

Batayan ng Muslim

Sa Paniniwala at Pagsamba



• ——— **Unang Baytang** ——— •

Dr. Yahya Salman AlBaheth



Batayan ng Muslim

Sa Paniniwala at Pagsamba

Dr. Yahya Salman AlBaheth

٢١٠ Yahya Salman Salim Albaheth ، 1442 ھ

فهرسة مكتبة الملك فهد الوطنية أثناء النشر

Yahya Salman Salim ، Albaheth
Batayan ng Mga Muslim (Muslim Basics in Belief and
Worship). / Yahya Salman Salim Albaheth

١٧٧ ص.؛ اسم

ردمك: ٩٧٨-٦٠٣-٠٣-٧٤٥٢-٦

١- Islam 2- Worship أ.العنوان

١٤٤٢/٦٥٤٤

ديوي ٢١٠

رقم الإيداع: ١٤٤٢/٦٥٤٤

ردمك: ٩٧٨-٦٠٣-٠٣-٧٤٥٢-٦

Pangalawang Edisyon

AH 1444

Nakalaan ang lahat ng mga karapatan sa may-akda

asasiyyat@gmail.com

0541708014



Asasiyyat

Inihanda ni:

Dr. Yahya Salman AlBaheth

Pagsusuri ng paksang kaalaman nila:

Ang Kagalang-galang na
**Sheikh Dr. Ahmed Abdulaziz
Al-Hamdan**

Dating Direktor ng Opisina ng
Da'wah at Patnubay sa Jeddah

Ang Kagalang-galang na
**Prof. Dr. Sheikh Ghazi Saeed
Al-Matrafi**

Propesor ng Fiqh sa Kolehiyo ng Shariah
Umm AL-Qura University sa Makkah

Tagapamahala ng proyekto	Ali bin Ahmed Al-Ajlani
Katulong sa Pananaliksik	Muhammad Mahdi Al-Subhi
Katulong sa Pananaliksik	Ismail David
Nagsalin sa Tagalog	Alim Amil
Tagasuri	Abdullah Lorenzo
Tagasuri	Yusuf Reyes
Tagasuri	Ahmad Peradilla
Dinisenyo at pinamamahalaan ng	Smart Corners Corporation

هذا الإصدار متاح للطباعة والنشر بأي وسيلة مع الالتزام بذكر المصدر وعدم إجراء أي تعديل على المحتوى

 Asasiyyat@gmail.com



+966-541708014



+966-501570911

بِسْمِ اللَّهِ الرَّحْمَنِ الرَّحِيمِ

Mula sa Qur'an

﴿ لَيْسَ الْبِرُّ أَنْ تُولُّوا وُجُوهَكُمْ قِبَلَ الْمَشْرِقِ وَالْمَغْرِبِ وَلَكِنَّ الْبِرَّ مَنْ آمَنَ بِاللَّهِ وَالْيَوْمِ الْآخِرِ وَالْمَلَائِكَةِ وَالْكِتَابِ وَالنَّبِيِّينَ وَآتَى الْمَالَ عَلَى حُبِّهِ ذَوِي الْقُرْبَىٰ وَالْيَتَامَىٰ وَالْمَسَاكِينَ وَابْنَ السَّبِيلِ وَالسَّائِلِينَ وَفِي الرِّقَابِ وَأَقَامَ الصَّلَاةَ وَآتَى الزَّكَاةَ وَالْمُوفُونَ بِعَهْدِهِمْ إِذَا عَاهَدُوا وَالصَّابِرِينَ فِي الْبَأْسَاءِ وَالضَّرَّاءِ وَحِينَ الْبَأْسِ أُولَئِكَ الَّذِينَ صَدَقُوا وَأُولَئِكَ هُمُ الْمُتَّقُونَ ﴾

Hindi kabutihan sa paningin ng Allâh ang ilingon ang inyong mga mukha sa silangan o sa kanluran sa tuwing magsa-Salâh. Subali't ang tunay na kabutihan ay ang gawain ng sinumang naniwala sa Allâh – na Siya lamang ang nararapat na sinasamba, bukod-tangi at walang katambal; at naniwala sa Araw ng Muling Pagkabuhay at Araw ng Paghuhukom, at naniwala sa lahat ng mga anghel, at sa lahat ng mga ipinahayag na mga Aklat, at sa lahat ng mga Propeta at Sugo nang walang pagtatangi, at nagbibigay ng kawanggawa kahit na ito ay labis pa niyang minamahal – sa mga kamag-anak at sa mga ulilang nangangailangan, at sa mga mahihirap na naghihikahos, at sa mga manlalakbay na nangangailangan ng panggastos dahil sa nalayo sila sa kanilang pamilya at kayamanan, at sa mga namamalimos dahil sa tindi ng pangangailangan, at paggasta sa pagpapalaya ng alipin at mga bihag; at taimtim na nagsasagawa ng Salâh, at nagbibigay ng obligadong kawanggawa (Zakâh), at yaong mga tumutupad sa kanilang pangako, at nagtitiis dahil sa kahirapan, karamdaman at gayundin sa mga matitinding labanan (sa Landas ng Allâh). Ang mga mayroong ganitong katangian o pag-uugali, sila ang matatapat sa kanilang paniniwala at sila ang natatakot sa kaparusahan ng Allâh, na kung kaya, iniawasan nila ang mga pagkakasala. ⁽¹⁾



(1) Surah Al-Baqarah 2:177

Mula sa Sunnah ng Propeta

Isinalaysay ni 'Umar bin Al-Khattab ؓ: Isang araw habang nakaupo kami kasama ang Sugo ng Allah ﷺ ay lumitaw sa harap namin ang isang tao na ang mga damit ay lubos na maputi at ang buhok ay labis na itim; walang mga tanda ng paglalakbay na makikita sa kanya at wala sa amin ang nakakakilala sa kanya. Lumakad siya at umupo sa tabi ng propeta ﷺ. Itinabi niya ang kanyang tuhod sa tabi ng tuhod ng propeta ﷺ, at inilagay ang palad ng kanyang mga kamay sa mga hita ng propeta ﷺ, at sinabi niya: "O Muhammad, sabihin mo sa akin ang tungkol sa Islam."

Ang Sugo ng Allah ﷺ ay nagsabi: "Ang Islam ay magpapatotoo na walang diyos maliban sa Allah lamang at si Muhammad ay ang sugo ng Allah, isagawa ang Salah, bayaran ang Zakah, mag-ayuno sa buwan ng Ramadan, at isagawa ang Hajj sa Bahay (Ka'bah, sa Makkah) kung may kakayahan."

Sinabi ng lalaki: "Tama ang sinabi mo," at nagulat kami sa kanya na nagtanong at nagsabing tama ang sinabi niya. Pagkatapos ay sinabi niya: "Sabihin mo sa akin ang tungkol sa Iman (pananampalataya)." Ang Propeta ﷺ ay nagsabi: "Ito ay maniwala sa Allah, sa Kanyang mga anghel, Kanyang mga Aklat, Kanyang mga Sugo, sa Huling Araw, at maniwala sa Al-Qadr (banal na kapalaran), mabuti at masama."

Sinabi ng lalaki: "Tama ang sinabi mo. Sabihin mo sa akin ang tungkol sa Ihsan (pagiging perpekto)." Ang Propeta ﷺ ay nagsabi: "Ito ay sambahin ang Allah na parang nakikita mo Siya, na datapwat hindi mo Siya nakikita ay tunay na nakikita ka Niya."

Sinabi ng lalaki: "Pagkatapos ay sabihin mo sa akin ang tungkol sa Oras (ng pagkagunaw ng mundo)." Ang Propeta ﷺ ay nagsabi: "Ang tinatanong tungkol dito ay hindi nakakaalam ng mas mahusay kaysa sa nagtatanong."

Sinabi ng lalaki: "Sabihin mo sa akin ang tungkol sa mga palatandaan nito." Ang Propeta ﷺ ay nagsabi: "Na ang aliping babae ay manganganak ng kanyang magiging amo na babae at makikita mo ang naka-paa, hubad, na taga-pastol ng kambing na nakikipag-paligsahan sa paggawa ng matataas na mga gusali."

Pagkatapos ay umalis ang lalaki at nanatili ako ng ilang sandali. Pagkatapos ay sinabi niya ﷺ: "O 'Umar, alam mo ba kung sino ang nagtanong?" Sinabi ko: "Ang Allah at ang Kanyang sugo ay higit na nakakaalam." Siya ﷺ ay nagsabi: "Siya si (Anghel) Jibreel (Gabriel), na pumarito upang ituro sa iyo ang iyong relihiyon."⁽¹⁾

(1) Iniulat sa Sahih Muslim

Pambungad

Ang lahat ng Papuri ay para lamang sa Allah ﷻ. Siya ang ating pinupuri at sa Kanya tayo humihingi ng tulong at sa Kanya tayo humihingi ng kapatawaran at nagbabalik loob tayo sa Kanya. Tayo ay nagpapakupkop sa Allah mula sa kasamaan ng ating mga sarili at sa kasamaan ng ating nagawa. Sinuman ang ginagabayan ng Allah ﷻ ay walang sinumang makapagligaw sa kanya, at sinuman ang Kanyang ililigaw ay walang sinumang makapag-gagabay sa kanya. Ako ay sumasaksi na walang tunay na diyos na karapatdapat sambahin maliban sa Allah ﷻ, Siya ay nag-iisa at walang katambal. Sa Kanya ang Kaharian at sa Kanya ang lahat ng Pagpupuri, at Siya ay may kapangyarihan sa lahat ng bagay. At ako ay sumasaksi na si Muhammad ﷺ ay Kanyang lingkod at Sugo. Isinugo siya ng Allah ﷻ na may gabay at dala ang tunay na Relihiyon upang kanyang ipahayag ang kabuuan ng relihiyong ito. Nawa'y sumakanya ang pinakamabuting pagpapala at kapayapaan, at sa kanyang mga pamilya at mga kasamahan.

Ang Islam ay *Deen* (Relihiyon) ng kaalaman, at ang pagsasaliksik ng kaalaman ay obligasyon ng bawat Muslim. Hindi magiging tama ang pagiging Muslim ng isang tao at hindi tatanggapin sa kanya ang kanyang mga gawain sa Islam kapag hindi mapapatunayan sa kanya ang pagiging *Ikhlas* (taos-puso, sinseridad) para lang sa Allah ﷻ at pagsunod sa Sunnah (pamamaraan) ni Propeta Muhammad ﷺ. Ang pagiging *Ikhlas* ay sa pamamagitan ng pagpapaganda ng *Niyyah* (intensiyon). Ang *It-tibaa* (pagsunod sa Propeta) ay hindi mangyayari maliban sa pamamagitan ng pananaliksik ng kaalaman at pag-unawa ng Deen, at ang pagsamba sa Allah ﷻ ay sa pamamagitan ng malinaw na gabay mula sa Aklat ng Allah (Qur'an) at Sunnah ng Kanyang Propeta ﷺ.

Dahil sa paglaganap ng kamalayan at sigasig ng karamihan ng mga Muslim na matutunan ang kanilang relihiyon, at sa pagyakap ng marami sa Islam, lumitaw ang matinding pangangailangan na magkaroon ng kumpletong sanggunian na magtuturo sa mga Muslim – kahit saan man sila naroroon – ng pinagmulan ng kanyang relihiyon sa '*Aqeedah* (tamang paniniwala), *Shari'ah* (mga batas) at paraan ng pamumuhay. Maraming mga sentro ng Islam at pang-edukasyon sa buong mundo ang nagsusumikap upang maghanda ng ilang mga polyeto at babasahin na napakahalaga upang ituro sa mga bagong yakap sa Islam ang mga prinsipyo ng Islam. Marami sa kanila ay pinahalagaan ang aspeto ng pangkaalaman, ngunit ang istrakturang pang-edukasyon at tamang pagtuturo ay hindi nakatanggap ng nararapat na pansin – ang mga alituntunin ng pamamaraan ng pagbibigay ng impormasyon o di kaya pagtuturo sa mag-aaral tungkol sa layunin ng kanyang pag-aaral, at pagbibigay ng mga pagsusulit upang malaman kung paano siya nakinabang mula sa kanyang pag-aaral.

Dahil dito, inilunsad ang proyekto bilang paghahanda ng kurikulum na ito ng kumpletong pangkaalaman, pang-edukasyon at tamang pagtuturo at ibinatay sa tanyag na **Hadith ni (anghel) Gabriel** ﷺ bilang tulong sa sinuman na nais umunawa sa relihiyon.

Sa konklusyon, ipinaabot namin ang aming taos-pusong pasasalamat at pagpapahalaga sa bawat nag-ambag sa tagumpay ng proyektong ito simula pa ng ito ay isang ideya pa lamang hanggang sa naging kumpletong kurikulum ng pag-aaral sa kapahintulutan ng Allah ﷻ. Hinihiling namin sa Allah ﷻ na tanggapin Niya sa atin ang gawain na ito at patawarin ang ating pagkukulang at pagkakamali. At pakiusap namin sa kung sinuman ang makakita ng anumang pagkakamali, may mga pagpuna at mga mungkahi ay ipaalam sa amin upang mapabuti ang aklat na ito sa hinaharap. At ang aming huling panalangin ay papuri sa Allah ﷻ ang Panginoon ng sanlibutan.



Dr. Yahya Salman AIBaheth

doctor_yahya@yahoo.com

Ang Katangian ng Kurikulum na ito

Ang lahat ng papuri at pasasalamat ay para sa Allah ﷻ lamang. Ang pinakamahusay na pananalita ay ang salita ng Allah ﷻ, at ang pinakamainam na gabay ay ang gabay ni Propeta Muhammad ﷺ, ang pagbabago sa relihiyon ay *Bid'ah* (maling pananampalataya) at bawat *Bid'ah* ay pagkaligaw, at bawat pagkaligaw ay sa impiyernong apoy. Katotohanan, dapat malaman ng isang Muslim na upang maging katanggap-tanggap ang mga mabubuting-gawa sa Islam ay dapat itong umayon sa dalawang kondisyon:

1. Ang gawain ay taos-puso na para sa Allah ﷻ lamang (Ikhlas).
2. Ang gawain ay batay sa gabay mula sa Qur'an at Sunnah ng Propeta Muhammad ﷺ

Ang unang kondisyon ay makakamit sa pamamagitan ng pag-aayos ng niyyah (layunin), tulad ng sinabi ng Propeta Muhammad ﷺ: *"Katotohanan, ang lahat ng mga gawain ay batay sa kung ano ang layunin, at makakamit ng bawat tao kung ano ang kanyang nilayan."*⁽¹⁾ Kaya ang unang bagay na dapat tandaan ng bawat Muslim ay pagsikapang isaayos ang kanyang layunin at gawin ang lahat ng kanyang mga gawain ng taos-pusong para sa Allah ﷻ lamang. Kabilang na rin ang kanyang pag-aaral o pagtuturo ng kurikulum na ito.

Ang pangalawang kondisyon ay makakamit sa pamamagitan ng pagsasaliksik ng Islamikong kaalaman, at ito ang layunin ng kurikulum na ito na maibigay sa mga mag-aaral. Kinakailangang mauna ang kaalaman bago ang gawain, sapagkat ang pananaliksik ng kaalaman ay obligasyon ng bawat Muslim, tulad ng sinabi ng Propeta Muhammad ﷺ: *"Ang pananaliksik ng kaalaman ay obligado sa bawat Muslim."*⁽²⁾

Ang nakikita ng ilang mga tao mula sa ibang mga Muslim na mga pag-uugali at pamamaraan na salungat sa katuruan ng Islam ay kadalasan dahil sa kamangmangan sa mga katuruan na ito, at kung minsan naman ay dahil na rin sa sadyang hindi ginagawa ng isang Muslim ang kanyang nalalaman, kung kaya ang kanyang kaalaman ay magiging katibayan laban sa kanya. Ang isang Muslim ay hindi laging binibigyan ng paumanhin sa kanyang kamangmangan.

Mula dito ay inaasahan namin na makakamit ng kurikulum na ito ang pangalawang kondisyon, at gamitin ng sinuman na nag-aaral nito ang kanyang natutunan sa kanyang buhay.

Wastong Paraan ng Pag-aaral (Hakbang-hakbang)

Marami sa mga Muslim ang gustong matuto, lalo na ang mga bagong Muslim. Ang sigasig ang nagtutulak sa kanila upang subukang malaman ang lahat sa maikling panahon, ngunit hindi nagtagal ang sigasig ay napalitan ng pagka-inip at pagkabigo, sapagkat hindi nila natutunan ang kanilang nais ng mabilis. Ito ay dahil ang pagkamit ng kaalaman ay nangangailangan ng pasensya, pagsisikap at panahon.

Kaya pinapayuhan ka namin na mag-aral ng marahan, unti-unti at hakbang-hakbang. Ang isang maliit ngunit tuloy-tuloy na gawain ay mas mahusay kaysa sa marami ngunit pansamantala lamang at walang natapos. Ang kurikulum na ito ay dinisenyo upang matuto nang unti-unti. Ang mga paksa ay binahagi sa tig-isang oras na aralin na maaaring pag-aralan nang unti-unti at sa panahon na aangkop sa iyong mga sitwasyon at kakayahan.

Ang pagkamit ng kaalaman sa Islam ay tuloy-tuloy at walang limitasyon sa edad, kung kaya ang isang Muslim ay naghahangad na magsasaliksik ng kaalaman hanggang sa huling sandali ng kanyang buhay.

(1) Isinalaysay ni Bukhari at Muslim

(2) Isinalaysay ni Ibn Majah at ito ay isang hassan Hadith

Ang mga Layunin ng Kurikulum na ito

Bihirang matagpuan ng mga nagsasaliksik ng kaalaman, lalong-lalo na sa mga bagong yakap sa Islam, ang isang kumpletong kurikulum na dinisenyo sa paraang pang-edukasyon na pinadali at nakakatulong sa kanya upang maunawaan at isabuhay ang mga katuruan ng kanyang relihiyon sa lahat ng aspeto ng kanyang buhay. Dahil dito ay may pangangailangan na magkaroon ng katulad ng aklat na ito na maaaring gamitin bilang isang kurikulum ng pag-aaral para sa mga regular na mag-aaral. At ang isang Muslim ay maaaring makinabang kahit mag-isa siyang nag-aaral, dahil ito ay dinisenyo sa paraan ng mga yunit ng pang-edukasyon at ilang naka-programa na pag-aaral.

Kaya inaasahan namin na ang kurikulum na ito ay kapaki-pakinabang para sa bawat Muslim – hindi lamang sa mga bagong yakap sa Islam – upang mapag-aralan kung ano ang dapat malaman ng isang Muslim tungkol sa mga bagay para sa kanyang relihiyon.

Ang mga sumusunod ay ang pinakamahalagang layunin na inaasahan na makamit ng kurikulum na ito:

1. Pagbibigay sa isang Muslim ng dapat niyang malaman tungkol sa kanyang relihiyon, batay sa mga tekstong pang-batas mula sa Qur'an at Sunnah at ayon sa pamamaraan ng mga *salafus-saalih* (naunang matutuwid na mga muslim) mula sa *ahlul-sunnah wal-jama'a* (angkan ng *Sunnah* at *Jama'ah*).
2. Pagtulong sa mga mag-aaral na makakuha ng kaalaman sa isang madali, organisado at paunti-unting paraan sa loob ng isang programang pang-edukasyon na nakabatay sa mga yunit ng pag-aaral.
3. Pagtutok sa pagpapaliwanag sa **Hadith ni (anghel) Gabriel** ﷺ tungkol sa mga haligi ng *Eeman* (paniniwala) at mga haligi ng Islam, na may detalyadong paliwanag ng tamang paraan sa pagsasagawa ng mga pagsamba tulad ng *Salah* (pagdarasal), *Zakah* (oblidagong kawang-gawa) at *Siyam* (pag-aayuno).
4. Ang pagbuo ng isang kurikulum sa edukasyon sa kapahintulutan ng Allah. Maaari itong ituro sa iba't ibang pamamaraan: sa loob ng isang regular na klase, o sa pamamagitan ng pag-aaral ng sarili, o pag-aaral ng magkahiwalay ("*distant learning*").
5. Pagpapakilala sa mag-aaral – lalo na sa mga hindi nakapagsasalita ng Arabe – ng mga termino ng Islam sa unti-unting paraan tulad ng *Salah*, *Ruku'*, *Sujood* at iba pa, at sana'y gamitin niya ito upang maiwasan ang paggamit ng dayuhang bokabularyo na may halos katumbas na kahulugan.



Paano Makikinabang sa Kurikulum na ito?

Pakikinabangan mo ang kurikulum na ito nasaan ka man sa mundo sa kapahintulutan ng Allah ﷻ, may nagtuturo man sa iyo o umaasa lamang sa sariling pag-aaral. Ito ay dinisenyo sa isang simpleng paraan ng pang-edukasyon, na may pangako na magbibigay ng ligal na nilalaman na nagmula sa Qur'an at sa Sunnah at batay sa *Daleel* (evidensya).

Inirerekomenda namin na simulan mong pag-aralan itong pambungad na kabanata ng kurikulum na ito, na makakatulong sa iyo na bumuo ng isang plano na naaangkop sa iyong kalagayan. Sa pamamagitan nito ay malalaman mo ang mga tampok, mga katangian, at mga layunin ng kurikulum na ito. Pati na rin ang mga paksa ng pang-kaalaman na nilalaman nito. Maaari mo ring piliin ang na-aangkop na pamamaraan na magagamit mo upang pag-aralan ito.

Ang pinakamahasay na paraan ng pag-aaral ay sa pamamagitan ng isang guro na tiwala ka sa kanyang kaalaman na magtuturo at gagabay sa iyo. Ngunit kung hindi ito posible ay maaari kang mag-aral sa sarili mo lamang.

Ang pag-aaral ng '*Aqeedah* – ito ang mga aralin ng *Tawheed* – ay nangangailangan ng maingat na pag-aaral at tamang pag-uunawa kung kaya binibigyang diin namin ang kahalagahan ng pag-aaral nito sa pamamagitan ng isang guro na pinagkakatiwalaan sa kanyang kaalaman, *Deen* at pamamaraan. Hindi sapat ang umasa sa pagbabasa at pag-aaral sa sarili lamang. Gayundin ang pag-aaral ng Banal na Qur'an at mga *Thikr* ng Salah; kailangan ang isang guro na magtuturo ng tamang pagbigkas.

Ang pagkakaiba ng kurikulum na ito ay ang kakayahang lumipat sa anumang paksa kung kinakailangan malaman agad ang tungkol dito. Halimbawa: Kung ikaw ay nasa bisperas ng buwan ng *Ramadhan*, maaari kang lumipat sa paksa ng pag-aayuno upang malaman mo ang mga alituntunin ng pag-aayuno at lahat ng tungkol sa mabiyayang buwan ng *Ramadhan*. Gayon din kapag may balak kang magsagawa ng *Haji*, maaari mong pag-aralan ang lahat ng tungkol sa *Haji*, at iba pa. Kaya pinapayuhan ka namin na tingnan ang listahan ng mga paksa, gayundin ang mga talaan ng mga nilalaman para sa bawat Aralin.

Pag-aaral ng Wikang Arabe

Ang Arabe ang wika ng Banal na Qur'an, at dahil dito ay dapat maging masigasig ang isang Muslim na pag-aralan ito. At kung mahirap ito para sa kanya, kung gayon, kahit papaano ay matuto man lang na magbasa upang mabigkas niya ang Banal na Qur'an.

Maraming mga programa kung saan maaari mong mapag-aralan ang salitang Arabe. Hinihiling namin sa Allah na Makapangyarihan sa lahat na ang kurikulum na ito ay makakatulong sa iyo sa pag-aaral ng mga prinsipyo ng wikang Arabe. Ngunit subukang gawin ang pag-aaral ng Wika ng Qur'an na isang layunin na hinahangad mo sa iyong buhay.

Mga Nakaraang Aralin na Kinakailangan

Sa umpisa ng bawat aralin ay ipinapakita ang mga nakaraang aralin na dapat pag-aralan at kumpletuhin ng mag-aaral bago simulan ito. Ito ay dahil ang ilang mga aralin ay batay sa nauna nang pinag-aralan, at ang nais na benepisyo ay makakamit lamang sa pamamagitan ng pagsunod sa mga tagubilin ito. Halimbawa, ang tao ay hindi maaaring matutong mag-Salah bago malaman ang kalinisan at pagsasagawa ng *Wudhu*, at iba pa.

Ito ay ipinapakita dahil ang isang nag-aaral ng sarili ay maaaring mag-aral ng anumang yunit o paksa, kaya dapat siyang bigyan ng babala na ang ilang mga Aralin ay kailangan din niyang mapag-aralan at iugnay dito.

Mga kaakibat na aralin

Sa simula ng bawat aralin ay may ilang mga aralin na pinili bilang mahusay na pag-aaralan sa parehong panahon dahil sa kanilang malapit na ugnayan, at dahil ang bawat isa sa mga aralin na ito ay kumukumpleto sa bawat isa.

Mga Layunin ng Aralin

Ang bawat aralin ay may mga layunin na itinakda sa simula. Ang mga ito ay praktikal na mga layunin, upang malaman ng guro at mag-aaral ang mga hinahangad nilang makamit bago magsimula ang aralin.

Mga Bahagi ng Aralin

Ang bawat aralin ay nahahati sa mga sumusunod:

- Mga Nilalaman ng Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino



Talaan ng mga Aralin at oras ng mga yunit ng aklat

	Mga paksa	Mga Aralin	Oras
1	Pambungad	1	1
2	Yunit ng A qeedah (Pananampalataya)	3	3
3	Yunit ng T ahaarah (Kalinisan)	3	3
4	Yunit ng S alaah (Pagdarasal)	4	4
5	Yunit ng mga A thkaarus- S alaah (Binibigkas sa S alaah)	3	3
6	Yunit ng Z akaah (Obligadong Kawanggawa)	2	2
7	Yunit ng S iyam (Pag-aayuno)	2	2
8	Yunit ng H ajj at 'U mrah	2	2
9	Yunit ng Buhay ng isang Muslim	1	1
	Kabuuan	21	21

لا إله إلا الله محمد رسول الله

لَا إِلَهَ إِلَّا اللَّهُ مُحَمَّدٌ رَسُولُ اللَّهِ

"Kaya't alamin (O Muhammad) na walang may karapatang sambahin maliban sa Allaah, at humingi ng kapatawaran para sa iyong kasalanan." ⁽¹⁾

Yunit ng Aqeedah (Pananamपालतaya)



(1) Surah Muhammad 47:19)

Talaan ng mga Nilalaman

Pahina	Mga Paksa
14	Unang Aralin – Ang <i>Tawheed Ar-Rubboobiyah</i> (Ang Allah ﷻ Ang Nag-iisang Tunay na Panginoon)
15	Ang Kahalagahan na maintindihan ang kahulugan ng <i>Tawheed</i>
15	Ang kahulugan ng <i>Tawheed</i>
16	Una: <i>Tawheed Ar-Rubboobiyah</i>
18	Nakasulat na Pagsasanay
19	Mga Bagong Salita at Termino
20	Pangalawang Aralin - Ang <i>Tawheed Al-'Uloohiyah</i> at ang <i>Tawheed Al-Asmaa was-Sifat</i>
21	Pangalawa: <i>Tawheed Al-'Uloohiya</i> (Kaisahan ng Allah sa Pagsamba sa Kanya), at tinatawag din ito na <i>Tawheed Al-'Ibadah</i> (Kaisahan sa Pagsamba)
23	Pangatlo: <i>Tawheed Al-Asma Was-Sifat</i> (Kaisahan ng Allah sa Kanyang mga Pangalan at Katangian)
25	Nakasulat na Pagsasanay
26	Mga Bagong Salita at Termino
28	Pangatlong Aralin: Ang dalawang Shahadah (pagsaksi)
29	Ang kahulugan ng Shahadah " <i>La ilaha illal-lah</i> "
29	Ang kahulugan ng Shahadah " <i>Anna Muhammadan Rasoolullah</i> "
30	Ang mga kondisyon ng Shahadah " <i>La ilaha illal-lah</i> "
31	Ang nagpapawalang-bisa sa dalawang Shahadah
32	Nakasulat na Pagsasanay
33	Mga Bagong Salita at Termino

Unang Aralin

Tawheed Ar-Rubboobiyah (Ang Allah ang Nag-iisang Tunay na Panginoon)

Itatagal:



Isang Oras



● Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Maipapaliwanag mo ang kahulugan ng Tawheed sa salita at sa Islamikong pananaw.
- Pag-usapan ang kahalagahan ng Tawheed.
- Maintindihan ang tatlong uri ng Tawheed.
- Maintindihan ang kahulugan ng Tawheed Ar-Ruboobiyah (Ang Allah ang Nag-iisang Tunay na Panginoon)



● Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino

● Kinakailangang napag-aralan na:

- Repasuhin ang unang pambungad

Ang Kahalagahan na Maintindihan ang kahulugan ng Tawheed (Kaisahan ng Allah)

Itinayo ang Islam sa limang haligi. Una, ang dalawang *Shahadah* (“*Ash-hadu an la ilaha illallah, wa ash-hadu anna Muhammadan rasoolullah*”) bilang larawan ng salitang Tawheed at pundasyon ng Islamikong ‘*Aqeedah*. Ang iba pang mga haligi ay:

- ✦ *Salah* (Pagdarasal),
- ✦ *Zakah* (Obligadong Kawanggawa),
- ✦ *Siyam* (Pag-aayuno) sa buwan ng *Ramadhan*,
- ✦ at ang *Hajj* sa tahanan ng Allah.

Ang unang haligi ang magdadala sa tao mula sa kawalang-pananampalataya (*kufr*) tungo sa may-pananampalataya (*Eeman*), at mula sa pagtatambal (*shirk*) tungo sa pagsuko sa kaisahan ng Allah ﷻ (*Islam*). Ito ang unang haligi ng *Eeman*. Hindi magiging Muslim ang isang tao kapag hindi niya naiintindihan ang katotohanan ng Tawheed na sumasakop sa unang haligi; ito ang paniniwala sa kaisahan ng Allah ﷻ at gagawin niya ang lahat ng katuruan nito.

Halimbawa: Hindi makikinabang sa unang haligi na ito ang isang hindi Muslim at hindi naniniwala, at hindi rin tatanggapin sa kanya ang pagsasagawa niya sa ibang mga haligi. Hindi tatanggapin sa kanya ang *Salah*, *Zakah*, *Siyam*, at iba pang mga mabubuting gawain. Ganoon din ang isang Muslim na hindi naniniwala sa idinudulot ng salitang Tawheed (*kalimat Tawheed*), hindi nakakaintindi ng kahulugan nito, at hindi ginagawa ang mga katuruan nito, dahil tunay na siya ay lumabas na sa nasasakupan ng Islam, kaya hindi niya mapapakinabangan ang pagsasagawa ng naiwan pang mga haligi ng Islam. Ito ang dahilan kung bakit sisimulan nating pag-aralan ang paksang Tawheed.

Ang kahulugan ng Tawheed

Ang Tawheed sa salitang Arabe: Ang salitang Tawheed ay nagmula sa salitang “*Wahhada*”, na ang ibig-sabihin ay pinag-iisa ang isang bagay, at hindi na tumatanggap ng bilang at ituturing lamang ito na isa (walang katambal at walang katulad). Ang mahalaga ay ang kahulugan nito ayon sa Islamikong salita, kaalaman at kultura ng Islam.

Ang Tawheed sa Islamikong salita: Ito ay paniniwala sa kaisahan ng Allah ﷻ sa pagsamba sa Kanya. Sinabi ng Allah ﷻ:

﴿ وَمَا أُمِرُوا إِلَّا لِيَعْبُدُوا اللَّهَ مُخْلِصِينَ لَهُ الدِّينَ حُنَفَاءَ وَيُقِيمُوا الصَّلَاةَ وَيُؤْتُوا الزَّكَاةَ وَذَلِكَ دِينُ الْقَيِّمَةِ ﴾

“At walang ipinag-utos sa kanila kundi sambahin lamang ang Allah na bukod-tangi, na ang kanilang hangarin sa pagsamba ay makatagpo nila ang Allah, na lumayo sila sa pagtatambal patungo sa tamang paniniwala, at isagawa ang *Salah*, at magbigay ng *Zakah*, ito ang matuwid na Deen (Relihiyon)”. ⁽¹⁾

Ang karamihang pinag-uusapan sa Banal na Qur’an ay tungkol sa Tawheed at kung ano ang maidudulot nito na mga gantimpala o kaparusahan bunga ng pagsunod o pagsuway. Ipinaliwanag ng mga ‘*Ulama* (paham) ang kahulugan ng Tawheed sa pamamagitan ng pagbaha-bahagi nito sa tatlo:

1. **Tawheed Ar-Rubboobiyah:** Ito ay paniniwala sa kaisahan ng Allah ﷻ sa lahat ng Kanyang ginagawa, tulad ng nag-iisang Tagapaglikha, nag-iisang nagbibigay ng biyaya, nag-iisang makapangyarihang Hari, at nag-iisang Tagapangalaga sa lahat ng Kanyang nilikha.

(1) Surah Al-Bayyinah 98 : 5

2. **Tawheed Al-Uloohiyah:** Tinatawag din itong **Tawheed Al-Ibadah** na ang tinutukoy dito ay paniniwala sa kaisahan ng Allah ﷻ sa lahat ng uri ng pagsamba, dahil Siya ang tunay na Panginoon na may karapatang sambahin. Kaya hindi maaring ilihis ang kahit anong uri ng Ibadah sa iba maliban sa Kanya, o magtatambal sa Kanya.
3. **Tawheed Al-Asmaa was-Sifaat:** Ito ay paniniwala sa kaisahan ng Allah ﷻ sa Kanyang mga magagandang pangalan at mga dakilang katangian na nakalagay sa Banal na Qur'an at sa *Hadith* ng Propeta ﷺ na hindi maaaring itanggi (*Ta'teel*), o ipaliwanag kung paano (*Takyeef*), o ihalintulad sa mga nilikha (*Tamtheel*), o baguhin ang kahulugan (*Tahreef*).

Una: Ang **Tawheed Al-Rubboobiyah** (Ang Allah Ang Nag-iisang Tunay na Panginoon)

Ito ay paniniwala na ang Allah ﷻ lamang ang nag-iisang Tagapaglikha. Walang sinuman na Tagapaglikha maliban sa Kanya. Siya lamang ang **Rabb** (panginoon), ang nag-iisang Tagapaglikha, ang Nagmamay-ari at Tagapamahala sa lahat ng pangangailangan ng Kanyang nilikha. Ang Allah ﷻ ang **Rabb** ng *'aalamin* (lahat ng daigdig). Siya ang lumikha sa mga nilikha at nagbibigay sa kanila ng biyaya, nag-aaruga sa lahat ng kanilang pangangailangan, at Siya ang nagpapasya sa Kanyang mga nilikha sa anumang Kanyang naisin. Sinabi ng Allah ﷻ:

﴿ إِنَّ رَبَّكُمْ اللَّهُ الَّذِي خَلَقَ السَّمَوَاتِ وَالْأَرْضَ فِي سِتَّةِ أَيَّامٍ ثُمَّ اسْتَوَىٰ عَلَى الْعَرْشِ يُعْشَىٰ اللَّيْلَ أَلَمْ يَطَّلِبْهُ خَيْثُمَا وَالشَّمْسِ وَالْقَمَرِ وَالنُّجُومِ مُسَخَّرَاتٍ بِأَمْرِهِ ۗ أَلَا لَهُ الْخَلْقُ وَالْأَمْرُ تَبَارَكَ اللَّهُ رَبُّ الْعَالَمِينَ ﴾

"Katiyakan, ang inyong Rabb ay ang Allah na Siyang lumikha ng mga kalangitan at ng kalupaan sa loob ng anim na araw, pagkatapos Siya ay pumaroon sa taas ng Kanyang trono. Ipinapasok Niya ang gabi sa araw, na tuwing darating ang gabi ay aalis ang araw at tuwing darating ang araw ay aalis ang gabi. Ang araw at ang buwan at ang mga bituin ay ipinapasailalim Niya sa Kanyang pag-aatas. Siya lamang ang bukod-tanging Lumikha ng lahat at gayundin ang lahat ng pag-aatas. Luwalhati sa Allah ang Rabb ng lahat ng nilalang". ⁽¹⁾

Sinabi ng Allah ﷻ:

﴿ اللَّهُ خَلِقُ كُلِّ شَيْءٍ ۖ وَهُوَ عَلَىٰ كُلِّ شَيْءٍ وَكِيلٌ ﴾

"Ang Allah ang Tagapaglikha ng lahat ng bagay, at lahat ng bagay ay Siya ang Tagapangalaga". ⁽²⁾

Sinabi ng Allah:

﴿ ذَلِكُمْ اللَّهُ رَبُّكُمْ لَا إِلَهَ إِلَّا هُوَ ۖ خَلِقُ كُلِّ شَيْءٍ ۖ فَاعْبُدُوهُ ۚ وَهُوَ عَلَىٰ كُلِّ شَيْءٍ وَكِيلٌ ﴾

"Ganito ang Allah na inyong Rabb, walang sinumang Ilah (diyos) na dapat sambahin maliban sa Kanya, nilikha Niya ang lahat ng bagay, kung gayon sambahin ninyo Siya. Siya ang Tagapangalaga sa lahat ng bagay". ⁽³⁾

Kasama sa **Tawheed Al-Rubboobiyah** ang paniniwala na ang Allah ﷻ ang tunay na nagbibigay ng biyaya sa lahat ng Kanyang mga nilikha. Sinabi ng Allah ﷻ:

﴿ وَمَا مِنْ دَابَّةٍ فِي الْأَرْضِ إِلَّا عَلَىٰ اللَّهِ رِزْقُهَا وَيَعْلَمُ مُسْتَقَرَّهَا وَمُسْتَوْدَعَهَا كُلٌّ فِي كِتَابٍ مُبِينٍ ﴾

(1) Surah Al-Araf : 54

(2) Surah Az-Zumar 39 : 62

(3) Surah Al-An'aam 6 : 102

Katiyakan, ginarantiyahan ng Allah ang kabuhatan ng lahat ng mga gumagapang sa ibabaw ng kalupaan, at batid Niya kung saan ito maninirahan sa tanang buhay nito at saan ito patutungo pagkatapos nitong mamatay, at batid Niya kung saang lugar ito mamamatay. Ang lahat ng ito ay naitala sa Aklat sa malinaw na talaan ng Allah.”⁽¹⁾

Kasama rin ang paniniwala na katiyakan ang Allah ﷻ ang Tunay na Hari (*Malik*) ng lahat, at Siya ang Tagapangasiwa sa lahat ng kailangan ng Kanyang mga nilikha. Siya ang nagbibigay ng kapangyarihan at Siya rin ang nagtatanggal nito. Siya ang nagpapataas ng kalagayan at Siya rin ang nagpapababa nito. Siya ang nagbibigay ng buhay at kamatayan. Siya ang nagpapalit-palit ng gabi at araw. Sinabi ng Allah ﷻ:

﴿ قُلِ اللَّهُمَّ مَلِكُ الْمَلِكِ نُورِي الْمَلِكِ مَنْ تَشَاءُ وَتَنْزِعُ الْمَلِكِ مِمَّنْ تَشَاءُ وَتُعِزُّ مَنْ تَشَاءُ وَتُذِلُّ مَنْ تَشَاءُ بِيَدِكَ الْخَيْرُ إِنَّكَ عَلَىٰ كُلِّ شَيْءٍ قَدِيرٌ , تُوَلِّجُ اللَّيْلَ فِي النَّهَارِ وَتُوَلِّجُ النَّهَارَ فِي اللَّيْلِ وَتُخْرِجُ الْحَيَّ مِنَ الْمَمَاتِ وَتُخْرِجُ الْمَمَاتِ مِنَ الْحَيِّ وَتَرزُقُ مَنْ تَشَاءُ بِغَيْرِ حِسَابٍ ﴾

“Sabihin mo [O Muhammad], O Allah na nagtataglay ng lahat ng kaharian, Ikaw ang tanging nagkakaloob ng kaharian sa sinuman na lyong nais mula sa lyong nilikha, at kinukuha Mo ang kaharian sa sinuman na lyong nais, at pinagkalooban Mo ng kapangyarihan ang sinuman na lyong nais, at hinahamak Mo ang sinuman na lyong nais. Nasa lyong kamay ang kabutihan. Katiyakan Ikaw ang walang hanggan at ganap na Makapangyarihan. Ipinapasok Mo ang gabi sa araw at ang araw ay ipinapasok Mo sa gabi. At inilalabas Mo ang may-buhay mula sa patay, at inilalabas Mo ang isang patay mula sa may-buhay, at nagkakaloob Ka ng kabuhatan sa sinuman na lyong nais mula sa lyong nilikha (nang walang hangganan).”⁽²⁾

Ang lahat ng pangyayari sa daigdig na ito ay batid ng Allah ﷻ at mula sa Kanyang kaphahintulutan. Ngunit ang ginagawa ng ibang mga tao ay taliwas sa uri ng *Tawheed* na ito, tulad ng paglalagay ng mga bagay na inaakala nilang magbibigay sa kanila ng suwerte o mag-aalis sa kanila ng malas o masama, tulad ng mga *Tama'im* (agimat). Ito ang naghahatak sa kanila patungong *Shirk* (pagtatambal). Ang uri ng *Tawheed* na ito ay likas na pinaniniwalaan ng lahat ng mga tao at walang tumututol dito maliban sa isang taong nagmamayabang sa kanyang sarili samantalang alam niya na tiyak na walang Tagapaglikha at nagbibigay ng kabuhatan maliban sa Allah ﷻ, tulad ng sinabi ng Allah ﷻ tungkol sa mga *mushrikoon* sa panahon ng Propeta.

﴿ قُلْ مَنْ رَبُّ السَّمَوَاتِ السَّبْعِ وَرَبُّ الْعَرْشِ الْعَظِيمِ , سَيَقُولُونَ لِلَّهِ قُلْ أَفَلَا تَتَّقُونَ , قُلْ مَنْ يَدِينُهُ مَلَكَوتِ كُلِّ شَيْءٍ وَهُوَ يُحْيِيهِ وَلَا يُحْيِيهِ وَلَا يُجَارُ عَلَيْهِ إِنْ كُنْتُمْ تَعْلَمُونَ , سَيَقُولُونَ لِلَّهِ قُلْ فَأَنَّى تُسْحَرُونَ ﴾

Sabihin mo sa kanila: Sino ang Rabb ng mga pitong kalangitan, at ang Rabb ng Dakilang Arsh. Sasabihin nila: Ang Allah. Kung gayon sasabihin mo sa kanila: “Hindi ba kayo natatakot sa Kanyang kaparusahan”? Sabihin mo sa kanila: “Nasa kaninong kamay ang pagmamay-ari ng lahat ng bagay? Siya ang tagapagtanggol ng sinumang humihingi ng kalinga, at walang magiging tagapagtanggol ang sinumang nais Niyang wasakin, kung ito ay batid lamang ninyo”? Sasabihin nila, “ang Allah”. Sabihin mo sa kanila: “Kung gayon, paano kayo nawala sa sarili ninyong katinuan?”⁽³⁾

Ang pagtanggap ng tao sa *Tawheed Ar-Rubboobiyah* ay hindi nangangahulugan na nakapasok na siya sa loob ng *Eeman* at *Islam*, dahil hindi magiging ganap ang paniniwala maliban na lamang kung paniniwalaan din ang *Tawheed Al-Uloohiyah*, na ang ibig sabihin ay paniniwala sa kaisahan ng Allah ﷻ sa pagsamba sa Kanya.

(1) Surah Hud : 6

(2) Surah Ali 'Imran 3 : 26-27

(3) Surah Mu'minoon 23 : 86-89



Nakasulat na Pagsasanay

T1. Buuin ang mga sumusunod:

A. Ano ang kahulugan ng *Tawheed* sa salita?

.....

B. Ano ang kahulugan ng *Tawheed* sa salitang Islamiko?

.....

.....

C. Ang mga uri ng *Tawheed* ay:

1.

2.

3.

D. Ang *Tawheed Ar-Rubboobiyah* ay:

.....

.....

T2. Ano ang kahalagahan na maintindihan ang *Tawheed*?

.....

.....

.....

T3. Maituturing bang isang Muslim ang sinumang tatanggap ng *Tawheed Ar-Rubboobiya*?

.....

T4. Magbigay ng halimbawa sa gawain o paniniwalang salungat sa *Tawheed Ar-Rubboobiyah*:

.....

.....

.....

Mga Bagong Salita at Termino

Nu.	Arabiko	Pagkasulat	Kahulugan
1	الله	Allaah	Ang personal na pangalan ng panginoong diyos na tagapaglikha ng lahat.
2	رب	Rabb	Panginoon
3	إله	ilah	Diyos
4	واحد	Waa <u>h</u> id	Isa
5	توحيد	Taw <u>h</u> eed	Paniniwala sa kaisahan ng Allaah.
6	إسلام	Islaam	Ang relihiyon ng pagsuko at pagsunod sa kalooban ng diyos na tagapaglikha.
7	إيمان	Eeman	Paniniwala (<i>faith</i>)
8	كفر	Kufr	Hindi paniniwala (<i>disbelief</i>)
9	شرك	Shirk	Pagtatambal
10	عقيدة	'Aqeedah	Paniniwala. Tumutukoy ito sa mga bagay na pinaniniwalaan na may katiyakan at pananalig sa puso at kaluluwa ng isang tao, na walang anumang pag-aalinlangan.

Pangalawang Aralin

Ang Tawheed Al-'Uloohiyah at ang Tawheed Al-Asmaa was-Sifaat

Itatagal:



Isang Oras



● Mga Layunin:

Sa pagtatapos ng araling ito, magkakaroon ka ng kakayahan sa kaphintulutan ng Allah ﷻ na:

- Maipapaliwanag ang *Tawheed Al-'Uloohiyah* (*Tawheed Al-'Ibaadah*).
- Maipapaliwanag ang *Tawheed Al-Asmaa was-Sifaat*.
- Malalaman mo ang pagkaiba ng *Tawheed Al-'Uloohiyah* at *Tawheed Al-Asmaa was-Sifaat*.



● Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino

● Kinakailangang napag-aralan na:

- Ang unang aralin sa yunit ng 'Aqeedah

Pangalawa: Tawheed Al-'Uloohiya (Kaisahan ng Allah sa Pagsamba sa Kanya)

Tinatawag din ito na Tawheed Al-'Ibaadah (Kaisahan sa Pagsamba)

Ang *Al-'Uloohiyah* ay mula sa salitang "*ilah*" na ang ibig sabihin ay ang Diyos na tinatanggap ng mga puso na may pagmamahal at pagsamba. Ang Allah ﷻ ang tunay na *ilah* (Diyos) na may karapatan ng katangian ng pagka-diyos. Kaya Siya lamang ang may karapatang sambahin, at walang diyos maliban sa Kanya na maaring sambahin. Ang *Tawheed Al-'Uloohiyah* ay paniniwala sa kaisahan ng Allah ﷻ sa pagsamba sa Kanya, kung kaya hindi maaaring ibaling sa iba ang kahit anong uri ng pagsamba maliban sa Kanya, kahit pa siya ay malapit sa Allah ﷻ tulad ng mga anghel, sugong Propeta, mabuting tao, mga bagay na nilikha o mga rebulto. Ito ang ibig sabihin ng salitang *Tawheed* (*Laa ilaaha illallaah*), walang may karapatang sambahin maliban sa Allah ﷻ. Ito ang uri ng *Tawheed* na naging dahilan kung kaya isinugo ang lahat ng mga Sugo. Sinabi ng Allah:

﴿وَلَقَدْ بَعَثْنَا فِي كُلِّ أُمَّةٍ رَسُولًا أَنِ اعْبُدُوا اللَّهَ وَاجْتَنِبُوا الطَّاغُوتَ﴾

"At katiyakan, nagpadala Kami sa bawat sambayanan na mga nauna, ng Sugo na nag-uutos sa kanila ng pagsamba sa Allah, at pag-iwas sa pagsamba ng iba bukod sa Kanya, tulad ng mga shaytan, mga rebulto at mga patay at anumang sinasandalan ng sinuman bukod sa Allah".⁽¹⁾

At ito rin ang uri ng *Tawheed* na tinanggihan ng mga *mushrikoon* sa panahon ng Propeta Muhammad ﷺ samantalang tinanggap nila ang *Tawheed Al-Rubboobiyah*. Katotohanan, tinatanggap ng mga *mushrikoon* ang Allah ﷻ ang Siyang Tagpaglikha ng lahat ng bagay, tulad ng sinabi ng Allah ﷻ:

﴿وَلَيْن سَأَلْتَهُمْ مَنْ خَلَقَهُمْ لَيَقُولُنَّ اللَّهُ فَأَنَّى يُؤْفَكُونَ﴾

At kapag tinanong mo O Muhammad, sila na sumasamba ng iba bukod sa Allah, kung sino ang lumikha sa kanila? Walang pag-aalinlangang kanilang sasabihin: Ang Allah ang Siyang lumikha sa amin. Kung gayon, paano sila bumabaligtad at tumatalikod sa pagsamba sa Allah."⁽²⁾

﴿وَلَيْن سَأَلْتَهُمْ مَنْ نَزَّلَ مِنَ السَّمَاءِ مَاءً فَأَحْيَا بِهِ الْأَرْضَ مِنْ بَعْدِ مَوْتِهَا لَيَقُولُنَّ اللَّهُ قُلِ الْحَمْدُ لِلَّهِ بَلْ أَكْثَرُهُمْ لَا يَعْقِلُونَ﴾

At kapag tinanong mo, O Muhammad, ang mga walang pananampalataya; "Sino ang nagpababa mula sa ulap ng tubig-ulan na naging sanhi ng pagsibol ng mga pananim sa kalupaan pagkatapos nitong maging tuyot? Katiyakan, sasabihin nila sa iyo: Ang Allah ang nag-iisang nagpababa nito. Sabihin mo, ang lahat ng papuri ay sa Allah lamang, subalit ang karamihan sa kanila ay hindi nakaiintindi kung ano ang nakabubuti at nakasama sa kanila".⁽³⁾

(1) Surah An-Nahl 16 : 36

(2) Surah Al-Zukhruf 43 : 87

(3) Surah Al-Ankabut 29 : 63

Tinatanggap ng mga *mushrikoon* sa panahon ng Propeta ﷺ ang pagka-*Rabb* ng Allah ﷻ, na Siya ang Tagapaglikha ng lahat at Siya ang nagbibigay ng biyaya. Ngunit tinanggihan nilang bigkasin ang Salitang *Tawheed* dahil batid nila na ang ibig sabihin nito ay paniniwala sa pagka-diyos ng Allah ﷻ na nag-iisa at Siya lamang ang dapat sambahin, at pagtakwil sa lahat ng mga huwad na diyos at mga rebulto na inaalayan nila ng lahat ng uri ng pagsamba.

Ang pagsamba sa Islam ay maraming kahulugan bukod pa sa pagsasagawa ng mga hayagang uri ng pagsamba – dahil sa kahalagahan nito - tulad ng *Salah* at *Sawm* (pag-aayuno). Sakop rin ang mga uri ng pagsamba na nasa puso ng tao tulad ng pagmamahal (*Al-hubb*), pagtitiwala sa Allah ﷻ (*Tawakkul*), pagkatakot sa Allah ﷻ (*Al-khawf*), at pagkasindak (*Al-khashyah*). Ang lahat ng mga ito ay dapat ituon lamang sa Allah ﷻ na nag-iisa. Tulad ng sinabi ng Allah ﷻ:

﴿ وَمِنَ النَّاسِ مَن يَتَّخِذُ مِن دُونِ اللَّهِ أَندَادًا يُحِبُّونَهُمْ كَحُبِّ اللَّهِ وَالَّذِينَ آمَنُوا أَشَدَّ حُبًّا لَّهِ وَلَوْ يَرَى الَّذِينَ ظَلَمُوا إِذْ يَرُونَ الْعَذَابَ أَنَّ الْقُوَّةَ لِلَّهِ جَمِيعًا وَأَنَّ اللَّهَ شَدِيدُ الْعَذَابِ ﴾

“At mayroong grupo ng mga taong nagsasagawa ng pagsamba sa iba bukod sa Allah. Ito ay kanilang itinatambal sa Allah, minamahal nila tulad ng pagmamahal sa Allah. Ngunit ang mga mananampalataya ay mas higit ang ginawang pagmamahal sa Allah. Kung makikita lamang ng mga taong ito na dinadaya lamang nila ang kanilang sarili, sa oras na ihaharap na sa kanila ang kaparusahan sa Kabilang Buhay, mapatunayan nila na ang Allah lamang ang Makapangyarihan sa lahat at matindi ang Kanyang parusa.”⁽¹⁾

Sinabi rin ng Allah ﷻ:

﴿ أَتَخْشَوْنَهُمْ فَاللَّهُ أَحَقُّ أَنْ تَخْشَوْهُ إِنْ كُنْتُمْ مُؤْمِنِينَ ﴾

“.. Natatakot ba kayo sa kanila o sa pakikiharap sa kanila sa labanan? Subali’t ang Allah ang nararapat ninyong katakutan kung kayo ay tunay na naniniwala”.⁽²⁾

(1) Surah Al-Baqarah 2 : 165
(2) Surah Al-Tawbah 9 : 13

Pangatlo: Tawheed Al-Asma was-Sifat (Kaisahan ng Allah sa Kanyang mga Pangalan at Katangian)

May mga magagandang pangalan at matataas na katangian ang Allah ﷻ. Ang mga pangalan at katangian na ito ay ganap at sa Kanya lamang maaaring gamitin. Sinabi ng Allah ﷻ:

﴿اللَّهُ لَا إِلَهَ إِلَّا هُوَ لَهُ الْأَسْمَاءُ الْحُسْنَىٰ﴾

“Ang Allah, walang sinumang diyos na dapat sambahin maliban sa Kanya, Siya ang nagmamay-ari ng Mabuting mga Pangalan”.⁽¹⁾

Ang **Tawheed Al-Asma was-Sifat**: ay paniniwala sa lahat na ibinigay ng Allah ﷻ sa Kanyang Sarili na mga Pangalan at mga Katangian na nababagay sa Kanyang Kadakilaan mula sa Banal na Qur'an, at inihayag ng Propeta ﷺ sa kanyang Sunnah, at pagpapanatili ng mga pangalan at mga katangian na nababagay sa Kadakilaan ng Allah ﷻ na nag-iisa. Dapat tanggapin ito na hindi maaring baguhin (*Tahreef*), at hindi maaring itanggi (*Ta'teel*), at hindi maaring itanong kung papaano (*Takyeef*), at hindi maaring ihalintulad sa anumang bagay (*Tamtheel*).

Upang mabatid ang uri ng Tawheed na ito ay dapat sundin ang mga sumusunod:

1. Dapat paniwalaan at tanggapin ang lahat na nabanggit sa Banal na Qur'an at sa Tamang Sunnah ng Propeta ﷺ mula sa mga Pangalan at mga Katangian ng Allah ﷻ, at panatilihin ang mga ito na hindi maaring bigyan ng ibang kahulugan na hindi tugma sa malinaw niyang kahulugan, ito ang tinatawag na *Tahreef* (pagbago). Katunayan, ang paniniwala sa *Tawheed* na ito ay nag-uutos ng hindi pagbibigay ng pangalan o katangian sa Kataas-taasang Allah ﷻ na hindi nabanggit sa Qur'an at Sunnah. Upang maliwanagan masdan ang sumusunod na talata, sinabi ng Allah ﷻ:

﴿أَلَمْ تَرَ إِلَى الَّذِينَ تَوَلَّوْا قَوْمًا غَضِبَ اللَّهُ عَلَيْهِمْ مَا هُم مِّنكُمْ وَلَا مِنْهُمْ وَيَخْلِفُونَ عَلَى الْكَذِبِ وَهُمْ يَعْلَمُونَ﴾

“Hindi ba ninyo nakikita ang mga mapagkunwari (munafiqun) na itinuring nila ang mga Hudyo na mga kaibigan at mga minamahal na kung saan nasa mga ito ang galit ng Allah? Sila ay hindi mga Muslim at hindi rin sila mga Hudyo, at sumumpa sila sa kasinungalingan na sila raw ay mga Muslim, at ikaw ay Sugo ng Allah, at batid nila na kasinungalingan ang kanilang panunumpa”.⁽²⁾

Ang galit na tulad ng nabanggit sa Banal na Ayat (talata) na ito, ay kabilang sa mga Katangian ng Allah ﷻ na nababagay sa Kanyang kadakilaan, kung kaya hindi maaring bigyan ng kahulugan na ang galit ng Allah ﷻ ay Kanyang kaparusahan. At hindi rin nangangahulugan na katulad ng galit ng Kanyang mga nilikha na nagdudulot sa kanila ng kahinaan. Katunayan, ang Allah ﷻ ay Bukod-Tanging walang katulad sa Kanyang mga nilikha. Sinabi ng Allah ﷻ:

﴿لَيْسَ كَمِثْلِهِ شَيْءٌ وَهُوَ السَّمِيعُ الْبَصِيرُ﴾

“Siya (ang Allah) ay walang katulad at walang maihahambing sa Kanya, at Siya ay Ganap na Nakakarinig, at Ganap na Nakakakita”.⁽³⁾

(1) Surah Taha 20 : 8

(2) Surah Al-Mujadilah 58 : 14

(3) Surah Ash-Shura 42 : 11

2. Ang mga katangian ng Allah ﷻ ay ganap na walang-hanggan na umaayon sa Kanyang kadakilaan. Minsan may pagkakahawig sa katangian ng Kanyang mga nilikha, ngunit sa pangalan lamang ito at hindi sa realidad. Ang katangian ng Kanyang mga nilikha ay may hangganan, kung kaya ito ay mahina at kulang dahil ito ang likas sa kanila. Ang katangian na galit na nabanggit sa talata ng Banal na Qur'an ay hindi nangangahulugan na maaari nating ibigay ang pangalang "*Al-gadhoob*" (Ang magalitin), dahil hindi ito nabanggit sa Qur'an at Sunnah. Ang mga pangalan at mga katangian ng Allah ﷻ ay "*tawqeefeeyah*"--dapat hihinto na lamang sa kanya at hindi na maaring higitan pa, katulad ng nabanggit sa mga talata ng Qur'an at Sunnah ng Propeta ﷺ.
3. Hindi maaring alisin o itanggi (*Ta'teel*) ang kahit anuman sa mga Pangalan at mga Katangian ng Allah ﷻ na napatunayan sa Qur'an at sa Sunnah ng Propeta ﷺ dahil ang pag-alis sa mga ito ay taliwas sa *Tawheed Al-Asma was-Sifat*, at ito ay magiging dahilan ng paglabas ng tao sa Islam. Hindi rin maaaring subukan na ipaliwanag kung papaano Siya (*Takyeef*) sa pamamagitan ng paghahalintulad at paglalarawan (*Tamtheel*).
4. Ang mga Magagandang Pangalan at Katangian ng Allah ﷻ ay hindi maaaring ipangalan sa kahit sinuman sa Kanyang mga nilikha, ngunit maaari din namang ibigay na pangalan kung lalagyan sa unahan ng katangian ng pagkaalipin ('*abd*) sa Allah ﷻ, tulad ng *Abdur-Rahman* (alipin ng *Ar-Rahman*), *Abdul-Kareem*, at *Abdul-Gafoor*. Hindi rin maaaring magpaalipin maliban sa Allah ﷻ, tulad ng *Abdun-Nabi* (alipin ng Propeta) o *Abdur-Rasool* (alipin ng Sugo).





Nakasulat na Pagsasanay

T1: Buuin ang mga sumusunod:

a. Ang kahulugan ng *Al-'Uloohiyah*.

.....
.....

b. Ang kahulugan ng *Tawheed Al-'Uloohiyah*:

.....
.....

c. Ang kahulugan ng *Tawheed Al-Asmaa was-Sifaat ay paniniwala sa lahat ng nabanggit sa:* at na hindi o kaya ay o kaya ay o kaya ay

d. Ang mga bagay na nagpapawalang-bisa sa *Tawheed Al-Asmaa was-Sifaat ay ang mga sumusunod:*

1. *Tahreef* – at ang kahulugan nito ay
2. *Ta'teel* – at ang kahulugan nito ay
3. *Takyeef* - at ang kahulugan nito ay
4. *Tamtheel* – at ang kahulugan nito ay

T2. Maari bang ipangalan sa isang Muslim ang “Abdun-Nabi” o “Abdur-Rasool”?

.....
.....
.....
.....

Mga Bagong Salita at Termino

Nu.	Arabiko	Pagkasulat	Kahulugan
1	اسم	Ism	Pangalan
2	صفة	Sifat	Katangian
3	الكتاب	Al-Kitaab	Ang Aklat
4	السنة	As-Sunnah	Ang Pamamaraan
5	عبد	'Abd	Lingkod; Alipin
6	عبادة	'Ibaadah	Pagsamba
7	تحريف	Tahreef	Pagbago ng kahulugan
8	تعطيل	Ta'teel	Pagtanggi
9	تكييف	Takyeef	Pagtatanong kung paano
10	تمثيل	Tamtheel	Paghalintulad




Pangatlong Aralin

Ang Dalawang Shahadah (Pagsaksi)

Itatagal:



Isang Oras




Ang Dalawang Shahadah (Shahadatayn)

Ang pundasyon ng 'Aqeedah at ang pagtatatag ng *Tawheed* ay tumatayo at magsisimula sa *Shahadah*:



Ang Pagbigkas
ng Shahadah



Ang Pagbigkas
ng Shahadah

Ang kahulugan ng Shahadah: “*La ilaha illal-lah*”

Ang Shahadah “*La ilaha illal-lah*” ay nabuo sa dalawa – Nafee (pagtangi) at Ithbat (pagtanggap). Ang unang bahagi ay ang “*La ilaha*” (walang diyos) na itinatangi ang pagkakaroon ng kahit anong diyos na dapat sambahin. Ang pangalawang bahagi ay “*illal-lah*” (maliban sa Allah) na tinatanggap na ang Allah ﷻ lamang ang Bukod-Tanging Tunay na Diyos na may katangian ng pagka-Diyos na dapat Sambahin, kung kaya ang kahulugan ng “*La ilaha illal-lah*” ay “walang diyos na may karapatang sambahin maliban sa Allah”.

Ang anyo ng Shahadah sa ganitong paraan ng pagpapahayag na nauuna ang pagtangi sa pagtanggap sa salitang Arabe ay higit na malakas at ganap na kawastuhan ng pagsamba sa Allah ﷻ lamang, at pagtangi ng karapatan sa pagsamba sa sinuman maliban sa Kanya. Itinatangi din ang pagkakaroon ng katangiang pagka-diyos sa lahat maliban sa Allah ﷻ, kaya walang karapatan ang sinuman maliban sa Kanya na mag-angkin ng pagka-diyos.

Alam lahat ng mga Muslim na ang Shahadah “*La ilaha ilal-lah*” ay ang susi ng *Jannah* (paraiso) tulad ng nabanggit sa Sunnah ng Propeta ﷺ. Ito ang dahilan kung bakit may mga Muslim na naniniwala na mabanggit lang ito ay sapat ng dahilan upang makapasok ng *Jannah*. Ngunit ito ay hindi totoo dahil sa katunayan, ang Shahadah ay mayroong mga kondisyon na dapat gampanan at mayroong mga kautusan na dapat isagawa. Kung kaya ang mga *Munafiqoon* (mga mapagkunwari) sa panahon ng Propeta ﷺ ay binabanggit din nila ang *Shahadah*, ngunit tinawag sila ng Allah ﷻ na mga sinungaling at pinaghandaan sila ng pinakamalalim na kalalagyan sa Impiyernong-Apoy.

Ang kahulugan ng Shahadah: “*Muhammadan Rasoolullah*”

Ito ay pagtanggap na katiyakan si Muhammad ﷺ ay alipin at sugo ng Allah na Kanyang isinugo sa lahat ng sangkatauhan. Kung gayon ay dapat siyang mahalina, at sundin ang lahat ng kanyang ipinag-utos, at paniniwalaan ang kanyang mga sinabi, at iwasan ang lahat ng kanyang mga ipinagbabawal at babala, at sambahin ang Allah ﷻ ayon sa kanyang dalang batas lamang, at hindi maaring ipagpalit ang kanyang salita sa salita ng kahit sinong tao.

Ang mga kondisyon ng Shahadah “La ilaha illal-lah”

1. **Al-ilm (kaalaman):** Kinakailangan na alam ang tamang kahulugan ng *Shahadah*, na ito ay pagtanggi ng pagka-diyos ng lahat maliban sa Allah ﷻ, kaya walang may karapatang sambahin maliban sa Kanya. At hindi maaaring ialay ang pagsamba sa kahit kanino maliban sa Kanya. At dapat paniwalaan na ang lahat na sinasamba ng mga *mushrikoon* (mga nagtatambal) maliban sa Allah ﷻ ay walang katotohanan, walang kakayahang magbigay ng pinsala at magbigay ng pakinabang, at walang karapatang sambahin. Kapag sinasabi ng isang tao ang *Shahadah* ngunit hindi niya batid ang kahulugan ng **Nafee** (pagtanggi), at **Ithbat** (pagtanggap) ay hindi makapagbibigay sa kanya ng kabutihan dahil wala sa kanyang paniniwala ang mga katuruan ng kanyang sinasabi.
2. **Al-Yaqeen (kasiguruhan):** Ito ay katiyakan ng sinuman na bumabanggit ng *Shahadah*. Kung siya ay may alinlangan ay walang halaga ito para sa kanya.
3. **Al-Qabool (pagtanggap):** Pagtanggap sa anumang kautusan na dulot ng kanyang kahulugan. Ito ay pagsamba sa Allah ﷻ ng nag-iisa at hindi pagsamba sa lahat maliban sa Kanya, at pagtanggap at pagpatupad sa lahat ng kanyang mga kondisyon.
4. **Al-Inqiyad (pagkamasunurin):** Ito ay pagpapasakop sa lahat ng kautusan na dulot ng *Shahadah*: ang pagsamba sa Allah ﷻ na nag-iisa at huwag ialay ang kahit anong uri ng pagsamba maliban sa Kanya.
5. **As-Sidq (pagkatotoo):** Ito ay pagiging totoo sa paniniwala, sapagka't kapag sinasabi ng kanyang dila at hindi pinatotohanan ng kanyang puso ay wala rin halaga sa kanya at magiging *munafiq* (hipokrito) siya.
6. **Al-Ikhlās (sinsinceridad):** Ito ay katapatan ng pagsamba sa Allah ﷻ lamang, kaya hindi dapat ialay ang pagsamba sa sinuman maliban sa Kanya. Hindi dapat layunin ng pagbigkas ng *Shahadah* ang magkamit ng makamundong bagay o kalugdan lamang ng sinuman sa mga nilikha.
7. **Al-Hubb (pagmamahal):** Ito ay pagmamahal sa *Shahadah*, at pagmamahal sa anumang katuruan sa kaisahan ng Allah. Ito rin ay pagmamahal sa sinumang gumagawa nito, pagtaguyod sa lahat ng mga kondisyon, at gampanan ang mga kautusan. Ang pinakamataas na antas ng pagmamahal ay para lamang sa Allah ﷻ, kasunod ang pagmamahal para sa Propeta ﷺ at susunod ay sa sinuman na tumatahak sa kanyang gabay.



Ang nagpapawalang-bisa sa dalawang Shahadah (Nawaqidul-Islam)

Ang nagpapawalang-bisa sa dalawang *Shahadah* ay ang hindi pagsunod sa katuruan nito, o hindi pagsagawa ng kautusan na ang Allah ﷻ lamang and dapat sambahin at pagsunod sa Propeta ﷺ kung kaya ang nagpapawalang-bisa sa dalawang *Shahadah* ay marami, ngunit ang mahalaga at madalas na nangyayari sa panahon ngayon ay ang mga sumusunod:

1. **Shirk** (pagtatambal): Ito ay pagbibigay ng katambal ng Allah ﷻ sa pamamagitan ng pag-alay ng kahit anong uri ng pagsamba, tulad ng *Du'a* (panalangin) sa mga Propeta, mga *Saaliheen* (mabubuting tao), at iba pa. Ito ang pinaka-malaking kasalanan na hindi patatawarin ng Allah ﷻ kapag hindi nakapagbalik-loob, tulad ng sinabi ng Allah ﷻ:

﴿ إِنَّ اللَّهَ لَا يَغْفِرُ أَنْ يُشْرَكَ بِهِ وَيَغْفِرُ مَا دُونَ ذَلِكَ لِمَنْ يَشَاءُ وَمَنْ يُشْرِكْ بِاللَّهِ فَقَدْ افْتَرَىٰ إِثْمًا عَظِيمًا ﴾

"Katiyakan, ang Allah, hindi Niya pinatatawad ang sinumang sumamba ng iba maliban sa Kanya mula sa Kanyang mga nilikha; subalit pinatatawad Niya ang anumang kasalanan maliban sa shirk na ito, sa sinumang Kanyang nais mula sa Kanyang mga alipin. Ang sinumang nagsasagawa ng pagtatambal sa pagsamba sa Allah ay walang pag-aalinlangan na nakagawa siya ng napakalaking pagkakasala."⁽¹⁾

2. Ang pagtatalaga ng tagapamagitan sa Allah ﷻ na nilalapitan, pinag-uukulan ng kahilingan, at pinaniniwalaan na magiging daan upang mapalapit sa Allah ﷻ, at upang mamagitan. Ang halimbawa ay paghingi ng panalangin sa mga mabubuting tao na namatay na.
3. Ang paniniwala na tama ang relihiyon ng sinumang sumusuway sa Allah ﷻ at hindi sumusunod sa batas ng Propeta Muhammad ﷺ pagkatapos siyang maging sugo, o mag-aalinlangan na mga kafir (walang-pananampalataya) ang sinumang hindi naniniwala sa Allah ﷻ at sa Kanyang Sugo ﷺ.
4. Ang paniniwala na higit na kumpleto at mahusay ang gabay ng ibang tao kaysa sa gabay ng Propeta Muhammad ﷺ, tulad ng pagpili sa batas na gawa ng tao kaysa batas ng Allah ﷻ.
5. Ang masuklam sa anumang bagay na ipinarating ng Propeta ﷺ ay *kaafir*, kahit ginagawa pa niya ito.
6. Ang pangungutya sa mga bagay na mula sa Relihiyon ng Allah, o ang Kanyang mga gantimpala at kaparusahan, o *Sunnah* ng Propeta ﷺ.
7. **Sihr** (salamangka, *magic*) at lahat ng uri nito. Ganoon din kung ito ay kanyang hiniling, ginawa, o kanyang naibigan.
8. Ang paniniwala na maaaring lumabas sa batas ni Propeta Muhammad ﷺ sa pamamagitan ng hindi pagsunod sa kanya, o paniniwala na may mga tao na hindi na kailangang sumunod.
9. Ang pagtalikod sa pag-aaral ng relihiyong Islam, o di kaya sa pagsasagawa nito.

Ang lahat ng sinumang makagawa ng mga bagay na ito na sinasadya o biro lang, o di kaya natatakot sa ibang tao, ay kabilang sa sumasalungat sa katuruan ng dalawang *Shahadah*, maliban sa sinuman na napilitan ngunit ang kanyang puso ay nananatili sa pananampalataya.

Ang mga bagay na ito ay kabilang sa pagsalungat sa katuruan ng dalawang *Shahadah*, ang paniniwala sa kaisahan ng Allah ﷻ sa pagsamba sa Kanya, at pagsunod sa anumang ipinarating ng huling Propeta at Sugo na si Muhammad ﷺ.

(1) Surah An-Nisa' 4 : 48



Nakasulat na Pagsasanay

T1. Buuin ang mga sumusunod:

A. Ang kahulugan ng *Shahadah* “*La ilaha illal-lah*”:

.....
.....

B. Ang kahulugan ng *Shahadah* “*Muhammadan rasoolullah*”:

.....
.....

C. Ang kahulugan ng nagpapawalang-bisa ng dalawang *shahadah*:

.....

T2. Ang mga kondisyon ng *Shahadah* ay:

1.
2.
3.
4.
5.
6.
7.

T3. Ang mga nagpapawalang-bisa sa dalawang *Shahadah*:

1.
2.
3.
4.
5.
6.
7.
8.
9.
10.

Mga Bagong Salita at Termino

Nu.	Arabiko	Pagkasulat	Kahulugan
1	شهادة	Shahaadah	Pagsaksi; Pagtestigo
2	شرط	Shart	Kondisyon
3	علم	'ilm	Kaalaman
4	صدق	Sidq	Totoo
5	إخلاص	ikhlas	Sinsieridad; Taos-puso
6	حب	Hubb	Pagmamahal
7	قبول	Qabool	Pagtanggap
8	النبي	An-Nabi	Ang Propeta
9	الرسول	Ar-Rasool	Ang Sugo
10	صلى الله عليه وسلم (ﷺ)	Sallallaahu 'alayhi wa sallam	Sumakanya nawa ang kapayapaan at pagpapala ng Allaah

"Ang aking nasyon ay darating sa Araw ng Paghuhukom na mayroong nagniningning na liwanag mula sa bakas ng kanilang isinagawang Wudhu' (ablusyon)." ⁽¹⁾

Unit ng Tahaarah (Kalinisan)



(1) Bukhari at Muslim

Talaan ng mga Nilalaman

Pahina	Mga Paksa
36	Unang Aralin: Kahalagahan ng <i>Taharah</i>
37	Paunang salita
38	Ang kahalagahan ng <i>Taharah</i>
38	Ang Kahulugan ng <i>Taharah</i>
38	Mga uri ng tubig
39	Ang Pamamaraan sa pag-gamit ng palikuran
40	Ang <i>Istinja</i> at <i>Istijmar</i>
40	Mga uri ng <i>Najis</i> (dumi)
41	Mga Nakasulat na Pagsasanay
42	Mga Bagong Salita at Termino
44	Pangalawang Aralin: Ang <i>Wudhu'</i>
45	Sunan <i>al-Fitrah</i> : (Ang likas na pamamaraan)
46	Ang mga uri ng Hadath at ano ang dapat gawin kapag nagka-Hadath ang tao
47	Ang <i>Wudhu'</i>
47	Ang mga kondisyon ng <i>Wudhu'</i>
48	Ang mga obligado sa pagsagawa ng <i>Wudhu'</i>
49	Mga Sunnah ng <i>Wudhu'</i>
50	Mga Nakasulat na Pagsasanay
51	Mga Bagong Salita at Termino
52	Pangatlong Aralin: Ang Pagsasagawa ng Tamang <i>Wudhu'</i>, at mga Bagay na Makasisira Dito
53	Mga hakbang ng kumpletong pagsasagawa ng <i>Wudhu'</i>
54	Ang mga nakakasira ng <i>Wudhu'</i>
55	Nakasulat na pagsasanay
55	Ginagawang pagsasanay
56	Mga Bagong Salita at Termino

Unang Aralin

Ang Kahalagahan ng Tahaarah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Malaman ang kahalagahan ng kalinisan.
- Maintindihan ang ibig sabihin ng *Najasah* (karumihan).
- Malaman ang mga uri ng *Najasah*.
- Maipaliwanag ang mga uri ng tubig
- Isa-isahin ang kaasalan sa paggamit ng palikuran.
- Ikumpara ang pagkakaiba ng *Istinja* (paghuhugas gamit ang tubig) at *Istijmar* (paggamit ng lupa, bato, papel, at iba pa).



Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Ang unang aralin sa yunit ng 'Aqeedah

Paunang Salita

Ang Islam ay relihiyon ng kalinisan at kadalisayan, kung kaya wala ka ng makikitang relihiyon na nagpapahalaga at nagtutulak sa tao tungo sa kalinisan na katulad sa Islam. Isinugo ng Allah ﷻ ang Propeta ﷺ upang linisin ang mga tao sa pangloob at panglabas. Sinabi ng Allah ﷻ:

﴿ كَمَا أَرْسَلْنَا فِيكُمْ رَسُولًا مِنْكُمْ يَتْلُو عَلَيْكُمْ آيَاتِنَا وَيُزَكِّيكُمْ وَيُعَلِّمُكُمُ الْكِتَابَ وَالْحِكْمَةَ وَيُعَلِّمُكُم مَّا لَمْ تَكُونُوا تَعْلَمُونَ ﴾

“Katulad ng pagbibigay Namin ng biyaya sa inyo sa pamamagitan ng pagharap ninyo sa Ka’bah, nagpadala Kami ng Sugo mula sa inyo upang bigkasin ang mga malinaw na salita, na isinasaad ang pagkakaiba ng katotohanan mula sa kamalian. At upang linisin din kayo mula sa dungis ng pagtatambal at masasamang pag-uugali; at ituro sa inyo ang Aklat (Qur’an,) at ang Sunnah, at ituturo sa inyo ang mga bagay na hindi pa ninyo batid”. ⁽¹⁾

Ang ibig sabihin ng Taharah sa Islam: Saklaw nito ang kadalisayan ng puso mula sa maling paniwala tulad ng pagtatambal sa Allah ﷻ (Shirk), at karaniwang sakit ng mga puso ng tao tulad ng pagkamainggitin, at pagkayamot. Ganoon din ang kadalisayan ng kaisipan mula sa paniwala sa mga pamahiin, at sa lahat ng mga nakakasagabal sa tamang pagpapasya tulad ng mga alak at bawal na gamot. Kasama na rin ang kadalisayan ng dila mula sa kasinungalingan at malalawang pananalita. At ang kadalisayan ng katawan at mga kasuotang damit mula sa mga karumihan.

(1) Surah Al-Baqarah 2 : 151

Ang kahalagahan ng Taharah

Ang *Taharah* ay isang kondisyon ng *Salah*. Hindi maaring mag-*Salah* ang isang Muslim na walang *Taharah*. Ang *Salah* ay haligi ng relihiyong Islam, kung kaya hindi kasapi sa Islam ang sinumang hindi nagsasagawa ng *Salah*, tulad ng sinabi ng Propeta ﷺ “*Ang pagitan ng tao (Muslim) at ng Kufr (walang pananampalataya) ay ang hindi pagsasagawa ng Salah*”.⁽¹⁾

Dapat isagawa ng bawat Muslim ang *Salah* sa takdang oras, at hindi dapat mahuli, tulad ng sinabi ng Allah ﷻ:

﴿ إِنَّ الصَّلَاةَ كَانَتْ عَلَى الْمُؤْمِنِينَ كِتَابًا مَوْقُوتًا ﴾

“Katotohanan, na ang Salah ay ipinag-utos sa mga mananampalataya sa takdang oras”.⁽²⁾

Dahil dito ay nagiging malinaw na sa inyo ang kahalagahan ng *Taharah* sa buhay ng isang Muslim.

Ang kahulugan ng Taharah

Ang kahulugan ng *Taharah* sa pananalita: Kalinisan.


Ang kahulugan ng *Taharah* sa Islamikong pananaw: Pag-alis ng *Hadath* (mga pangyayari na naglalagay sa sitwasyon na hindi maaring magsagawa ng pagsamba ang isang Muslim), at pagtanggali ng *Najis* (dumi).

Mga uri ng tubig

Hindi magiging sapat ang *Taharah* kung hindi gagamit ng tubig, o ang kapalit ng tubig kapag wala ito. Ang tubig ayon sa tamang paggamit upang ipanglinis ay may dalawang uri:

1. **Ang tubig *At-Tahoor*:** Ito ay malinis at maaring ipanglinis, tulad ng bukal, ulan, ilog, at dagat. Ang mga tubig na ito ay nananatili sa kanilang orihinal na kadalisan at ginagamit sa paglilinis at iba pa.
2. **Ang tubig *An-Najis*:** Ang tubig na nahaluan ng *Najasah* (karumihan) at ito ang nangibabaw hanggang sa mag-iba ang kulay, ang amoy, o ang lasa. Ang tubig na ito ay hindi maaring gamitin sa paglilinis.

(1) Muslim at Ahmad
(2) Surah An-Nisa' 4:103



Mga mabubuting asal sa pag-gamit ng palikuran

Makikita ng isang Muslim sa batas ng Allah ﷻ ang mga payo at gabay sa bawat bahagi ng kanyang pamumuhay. Ang paggamit ng palikuran (banyo/kubeta) ay kasama sa likas na gawain ng tao. May mga mabubuting asal sa Islam na kapag ginampanan ng isang Muslim ay magkakamit siya ng gantimpala. Ito ang mga sumusunod:

1. Ang lugar na ginagamit bilang palikuran ay may dingding o tabing at hindi nakikita ang *Awrah* (bahagi ng katawan na dapat itago) ng tao.
2. Hindi dapat gamitin sa tawag ng kalikasan ang daanan ng mga tao, o silong na inuupuan ng mga tao, o sa lilim ng namumungang punong-kahoy o pinanggagalingan ng tubig.
3. Hindi dapat dalhin sa loob ng palikuran ang bagay na may pangalan ang Allah ﷻ.
4. Bigkasin ang *Du'a na ito* bago pumasok sa palikuran: "*Allahumma inni a'oodhu bika minal-khubthi wal khaba'ith*".⁽¹⁾ ("*O Allah, tunay na ako ay nagpapakupkop sa Iyo laban sa masasama at mga demonyo*"). At sa paglabas naman ay bigkasin ang *du'a na*: "*Gufranak*"⁽²⁾ ("*Patawarin Mo ako [O Allah]*").
5. Mauuna ang kaliwang paa sa pagpasok, at kanang paa naman sa paglabas.
6. Huwag humarap o tumalikod sa *Qiblah* (Direksyon ng Ka'bah sa Makkah) sa oras ng paggamit ng palikuran kapag nasa labas ng bahay tulad ng disyerto.
7. Iwasang matalsikan ng ihi o mapahiran ng dumi ang damit at katawan.
8. Huwag magsasalita sa panahon ng paggamit ng palikuran.
9. Ang kaliwang kamay ang gagamitin sa paghugas ng tubig (*Istinja*) at sa pagpahid ng tisyu o bato (*Istijmar*).
10. Panatilihin malinis ang palikuran bago umalis kagaya ng kung paano ito natagpuan bago gamitin.



(1), (2) Isinalaysay ni Bukhari

Ang Istinja at Istijmar

Al-Istinja: Ito ang paggamit ng tubig sa paglilinis ng puwerta at ari.

Al-Istijmar: Ito ang paggamit ng bato o papel tulad ng tisyu sa pagpunas ng puwerta at ari upang linisin ang anumang dumi o ihi.

Higit na mabuti kapag pinagsama ang *Istijmar* at *Istinja*. Punasan muna ng tatlong ulit (*Istijmar*) gamit ang bato o tisyu at pagkatapos ay hugasan ng tubig (*Istijmar*). Hindi maaaring gumamit ng mga buto o natuyong dumi ng hayop para ipang-punas.

Mga uri ng Najis (dumi)

Ang mga uri ng *Najis* na dapat lilinis ng bawat Muslim ay:

1. **Al-Maytah:** Ang hayop na namatay na hindi nakatay sa pamamaraan ng Islam ay hindi maaring kainin, maliban sa mga patay na hayop na nagmumula sa dagat (gaya ng isda).
2. **Ad-Dam** (dugo). Maliban sa atay at lapay.
3. Ang maruming bagay mula sa tao, tulad ng tae, ihi at suka.
4. **Al-Wadi:** likidong puti na lumalabas pagkatapos umihi sanhi ng sakit o sanhi ng hindi makadumi.
5. **Al-Madhi:** likidong puti na lumalabas sanhi ng pagnanasa at pagkalibog.
6. **Al-Khinzeer** (baboy): at lahat na nanggaling dito ay hindi maaring kainin o gamitin.
7. Ang aso.
8. Ang mga mababangis na hayop o ibon tulad ng leon, tigre, lawin, at agila.
9. **Al-Khamr** (mga nakakalasing): bawal inumin o di kaya'y ipang-gamot.

Kapag napunta ang mga *Najis* na ito sa damit, katawan, o sa isang lugar ay alisin kapag buo o solido, pagkatapos ay hugasan ang lugar na ito. Kapag hindi naman buo o likido tulad ng dugo o ihi ay hugasan hanggang sa matanggal ang kulay at amoy nito.





Nakasulat na Pagsasanay

T1. Buuin ang mga sumusunod:

- a) Ang kahulugan ng *Taharah* sa pananalita ay:
- b) Ang kahulugan ng *Taharah* sa Islamikong pananaw ay:
- c) Ang tubig na *Tahoor* ay:
- d) Ang tubig na *Najis* ay:
- e) Ang *Istinja* ay:
- f) Ang *Istijmar* ay:

T2. Ano ang mga uri ng *Najis* na dapat iwasan ng bawat Muslim?

- 1.
- 2.
- 3.
- 4.
- 5.
- 6.
- 7.
- 8.
- 9.

T3. Kailan magiging *Najis* ang tubig?

T4. Banggitin ang pito sa mga pamamaraan sa paggamit ng palikuran:

- 1.
- 2.
- 3.
- 4.
- 5.
- 6.
- 7.

Mga Bagong Salita at Termino

No.	Arabik	Pagkasulat	Kahulugan
1	طهارة	Tahaarah	Kalinisan
2	طاهر	Taahir	Malinis
3	نجاسة	Najaasah	Karumihan
4	نجس	Najis	Madumi
5	ماء	Maa'	Tubig
6	استنجاء	Istinjaa'	Paglilinis gamit ang tubig
7	استجمار	Istijmaar	Paglilinis gamit ang papel, tissue, bato, atbp.
8	دم	Dam	Dugo
9	خنزير	Khinzeer	Baboy
10	ميتة	Maytah	Patay na hayop



Pangalawang Aralin

Ang Wudhu'

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Talakayin ang mga *sunan al-Fitrah* (Ang likas na pamamaraan).
- Malaman ang pagkakaiba ng *Hadath Akbar* at *Hadath Asghar*.
- Matandaan ang mga kondisyon ng *Wudhu'*.
- Maipaliwanag ang mga obligado ng *Wudhu'*
- Isa-isahin ang mga Sunnah ng *Wudhu'*.

Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino



Kinakailangang napag-aralan na:

- Ang unang aralin sa yunit ng *Tahaarah*

Kaakibat na pag-aaral:

- Ang unang aralin sa yunit ng *Athkarus-Salah*

Sunan al-Fitrah: (Ang likas na pamamaraan)

Ang *Sunan al-Fitrah* ay ang malinaw na pangangalaga ng Islam sa personal na kalinisan ng katawan at kagandahan ng anyo bilang isang tao, tulad ng sinabi ng Propeta ﷺ: "Ang limang uring ito ay kasama sa Al-Fitrah: Ang pag-ahit ng buhok mula sa pribadong bahagi ng katawan, ang pagtutuli, pagtabas ng bigote, pagbunot ng balahibo sa kilikili, at pagputol ng mga kuko".⁽¹⁾

Kung kaya ang mga *Sunan al-Fitrah* ay dapat pagsikapang gawin ng isang Muslim.

1. Pagtutuli

2. Pagtabas ng bigote

3. Pag-ahit ng balahibo mula sa pribadong ari

4. Pagbunot ng balahibo sa kilikili

5. Pagputol ng mga kuko



(1) Isinalaysay ni Bukhari at Muslim

Ang mga uri ng *Hadath* at ano ang dapat gawin kapag nagka-*Hadath*

Batid natin sa unang aralin ang kahulugan ng *Taharah* sa Islamikong pananaw, na ito ay ang pagtanggali ng *Hadath* at *Najis*. Kung gayon, ano ang tinatawag na *Hadath*? Ano ang mga uri nito? At sa paanong paraan tatanggalin ito?

Ang *Hadath* ay: mga pangyayari na naglalagay sa tao sa sitwasyon na nagiging bawal sa kanya ang pagsasagawa ng mga *'Ibaadah* (pagsamba) sa Allah ﷻ tulad ng *Salah* at pagbabasa ng Qur'an hanggang sa makalabas siya sa ganoong kalagayan sa pamamagitan ng paglilinis. Ito ay may dalawang uri:

1. ***Al-Hadath Al-Akbar*** (malaking *Hadath*): Kailangang maligo (*ghusl*) kapag nangyari ang mga ito, gaya halimbawa ng pakipagtalik sa asawa (*junub*), buwanang-dalaw (*haydh*), at dugo na sanhi ng panganganak (*nifas*).
2. ***Al-Hadath Al-Asghar*** (maliit na *Hadath*): Kailangang maghugas (*Wudhu'*) kapag nangyari ang mga ito, tulad halimbawa kung mayroong lumabas sa dalawang daanan (puwerta at ari) at kapag nakatulog.

Sa araling ito ay malalaman mo ang mga alituntunin ng *Wudhu'* dahil sa kahalagahan nito sa paghahanda sa *Salah*, at malalaman din natin ang tungkol sa *Ghusl* at mga alituntunin nito sa susunod na aralin, *Insha' Allah*.



Ang Wudhu'

Kapag hindi Junub ang isang Muslim ay hindi na kailangang maligo upang maging malinis sa pagsasagawa ng Salah, ngunit dapat siyang mag-Wudhu' para sa Salah tulad ng sinabi ng Allah

ﷻ:

﴿ يَا أَيُّهَا الَّذِينَ آمَنُوا إِذَا قُمْتُمْ إِلَى الصَّلَاةِ فَاغْسِلُوا وُجُوهَكُمْ وَأَيْدِيَكُمْ إِلَى الْمَرَافِقِ وَامْسَحُوا بِرُءُوسِكُمْ وَأَرْجُلَكُمْ إِلَى الْكَعْبَيْنِ وَإِنْ كُنْتُمْ جُنُبًا فَاطَّهَّرُوا ﴾

"O kayong mga mananampalataya! Kapag kayo ay nagnanais na magsagawa ng Salah, hugasan ninyo ang inyong mga mukha, at ang inyong mga kamay hanggang siko, at pahiran ninyo ng tubig ang inyong mga ulo, at hugasan ang inyong mga paa hanggang bukung-bukong. At kapag kayo ay junub ay maglinis kayo (sa pamamagitan ng pagligo)".⁽¹⁾

Ang Wudhu' ay *wajib* (obligado) din sa *tawaf* (pag-ikot) sa palibot ng *Ka'bah* at sa pagbabasa ng Qur'an mula sa *Mushaf* (aklat). Kanais-nais din sa isang Muslim ang pagsasagawa ng Wudhu' sa lahat ng pagkakataon lalung-lalo na bago matulog at pagkatapos makipagtalik sa asawa kapag nais niyang ipagpaliban muna ang pagligo sa bandang huli.

Ang Wudhu' ay paghugas ng nakalabas na bahagi ng katawan gaya ng mukha, dalawang kamay, dalawang paa, at pagpahid sa ulo tulad ng ipinaliwanag ng talata sa itaas.

Ang mga kondisyon ng Wudhu'

Mayroong mga kondisyon ang Wudhu' na hindi magiging tama kapag wala ito. Ang mga ito ay:

1. **Al-Islam:** kung kaya hindi dapat sa mga *kaafir*.
2. **An-Niyyah:** Ang layunin na gumawa ng pagsamba na kinakailangan ng *Taharah* tulad ng Salah, o ang layunin na tanggalin ang *Hadath* at hindi upang magpalamig o maging masigla lamang, o pagtanggap lang ng dumi sa katawan.
3. **Al-Aql:** tamang kaisipan, kung kaya hindi puwede sa mga wala sa tamang pag-iisip.
4. **Ang tubig ay Tahoor:** malinis at puwedeng ipanglinis.
5. Tanggalin ang mga bagay na hahadlang upang mabasa ng tubig ang balat ng katawan maliban na lang kung mayroong sapat na dahilan tulad ng balangkat o benda sa bahagi ng paa o braso. Ang mga ito ay pinapahiran lamang ng basang kamay sa ibabaw.

(1) Surah Al-Ma'idah 5 : 6



Ang mga obligado sa pagsagawa ng Wudhu'

Ang tinutukoy na obligado (*fardh*) sa *Wudhu'* ay ang mga bahagi ng katawan na dapat hugasan. Ito ay nabanggit sa talata ng Banal na Qur'an. Sinabi ng Allah ﷻ:

﴿ يَا أَيُّهَا الَّذِينَ آمَنُوا إِذَا قُمْتُمْ إِلَى الصَّلَاةِ فَاغْسِلُوا وُجُوهَكُمْ وَأَيْدِيَكُمْ إِلَى الْمَرَافِقِ وَامْسَحُوا بِرُءُوسِكُمْ وَأَرْجُلَكُمْ إِلَى الْكَعْبَيْنِ وَإِنْ كُنْتُمْ جُنُبًا فَاطَّهَّرُوا وَإِنْ كُنْتُمْ مَرْضَىٰ أَوْ عَلَىٰ سَفَرٍ أَوْ جَاءَ أَحَدٌ مِنْكُمْ مِنَ الْغَائِطِ أَوْ لَامَسْتُمُ النِّسَاءَ فَلَمْ يَجِدُوا مَاءً فَتَيَمَّمُوا صَعِيدًا طَيِّبًا فَامْسَحُوا بِوُجُوهِكُمْ وَأَيْدِيكُمْ مِنْهُ مَا يُرِيدُ اللَّهُ لِيَجْعَلَ عَلَيْكُمْ مِنْ حَرَجٍ وَلَكِنْ يُرِيدُ لِيُطَهَّرَكُمْ وَلِيُتِمَّ نِعْمَتَهُ عَلَيْكُمْ لَعَلَّكُمْ تَشْكُرُونَ ﴾

"O kayong mga mananampalataya kapag kayo ay nagnanais na magsagawa ng Salah, hugasan ninyo ang inyong mga mukha, at ang inyong mga kamay hanggang siko, at pahiran ninyo ng tubig ang inyong mga ulo, at hugasan ang inyong mga paa hanggang bukung-bukong. At kapag kayo ay junub ay maglinis kayo (sa pamamagitan ng paliligo).

At kung kayo ay maysakit o di kaya'y naglalakbay o gumamit ng palikuran o nakipagtalik sa mga asawa at wala kayong matagpuang tubig ay gawin ang Tayammum sa pamamagitan ng malinis na lupa at ipapahid sa inyong mga mukha at mga kamay. Hindi nais ng Allah na pahirapan kayo bagkus nais Niyang maging malinis at dalisay kayo at upang maging ganap ang Kanyang biyaya para sa inyo, upang kayo ay magkaroon ng pagpapasalamat". ⁽¹⁾

Ang mga *Fardh* sa *Wudhu'* na hindi magiging tama kapag nawala ang isa sa mga ito ay:

1. Paghugas ng buong mukha na kasama na rin ang pagmumog at pagsinghot ng tubig, sapagkat ang bibig at ilong ay kasama sa tinatawag na mukha.
2. Paghugas ng kamay hanggang siko, dahil sinabi ng Allah ﷻ: *"at inyong mga kamay hanggang siko".* ⁽²⁾
3. Pagpahid ng buong ulo kasama na rin ang dalawang tainga, tulad ng sinabi ng Propeta ﷺ: *"Ang dalawang tainga ay kasama sa ulo".* ⁽³⁾
4. Paghugas ng dalawang paa hanggang bukung-bukong, dahil sinabi ng Allah: *"at hugasan ang inyong mga paa hanggang bukung-bukong".* ⁽⁴⁾
5. **At-Tarteeb:** Kailangang maayos ang pagkasunud-sunod tulad ng paghugas ng mukha, pagkatapos ay ang dalawang kamay, pagpahid sa ulo at isunod ang paghugas ng dalawang paa.
6. **Al-Muwaalat:** Ito ay paghugas ng mga bahagi ng katawan ng tuluy-tuloy at sunud-sunod ng hindi mapuputol ang pagitan hanggang sa matuyo.

(1) Surah Al-Ma'idah 5 : 6

(2) Surah Al-Ma'idah 5 : 6

(3) Isinalaysay ni Imam Ahmad at mga angkan ng Sunnah maliban kay Nisaa'i

(4) Surah Al-Ma'idah 5 : 6

Mga Sunnah ng Wudhu'

Inirerekomenda ang pagiging masigasig sa pagsasagawa ng mga *Sunnah* na nabanggit mula sa Propeta ﷺ upang maging ganap ang *Wudhu'* at higit na malaki ang gantimpala. Ang mga *Sunnah* na ito ay:

1. **As-Siwak:** Inirerekomendang gamitin sa oras ng pagmumog.
2. Paghugas ng dalawang kamay bago mag-*Wudhu'* ng tatlong ulit.
3. Simulan sa pagmumog at sisinghot ng tubig muna bago maghugas ng mukha. Ang hindi nag-aayuno ay inirerekomendang magmumog ng mabuti.
4. Suklayin ng mga daliri ang balbas, at ipadaan din ang mga daliri sa mga singit ng mga daliri ng kamay at paa.
5. **At-Tayamun:** Mag-umpisa sa kanan bago ang kaliwa sa lahat ng mga bahagi ng katawan.
6. Ang bawat bahagi ng katawan ay hugasan ng tatlong ulit maliban sa ulo, sapagkat isang ulit lang ang *wajib*, at huwag lalampas ng tatlong ulit.
7. Pagkatapos ng *Wudhu'* ay bigkasin ang *Tashahhud* (pagsaksi) at mag-*Du'a* (manalangin) tulad ng nabanggit mula sa Propeta ﷺ:

"Ash-hadu an la ilaha illal-lah, wahdahu la shareeka lah, wa ash-hadu anna Muhammadan 'abduhu wa rasooluh. Allahummaj-'alni minat-taw-wabeen, waj-'alni minal-mutatah-hireen".

"Ako ay sumasaksi na walang sinuman ang may karapatang sambahin maliban sa Allah, wala Siyang katambal. At ako ay sumasaksi na si Muhammad ay Kanyang lingkod at Sugo. O Allah, gawin Mo po akong kasama sa mga nagbabalik-loob sa Iyo at gawin Mo po akong kasama sa mga malilinis at dalisay." ⁽¹⁾



(1) Isinalaysay ni Al-Tirmidhi at kinumpirma ni Al-Albani



Nakasulat na Pagsasanay

T1. Buuin ang mga sumusunod:

a) Ang mga Sunan al-Fitrah ay:

1.
2.
3.
4.
5.

b. Ang Hadath Akbar ay gaya ng: at kinakailangan ang:

c. Ang Hadath Asgar ay gaya ng: at kinakailangan ang:

d. Ang mga kondisyon ng Wudhu':

1.
2.
3.
4.
5.

T2. Kilalanin ang Fardh at Sunnah sa mga sumusunod sa pamamagitan ng paglagay ng titik (F) sa tapat ng Fardh, at titik (S) sa tapat ng Sunnah na dapat isagawa sa oras ng pag-Wudhu':

Nu.	Mga Gawain	(F) o (S)
1	Paghugas ng mukha.	
2	Ang tatlong ulit na paghuhugas sa bawat bahagi ng katawan.	
3	As-Siwak.	
4	Paghugas ng dalawang kamay hanggang siko.	
5	Paghugas ng dalawang kamay ng tatlong ulit bago mag- <u>W</u> udhu'.	
6	Pagpahid ng ulo.	
7	Ang pagmumog at pangsinghot ng tubig bago maghugas ng mukha.	
8	At-Tayaamun: paggamit ng kanan muna.	
9	Paghugas ng dalawang paa hanggang bukong-bukong.	
10	Pagsuklay ng balbas gamit ang mga daliri, at mga singit ng kamay at paa.	
11	Ang tuloy-tuloy na paghugas.	
12	Ang Tashahhud at Du'a pagkatapos mag- <u>W</u> udhu'.	
13	Ang maayos na pagkasunud-sunod.	

Mga Bagong Salita at Termino

Nu.	Arabiko	Pagkasulat	Kahulugan
1	شمال	Shima <u>al</u>	Kaliwa
2	يمين	Yame <u>en</u>	Kanan
3	مضمضة	Mad <u>h</u> mad <u>h</u> ah	Pagmumog / Paglilinis ng bibig
4	استنشاق	Istinshaa <u>q</u>	Pagsinghot ng tubig sa ilog
5	نية	Niyah	Intensyon
6	جنابة	Jana <u>a</u> bah	Karumihan na sanhi ng pakikpagtalik sa asawa o paglabas ng semilya.
7	حدث	<u>H</u> adath	Isang pangyayari na naglalagay sa isang muslim sa kalagayan ng karumihan.
8	وضوء	Wud <u>h</u> '	Paghuhugas / Ablusyon
9	غسل	Ghusl	Paliligo
10	ختان	Khita <u>a</u> n	Pagtutuli

Pangatlong Aralin

Ang Pagsasagawa ng Tamang Wudhu',
at mga Bagay na Makasisira Dito

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Maipaliwanag ang pagsasagawa ng tamang *Wudhu'*.
- Pagsasagawa ng tamang *Wudhu'*.
- Malaman ang mga nakakasira sa *Wudhu'*.
- Maisaulo ang mga *Thikr* ng *Wudhu'*.

Kabuuan ng Aralin:

- Mga Nilalaman ng Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino



Kinakailangang napag-aralan na:

- Ang unang at pangalawang aralin sa yunit ng *Tahaarah*

Mga hakbang ng kumpletong pagsasagawa ng Wudhu'

1. Ang *Niyah* na magsasagawa ng *wudhu'*, at ito ay isinasapuso lamang at hindi binibigkas.
2. Bigkasin ang "*Bismillah*".



3. Hugasan ang dalawang kamay hanggang sa pulso ng tatlong ulit at basain din ang mga singit ng mga daliri.
4. Pagmumog at pagsinghot ng tubig ng tatlong ulit. Gamitin ang kanang kamay sa pagsinghot, kaliwa naman kapag isininga.
5. Hugasan ang mukha gamit ang dalawang kamay ng tatlong ulit.
6. Hugasan ang kanang kamay kasama hanggang siko ng tatlong ulit.
7. Hugasan ang kaliwang kamay kasama hanggang siko ng tatlong ulit.
8. Ipahid ang mga basang kamay sa ulo kasama ang dalawang tenga, umpisa sa unahan papunta sa batok at ibalik muli sa unahan, isang ulit. Kasama sa pagpahid sa ulo ang paglinis ng loob ng tenga gamit ang hintuturo, at sa labas ng tenga gamit ang hinlalaki.
9. Hugasan ang kanang paa hanggang bukung-bukong ng tatlong ulit. Hugasan ang kaliwang paa hanggang bukung-bukong ng tatlong ulit. Basain din ng tubig ang mga singit ng mga daliri.

Pagkatapos ay inirerekomenda ang pagbigkas ng *Du'a* na ito:

"Ash-hadu an la ilaha illal-lah, wah-dahu la shareeka lah, wa ash-hadu anna Muhammadan 'abduhu wa rasooluh. Allahum-maj-'alni minat-tawwabeen, waj-'alni minal-mutatah-hireen."

"Ako ay sumasaksi na walang sinuman ang may karapatang sambahin maliban sa Allah, wala Siyang katambal. At ako ay sumasaksi na si Muhammad ay Kanyang alipin at Sugo. O Allah, gawin Mo po akong kasama sa mga nagbabalik-loob sa Iyo at gawin Mo po akong kasama sa mga malilinis at dalisay."



Ang Pagsasagawa ng Wudhu'



Ang Pagsasagawa ng Wudhu'

Ang mga nakasisira ng *Wudhu'* (*Nawaqidul-Wudhu'*)

Ang ibig sabihin ng nakasisira ng *Wudhu'* ay ang nagpapawalang bisa sa *Wudhu'*. Kapag nasira ang *Wudhu'* kinakailangang gawin ulit ito bago magsagawa ng mga gawaing pagsamba na nangangailangan ng *Wudhu'* tulad ng *Salah*, *Tawaf* sa Ka'bah at pagbabasa ng Banal na Qur'an.

Ang mga sumusunod ay nakakasira ng *Wudhu'*:

1. Lahat ng lumalabas sa puwerta at ari tulad ng dumi, ihi, hangin, at dugo.
2. Pagkawala ng pag-iisip dahil sa pagkabiliw, nawalan ng malay o di kaya ay mahimbing na pagtulog at wala ng nararamdaman sa paligid.
3. Pagiging *Murtad*, o pagbaliktad at paglisan sa Islam (tayo ay nagpapakupkop sa Allah mula sa *riddah*).
4. Paghawak ng *Awrah*: ang puwerta o ari na walang sapin.
5. Pagkain ng karne ng kamelyo.
6. Kapag lumampas na ang oras ng pagpahid ng medyas. Ito ay tatlong araw at tatlong gabi para sa manlalakbay at isang araw at isang gabi para sa residente.

Kapag ang isang Muslim ay nakapag-*Wudhu'* na at handa ng mag-*Salah* ngunit nangyari ang anuman sa nabanggit na nakasisira ng *Wudhu'* tulad ng paglabas ng hangin (utot) ay dapat siyang mag- *Wudhu'* ulit kahit siya ay nagsa-*Salah* na. Dapat niyang putulin ang kanyang *Salah* at magsagawa ng panibagong *Wudhu'* .

Kapag hindi nasira ang *Wudhu'* ay maaaring mag-*Salah* ng higit pa sa isang *Salah*, ngunit higit na mabuti ang bawat *Salah* na may panibagong *Wudhu'* .

Mayroon pang ibang nakasisira ng *Wudhu'* ngunit hindi na sapat ang panibagong *Wudhu'* kundi kinakailangan ng *Ghusl* (paliligo) tulad ng *Janabah* (nakipagtalik), *Haydh* (regla), at *Nifas* (dugo sanhi ng panganganak). Insha' Allah maipapaliwanag natin ang detalye nito sa pagdating natin sa Aralin ng *Ghusl*.



Nakasulat na Pagsasanay

T1. Buuin ang mga sumusunod:

- Bago mag-umpisa ng *wudhu*, bigkasin ang:
- Pagkatapos ng *wudhu*, inirerekomenda na bigkasin ang du'a na:
.....
.....
.....

T2. Ano ang ibig sabihin ng "Nakakasira ng *wudhu*"?

.....

T3. Kabilang sa mga nakakasira ng *Wudhu* ay:

-
-
-



Ginagawang Pagsasanay

Hilingin ng guro sa mag-aaral na magsagawa ng tama at kumpletong *Wudhu*. Pagkatapos ay magtanong tungkol sa pamamaraan ng *Wudhu*, at itama ang mga kamalian ng mag-aaral. Ulit-ulitin ang pagsasanay hanggang hindi na siya nangangamba sa kakayahan ng mag-aaral sa pagsasagawa ng tamang *Wudhu*.



Mga Bagong Salita at Termino

Nu.	Arabiko	Pagkasulat	Kahulugan
1	عورة	'Awrah	Pribadong parte ng katawan na kailangang takpan
2	يد	Yad	Kamay
3	وجه	Wajh	Mukha
4	فم	Fam	Bunganga
5	قدم	Qadam	Paa
6	لحية	Li ^h yah	Balbas
7	أنف	Anf	ilong
8	كعب	Ka`b	Bukongbukong
9	مرفق	Mirfaq	Siko
10	مسح	Mas-h	Pagpunas



*"Manalangin (Salah) kayo katulad ng kung paano ninyo
ako nakitang manalangin." ⁽¹⁾*

Yunit ng Salah (Pagdarasal)



Talaan ng mga Nilalaman

Pahina	Mga Paksa
60	Unang Aralin: Ang Salah (Pagdarasal)
61	Ang Kahulugan ng Salah
61	Ang kahalagahan ng Salah
64	Ang benepisyong ng Salah sa buhay ng isang Muslim
65	Mga kondisyon ng Salah
66	Mga Nakasulat na Pagsasanay
67	Mga Bagong Salita at Termino
68	Pangalawang Aralin: Mga haligi at mga obligadong gawain sa Salah
69	Ang mga posisyon sa Salah
70	Ang mga Haligi (<i>Arkan</i>) ng Salah
71	Ang mga obligadong gawain (<i>Waajibat</i>) sa Salah
72	Ang mga gawaing <i>Sunnah</i> (inirekomenda at hindi sapilitan) sa Salah
74	Nakasulat na Pagsasanay
75	Ginagawang pagsasanay
75	Mga Bagong Salita at Termino
76	Pangatlong Aralin: Ang mga obligadong Salah
77	Ang mga Obligadong Salah, at mga bilang ng <i>Rak'ah</i> nito
77	Mga Oras ng Obligadong Salah
79	Ang Pagbabayad ng Obligadong Salah
79	Ang mga nakakasira ng Salah (<i>Mubtilatus-Salah</i>)
80	Nakasulat na pagsasanay
81	Ginagawang Pagsasanay
82	Mga Bagong Salita at Termino
84	Pang-apat na Aralin: Paglalarawan ng Salah
86	Paglalarawan ng mga posisyon ng Salah na may dalawang <i>Rak'ah</i>
87	Paglalarawan ng mga posisyon ng Salah na may tatlong <i>Rak'ah</i>
88	Paglalarawan ng mga posisyon ng Salah na may apat na <i>Rak'ah</i>
89	Nakasulat na pagsasanay
89	Ginagawang pagsasanay
89	Mga Bagong Salita at Termino

Unang Aralin

Ang Salah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Maipaliwanag ang kahulugan ng Salah.
- Maramdaman ang kahalagahan ng Salah.
- Pag-usapan ang alituntunin ng Salah sa Islam.
- Matandaan ang mga Kondisyon ng Salah.

Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino



Kinakailangang napag-aralan na:

- Ang unang aralin sa yunit ng *Tahaarah*

Kaakibat na pag-aaral:

- Ang unang aralin sa yunit ng *Athkaarus-Salah*

Ang Kahulugan ng Salah

Ang Salah ay sumasakop sa maraming uri ng pagsamba tulad ng pagtayo, pagyuko, pagpatirapa, pagbasa ng Banal na Qur'an, panalangin, at pagpuri sa Allah ﷻ sa pamamagitan ng pagbigkas ng "Subhan Allah", "Allaahu Akbar", at "Al-hamdu Lillaah". Ang Salah ay matatagpuan din sa lahat ng mga batas ng mga naunang Sugo.

Ang literal na kahulugan ng Salah ay: *Du'a* (panalangin).

Ang kahulugan naman ng Salah sa Islamikong pananaw ay: ang pagsamba sa Allah ﷻ sa pamamagitan ng natatanging mga salita at mga gawa na nag-uumpisa sa pagbigkas ng "Allaahu Akbar", at nagtatapos sa pagbigkas ng "As-salaamu alaykum wa rahmatullaah".

Ang kahalagahan ng Salah

Ang Salah ay ang ikalawang haligi ng Islam. Ito ay obligado sa bawat Muslim na nasa tamang gulang at pag-iisip, lalaki man o babae. Sinuman ang hindi magsagawa ng Salah ay isang *kaafir* (walang pananampalataya, hindi Muslim). Sinabi ni Propeta Muhammad ﷺ "Ang pagitan ng isang tao patungo sa pagtatambal (*shirk*) at pagiging walang-pananampalataya (*kufir*) ay ang hindi pagsasagawa ng Salah".⁽¹⁾

Ang Hadith na ito ay sapat ng paliwanag ng kahalagahan ng Salah, na kung kaya marami sa mga 'Ulama (paham ng Islam) ang gumagamit nito bilang katibayan na ang mga hindi nagsasagawa ng Salah ng sinasadya o dahil sa katamaran, kahit pa inaamin nila na ito ay obligado, ay nasa labas na ng Islam. Walang itinuturing na uri ng pagsamba ang mga 'Ulama na kapag iniwanan ay magiging *kaafir* ang isang Muslim maliban sa Salah. Ang Salah ay haligi ng relihiyong Islam, at sinuman ang hindi magsagawa ng Salah ay winasak na niya ang kanyang Islam. Maraming mga talata mula sa Banal na Qur'an ang nagpapatunay sa kautusan ng pagsasagawa ng Salah na ang tinutukoy ay ang pag-iingat nito sa pagsasagawa sa tamang oras, tulad ng sinasabi ng Allah ﷻ:

﴿ إِنَّ الصَّلَاةَ كَانَتْ عَلَى الْمُؤْمِنِينَ كِتَابًا مَوْقُوتًا ﴾

"Walang pag-aalinlangan na ang As-Salah ay ipinag-utos sa mga mananampalataya sa takdang oras".⁽²⁾

Sinabi rin ng Allah ﷻ:

﴿ حَافِظُوا عَلَى الصَّلَوَاتِ وَالصَّلَاةِ الْوُسْطَىٰ وَقُومُوا لِلَّهِ قَانِتِينَ ﴿٢٣٩﴾ فَإِنْ خِفْتُمْ فَرِجَالًا أَوْ رُكْبَانًا فَإِذَا أَمِنْتُمْ فَأَدْكُرُوا اللَّهَ كَمَا عَلَّمَكُم مَّا لَمْ تَكُونُوا تَعْلَمُونَ ﴿٢٤٠﴾ ﴾

"At pangalagaan ninyo ang (limang obligadong) Salah at ang panggitnang Salah ('Asr). At tumayo kayo sa (harap ng) Allah ng may tapat (o taimtim) na pagsunod. At kung inyong pinangangambahan (ang inyong mga kaaway), magkagayon kayo ay magdasal ng naglalakad (o nakatayo) o nakasakay. Subalit kung kayo ay nasa payapang kalagayan, inyong alalahanin ang Allah (sa mga itinakdang oras ng pagdarasal) sapagkat kayo ay kanyang tinuruan ng anupamang hindi ninyo nalalaman."⁽³⁾

(1) Muslim at iba pa

(2) Surah An-Nisa' 4 : 103

(3) Surah Al-Baqarah 2: 238-239

Makikita mo sa talatang ito ang paliwanag na dapat isagawa ng isang Muslim ang Salah sa takdang oras at hindi niya maaaring ipagpaliban kahit sa panahon ng pagkatakot, paglalakbay, o may sakit. Sa madaling salita, kinakailangang isagawa ang Salah sa kahit anong posisyon na kaya niya: nakatayo, nakaupo o nakahiga. Walang Muslim ang malaya sa obligasyon ng Salah maliban kung mawalan na siya ng matinong pag-iisip dahil sa pagkabaliw, sobrang katandaan o *“Alzheimer’s Disease”*, o kapag dumating sa isang babae ang buwanang dalaw (*haydh*) at dugo na sanhi ng panganganak (*nifas*).

Katotohanan na maraming mga talata ng Qur’an ang humihikayat sa pagsasagawa ng Salah at nagpapaliwanag ng walang pag-aalinlangan na ang Salah ang dahilan ng tagumpay ng tao dito sa mundo at sa huling araw. Sinabi ng Allah ﷻ:

﴿ قَدْ أَفْلَحَ مَنْ تَزَكَّى، وَذَكَرَ اسْمَ رَبِّهِ فَصَلَّى ﴾

“Katiyakan, magtatagumpay ang sinumang nililinis niya ang kanyang sarili mula sa mga masasamang pag-uugali, at inaalaala niya ang pangalan ng kanyang Rabb na Tagapaglikha, at isinasagawa niya ang pagsa-Salah sa tamang oras nito.”⁽¹⁾

At sinabi ng Allah ﷻ:

﴿ قَدْ أَفْلَحَ الْمُؤْمِنُونَ، الَّذِينَ هُمْ فِي صَلَاتِهِمْ خَاشِعُونَ ﴾

“Katiyakan, nagtagumpay ang mga naniwala sa Allah at sa Kanyang Sugo na sumusunod sa Kanyang batas. Na ang kanilang mga katangian ay sila, sa kanilang pagsasagawa ng Salah, ay punung-puno ng pagkatakot.”⁽²⁾

At sinabi ng Allah ﷻ:

﴿ وَالَّذِينَ هُمْ عَلَى صَلَوَاتِهِمْ يُحَافِظُونَ، أُولَئِكَ هُمُ الْوَارِثُونَ، الَّذِينَ يَرِثُونَ الْفِرْدَوْسَ هُمْ فِيهَا خَالِدُونَ ﴾

“At sila na patuloy sa pagsasagawa ng Salah sa mga oras na itinakda para rito at ayon sa tamang pamamaraan na itinuturo ni Propeta Muhammad, Sila ang mga mananampalataya na mamanahin nila ang Al-Jannah, na siyang magmamana ng mga matataas na antas sa Al-Jannah at ang kalagitnaan nito, na sila ay mananatili roon na wala ng katapusan ang kanilang kaligayahan.”⁽³⁾

Ang hindi pagsasagawa ng Salah ay magiging dahilan ng pagpasok sa impiyernong-apoy. Sinabi ng Allah ﷻ:

﴿ مَا سَلَكَكُمْ فِي سَقَرٍ قَالُوا لَمْ نَكُ مِنَ الْمُصَلِّينَ ﴾

“Ano ba ang naging sanhi ng inyong pagpasok sa Impiyerno, na sinanhi na malasap ninyo ang init nito? Sasabihin nila: Hindi kami kabilang sa mga yaong nagsasagawa ng pagsa-Salah sa daigdig.”⁽⁴⁾

(1) Surah Al-A’la 87 : 14-15

(2) Surah Al-Mu’minun 23 : 1-2

(3) Surah Al-Mu’minun 23 : 9-11

(4) Surah Al-Muddaththir 74: ayat 42-43

Kabilang sa mga katibayan ng kahalagahan ng Salah ay ipinag-utos ito doon sa kalangitan noong gabi ng *Isra' wal-Mi'raj* (paglakbay ng Propeta Muhammad ﷺ mula sa Makkah patungong Jerusalem at pag-akyat sa kalangitan), galing sa Allah ﷻ na direktang ibinigay kay Propeta Muhammad ﷺ ng walang namagitan, habang ang mga ibang pagsamba sa Allah ﷻ ay dito ipinag-utos sa lupa sa pamamagitan ng rebelasyon na dala-dala ni Anghel Jibreel ﷺ.

Ang Salah ang unang ipinag-utos sa lahat ng uri ng pagsamba sa Allah ﷻ. Ito ay ipinag-utos sa Makkah bago mag-*Hijrah* (pangingibang-bayan), samantala ang lahat ng batas ng Islam na pagsamba at mga alituntunin ay ipinag-utos pagkatapos ng *Hijrah*.

Kabilang din na katibayan ng kahalagahan ng Salah ay ipinag-utos ng Propeta ﷺ ang pagsasanay ng mga kabataan na magsagawa ng Salah sa gulang na pitong taon kahit na hindi pa sila dumating sa tamang gulang. Sinabi ng Propeta ﷺ *"Pag-utusan ang inyong mga anak na magsagawa ng Salah pagdating nila ng pitong taong gulang, at pagdating sa gulang na sampung taon ay paluin sila kapag ayaw magsagawa ng Salah, at paghiwalayin sila ng tulugan"*.⁽¹⁾ Ito ay upang masasanay sila sa pagsasagawa ng Salah at maturuan sila upang pangalagaan ito.

Kabilang sa kahalagahan ng Salah ay ang sinabi ng Propeta ﷺ: *"Ang unang itatanong sa tao sa araw ng paghuhukom ay ang Salah, kung kaya kapag tinanggap ay siya ay tatanggapin at ang lahat ng kanyang mga gawa, at kapag tinanggihan ay tatanggihan din ang lahat ng kanyang gawa"*.⁽²⁾ Kung kaya, ang katanggap-tanggap na Salah ng isang Muslim ang kondisyon upang tanggapin ang iba pa niyang mabubuting gawain.

At ang Salah ang kahuli-hulihang bilin na inulit-ulit ni Propeta Muhammad ﷺ sa kahulihulihan ng kanyang buhay bago siya namatay. Sinabi niya *"Ang Salah, Ang Salah ..."*⁽³⁾ ng paulit-ulit hanggang sa huling hibla ng kanyang buhay.



(1) Isinalaysay ni Ahmad, Abu Dawood at iba pa

(2) Isinalaysay ni al-Tirmidhi, al-Nasa'i, at Abu Dawood, at pinatunayan ni al-Albani

(3) Isinalaysay ni Abu Dawood at pinatunayan ni Al-Albani

Ang benepisyo ng Salah sa buhay ng isang Muslim

Mayroong mga dakilang benepisyo ang Salah sa buhay ng isang Muslim sa kanyang kaligayahan, katatagan, pagiging matuwid at pagtanggap ng kanyang mga kasalanan. Ang mga benepisyo na ito ay pinapatunayan sa una ng nabanggit tungkol sa kahalagahan ng Salah. Ang mga sumusunod ay kasama sa benepisyo ng Salah:

1. Nakakatanggal ng mga kasalanan: Isinalaysay ni Abu Hurayrah رضي الله عنه na narinig niya ang Propeta ﷺ na nagsabi: *"Ano sa palagay ninyo kung mayroong ilog sa pintuan ng bahay ninyo at limang beses kayong maliligo sa loob ng isang araw, mayroon pa kayang matitirang dumi sa katawan ninyo? Sinabi nila: wala ng matitira pang dumi. Sinabi niya: Katulad iyon ng limang Salah. Tatanggalin ng Allah, dahil sa Salah, ang lahat ng kasalanan".* ⁽¹⁾



2. Ang Salah ang magbabawal ng lahat ng masamang gawain: Sinasabi ng Allah ﷻ:

﴿ إِنَّ الصَّلَاةَ تَنْهَىٰ عَنِ الْفَحْشَاءِ وَالْمُنْكَرِ وَلَذِكْرُ اللَّهِ أَكْبَرُ ﴾

"Katiyakan, ang pangangalaga sa Salah sa pamamagitan ng pagsasagawa nito nang ganap ay pumipigil sa pagsagawa ng mga kasalanan at ipinagbabawal, at walang pag-aalinlangang ang pagpuri sa Allah ay higit na mas dakila kaysa sa anupaman". ⁽²⁾

3. Ang Salah ang pinanggagalingan ng lakas na nakakatulong sa isang Muslim sa lahat ng kanyang kalagayan, na sa pamamagitan ng Salah ay makakarating sa kanya ang tulong mula sa Tagapaglikha. Sinasabi ng Allah ﷻ:

﴿ وَاسْتَعِينُوا بِالصَّبْرِ وَالصَّلَاةِ ﴾

"At humingi kayo ng tulong sa Allah sa lahat ng inyong gawain sa pamamagitan ng lahat ng uri ng pagtitiis at gayundin sa pagsa-Salah..." ⁽³⁾

Kapag nangangamba si Propeta Muhammad ﷺ sa isang bagay na mahalaga para sa kanya ay kaagad siyang nagsasagawa ng Salah. [Katulad ng nabanggit ni Abi Dawud at Ahmad.]

Ayon sa mga naunang usapin, maliwanag ang kahalagahan ng pagiging maagap sa pagsasagawa ng Salah sa tamang oras at sang-ayon sa pamamaraan ni Propeta Muhammad ﷺ, tulad ng kanyang sinabi: *"Manalangin kayo katulad ng kung papaano ninyo ako nakitang Manalangin."* ⁽⁴⁾ At ito ay nangangailangan ng maraming atensyon sa pag-aaral ng tamang pagsasagawa at mga alituntunin batay sa mga Hadith na nagpapaliwanag tungkol dito, dahil ito ay dapat malaman ng bawat Muslim. *In sha' Allah*, ito ang mapag-aaralan mo dito sa aralin tungkol sa Salah pagkatapos mong malaman kung paano ang paghahanda para sa Salah mula sa naunang aralin tungkol sa *Tahaarah* (kadalisayan).

(1) Napagkasunduan

(2) Surah Al-ankaboot 29 : 45

(3) Surah Al-Baqarah 2 : 45

(4) Al-Bukhari

Mga kondisyon ng Salah

Ang mga sumusunod ay mga kondisyon ng Salah:

1. **Islam:** Hindi tatanggapin ang Salah ng isang *kaafir*, at hindi tatanggapin sa kanya ang kahit anong uri ng pagsamba, dahil ang pagiging Muslim ay kondisyon ng pagiging tama ng pagsamba, at magiging dahilan ng pagtanggap sa mga mabubuting gawa.
2. **Al-Aql** (tamang pag-iisip): Ang kabaliktaran nito ay walang-isip. Ang walang isip ay malaya sa obligasyon ng Salah hanggang sa magka-isip.
3. **At-Tamyiz** (alam ang pagitan ng mabuti at masama): Ito ay kaalaman sa pagsamba. Kadalasan ito ay sa gulang na pitong taon. Hindi tama ang Salah ng batang hindi alam ang mabuti at masama at alam ang kahulugan ng *'ibadah* (pagsamba).
4. **An-Niyah** (intensiyon): Ito ay nasa puso lamang ng tao, na intensiyon niya ang magsagawa ng Salah. Hindi maaring bigkasin dahil kapag binigkas ay nagiging *Bid'ah* (labas sa turo ng Islam), na hindi ginawa ng Propeta ﷺ at kanyang mga *Sahaabah* (kasamahan) na sumunod sa kaniya.
5. **Pagpasok ng waqtu** (oras): Hindi maaaring magsagawa ng kahit anong Salah hangga't hindi pa dumating ang tamang oras nito, at hindi rin maaaring iantala hanggang sa katapusan ng oras nito. Insha' Allah darating ang paliwanag tungkol sa mga oras ng Salah sa susunod na Aralin.
6. **Tahaarah** (Kalinisan): Malinis mula sa *Hadath Akbar* (malaking *hadath*) sa pamamagitan ng paliligo, at malinis mula sa *Hadath Asghar* (maliit na *hadath*) sa pamamagitan ng *wudhu* (paghuhugas), tulad ng napag-aralan sa aralin ng Tahaarah.
7. **Pagtakip ng 'Awrāh** (pribadong bahagi ng katawan): Pagsuot ng damit upang matakpan ang *'Awrāh*. Ang *Awrāh* ng lalaki sa oras ng pagsa-Salah ay magmula sa pusod hanggang tuhod, at dapat din magsuot ng pantakip sa kanyang balikat. Ang babae naman ay ang kanyang buong katawan maliban sa mukha at dalawang kamay sa oras ng pagsa-Salah.
8. **Pag-iwas sa mga Najaasah** (karumihan): Ang kanyang katawan, damit, at lugar kung saan siya magsa-Salah ay kinakailangang malinis sa lahat ng uri ng karumihan. Ito ay naipaliwanag na sa aralin ng *Tahaarah*.
9. **Pagharap sa Qiblah:** Pagharap sa direksyon ng *Ka'bah*, ang Banal na lugar sa Makkah Al-Mukarramah.

Ngunit kahit kailangan ang mga kondisyon na ito upang maging tama ang Salah, hindi dapat ipagpaliban ng isang Muslim ang Salah sa takdang oras nito kahit hindi niya makumpleto ang mga kondisyon na ito na hindi sinasadya. Kapag hindi niya kayang gawin ang lahat ng kondisyon, siya ay magsa-Salah sa abot ng kanyang makakaya. Makikita natin dito ang kahalagahan ng pagsa-Salah sa takdang oras.





Nakasulat na Pagsasanay

T1. Kumpletuhin ang mga sumusunod:

- Ang kahulugan ng Salah sa salita ay:
- Ang kahulugan ng Salah sa Islamikong pananaw ay:
.....
.....
- Ang Salah ay mula sa mga haligi ng Islam.
- Ipinag-utos ang limang obligadong Salah sa noong gabi
ng bago
- Ang Salah ay sa bawat Muslim na nasa
at, lalaki man o babae.
- Pag-utusan na magsagawa ng Salah ang bata kapag umabot sa gulang na
at paluin kapag hindi magsasagawa ng Salah sa gulang na, upang
siya ay masasanay sa pagsasagawa ng Salah habang maliit pa.

T2. Isulat ang mga kondisyon ng Salah:

-
-
-
-
-
-
-
-
-

Mga Bagong Salita at Termino

Nu.	Arabiko	Pagkasulat	Kahulugan
1	صَلَاة	Salaah	Panalangin; Pagdarasal
2	قِبْلَة	Qiblah	Direksyon ng Makkah
3	فَرَض	Fardh	Itinakdang obligasyon
4	سُنَّة	Sunnah	Hindi sapilitan; Boluntaryo
5	بُلُوغ	Bulugh	Pagbibinata o Pagdadalaga
6	عَقْل	'Aql	Pag-iisip; Pangunawa; Talino
7	دُنْيَا	Dunya	Buhay sa Mundo
8	الْآخِرَة	Al-Akhirah	Ang Kabilang-Buhay
9	مُنْكَر	Munkar	Masamang gawain
10	مَعْرُوف	Ma'roof	Mabuting gawain

Pangalawang Aralin

Mga haligi at mga obligadong gawain sa Salah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Ilarawan ang mga posisyon ng Salah.
- Matandaan mo ang mga haligi ng Salah.
- Matandaan mo ang mga obligasyon sa Salah.
- Matandaan mo ang mga Sunnah (hindi sapilitan) sa Salah.
- Kilalanin ang pagkakaiba ng haligi, obligado at Sunnah.

Kabuuan ng Aralin:

- Mga Nilalaman ng Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino



Kinakailangang napag-aralan na:

- Mga aralin sa yunit ng *Tahaarah*
- Ang unang aralin sa yunit ng Salah

Kaakibat na pag-aaral:

- Ang pangalawang aralin sa yunit ng *Athkarus-Salah*

Ang Mga Posisyon sa Salah

Binubuo ang Salah ng mga **Arkaan** (mga haligi) na hindi magiging tama ang Salah kapag wala ang mga ito, mga **Waajibat** (mga gawaing obligado) na magpapawalang-bisa sa Salah kung sinadyang iwanan ngunit hindi naman nasisira ang Salah kung nakalimutan at hindi sinasadya, at mayroon ding mga **Sunnah** sa Salah na kahit hindi maisagawa ay hindi nasisira ang Salah.

Mayroong natatanging posisyon at pamamaraan ang Salah na ginagawa sa isang **rak'ah** (Yunit ng Salah) at ito ay inuulit-ulit sa bawat **rak'ah**. Ang pinakamahalagang posisyon sa Salah na bumubuo ng isang **rak'ah** ay ang pagtayo (**Qiyam**), pagyuko (**Ruku'**), pagpapatirapa (**Sujood**), at pag-upo (**Juloos**) tulad ng nakikita natin sa mga larawang ito:

Qiyam
(Pagtayo)



Ruk'u
(Pagyuko)



Sujood
(Pagpapatirapa)



Juloos
(Pagupo)



Mga Posisyon sa Salah



Mga Posisyon sa Salah

Ang mga Haligi (Arkan) ng Salah

Mayroong mga haligi (*arkan*) ang Salah na kung mawawala ay hindi magiging tama ito, at mawawalan ng saysay ang Salah kapag sinadyang hindi gawin o nakaligtaang gawin. Kapag nakaiwan ng isang haligi sa loob ng isang rak'ah dahil nakaligtaan at pagkatapos ay naalaala habang nasa posisyon pa rin siya ng Salah, mawawalan ng saysay ang rak'ah na yaon kung kaya dapat niyang ulitin at pagkatapos ay magsasagawa siya ng *Sujood Sahwu* (bayad na sujood dahil sa pagkalimot) sa katapusan ng kanyang Salah.

Ito ang halimbawa: kapag nakalimutan mo ang pagyuko (*ruku'*) sa pangalawang rak'ah at pagkatapos ay naalaala mo bago ka mag-tasleem ay dapat kang tumayo at gawin muli ng buo ang pangalawang rak'ah na iyon, pagkatapos ay mag-*sujood Sahwu* bago bigkasin ang *tasleem*. Ngunit kapag sinasadyang iwanan ang isang haligi ay mawawalan ng saysay ang buong Salah at dapat ulitin ito.

Kung ang naiwan ay ang unang pagbigkas ng "*Allahu Akbar*" (*takbeeratul-ihram*), kung gayon ay hindi pa siya nakapag-umpisa ng Salah kung kaya dapat ulitin ito.

Ang mga arkan ng Salah ay 14, tulad ng mga sumusunod:

1. **Ang Qiyam**, o pagtayo ng matuwid para sa mga may kakayahang isagawa ito, para sa obligadong Salah. Kapag hindi niya kayang tumayo dahil may sakit ay magsagawa ng Salah na nakaupo o di kaya anumang posisyon na kanyang makayanan. Ang buluntaryong Salah (*nafilah*) ay maaaring isagawa ng nakaupo ngunit ang kanyang gantimpala ay kalahati kung ihahalintulad sa Salah ng nakatayo.
2. **Ang Takbeeratul-Ihram**. Ang unang *Takbeer* (pagbigkas ng "*Allahu Akbar*") na siyang magpapasok sa isang tao sa kalagayan ng Salah. Kung ito ay nakaligtaan ang Salah ay dapat ulitin, kung kaya dapat sikaping hindi makaligtaan. DAng iba ay nagmamadaling makahabol sa Salah at maabutan ang Imam na nasa posisyon ng *Ruku'* o *sujood* ay magta-*takbeer* para sa *Ruku'* o *Sujood* ngunit nakalimutan nila ang *Takbeeratul-Ihram* na siyang magpapasok sa kanila sa Salah. Kailanganh bigkasin ito habang nakatayo.
3. **Ang pagbigkas ng Surah Al-Fatihah** (Ang Unang Kabanata sa Qur'an). Tungkol naman sa mga baguhan pa sa Islam at hindi pa naisaulo ang *Al-Fatihah*, bigkasin lamang nila ang "*SubhanAllah*" o "*Alhamdu Lillah*"; ngunit dapat nilang pagsikapan na isaulo ang *Al-Fatihah* sa lalong madaling panahon.
4. **Ang Ruku'** (pagyuko) sa bawat rak'ah.
5. **Ang pagbangon mula sa Ruku'**.
6. **Ang pagtayo ng tuwid pagkatapos ng pagbangon sa Ruku'**.
7. **Ang Sujood** (pagpapatirapa) sa bawat rak'ah ng dalawang ulit, sa pamamagitan ng paglagay ng pitong bahagi ng katawan sa lupa: ang mukha (noo at ilong), ang mga kamay (dalawang palad), ang mga tuhod at ang mga daliri ng dalawang paa.
8. **Pag-angat mula sa Sujood, at pag-upo (Juloos) sa pagitan ng dalawang Sujood.**
9. **Ang pagtigil ng may katamtamang tagal sa bawat posisyon.** Bilang halimbawa: hindi kaagad magsu-*sujood* pagkatapos niyang tumayo mula sa *ruku'*. Kailangang tumayo muna ng may katamtamang tagal upang maibalik sa dating lugar ang mga himaymay ng kalamnan bago mag-*sujood*.

10. Ang pag-upo (*Juloos*) para sa pinakahuli o ika-dalawang *tashahhud*.
11. Ang pinakahuling *tashahhud*, ito ay ang pagbigkas ng "*Attahiyyatul Lillah...*" hanggang sa katapusan.
12. Ang *Salah Ibrahimiyah* sa pinakahuling *Tashahhud*. Ito ang pagbigkas ng "*Allahumma salli 'ala Muhammad wa 'ala ali Muhammad ...*" hanggang sa katapusan.
13. Ang pagsasagawa ng mga haligi na magkasunod-sunod. Kaya ang *sujood* ay hindi dapat mauna sa *ruku'* o ang *juloos* ay hindi dapat mauna sa *sujood*.
14. Ang *Tasleem*. Ito ang pagbigkas ng "*As-salamu 'alaykum wa rahmatullah*" sa katapusan ng *Salah*.

Ang mga obligadong gawain (*wajibat*) sa *Salah*

Ang mga *wajibat* sa *Salah* ay ang mga naisa-batas na mga gawain at mga salita na kinakailangang gawin. Mawawalan ng saysay ang *Salah* kapag sinadyang hindi gawin ang mga ito, at maaari namang magsagawa ng *sujood sahwu* kapag nakalimutan lamang.

Ang pagkakaiba ng mga *wajibat* sa mga *arkan* ng *Salah* ay dapat gawin ulit ang mga *arkan* kapag nakalimutan, habang ang *wajib* ay sapat nang mag-*sujood sahwu* pagkatapos ng *Salah* at hindi na kailangang gawin muli. Ngunit kapag ang *arkan* o *wajib* ay sinadyang hindi gawin, mawawalan ng saysay ang buong *Salah* at dapat ulitin.

Ang walong obligadong gawain sa *Salah*

1. Ang lahat ng *Takbeer* (pagbigkas ng "*Allahu Akbar*") na binibigkas mula sa isang posisyon patungo sa isang posisyon, maliban sa *Takbeeratul-Ihram* na binibigkas sa simula ng *Salah* dahil ito ay kasama sa mga *arkan* (haligi) ng *Salah*.
2. Ang pagbigkas ng "*Sami' Allahu liman hamidah*" ng *Imam* (nangunguna sa pagsa-*Salah*) at kapag mag-isang nagsa-*Salah*. Hindi ito binibigkas ng mga tagasunod (*mamum*) ng *Imam*.
3. Ang pagbigkas ng "*Rabbana wa lakal hamd*" ng *Imam*, ng mga *mamum* at kapag mag-isang nagsa-*Salah*.
4. Ang pagbigkas ng "*Subhana rabbiyal-'adheem*" ng isang beses habang naka-*ruku'*.
5. Ang pagbigkas ng "*Subhana rabbiyal a'la*" ng isang beses habang naka-*sujood*.
6. Ang pagbigkas ng "*Rabbighfir lee*" ng isang beses sa pag-upo sa pagitan ng dalawang *sujood*.
7. Ang *Juloos* (pag-upo) para sa unang *tashahhud*.
8. Ang unang *Tashahhud*. Ito ay ang pagbigkas ng "*At-tahiyyatul Lillah...*" hanggang sa katapusan.

Kapag sinasadyang hindi gawin ng sinuman ang isa sa walong obligado na ito ay mawawalan ng saysay ang kanyang *Salah*, ngunit kapag nakalimutan lamang ay kinakailangan siyang magsagawa ng *Sujood Sahwu*.

Ang mga gawaing Sunnah sa Salah (inirerekomenda at hindi sapilitan)

Ito ay ang lahat ng mga gawain at mga salitang nabanggit sa pamamaraan ng pagsasagawa ng Propeta ﷺ ng Salah na hindi napabilang sa mga haligi at mga obligado. Ang pagsasagawa ng Sunnah ay hindi kondisyon upang magiging tama ang Salah, at kapag naiwan ng sinasadya o hindi sinasadya ay hindi mawawalan ng saysay ang Salah. Ang pagsasagawa nito ay upang makumpleto at maging ganap ang Salah at para sa karagdagan gantimpala, kung kaya makabubuti sa isang Muslim na sikapin niyang gawin ang mga ito upang ang kanyang Salah ay malapit sa Salah ni Propeta Muhammad ﷺ.

Ang mga Sunnah na ito ay marami at maaari nating hatiin sa mga *Sunnah qawliyah* (sunnah na binibigkas) at mga *Sunnah fi'iliyah* (sunnah na ginagawa):

Una: Ang mga *Sunnah Fi'iliyah* (sunnah na ginagawa)

1. Ang pagtaas ng dalawang kamay sa tapat ng dalawang tenga o dalawang balikat sa apat na panahon:
 - a. pagbigkas ng *takbeeratul-Ihram* sa umpisa ng Salah.
 - b. pagbigkas ng *takbeer* bago mag-*ruku'* (pagyuko).
 - c. pagtayo mula sa *ruku'*.
 - d. pagbigkas ng *takbeer* kapag tatayo mula sa unang *tashahhud*.
2. Paglalagay ng kanang palad sa ibabaw ng kaliwang braso sa dibdib o sa ibaba ng pusod.
3. Paglagay ng dalawang kamay sa dalawang tuhod sa pag-*ruku'*.
4. Ang paningin ay kailangang nakatutok sa lugar na kung saan *magsu-sujood*.
5. Ang braso ay malayo sa tagiliran ng katawan at ang tiyan ay malayo sa hita habang *naka-sujood*.
6. Ang braso ay hindi dapat nakadikit sa lupa habang *naka-sujood*.
7. Pagpapantay ng ulo at likod habang *naka-ruku'*.
8. Pag-upo sa kaliwang paa habang ang kanang paa ay nakatayo sa unang *tashahhud*.



Pangalawa: Ang mga *Sunnah Qawliyyah* (sunnah na binibigkas)

1. Pagbigkas ng *Du'a Istiftah* (pambungad na panalangin): Ito ay binibigkas pagkatapos ng *Takbeeratul-Ihram* at bago bigkasin ang *Al-Fatihah*. Mayroong iba't ibang uri ang *Du'a* na ito na naisalaysay mula sa Propeta na tatalakayin sa Aralin ng *Athkarus-Salah* (mga binibigkas sa Salah).
2. Pagbigkas ng *Isti'adha* ("*A'oodhu Billahi minas-shaytanir-rajeem*") at *Basmalah* ("*Bismillahir-Rahmanir-Raheem*") bago bigkasin ang *Al-Fatihah*, at ang pagbigkas ng "*Ameen*" pagkatapos ng *Al-Fatihah*.
3. Pagbigkas ng mga ayat (talata) ng Banal na Qur'an pagkatapos ng *Al-Fatihah* sa unang dalawang Rak'ah.
4. Pagbigkas ng *Athkar* (pag-alaala) para sa *ruku'* at *sujood* ng higit sa isa.
5. Ang pagbigkas ng *Du'a* pagkatapos ng huling *tashahhud*, gaya ng:

"Allahumma inni a'oodhu bika min athabi jahannam, wa athabil-qabr, wa fitnatil-mahya wal-mamat, wa fitnatil-maseehid-dajjal."

"O Allah ako ay nagpapakupkop sa Iyo mula sa kaparusahan ng impiyernong-apoy, sa kaparusahan sa libingan, sa mga pagsubok ng buhay at kamatayan, at sa pagsubok ng *Al-Maseeh Ad-Dajjal*".⁽¹⁾

At may iba pang mga *Sunnah* na nais naming ipabatid sa inyo sa pag-aaral natin ng posisyon ng Salah.

Dapat sikapin ng bawat Muslim na kumpletuhin ang pagsasagawa ng Salah ayon sa *Sunnah* ni Propeta Muhammad ﷺ upang makamantan ang dakilang gantimpala at bilang tunay na pagsunod sa pamamaraan ng Propeta ﷺ, tulad ng kanyang sinabi: "*Manalangin kayo, katulad ng kung papaano ninyo ako nakitang manalangin*".⁽¹⁾

(1) Al-Bukhari

Nakasulat na Pagsasanay

T1. Piliin ang alituntunin ng mga sumusunod na gawa at mga salita sa pamamagitan ng paglalagay ng X sa kahon kung saan ang tamang kasagutan:

Nu.	Mga gawain at mga binibigkas sa Salah	Haligi (rukun)	Obligado (wajib)	Sunnah
1	Takbeeratul Ihram (Unang takbir)			
2	Pagbigkas ng "Subhana Rabbiyal Adheem" ng tatlong beses sa pagyuko (ruku').			
3	Pagbigkas ng Al-Fatihah			
4	Ang unang Tashahhud			
5	Du'a (panalangin) ng Istiftah			
6	Ang pagtuon ng tingin sa lugar kung saan magpapatirapa.			
7	Pagbigkas ng "Subhana Rabbiyal A'la" ng minsan lang sa Sujood.			
8	Ang juloos (pag-upo) sa huling Tashahhud.			
9	Pagbigkas ng mga Talata ng Qur'an pagkatapos ng Al-Fatihah sa una at pangalawang Rak'ah.			
10	Pagkasunod-sunod ng mga haligi (arkan).			
11	Ang Takbeer bago yumuko (ruku').			
12	Ang Salah Ibrahimiyah "Allahumma salli ala Muhammad...." hanggang katapusan.			
13	Pag-upo sa pagitan ng 2 sujood			
14	Pagtayo mula sa ruku'.			

T2. Ipaliwanag mo ang alituntunin ng mga sumusunod:

1. Nakaiwan ng isa sa mga haligi (*rukun*) ng Salah ng hindi sinasadya:

.....

2. Nakaiwan ng isa sa mga obligado (*wajib*) ng Salah ng sinasadya:

.....

3. Nakalimutan ang pagbigkas ng "*Allaahu Akbar*" bago tumayo sa pangalawang *Rak'ah*:

.....



Ginagawang Pagsasanay

Ipakita ang mga sumusunod:

1. Ang tamang posisyon ng pagyuko (*ruku'*).
2. Ang tamang posisyon ng pagpapatirapa (*sujood*).
3. Magsasagawa ng kumpletong dalawang *Rak'ah* gamit ang lahat ng mga haligi (*arkan*), mga obligado (*waajibat*) at mga Sunnah ng Salah.

Mga Bagong Salita at Termino

Nu.	Arabiko	Pagkasulat	Kahulugan
1	رُكْعَةٌ	Rak'ah	Yunit ng Salah
2	رَفَعَ	Rafa'a	Itaas; lakyat
3	وَاجِبٍ	Waajib	Obligado
4	رُكْنٌ	Rukn	Haligi
5	قِيَامٍ	Qiyaam	Pagtayo
6	رُكُوعٍ	Ruku'	Pagyuko
7	سُجُودٍ	Sujood	Pagpapatirapa
8	جُلُوسٍ	Juloos	Pagupo
9	عَمَدٍ	Amad	Sinadya
10	سَهْوٍ	Sah-wu	Nakalimutan, Nalaktawan

Pangatlong Aralin

Ang mga obligadong Salah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahang sa kapahintulutan ng Allah ﷻ na:

- Mabatid ang kahalagahan ng pagsasagawa ng Salah sa tamang oras.
- Maaalaala ang mga bilang ng Rak'ah ng bawat Salah.
- Mababatid mo ang oras ng pagpasok at katapusan ng bawat Salah.
- Maaalaala mo ang mga nagpapawalang bisa sa Salah.

Kabuuan ng Aralin:

- Mga Nilalaman ng Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino



Kinakailangang napag-aralan na:

- Mga naunang aralin sa yunit ng Salah
- Mga Aralin sa yunit ng *Tahaarah*.
- Ang pangalawa at pangatlong aralin sa yunit ng *Athkarus-Salah*

Ang mga Obligadong Salah, at mga bilang ng Rak'ah

Ito ang limang Salah na obligado sa bawat Muslim na nasa tamang gulang at kaisipan. Hindi ito maaaring alisin maliban sa mga kababaihan na dinatnan ng buwanang dalaw (*haydh*) at dugo sanhi ng panganganak (*nifas*). Hindi rin pinahihintulutang maantala sa takdang oras nito. Nagkakaisa ang mga paham ('*Ulama*) na kapag hindi isinagawa ng isang Muslim ang Salah dahil sa pagtangi ng pagiging obligado nito ay isang hindi mananampalataya, at ganoon din kapag hindi isinagawa dahil sa katamaran at hindi pagpapahalaga ay itinuturing din na nasa labas na ng Islam, base sa tamang pananaw ng mga '*Ulama*.

Talaan ng mga bilang ng Rak'ah ng limang obligadong Salah at uri ng pagbigkas

Nu.	Ang Salah	Bilang ng Rak'ah	Uri ng pagbigkas
1	Fajr	2	Malakas
2	<u>D</u> huhr	4	Tahimik
3	'A <u>s</u> r	4	Tahimik
4	Maghrib	3	Malakas sa una at pangalawa, tahimik sa pangatlo.
5	'Isha	4	Malakas sa una at pangalawa, tahimik sa pangatlo at pang-apat.

Ang kabuuang bilang ng rak'ah na ipinataw sa loob ng isang araw ay 17 rak'at

Mga Oras ng mga Obligadong Salah

Sinabi ng Allah ﷻ:

﴿ إِنَّ الصَّلَاةَ كَانَتْ عَلَى الْمُؤْمِنِينَ كِتَابًا مَوْقُوتًا ﴾

"Katiyakan, ang pagsasagawa ng Salah ay ipinapatupad sa mga mananampalataya sa takdang oras." ⁽¹⁾

Ang Talata na ito ay nagpapatunay na ang mga obligadong Salah ay mayroong takdang oras na kung kaya hindi maaaring mauna o maantala, kaya kabilang sa kondisyon ng tamang Salah ay ang pagpasok ng oras ng Salah (*Wagt*), tulad ng napag-aralan natin sa mga Kondisyon ng Salah. Sinabi ng Allah ﷻ:

﴿ حَظُّوْا عَلَى الصَّلَوَاتِ وَالصَّلَاةِ الْوُسْطَىٰ وَقُومُوا لِلَّهِ قَانِتِينَ ﴾

"At pangalagaan ninyo ang (limang obligadong) Salah at ang pang-gitnang Salah ('Asr). At tumayo kayo sa (harap ng) Allah ng may tapat (o taimtim) na pagsunod." ⁽²⁾

(1) Suran An-Nisa' 4 : 103
(2) Surah Al-Baqarah 2 : 238

Kabilang sa pangangalaga ng Salah ay ang pagsasagawa nito sa takdang oras, at ang pinakamahusay ay isagawa ito sa unang pagpasok ng kanyang oras. Bawal ipagpaliban ang oras nito ng walang sapat na dahilan, tulad ng sinabi ng Allah ﷻ:

﴿قَوْلًا لِّلْمُصَلِّينَ، الَّذِينَ هُمْ عَنْ صَلَاتِهِمْ سَاهُونَ﴾

“Samakatuwid, matinding kaparusahan at kapahamakan sa mga yaong nagsasagawa ng Salah nang may pagkukunwari na wala sa pagiging taimtim nito, na hindi nila ito ginagawa sa tamang kaparaanan at wala ito sa tamang oras na itinakda.”⁽¹⁾

﴿فَخَلَفَ مِنْ بَعْدِهِمْ خَلْفٌ أَضَاعُوا الصَّلَاةَ وَاتَّبَعُوا الشَّهْوَةَ ۖ فَسُوفَ يَلْقَوْنَ عَذَابًا﴾

At sinabi pa ng Allah ﷻ: *“At dumating pagkatapos nila na mga biniyayaan ang mga masasama na hindi na nagsasagawa ng Salah, at ang sinunod lamang nila ay ang kanilang sariling kagustuhan o pagnanasa, na kung kaya walang pag-aalinlangang matatamo nila ang napakasama at pagkasawi sa Impiyerno.”*⁽²⁾

Ang bawat obligadong Salah ay mayroong takdang oras na dapat malaman at agapan. Naipahayag ang mga takdang oras na ito sa sumusunod na mga Hadith:

Mula kay Abdullah bin Amr ؓ na sinabi ng Propeta ﷺ: *“Ang oras ng Dhuhr ay kapag ang araw ay lumampas na ng katanghaliang-tapat hanggang maging kasing haba ng isang tao ang kanyang anino, at ito naman ang simula ng oras ng Asr. Ang oras ng Asr ay hanggang mag kulay dilaw ang araw (habang ito ay papalubog). Ang Oras ng Maghrib ay hanggang mawala ang takip-silim sa kanluran. Ang oras ng ‘Isha ay hanggang hating-gabi. Ang Oras ng Fajr ay magsisimula sa buwang-liwayway hanggang bago sumikat ng araw. Kapag sumisikat na ang araw ay huwag nang magsalah, dahil ang araw ay sumisikat sa pagitan ng dalawang sungay ng satanas.”*⁽³⁾ At kay Muslim din mula sa Hadith ni Buraydah ؓ tungkol sa Salah ng ‘Asr *“At ang araw ay kulay malinaw na puti.”*⁽⁴⁾ Mula naman sa Hadith ni Abi Musa ؓ *“Ang araw ay nananatiling mataas pa.”*⁽⁵⁾

Ang Talaan na nagpapaliwanag ng mga oras ng mga obligadong Salah:

Nu.	Salah	Umpisa ng Oras	Hangganang Oras
1	Fajr	Bukang-liwayway	Pagsikat ng araw
2	Dhuhr	Araw ay lumampas na ng katanghaliang-tapat.	Maging magkatulad ang haba ng anino ng mga bagay.
3	‘Asr	Hangganang oras para sa Salah ng Dhuhr	Kapag nagkulay dilaw na ang Araw bago ang paglubog nito
4	Maghrib	Paglubog ng araw	Kapag nawala na ang pulang liwanag (takip-silim)
5	‘Isha	Hangganang oras para sa Salah ng Maghrib	Hatinggabi, at sa pagsikat ng buwang-liwayway kapag kailangan.

(1) Surah Al-Maon 107 : 4-5

(2) Surah Maryam 19 : 59

(3) Muslim, Ahmad, An-Nasa'i at Abu Dawood

(4) Bukhari at Muslim

(5) Muslim, Ahmad, An-Nasa'i at Abu Dawood

Ang pagbabayad ng obligadong Salah

Dapat maging maagap ang bawat Muslim sa pagsasagawa ng Salah sa unang oras nito, ngunit kapag nangyaring nakaligtaan ang Salah ng may sapat na dahilan katulad ng nakatulog o nakalimutan ay dapat sa kanya ang kaagarang pagbabayad sa Salah na ito sa oras ng kanyang pagkagising o pagka-alaala, kahit ito ay matapat sa mga oras na bawal ang mag-Salah, dahil sinabi ni Anas bin Malik na sinabi ng Propeta ﷺ: *"Sinuman ang nakalimot ng Salah ay kinakailanan niyang isagawa kaagad ito sa oras na naalaala niya. Walang ibang kapalit maliban dito."* ⁽¹⁾ Sinabi rin ng Propeta ﷺ: *"Sinuman ang nakalimot ng Salah o nakatulog ay kinakailangang isagawa ang Salah sa oras na naalaala niya."* ⁽²⁾

Sinabi ng Propeta ﷺ: *"Kapag nakalimutan ng isa sa inyo ang Salah ay isasagawa niya sa oras na naalaala niya, dahil ang Allah ay nagsasabi ng ganito:*

﴿ وَأَقِمِ الصَّلَاةَ لِذِكْرِي ﴾

'Isagawa mo ang Salah bilang pag-alaala sa Akin.' ^{(3) (4)}

Dapat mong bayaran ang mga Salah na nakaligtaan mo batay sa pagkasunod-sunod nito. Kapag ikaw ay nakapasok sa *Masjid* na ang Salah ay *'Asr* at nalaala mo na ikaw ay hindi pa nakapag- Salah ng *Dhuhr* ay dapat mong bayaran muna ang *Dhuhr*. Ngunit kapag nag-umpisa na ang *'Asr* ay mag- Salah ka na rin kasama ang Imam ngunit ang *Niyah* mo ay *Dhuhr*, at pagkatapos ay mag- Salah ka na ng *'Asr*.

Tungkol naman sa sinasadyang pagpapaliban ng Salah sa tamang oras nito ng walang sapat na dahilan, ito ay isang malaking kasalanan na dapat ang agarang pagta-*Tawbah* (pagbabalik-loob) sa Allah ﷻ at huwag ng ulitin pa, at agaran din ang pagbabayad sa lahat ng nakaligtaan.

Ang mga nakakasira ng Salah (Mubtilatus-Salah)

Ang mga sumusunod ay mga bagay na nakakasira ng Salah:

1. Pagsasalita
2. Pagtawa
3. Sunod-sunod na galaw ng katawan na hindi kinakailangan.
4. Kapag nangyari ang mga bagay na nakakasira ng *Taharah*.
5. Pagbaling palayo mula sa direksyon ng *Qiblah*
6. Ang pagkain o pag-inom.
7. Pagtanggap ng takip sa *'Awrāh* ng sinasadya.
8. Pagsira ng intensyon o pagdadalawang isip.
9. Pagdagdag o pagbaliktad sa isang haligi ng sinasadya.
10. Pakikipag-unahan sa *Imam* sa pagsagawa ng mga *arkaan* ng Salah, tulad ng pangunguna sa kanya sa pagpapatirapa (*sujood*).

(1) Bukhari at Muslim

(2) Bukhari at Muslim

(3) Muslim

(4) Surah Taha 20 : 14

Nakasulat na Pagsasanay

T1. Magbigay ng katibayan mula sa Qur'an na nagsasabi na kailangang magsasagawa ng mga obligadong Salah sa takdang Oras.

.....

T2. Magbigay ng dalawang tanggap na dahilan kapag ang isang Muslim ay nagpaliban ng Salah sa takdang oras:

1.

2.

T3. Kumpletuhin ang sumusunod na talaan: isulat ang bilang ng Rak'ah at mga oras ng umpisa at katapusan ng bawat Salah:

Nu.	Salah	Bilang ng Rak'ah	Unang Oras	Huling Oras
1	Fajr			
2	<u>Dhuhr</u>			
3	'Asr			
4	Maghrib			
5	'Isha			

T4. Ituro ang pinahihintulatang gawain (mubah) at nakakasira ng Salah (*Mubtilatus - Salah*) sa mga sumusunod:

Nu.	Gawain	Mubah	Mubtilatus - Salah
1	Pagbigkas ng "subhanAllah" kapag nagkamali ang Imam.		
2	Sunod-sunod na paggalaw ng walang sapat na dahilan.		
3	Pakikipag-unahan sa Imam sa isang haligi.		
4	Pagdagdag ng haligi o wajib ng sinasadya.		
5	Ang pagkain o pag-inom.		
6	Pagbuhat ng maliit na bata habang nagsa- Salah.		
7	Pag-iyak dahil takot sa Allah ﷻ.		
8	Ang pagsasalita		
9	Pagbaling palayo mula sa direksyon ng Qiblah		
10	Pagsagot ng pagbati (<i>salaam</i>) sa pamamagitan ng senyas.		
11	Ang pagbaligtad ng pagsasagawa ng haligi.		



Ginagawang Pagsasanay

- Isagawa ang Salah ng Maghrib.
- Isagawa ang Salah ng 'Asr.

Mga Bagong Salita at Termino

Nu.	Arabiko	Pagkasulat	Kahulugan
1	وقت	Waqt	Oras
2	شُرُوق	Shurooq	Pagsikat ng araw
3	زَوَال	Zawaal	Paglampas ng Katanghaliang-tapat
4	الليل	Al-Layl	Gabi
5	سِرِّ	Sirr	Lihim; Tago; Sikreto
6	جَهْر	Jahr	Lantad; Hayagan
7	آخِر	Aakhir	Huli
8	قَدَم	Qadam	Paa
9	نَوْم	Nawm	Tulog
10	نِسْيَان	Nisyaan	Pagkalimot



Pang-apat na Aralin

Paglalarawan ng mga Salah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Maaayos mo ang mga posisyon ng Salah sa tamang pamamaraan.
- Magsagawa ng Salah sa tamang pamamaraan.

Kabuuan ng Aralin:

- Mga Nilalaman ng Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino



Kinakailangang napag-aralan na:

- Ang una at pangalawang Aralin sa yunit ng Salah.

Mga kaakibat na kurso:

- Ang pangatlong aralin sa yunit ng Athkarus-Salah.




Paglalarawan ng pagkakasunod-sunod ng mga posisyon ng Salah na may dalawang rak'ah, tulad ng Salah ng Fajr at mga Sunnah

Unang Rak'ah



Pangalawang Rak'ah



Salah ng Fajr



Salah ng Fajr

Paglalarawan ng pagkakasunod-sunod ng mga posisyon ng Salah na may tatlong rak'ah, tulad ng Maghrib

Unang Rak'ah



Pangalawang Rak'ah



Salah ng Maghrib



Salah ng Maghrib

Pangatlong Rak'ah



Paglalarawan ng pagkakasunod-sunod ng mga posisyon ng Salah na may apat na rak'ah, tulad ng Dhuhr, 'Asr at 'Isha

Unang Rak'ah



Salah ng Duhr



Salah ng Duhr

Pangalawang Rak'ah



Salah ng Asr



Salah ng Asr

Pangatlong Rak'ah



Salah ng Isha



Salah ng Isha

Pang-apat na Rak'ah





Nakasulat na Pagsasanay

T1. Kumpletuhin ang mga sumusunod: Ang limang Obligadong Salah sa loob ng isang araw at gabi:

1. Salah Bilang ng Rak'ah
2. Salah Bilang ng Rak'ah
3. Salah Bilang ng Rak'ah
4. Salah Bilang ng Rak'ah
5. Salah Bilang ng Rak'ah



Ginagawang pagsasanay

1. Isagawa ang isang halimbawa ng tamang pamamaraan ng Salah ng Maghrib kasama ang mga Sunnah.
2. Isagawa ang isang halimbawa ng tamang pamamaraan ng Salah ng 'Asr kasama ang mga Sunnah.

Mga Bagong Salita at Termino

Nu.	Arabiko	Pagkasulat	Kahulugan
1	صَلَاةُ الْفَجْرِ	Salatul-Fajr	Ang Salah ng Fajr
2	صَلَاةُ الظُّهْرِ	Salatul- <u>D</u> huhr	Ang Salah ng <u>D</u> huhr
3	صَلَاةُ الْعَصْرِ	Salaatul-'Asr	Ang Salah ng 'Asr
4	صَلَاةُ الْمَغْرِبِ	Salaatul-Maghrib	Ang Salah ng Maghrib
5	صَلَاةُ الْعِشَاءِ	Salaatul-'Isha'	Ang Salah ng 'Isha'
6	نَافِلَةٌ	Naafilah	Boluntaryo
7	السَّلَامُ	As-Salaam	Ang Kapayapaan
8	الْأَخِيرِ	Al-Akheer	Ang Panghuli
9	التَّحِيَّاتِ	At-tah <i>h</i> iyaat	Ang Pagbati
10	قَضَاءُ	Qad <i>h</i> a'	Hukom; Kapasyahan

"Katiyakan, ipinagkaloob Namin sa iyo, O Muhammad, ang pambungad ng Qur'an, na pitong talata, na inuulit-ulit ang pagbibigkas tuwing Salah, at ipinagkaloob Namin sa iyo ang Dakilang Qur'an." ⁽¹⁾

Yunit ng Athkarus-Salah (Ang mga binibigkas sa Salah)



Talaan ng mga Nilalaman

Pahina	Mga Paksa
92	Unang Aralin – Kahalagahan ng wikang Arabe
93	Pangkalahatang panuntunan sa mga maaaring bigkasin sa Salah
93	Ang kahalagahan ng tamang pagbasa at pagbigkas
94	Ang paggamit ng ibang letra sa pagsulat ng Arabe (pagsasatitik)
95	Ang buong Alpabeto ng Arabe, at ang katumbas nito sa Tagalog
96	Ang dalawang Shahadah (Testimonya ng pagsaksi)
96	Ang bibigkasin sa pagsasagawa ng <i>Wudhu'</i>
97	Nakasulat na Pagsasanay
97	Ginagawang Pagsasanay
98	Mga Bagong Salita at Termino
100	Pangalawang Aralin - Ang mga Binibigkas sa Salah (1)
101	Ang binibigkas sa posisyon na nakatayo
103	Nakasulat na Pagsasanay
103	Ginagawang pagsasanay
104	Mga Bagong Salita at Termino
106	Pangatlong Aralin: Ang mga Binibigkas sa Salah (2)
107	Ang mga binibigkas sa posisyon na nakayuko (<i>ruku'</i>)
108	Ang mga binibigkas sa posisyon na pagpapatirapa (<i>sujood</i>)
109	Ang mga binibigkas sa posisyon na naka-upo (<i>juloos</i>)
110	Ang mga binibigkas pagkatapos ng Salah
113	Nakasulat na Pagsasanay
113	Ginagawang Pagsasanay
114	Mga Bagong Salita at Termino

Unang Aralin

Kahalagaan ng wikang Arabiko

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Maipapaliwanag ang maaaring sabihin ng sinuman na hindi pa nakakasaulo ng mga binibigkas sa Salah.
- Malaman ang kahalagahan ng tamang pagbigkas ng mga binabasa sa Salah.
- Mabigkas mo ng tamang pagbigkas ang *Shahada* (Pagsaksi).
- Maaalaala mo ang bibigkasin sa pag-uumpisa ng *Wudhu*.

Kabuuan ng Aralin:

- Mga Nilalaman ng Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino

Kinakailangang napag-aralan na:

- Pag-aaral ng yunit ng *Taharah*

Kaakibat na pag-aaral:

- Ang unang aralin sa yunit ng Salah



Pangkalahatang panuntunan sa mga maaaring bigkasin sa Salah

Kailangan na ang lahat ng *Thikr* (binibigkas) sa Salah ay sa wikang Arabe. Ito ang wika ng Banal na Qur'an na Salita ng *Rabb* (panginoon) ng sanlibutan. At dahil ang pagsasaulo ng mga bibigkasin sa Salah mula sa Qur'an tulad ng Suratul-Fatihah at iba pang mga *Thikr* ay nangangailangan ng panahon lalo na sa mga bagong Muslim, kung ganun maaari nilang isaulo at pansamantalang ulit-ulitin ang mga pangunahing *Thikr* tulad ng "*Allahu Akbar*", "*Subhan Allah*", at "*Alhamdu Lillah*".

Bigkasin ang "*Allahu Akbar*" upang umpisahan ang Salah, at inulit-ulit ito tuwing lilipat sa ibang posisyon. Kung kaya, dapat bigkasin ang "*Allahu Akbar*" kapag yuyuko, pagpapatirapa, pagbangon mula sa pagpapatirapa at iba pa. Habang nagsa-Salah ay maaaring ulit-ulitin ang mga *Thikr* gaya ng "*Subhan Allah*" at "*Alhamdu Lillah*". Tapusin ang Salah sa pagbigkas ng "*As-salamu 'alaykum wa rahmatullah*".

Magkagayunpaman, kinakailangan mong pagsumikapan na maisaulo ang *Suratul-Fatihah* at iba pang mga Surah sa Banal na Qur'an upang bigkasin sa pagsasagawa mo ng Salah. Wala namang masama kung isulat mo sa papel at ilagay mo kung saan ka nakaharap upang basahin hanggang sa ganap ng maisaulo. Ngunit dapat mong malaman na ito ay pansamantala lamang sa maikling panahon habang ikaw ay nagsusumikap na maisaulo ang mga talata at mga *Thikr* na kinakailangan.

Katiyakan, ang pagsasaulo ng Banal na Qur'an at pagbasa dito ay may malaking gantimpala. Mayroon ding gantimpala ang sinuman na nahihirapan at nagsusumikap upang maisaulo ang Banal na Qur'an. Isinalaysay ni Ai'sha رضي الله عنها na sinabi ng Propeta ﷺ: "*Sinuman ang bumibigkas ng Qur'an nang mahusay at kagalingan ay mapapabilang sa mga masunurin at sa mga mararangal na anghel, at ang sinuman na bumibigkas nito ng pahintu-hinto at may kahirapan ay pagkalooban ng dobleng gantimpala.*"⁽¹⁾

Ang kahalagahan ng tamang pagbasa at pagbigkas

Katiyakan, ang Qur'an ay Salita ng Allah ﷻ. Hindi maaaring baguhin ang pagbigkas ng mga *harf* (letra) maliban sa kung paano ito ipinahayag ng Allah ﷻ. Hindi rin maaaring bigkasin sa pamamagitan ng pagsasalin, o kaya ay isulat sa ibang mga letra maliban sa Arabe.

Dahil sa ang Salah ay nangangailangan ng kaalaman at pagbigkas ng mga Talata ng Banal na Qur'an, kung kaya ang pag-aaral ng tamang pagbigkas sa mga letrang Arabe at mga Talata sa Qur'an ay pinaka pangunahin sa buhay ng isang Muslim at dapat pagsikapan mula sa umpisa.

Katunayan, tinanggap ng Propeta ﷺ ang Qur'an mula kay Anghel Jibreel جبرائيل عليه السلام sa pamamagitan ng pakikinig, at ganoon din ang pamamaraan kung paano pinag-aralan ng mga *Sahabah* (mga kasama ng Propeta) at mga salinlahi ng mga Muslim na sumunod sa kanila.

Kung kaya ang pag-aaral ng pagbigkas ng mga letrang Arabiko at mga Talata sa Qur'an ay hindi maaaring basahin sa pamamagitan ng pagsulat gamit ang mga letra na iba sa letrang Arabie. Bagkus, dapat itong pakinggan mula sa isang guro o mula sa naikopyang pagbasa ng Qur'an ng paulit-ulit hanggang sa masanay sa tamang pagbigkas.

Ang pagbabasa ng Qur'an ay nangangailangan ng pag-aaral ng *Tajweed*, kung kaya dapat sa bawat Muslim na pag-aralan ang Qur'an kasama ang isang magaling na guro upang maitama niya ang pagbigkas at mapaganda ang pagbasa.

(1) Bukhari at Muslim

Ang kahulugan ng **Tajweed** ay: Pagbasa ng Qur'an kung paano ito ipinahayag sa Propeta ﷺ, at kung papaano binibigkas ng Propeta ﷺ.

Ang paggamit ng ibang letra sa pagsulat ng Arabiko (pagsasatitik)

Sinusubukan ng iba na mapadali ang pagsasaulo ng *Suratul-Fatihah* o ibang mga *Thikr* na dapat bigkasin sa wikang Arabe sa pamamagitan ng pagsulat nito sa ibang wika tulad ng Tagalog.

Dahil sa mayroong mga letrang Arabe na walang katumbas sa ibang wika tulad ng ح at ض, ang iba ay gumagamit ng pinakamalapit na tunog nito, tulad ng pagbigkas ng ح gamit ang letrang 'H'. Ito ay maaaring maging dahilan ng pagkaiba ng pagbigkas sa isang salita at nagbibigay ng ibang kahulugan sa tinutukoy.

Sa Kurikulum na ito ay pinilit naming maging madali sa pamamagitan ng paggamit ng letra ng wika ng mag-aaral sa pagsulat ng *Surah Al-Fatihah* at ang mga *Thikr* sa Salah (nang pansamantala lamang). Ginamit namin ang mga letra na mayroong pinakamalapit na tunog para sa mga letra ng Arabe na walang katumbas sa ibang wika. Ang mga letrang ito ay nakasulat ng mabigat (**bold**) o di kaya'y may salungguhit (underline). Pagmasdan ang halimbawa:

بِسْمِ اللَّهِ الرَّحْمَنِ الرَّحِيمِ

Bismillahir-rahmanir-raheem

Ginamit namin dito ang letrang "H" katumbas ng letrang ح sa wikang Arabe. Ngunit dahil ang letrang "H" ay binibigkas ng "ha", ginawa naming mabigat (**bold**) at may salungguhit (underline) **h** ang pagkakasulat upang ipaalam sa mag-aaral na ang pagbigkas ay magkaiba at malapit lamang sa tunog ng letrang Arabe. Na kung kaya gumawa kami ng talaan upang ipakita ang mga letra at mga halimbawa upang makatulong sa mambabasa na makita kung ano-ano ang mga letra na walang katumbas sa Arabe.

ا ب ت ث ج ح خ
د ذ ر ز س ش ص
ض ط ظ ع غ ف ق
ك ل م ن ه و ي

Ang buong Alpabeto ng Arabe at ang katumbas na pagbigkas nito sa Tagalog

Nu.	Arabiko	Simbolo	Katulad ng
1	ا	A	Adobo
2	ب	B	Baso
3	ت, ة	T	Takbo
4	ث	Th	Sa English-Three
5	ج	J	Sa English- Jacket
6	ح	H	Walang katumbas / matikas ang pagbigkas mula sa lalamunan
7	خ	Kh	Walang katumbas / matikas ang pagbigkas, mula taas ng likod ng lalamunan
8	د	D	Dagat
9	ذ	Th	Sa English -The
10	ر	R	Relo
11	ز	Z	Sa English - Zebra
12	س	S	Saging
13	ش	Sh	Sa English - She
14	ص	S	Sa English - Xylophone
15	ض	Dh	Mabigat na 'd' mula sa gilid ng bibig
16	ط	T	Malambot na 't' na tinakpan
17	ظ	Dh	Walang katumbas/ matikas ang pagbigkas
18	ع	'	Walang katumbas/ mula sa lalamunan
19	غ	Gh	Walang katumbas/ mula sa lalamunan
20	ف	F	Sa English - Fish
21	ق	Q	Walang katumbas/ mula sa lalamunan
22	ك	K	Kaldero
23	ل	L	Lamesa
24	م	M	Maharlika
25	ن	N	Nene
26	هـ	H	Hardin
27	و	W	Walis
28	ي	Y	Yantok
29	ء	°	Walang katumbas/ mula sa lalamunan



Pagbigkas ng mga letrang Arabiko

Ang dalawang Shahadah (Shahadatayn)

Ang dalawang Shahadah ay ang pagbigkas ng:

أَشْهَدُ أَنْ لَا إِلَهَ إِلَّا اللَّهُ وَأَشْهَدُ أَنَّ مُحَمَّدًا رَسُولُ اللَّهِ

"Ash-hadu an la ilaha illallah, wa ash-hadu anna Muhammadan rasool Allah"
"Ako ay sumasaksi na walang sinuman ang may karapatang sambahin maliban sa Allah, at ako ay sumasaksi na si Muhammad ay Sugo ng Allah."

Ito ang kauna-unahang salita na kinakailangang mabanggit ng isang nagnanais yakapin ang Islam. Ang pagbigkas nito na may tunay na paniniwala ang magsasanhi sa isang tao na maging isang Muslim. Maraming beses itong inuulit-ulit ng isang Muslim sa loob ng kanyang pang-araw-araw na buhay. Sinabi ni Propeta Muhammad ﷺ na kung ito ang huling binigkas ng isang taong namatay ay makakapasok siya ng *Jannah* (paraiso).

Ang bibigkasin sa pagsasagawa ng Wudhu'

Tasmiyah (Pagbigkas ng "Bismillah")

Ito ay ang salitang kinakailangang bigkasin ng bawat Muslim sa umpisa ng pag-*Wudhu'*, at sa pag-uumpisa sa lahat ng kanyang mga gawain gaya ng pagkain, pag-inom, pagpasok ng Masjid, at sa lahat ng mabubuting gawain sa kanyang pang araw-araw na buhay. Ang ibig sabihin ng *Tasmiyah* ay nag-uumpisa ka sa pamamagitan ng pagbigkas ng pangalan ng Allah ﷻ:

بِسْمِ اللَّهِ

"Bismillah" - "Sa Ngalan ng Allah"

Ano ang bibigkasin pagkatapos magsagawa ng Wudhu'?

Sa pagtatapos ng *wudhu'*, makakabuting bigkasin niya ang mga sumusunod:

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ، اللَّهُمَّ اجْعَلْنِي مِنَ التَّوَابِينَ وَاجْعَلْنِي مِنَ الْمُتَطَهِّرِينَ. سُبْحَانَكَ اللَّهُمَّ وَبِحَمْدِكَ، أَشْهَدُ أَنْ لَا إِلَهَ إِلَّا أَنْتَ، أَسْتَغْفِرُكَ وَأَتُوبُ إِلَيْكَ.

Ash-hadu an la ilaha illallah, wahdahu la shareeka lah, wa ash-hadu anna Muhammadan `abduhu wa Rasooluh. Allahummaj-`alni minat-tawwabeen, waj-`alni minal-mutatah-hireen.

Subhanaka Allahumma wa bihamdik, ash-hadu an la ilaha illa Ant, astaghfiruka wa atoobu ilayk.

"Ako ay sumasaksi na walang diyos (na karapat-dapat sambahin) maliban sa Allah. Siya ay nag-iisa at walang katambal. At ako ay sumasaksi na si Muhammad ay Kanyang alipin at sugo. O Allah, gawin Mo akong kasama ng mga taong nanunumbalik at humihingi ng kapatawaran sa Iyo, at gawin Mo akong kasama sa mga malinis at dalisay. ⁽¹⁾ Luwalhati at papuri sa Iyo O Allah. Ako ay sumasaksi na walang diyos maliban sa Iyo. Patawarin Mo po ako. Ako ay nanunumbalik sa Iyo na nagsisisi."⁽²⁾



Nakasulat na Pagsasanay

T1. Sagutin ang mga sumusunod:

1. Isulat ang maaaring bigkasin o basahin na mga Thikr habang nagsa-Salah, hanggang sa matutunan ang tamang pagbasa ng *Al-Faatihah*.

.....

2. Bakit mahalaga na mabigkas natin ng tama ang mga Thikr sa wikang Arabic?

.....

.....

3. Ano ang gantimpala nang mahusay at magaling bumasa ng Qur'an?

.....

4. Ano ang gantimpala ng nahihirapan sa pagbasa ng Qur'an?

.....

T2. Kumpletuhin ang mga sumusunod:

1. *Shahadatayn* (Pagsaksi) ay ang pagbigkas ng:

.....

2. Ang *Takbeer* ay ang pagbigkas ng:

.....

3. Ang *Tasbeeh* ay ang pagbigkas ng:

.....

4. Ang *Tasleem* ay ang pagbigkas ng:

.....

5. Ang binibigkas sa umpisa ng pag-*wudhu'* ay:

.....

6. Pagkatapos ng *wudhu'*, inirekomenda na bigkasin ang:

.....



Ginagawang Pagsasanay

Bigkasin ang Shahadah ng tatlong beses.

Mga Bagong Salita at Termino

Nu.	Arabiko	Pagkasulat	Kahulugan
1	حَرْف	<u>H</u> arf	Letra
2	قراءة	Qira`ah	Pagbabasa
3	كِتَابَة	Kitabah	Pagsusulat
4	تِلَاوَة	Tilawah	Pagbibigkas
5	لُغَة	Lughah	Wika; Lengguwahe
6	تَجْوِيد	Tajweed	Tamang pagbigkas ng Qur'an sa pamamaraan ng pagkakahayag
7	اسْتِمَاع	Istima`	Pakikinig
8	ذِكْر	<u>T</u> hikr	Pag-alaala
9	أَذْكَار	<u>A</u> thkaar	Mga Pag-alaala
10	قَوْل	Qawl	Salita



Pangalawang Aralin

Ang mga Binibigkas sa Salah (1)

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Maalala ang bibigkasin upang umpisahan ang Salah.
- Mabigkas ang *Suratul-Fatihah* (Pambungad na Kabanata) sa tamang pamamaraan.

Kabuuan ng Aralin:

- Mga Nilalaman ng Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino

Kinakailangang napag-aralan na:

- Ang unang Aralin sa yunit ng Thikr.

Kaakibat na pag-aaral:

- Ang pangalawang Aralin sa yunit ng Salah.



Lahat ng mga *Thikr* sa Salah ay binibigkas sa wikang Arabiko lamang, tulad ng nabanggit natin sa unahan. Ang sumusunod ay paglilinaw sa bawat dapat bigkasin sa iba't ibang mga posisyon ng Salah.

Ang binibigkas sa posisyon na nakatayo

Takbeeratul-Ihram (Ang panimulang takbeer)

Ito ang simula ng Salah, ang pagbigkas ng *Takbeer* ("*Allahu Akbar*"). Itaas ang mga kamay sa tapat ng dalawang teynga o balikat (tulad ng napag-aralan mo sa pangalawang Aralin ng Salah).

Ang *Takbeer* ay binibigkas sa mga sumusunod na posisyon:



1. Ang *Takbeeratul-Ihram* sa pagsisimula ng Salah.
2. Kapag yuyuko.
3. Kapag magpapatirapa.
4. Kapag uupo mula sa pagpapatirapa.
5. Kapag magpapatirapa sa pangalawang ulit mula sa pagkaka-upo.
6. Kapag tatayo mula sa pangalawang pagpapatirapa.

Kung ikaw naman ay *ma'mum* (tagasunod ng *imam*), o kapag ikaw ay nag-iisa lamang bigkasin ito ng mahina na ikaw lamang ang nakaririnig. (Balikan ang pangalawang aralin ng Salah)

Ang pagbigkas ng *Surah Al-Fatihah*

Pagkatapos ng *Takbeeratul-Ihram* ay inirekominda ang pagbasa ng *Du'a Istiftah* (pambungad na panalangin). Pagkatapos ay bibigkasin ang *Surah Al-Fatihah*, at pagkatapos ay isusunod ang iba pang Talata mula sa Qur'an na nalalaman mo.

Ang *Surah Al-Fatihah* (Pambungad na Kabanata) ang unang Surah sa *Mushaf* (Aklat ng Qur'an). Ito ang nakakuha ng pang-unang bilang sa pagkakasunod-sunod ng mga Surah ng Banal na Qur'an. At ito ang unang dapat maisaulo ng isang Muslim mula sa Banal na Qur'an.

Pagkatapos ay Mag-*Takbeer* para sa *ruku'* (pagyuko) na nakataas ang mga kamay sa tapat ng tenga tulad ng pag-*Takbeer* sa *Takbeeratul-Ihram*.

Al-Fatihah

- (1) Sa ngalan ng Allah, ang Pinakamahabagin, ang Pinakamaawain.
- (2) Ang lahat ng pagpupuri ay sa Allah lamang, ang **Rabb** (Panginoon, Tagapanustos at Tagapagtangkilik) ng lahat ng mga nilalang.
- (3) Ang Pinakamahabagin, ang Pinakamaawain.
- (4) Ang tanging may Hawak (o Pagpapasya) sa Araw ng Paghuhukom.
- (5) Ikaw lamang ang aming sinasamba, at Ikaw lamang ang aming hinihingan ng tulong.
- (6) Inyong patnubayan kami sa Matuwid na Landas.
- (7) Sa landas ng mga ginawaran Ninyo ng Inyong mga biyaya, at hindi sa landas na umaani ng Inyong pagkapoot at ng mga napaligaw sa patnubay.





Nakasulat na Pagsasanay

T1. Banggitin ang 6 na posisyon na dapat bigkasin ang Takbeer habang nagsa-Salah:

1.
2.
3.
4.
5.
6.

T2: Ano ang bibigkasin habang nasa posisyon na nakatayo?

.....



Ginagawang Pagsasanay

Pag-aralan at kabisaduhin ang pagbigkas ng *Surah Al-Faatihah* sa pamamagitan ng pakikinig mula sa nai-kopyang audio.

Mga Bagong Salita at Termino

Nu.	Arabiko	Pagkasulat	Kahulugan
1	بِسْمِ اللّٰهِ	Basmalah	Pagbigkas ng "Bismillaah"
2	تَكْبِيْرٌ	Takbeer	Pagdakila sa Allaah; Pagbigkas ng "Allaahu Akbar"
3	تَسْبِيْحٌ	Tasbeeh	Pagluwalhati sa Allaah; Pagbigkas ng "Subhan Allaah"
4	تَحْمِيْدٌ	Tahmeed	Pagpuri sa Allaah; Pagbigkas ng "Alhamdu Lillaah"
5	تَشْهَدُ	Tashahhud	Pagsaksi; Pagbigkas ng Shahadah
6	سَبَابَةٌ	Sabbaabah	Hintuturo (daliri)
7	تَسْلِيْمٌ	Tasleem	Pagbigkas ng "As-salamu alaykum wa rahmatullaah"
8	اِسْتِغْفَارٌ	Istighfaar	Paghingi ng kapatawaran sa Allaah
9	بَعْدٌ	Ba'd	Pagkatapos; Sa huli
10	قَبْلٌ	Qabl	Bago; Sa simula; Unahan



Pangatlong Aralin

Ang mga Binibigkas sa Salah (2)

Itatagal:



Isang Oras

Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Matandaan mo ang bibigkasin sa posisyon ng pagkakayuko.
- Matandaan mo ang bibigkasin habang tumatayo mula sa posisyon na pagyuko.
- Matandaan mo ang bibigkasin sa posisyon ng pagpapatirapa.
- Matandaan mo ang bibigkasin sa posisyon nna nakaupo sa pagitan ng dalawang pagpapatirapa.
- Matandaan mo ang bibigkasin sa posisyon na nakaupo sa tashahhud.

Kabuuan ng Aralin:

- Mga Nilalaman ng Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino

Kinakailangang napag-aralan na:

- Ang una at pangalawang Aralin mula sa yunit ng *Athkarus-Salah*.
- Ang una at pangalawang Aralin mula sa yunit ng Salah

Kaakibat na Aralin:

- Ang ika-apat na aralin sa yunit ng Salah

Ang mga binibigkas sa posisyon na nakayuko (ruku')

Ang binibigkas habang nakayuko

Kapag ikaw ay nakayuko bigkasin ang "*Subhana Rabbiyal Adheem*" ng mahina. Ikaw lang ang nakakarinig kahit na ikaw ang *Imam*, tulad ng makikita mo sa sumusunod na halimbawa:



Ano ang bibigkasin habang nakayuko



سُبْحَانَ رَبِّيَ الْعَظِيمِ

"*Subhana Rabbiyal Adheem*"

"Luwalhati sa aking Rabb, Ang Pinakadakila."



Ang bibigkasin sa pagtayo mula sa pagyuko

Bigkasin ang "*Sami'-Allahu liman hamidah*" nang malakas habang tumatayo mula sa pagkakatayo kapag ikaw ang *Imam*, at mahina naman kapag ikaw ay *ma'mum* o nag-iisa. (Tingnan ang Salah Aralin 2, mula sa mga Aralin ng Salah yunit):



Ano ang bibigkasin sa Pagtayo mula sa Ruku'



سَمِعَ اللَّهُ لِمَنْ حَمِدَهُ

"*Sami' Allahu liman hamidah*"

"Pinakikinggan ng Allah ang mga Pumupuri sa Kanya."



At pagkatapos ay bigkasin ang "*Rabbana wa lakal-hamd*" nang mahina, kung ikaw ang *Imam*, *ma'mum*, o nag-iisa:



رَبَّنَا وَ لَكَ الْحَمْدُ

"*Rabbana wa lakal hamd*"

"O aming Rabb, ang papuri at kaluwalhatian ay sa Iyo lamang."

Pagkatapos ng bahagyang pagtigil sa pagkakatayo mula sa pagyuko ay muling bigkasin ang *Takbeer* habang patungo sa pagpapatirapa.

Ang mga binibigkas sa posisyon na pagpapatirapa (sujood)

Ang binibigkas habang nakatirapa (sujood)

Sa pagpapatirapa ay bigkasin ang "*Subhana Rabbiyal a'laa*", na ang pinakamababang bilang ay isang beses, ngunit ang sunnah ay tatlong beses, at walang masama kung mas marami pa dito. Pagkatapos ay bigkasin muli ang *Takbeer* at maupo ng bahagya bago magpapatirapa ng pangalawang ulit:



Ano ang bibigkasin habang naka-sujood



سُبْحَانَ رَبِّيَ الْأَعْلَى

"*Subhana Rabbiyal- a'laa*"

"Luwalhati sa aming Rabb, ang Kataas-taasan"



Ano ang bibigkasin sa pagitan ng dalawang sujood

Ang binibigkas habang naka-upo sa pagitan ng dalawang pagpapatirapa (sujood)

Habang ikaw ay naka-upo ng bahagya sa pagitan ng dalawang pagpapatirapa (tulad ng nasa yunit ng Salah, panagalawang aralin) bigkasin ang "*Rabbigh-fir lee*" tulad ng sumunod na halimbawa:



رَبِّ اغْفِرْ لِي

"*Rabbigh-fir lee*"

"Patawarin mo po ako, O aking Rabb."



Pagkatapos ng pag-upo na ito ay bigkasin muli ang *Takbeer*, at magpapatirapa ng pangalawang beses, pagkatapos ay bigkasin muli ang *Takbeer* at tumayo para isagawa ang pangalawang *Rak'ah*.

Ang mga binibigkas sa posisyon na naka-upo (juloos)

Ang bibigkasin habang nakaupo sa unang *Tashahhud* (At-tahiyyat)

Pagkatapos ng pangalawang pagpapatirapa sa pangalawang *Rak'ah* ay umupo para sa unang *Tashahhud* at bigkasin ang sumunusod, na tinatawag na *At-tahiyyat*:



Ang Pagbigkas ng
At-Tahiyyat



التَّحِيَّاتُ لِلَّهِ وَالصَّلَوَاتُ وَالطَّيِّبَاتُ السَّلَامُ عَلَيَّ النَّبِيِّ وَرَحْمَةُ اللَّهِ وَبَرَكَاتُهُ
السَّلَامُ عَلَيْنَا وَعَلَى عِبَادِ اللَّهِ الصَّالِحِينَ أَشْهَدُ أَنْ لَا إِلَهَ إِلَّا اللَّهُ
وَ أَشْهَدُ أَنَّ مُحَمَّدًا عَبْدُهُ وَرَسُولُهُ

At-tahiyyat Lillahi was-salawatu wat-tayyibat.

As-salamu `alayka ayyuhan-Nabiyyu wa rahmatullahi wa barakatuh.

As-salamu `alayna wa `ala `ibadi-llahis-saliheen.

Ash-hadu an la ilaha illal-lah, wa ash-hadu anna Muhammadan `abduhu wa rasooluh.

Ang lahat ng mga papuri, panalangin, at dalisay na pananalita ay para sa Allah lamang. Ang Kapayapaan ay mapasa iyo O Propeta, at ang Habag at Biyaya ng Allah. Ang Kapayapaan ay mapasa atin at sa mga tapat na mga alipin ng Allah. Ako ay tumitestigo na walang sinuman ang may karapatang sambahin maliban sa Allah, at ako ay tumitestigo na si Muhammad ay alipin at sugo ng Allah.

Ang bibigkasin sa huling *tashahhud*



Kapag ikaw ay nakaupo na para sa panghuling pag-upo ng *Tashahhud* ay bigkasin ang unang bahagi ng *Tashahhud* (At-tahiyyat) at pagkatapos ang pangalawang bahagi: ang *Salatul-Ibrahimiyyah*, na katulad ng sumusunod.



Ang Pagbigkas ng
Salatul-Ibrahimiyyah



اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ إِنَّكَ حَمِيدٌ مَجِيدٌ
اللَّهُمَّ بَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ إِنَّكَ حَمِيدٌ مَجِيدٌ

"Allahumma salli 'ala Muhammad, wa 'ala ali Muhammad, Kama sallahta 'ala Ibraheem, wa 'ala ali Ibraheem, innaka hameedun majeed.

Allahumma barik 'ala Muhammad, wa 'ala ali Muhammad, Kama barakta 'ala Ibraheem, wa 'ala ali Ibraheem, innaka hameedun majeed."

O Allah! Ipagkaloob po Ninyo ang kapayapaan at mga biyaya kay Muhammad, at sa kanyang angkan at tagasunod, tulad ng ipinagkaloob Niyo kay Ibrahim at sa mga tagasunod ni Ibrahim. Tunay na Ikaw ay Kapuripuri at Maluwalhati.

O Allah! Pagpalain po Ninyo si Muhammad at ang kanyang angkan at mga tagasunod, tulad ng pagpapalang ipinagkaloob Niyo kay Ibrahim at sa mga tagasunod ni Ibrahim. Tunay na Ikaw ay Kapuripuri at Maluwalhati.

Ang Tasleem

Pagkatapos bigkasin ang *At-tahiyat* at ang *Salatul-Ibrahimiyyah* ay maaring mag-*Du'a* ng kung anong nais mo para sa buhay dito sa mundo at sa kabilang buhay. At pagkatapos ay tatapusin mo ang iyong salah sa pamamagitan ng pagbigkas ng *Tasleem*.

Iharap ang mukha sa kanan at bigkasin ang:



السَّلَامُ عَلَيْكُمْ وَرَحْمَةُ اللَّهِ

"As-salamu 'alaykum wa rahmatullah"

(Ang kapayapaan at biyaya ng Allah ay mapasa inyo.)

at iharap ang mukha sa kaliwa at bigkasin muli ang:



السَّلَامُ عَلَيْكُمْ وَرَحْمَةُ اللَّهِ

"As-salamu 'alaykum wa rahmatullah"

(Ang kapayapaan at biyaya ng Allah ay mapasa inyo.)

Ang mga binibigkas pagkatapos ng Salah

Pagkatapos ng Salah, inirerekomenda sa Muslim na humiling ng kapatawaran sa Allah ﷻ (*Istighfar*) at bumigkas ng mga *Thikr*. Maraming uri ng mga *Thikr* na nabanggit sa Sunnah ng Propeta ﷺ na dapat pagsikapang gawin ng isang Muslim. Ang pinaka mahalagang dapat mong malaman sa ngayon ay ang *Al-Istighfar* na tatlong beses na inuulit-ulit pagkatapos ng *tasleem*:

أَسْتَغْفِرُ اللَّهَ ، أَسْتَغْفِرُ اللَّهَ ، أَسْتَغْفِرُ اللَّهَ

Astaghfirullah, Astaghfirullah, Astaghfirullah.

Oh Allah, patawarin po Ninyo ako [3x]

Pagkatapos bigkasin ang *Al-Istighfar*, bigkasin ang sumusunod:

اللهم أنت السلام ومنك السلام تباركت يا ذا الجلال والإكرام

Allahumma Antas-Salam, Wa minkas-Salam, Tabarakta Yaa Thal-Jalali wal-ikram.

O Allah, Ikaw ang kapayapaan, at sa Iyo nagmumula ang Kapayapaan. Pinagpala Ka, O Ikaw na nagmamay-ari ng kaluwalhatian at karangalan.

Pagkatapos ay bigkasin ang:

لا إله إلا الله وحده لا شريك له ، له الملك وله الحمد وهو على كل شيء قدير . لا حول ولا قوة إلا بالله .
لا إله إلا الله ، ولا نعبد إلا إياه . له النعمة وله الفضل وله الثناء الحسن . لا إله إلا الله ، مخلصين له الدين ولو
كره الكافرون . اللهم لا مانع لما أعطيت ، ولا معطي لما منعت ، ولا ينفع ذا الجد منك الجد

(1) La ilaha ilallah, Wahdahu la shareeka lah, la hul-mulku wa la hul-hamd, wa huwa 'ala kulli shay-in qadeer.

(2) La hawla wa la quwwata illa Billah.

(3) La ilaha ill-Allah, wa la na`budu illa iyyah.

(4) Lahul-ni`matu wa la hul-fadhli, wa la huth-thana' al-hasan.

(5) La ilaha ill-Allah, mukhliseena la hud-deen, wa law karihal-kafiroon.

(6) Allahumma la mani`a lima a`tayt, wa la mu`tiya lima mana`t, wa la yanfa`u thal-jaddi minkal-jadd

(1) Walang diyos (na karapat-dapat sambahin) maliban sa Allah. Siya ay nag-iisa at walang katambal. Sa Kanya ang paghahari, at sa Kanya ang lahat ng papuri, At Siya ang may kapangyarihan sa lahat ng bagay.

(2) Walang lakas o kapangyarihan maliban sa Allah.

(3) Walang diyos (na karapat-dapat sambahin) maliban sa Allah, at wala kaming sinasamba maliban sa Kanya.

(4) Sa Kanya ang lahat ng pabor, biyaya at dakilang pagpupuri.

(5) Walang diyos (na karapat-dapat sambahin) maliban sa Allah. Taos puso ang aming pananampalataya sa Kanya, kahit ito ay kinamumuhian ng mga walang pananampalataya.

(6) O Allah, walang makakapigil sa mga bagay na iyong ipagkakaloob at walang makapagbibigay sa anumang bagay na iyong pinigilan. At walang silbi ang lakas at kapangyarihan ng isang tao laban sa Iyo.

Pagkatapos ay bigkasin ang mga sumusunod (33 beses ang bawat isa). Maaari mong bilangin sa pamamagitan ng iyong mga daliri:

سبحان الله
"Subhan Allah" 33x

"Luwalhati sa Allah"

الحمد لله
"Alhamdu lillah" 33x

"Ang papuri ay para sa Allah"

الله أكبر
"Allahu Akbar" 33x

"Ang Allah ang Pinakadakila"



Kapag nabigkas mo na ang bawat isa ng 33 beses ang kabuuan ay 99, at kukumpletuhin mo ito ng pagbigkas ng:

لا إله إلا الله وحده لا شريك له، له الملك وله الحمد وهو على كل شيء قدير.

“La Ilaha Ilallah, Wahdahu La shareeka lah, laahul-mulku wa laahul-hamd, wa huwa ‘ala kulli shay’in qadeer.”

Walang diyos (na karapat-dapat sambahin) maliban sa Allah. Siya ay nag-iisa at walang katambal. Sa Kanya ang paghahari, at sa Kanya ang lahat ng papuri, at Siya ang may kapangyarihan sa lahat ng bagay.





Nakasulat na Pagsasanay

T1. Isulat ang mga binibigkas sa mga sumusunod na posisyon ng Salah:

- Sa posisyon ng *Ruku'*, bigkasin ang:
- Sa pagtayo mula sa *Ruku'*, bigkasin ang:
- Sa posisyon ng *Sujood*, bigkasin ang:
- Sa pag-upo sa pagitan ng dalawang *Sujood*, bigkasin ang:

T2: Kumpletuhin ang mga sumusunod:

- Tatapusin ang Salah sa pamamagitan ng pagbigkas ng:
- Pagkatapos ng *Tasleem*, bibigkasin ang: 3x
- Sa pag-upo sa unang *Tashahhud*, bibigkasin ang:

- Sa pag-upo sa huling *Tashahhud*, bigkasin bilang kadugtong sa unang *Tashahhud* ang:



Ginagawang Pagsasanay

- Magsagawa ng dalawang *rak'ah* na binibigkas ang mga *athkar* ng malakas.
- Pakinggan sa CD o sa Tape ang *At-tahyyat* at gagayahin ng paulit-ulit.
- Pakinggan sa CD o sa Tape at pag-aralan ang *Salaatul-Ibraahimiyah*

Mga Bagong Salita at Termino

Nu.	Arabiko	Pagkasulat	Kahulugan
1	سُبْحَانَ اللَّهِ	Subḥan Allaah	Luwalhati sa Allaah
2	الْحَمْدُ لِلَّهِ	Al-ḥamdu Lillaah	Ang papuri ay para sa Allaah
3	سَمِعَ	Sami'	Naririnig
4	الْأَعْلَى	Al-A'laa	Pangalan ng Allaah, Ang Pinakamataas
5	الْعَظِيمُ	Al-Adheem	Pangalan ng Allaah, Ang Kataastaasan
6	الْأَوَّلُ	Al-Awwal	Pangalan ng Allaah, Ang Kauna-unahan
7	الْآخِرِ	Al-Akheer	Pangalan ng Allaah, Ang Kahulihulan
8	اللَّهُمَّ	Allaahuma	O Allaah!
9	يَمِينِ	Yameen	Kanan
10	يَسَارِ	Yasaar	Kaliwa



kel*

"Kumuha ka (O Muhammad) ng kawanggawa mula sa kanilang kayamanan upang sila ay mapadalisay nito at ito ay lalo pang mag-ibayo, at ikaw ay manalangin sa Allah para sa kanila. Katotohanan, ang iyong panalangin ay kapanatagan para sa kanila. At ang Allah ay lubos na nakakarinig, ang Ganap na Maalam)." ⁽¹⁾

Yunit ng Zakah

(Kawanggawa)



Talaan ng mga Nilalaman

Pahina	Mga Paksa
118	Unang Aralin: Ang Zakah
119	Ang katayuan ng Zakah sa Islam
119	Ang kahulugan ng Zakah
120	Ang karunungan (wisdom) mula sa Zakah
121	Sino ang dapat na magbigay o magbayad ng Zakah?
121	Ang hatol ukol sa mga hindi nagbabayad ng Zakah
122	Nakasulat na Pagsasanay
123	Mga Bagong Salita at Termino
124	Pangalawang Aralin: Mga Alintuntunin ng Zakah
125	Mga Kondisyon ng Zakah
125	Mga Ari-arian na kinakailangang kuhanan ng Zakah
126	Ang Zakatul-Fitr
127	Nakasulat na Pagsasanay
128	Mga Bagong Salita at Termino

Unang Aralin

Ang Zakah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Maintindihan mo ang kahulugan ng *Zakah*.
- Malaman mo ang mga pakinabang at karunungan ng *Zakah*.
- Malaman mo ang mga alituntunin ng *Zakah*.
- Maipaliwanag mo ang alituntunin sa sinuman na hindi nagbibigay ng *Zakah*.



Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino

Ang katayuan ng Zakah sa Islam

Ang *Zakah* ay ang ika-3 haligi ng Islam. Ito ay nabanggit sa Qur'an kasama ng Salah nang may 82 beses. Ito ay tinatawag na pagsamba sa pamamagitan ng pinansiyal na pag-aari ng isang Muslim.

Ang kahulugan ng Zakah

Ang kahulugan sa Salita: Ang salitang *Zakah* ay isang pangalan na hinango sa pandiwang "Zaka" na ang ibig sabihin ay "paglago – pagdami", kaya ang *Zakah* ay ang paglago at pagdami.

Ang salitang ito ay nangangahulugan din ng paglilinis at pagdadalisay, tulad ng sinabi ng Allah ﷻ :

﴿ خُذْ مِنْ أَمْوَالِهِمْ صَدَقَةً تُطَهِّرُهُمْ وَتُزَكِّيهِمْ بِهَا وَصَلِّ عَلَيْهِمْ إِنَّ صَلَاتَكَ سَكَنٌ لَهُمْ وَاللَّهُ سَمِيعٌ عَلِيمٌ ﴾

"Kumuha ka (O Muhammad) ng kawanggawa mula sa kanilang kayamanan upang sila ay mapadalisay nito at ito ay lalo pang mag-ibayo, at ikaw ay manalangin sa Allah para sa kanila. Katotohanan, ang iyong panalangin ay kapanatagan para sa kanila. At ang Allah ay lubos na nakaririnig, ang Ganap na Maalam."⁽¹⁾

Ang kahulugan naman ng *Zakah* sa Islamikong pananaw ay: pagsamba sa Allah ﷻ sa pamamagitan ng pagbibigay ng isinabatas na bahagi ng ibat-ibang uri ng kayamanan sa mga tao o grupo.



(1) Surah At-Tauba 9 : 103

Ang karunungan (wisdom) mula sa Zakah

Ang *Zakah* ay nakabatay sa katotohanan na ang Allah ﷻ ang totoong nagmamay-ari ng lahat ng mga bagay sa kalangitan at kalupaan, tulad ng sinabi ng Allah ﷻ :

وَلِلَّهِ مُلْكُ السَّمَاوَاتِ وَالْأَرْضِ وَإِلَى اللَّهِ الْمَصِيرُ

"At ang Allah ang Nagmamay-ari ng mga kalangitan at kalupaan, at sa Allah ang lahat ay magbabalik.."⁽¹⁾

Samakatuwid, ang lahat ng ginugul ng mga tao ay mula sa kayamanan ng Allah ﷻ na ipinagkatiwala sa kanila. Ang kanilang pag-gugol bilang pagtalima sa ipinag-utos ng Allah ﷻ ay tanda ng kanilang pananampalataya at pagsunod sa utos ng kanilang *Rabb*, sapagkat likas sa tao ang pagmamahal ng pag-aari at kayamanan. At dahil ginugul niya ito alang-alang sa Allah ﷻ ay naipapakita niya na inuuna niya ang anuman na Kanyang ipinag-uutos, kahit na mahal niya ang kanyang kayamanan.

Ang mga sumusunod ay kabilang sa mga karunungan ng Zakah:

1. Nagpapatunay ito ng paniniwala at pananampalataya ng isang Muslim dahil ito ay isa sa pinakamahalagang haligi ng Islam.
2. Ipinapakita nito na totoo ang pananampalataya ng isang nagbibigay ng *Zakah*, dahil kahit gustong-gusto niya ang mga ito ay nagagawa pa rin niyang ipamigay. Kaya kapag nagbigay siya upang kalugdan ng Allah ﷻ, ito ay nagpapatunay na kanyang sinasakripisyo kung ano ang kanyang mahal alang-alang sa Allah ﷻ. Ito ang dahilan kung bakit ito tinawag na "*Sadaqah*": dahil nagpapakita ng pagiging "totoo" ng sinuman na nagnanais ng kaluguran ng kanyang Tagapaglikha.
3. Nililinis nito ang pag-uugali ng isang tao dahil mapapangalagaan siya mula sa kadamutan at pagiging makasarili, at sinasanay siyang maging mapagbigay at mabuti.
4. Pinupunan nito ang pangangailangan ng mga mahihirap sa lipunan, at naipapakita nito sa komunidad ng Muslim ang tunay na konsepto ng kapatiran sa praktikal na paraan.
5. Pinangangalagaan nito ang lipunan mula sa mga krimen at mula sa iringan sa pagitan ng mahirap at mayaman. Ito ay dahil sa batid ng mga mahihirap na sila ay mayroong bahagi sa kayamanan ng mga mayayaman. Ito ang susi sa katatagan at pagiging matibay ng pamayanan.
6. Itinutulak nito ang isang Muslim sa pagsasaliksik ng kaalaman sa batas ng Islam, dahil ito ang makakatulong sa kanya upang tuparin ang mga tungkulin sa batas ng Islam at pagsamba sa Allah ﷻ sa pamamagitan ng liwanag mula sa gabay ng Banal na Qur'an at *Sunnah* ng Propeta ﷺ. Pagsisikapan nila ang pagsaliksik ng kaalaman tungkol sa mga alituntunin ng *Zakah* upang maipamahagi nila sa tamang pamamaraan.
7. Ito ay isang paraan upang pagpalain ng Allah ﷻ ang mga ari-arian ng isang Muslim, upang palaguin at pangalagaan ang mga ito.
8. Sa pamamagitan ng *Zakah*, ang kayamanan ay nagagawang umikot sa lipunan at upang lalong lumago ang ekonomiya ng lipunan.

(1) Surah An-Nur 24 : 42

Sino ang dapat na magbigay o magbayad ng Zakah?

Ang Zakah ay obligado para sa mga Muslim na nagmamay-ari ng *nisab* (pinakamaliit na halaga) na pag-aaring kinakailangan kuhanan ng Zakah at mayroong sapat na mga kondisyon. Sinabi ng Allah ﷻ sa Qur'an:

﴿ خُذْ مِنْ أَمْوَالِهِمْ صَدَقَةً تُطَهِّرُهُمْ وَتُزَكِّيهِمْ بِهَا ... ﴾

"Kumuha ka (O Muhammad) ng kawanggawa mula sa kanilang kayamanan upang sila ay mapadalisay nito at ito ay lalo pang mag-ibayo..."⁽¹⁾

At ang ebidensiya mula sa Sunnah ay: Isinalaysay ni Ibn 'Umar ﷺ: Sinabi ni Propeta Muhammad ﷺ: *"Ang Islam ay nakatayo sa limang haligi: Shahadatain, pagsasagawa ng Salah, pagbabayad ng Zakah, pag-aayuno sa buwan ng Ramadhan, at ang Hajj sa Makkah."*⁽²⁾

Ang hatol para sa mga hindi nagbabayad ng Zakah

Ang isang tao na tumatangi na ang Zakah ay obligado para sa isang Muslim ay maituturing na walang pananampalataya (*kafir*). Ang isa naman na naniniwala na ito ay obligasyon ng isang Muslim, subalit hindi naman niya ito binabayaran ay maituturing na *"Fasiq"* (isang tao na gumagawa ng malaking kasalanan). Ang kanyang Zakah ay maaaring kunin sa kanya ng sapilitan (kung kinakailangan) ng isang pinuno ng mga Muslim. Maraming mga talata at mga *ahadith* ang nabanggit upang balaan ang mga tao ukol sa mga kaparusahan ng di pagbabayad ng Zakah sa Araw ng Muling Pagkabuhay. Sinabi ng Allah ﷻ:

﴿ وَالَّذِينَ يَكْتُمُونَ الذَّهَبَ وَالْفِضَّةَ وَلَا يَنْفِقُونَهَا فِي سَبِيلِ اللَّهِ فَبَشِّرْهُمْ بِعَذَابٍ أَلِيمٍ ﴾
﴿ يَوْمَ يُحْمَىٰ عَلَيْهَا فِي نَارِ جَهَنَّمَ فَتُكْوَىٰ بِهَا جِبَاهُهُمْ وَجُنُوبُهُمْ هَذَا مَا كَنْتُمْ لِأَنفُسِكُمْ فَذُوقُوا مَا كُنْتُمْ تَكْتُمُونَ ﴾

"At silang mga nag-iimbak ng ginto at pilak at hindi ginugugol sa landas ng Allah – ibigay sa kanila ang balita ng isang mahapding parusa. Sa araw na iyon ay paiinitin sa Apoy ng Impiyerno at pagkaraan ito ay itatatak sa kanilang mga noo, sa kanilang mga tagiliran at sa kanilang mga likod, at ang sasabihin sa kanila, ito ang anumang inyong tinipong yaman para sa inyong mga sarili, kaya inyong lasapin ang inyong pinag-ipunan."⁽³⁾

Isinalaysay ni Abu Hurairah ﷺ na sinabi ni Propeta Muhammad ﷺ: *"Walang sinumang nagmay-ari at nag-impok ng kayamanan (ginto at pilak) at hindi nagbayad ng Zakah bagkus ang kanilang mga kayamanan ay paiinitan sa Apoy ng Impiyerno, ito ay ihuhubog at itatatak sa kanilang mga noo at taligiran at likuran. At sa tuwing lumamig ito ay ibabalik ulit sa init ng apoy, hanggang sa hukuman ng Allah ang Kanyang mga alipin sa araw na ang katumbas ay 50,000 taon. Pagkatapos ay ituturo sa kanila ang kanilang daan, maaaring patungo sa Paraiso o sa Impiyerno."*⁽⁴⁾

(1) Surah At-Tawbah 9 : 103

(2) Bukhari at Muslim

(3) Surah At-Tawbah 9 : 34-35

(4) Muslim



Nakasulat na Pagsasanay

T1. Kumpletuhin ang mga sumusunod:

- a. Ang kahulugan ng *Zakah* sa Salita:
- b. Ang kahulugan ng *Zakah* sa Islamikong pananaw:
.....
- c. Kabilang sa mga kabutihan ng *Zakah* at mga benipisyo nito para sa pamayanan at sa bawat isa ay:
 1.
 2.
 3.
- d. Ang dapat na magbabayad ng *Zakah* ay:
.....
.....

T2: Ano ang hatol sa sinuman na tumatanggi sa pagiging obligado ng *Zakah*?

.....

T3: Ano ang hatol sa sinuman na hindi nagbabayad ng *Zakah*?

.....

Mga Bagong Salita at Termino

Nu.	Arabiko	Pagkasulat	Kahulugan
1	زَكَاةٌ	Zakah	Sambahin ang Allah sa pamamagitan ng pagbibigay ng legal na bahagi ng uri ng kayamanan
2	مَالٌ	Maal	Kayamanan
3	عِبَادَةٌ مَالِيَّةٌ	'Ibaadaton Maliyah	Pagsamba sa pamamagitan ng kayamanan
4	نُمُوٌّ	Numoo	Paglaki; Pag-usbong; Pagdami
5	زِيَادَةٌ	Ziyaadah	Karagdagan
6	صَدَقَةٌ	Sadaqah	Kawanggawa; Limos
7	نِصَابٌ	Nisaab	Ang pinakamababang halaga na kapag naabot ay kinakailangan nang magbayad ng Zakah
8	نَفَقَةٌ	Nafaqah	Gastusin
9	إِنْفَاقٌ	Infaaq	Paggastos
10	كَنْزٌ	Kanz	Inipong kayamanan

Pangalawang Aralin

Mga Alintuntunin ng Zakah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Mabilang ang mga kondisyon ng *Zakah*.
- Matandaan ang mga uri ng kayamanan na dapat kuhanan ng *Zakah*.
- Maniwala sa kahalagahan ng *Zakatul-Fitr*.
- Maintindihan ang kahulugan ng *Zakatul-Fitr*.
- Matandaan kung kailan ibibigay ang *Zakatul-Fitr*.
- Malaman kung ilan ang halaga ng *Zakatul-Fitr*.



Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Unang Aralin sa Yunit ng *Zakah*

Ang Mga Kondisyon ng Zakah

1. **Islam:** Ang *Zakah* ay isang gawaing pagsamba, at tatanggapin lamang mula sa isang Muslim.
2. **Pagmamay-ari:** ang kayamanan ay kumpletong pag-aari at walang pangamba sa pagkasira o pagkawala, at maaaring gamitin ng may-ari sa lahat ng panahon. Halimbawa, ang kayamanan na ibinigay (*waqf*) para sa mga mahihirap, mga *Masjid*, o sa mga organisasyon para sa kawanggawa ay walang *Zakah*.
3. **Nisab:** ito ay ang pinakamaliit na halaga na dapat na naipon ng isang Muslim upang ang *Zakah* ay maging obligado para sa kanya. Ang bawat ari-arian ay may iba't ibang alituntunin upang maging obligado ang pagbibigay ng *Zakah* para dito. Ang *nisab* ng ginto ay iba sa *nisab* ng hayop at bawat uri ng ari-arian ay mayroong nakatakdang *nisab*.
4. **Paglipas ng Isang Buong Taon:** Kailangan na naging pag-aari ng tao ang *nisab* sa loob ng isang buong taon (Kalendaryong Islamiko). Kapag hindi umabot sa *nisab* ang halaga ng kayamanan bago makumpleto ang isang buong taon ay hindi kailangang magbigay ng *Zakah*. Sa ganitong paraan nahihimok ang isang Muslim na mamuhunan ng kanyang kayamanan at hindi itatago lamang at hindi gagamitin, upang siya at ang kanyang pamamayan ay makinabang mula sa kanyang kinita. Hindi kasama ang mga pananim sa kondisyon ng paglipas ng isang buong taon dahil ang *Zakah* ng mga ito ay ibinibigay pagkatapos ng anihan, kung ang nisab ay naabot. Sinabi ng Allah ﷻ:

﴿وَأَتُوا حَقَّهُ يَوْمَ حَصَادِهِ...﴾

"Magbigay ng karampatang kabayaran sa araw ng pag-ani nito."⁽¹⁾

Mga ari-arian na kinakailangang kuhanan ng Zakah

Ang *Zakah* ay dapat bayaran mula sa sumusunod na mga ari-arian:

1. **Ginto at Pilak:** Ang nisab ng ginto ay kinakailangang umabot ng 85 gramo, at 595 gramo naman para sa pilak. Ito ay kinakailangan na naging pag-aari sa loob ng isang taon (kalendaryong *Hijri*). Kapag naabot ang dalawang kondisyon na ito, kinakailangan itong kunan ng 2.5% bilang *Zakah*.
Pareho din ang kondisyon para sa lahat ng uri ng salapi. Kapag ang salapi ay naging pag-aari sa loob ng isang buong taon at nakaabot ng Nisab ay kinakailangang kunan ng 2.5% mula sa halaga nito bilang *Zakah*, sa pamamagitan ng paghahati ng salapi sa 40 na bahagi. Halimbawa: $P10,000/40 = P250$. Ito ang halaga ng zakah na dapat bayaran
2. ***Zakah* para sa mga negosyo at mga panindang bagay:** Kabilang dito ang anumang gagamitin sa pangne-negosyo upang kumita. Ang lahat ng kayamanang pag-aari ng isang tao na balak niyang ipang-negosyo ay dapat bayaran ang *Zakah*. Kabilang din sa pakikipagkalakal ang kabahagi (shares of stock) ng isang Muslim sa mga kumpanya.
3. **Ang mga hayop:** Kamelyo, Baka, Tupa at Kambing.
4. **Ang mga produkto ng lupa:** Kabilang dito ang mga butil, bungang-kahoy at mga produkto ng agrikultura.

Ang kabuuang paliwanag para sa mga ari-arian na dapat bayaran ang *Zakah* ay nasa ikalawang baytang sa kapahintulutan ng Allah ﷻ.

Ang Zakatul-Fitr

Ito ay kawanggawa mula sa pagkain na ibinibigay ng isang Muslim pagkatapos ng buwan ng *Ramadhan*. Tinawag ito na *Zakatul-Fitr* hango sa pagtigil ng pag-aayuno ng *Ramadhan* (*Fitr*). Ang layunin nito ay upang linisin ang isang nag-aayuno mula sa hindi kanais-nais na nagawa o nasabi sa panahon ng *Ramadhan* na nakababawas sa gantimpala ng isang nag-aayuno at nakasisira sa pag-aayuno nito.

Sinabi ni Ibnu Abbas ﷺ: *"Ipinag-utos ng Propeta ang pagbibigay ng Zakatul-Fitr upang linisin ang nag-aayuno mula sa mga masasamang nagawa o salita sa panahon ng Ramadhan, at upang maipakain sa mga nangangailangan. Ang sinumang nagbigay nito bago ang Salatul-'Eid ay nakapagbigay ng katanggap-tanggap na Zakah, at sinuman ang nagbigay nito pagkalipas na ng Salatul-'Eid ay nagiging isa na lamang itong ordinaryong kawanggawa (sadaqah)".*⁽¹⁾

Maliwanag mula sa *Hadith* na ito na ang *Zakatul-Fitr* ay obligado sa bawat isang Muslim, bata o matanda, lalaki o babae, kapag mayroon siyang sobrang pagkain na kanyang kailangan sa araw ng *'Eidul-Fitr*.

Obligado rin ito sa kung sino ang ipinanganak o yumakap ng Islam sa gabi bago mag *'Eidul-Fitr* pagkatapos lumubog ang araw sa huling araw ng buwan ng *Ramadhan*. Kanais-nais naman ito ngunit hindi obligado para sa sanggol na nasa sinapupunan pa lamang.

Anong oras dapat ibigay ang Zakatul-Fitr?

Dapat itong ibigay bago ang Salah ng *'Eidul-Fitr*. Maaari din ibigay ito ng isa o dalawang araw bago matapos ang buwan ng *Ramadhan*, tulad ng sinabi ng Propeta ﷺ: *"Sinuman ang magbigay nito bago ang Salatul-'Eid ito ay katanggap-tanggap na Zakah, at sinuman ang magbigay nito ng pagkatapos ng Salatul-'Eid ay isa na lamang itong Sadaqah".*⁽²⁾

Ano ang halaga ng Zakatul-Fitr?

Ang Propeta ﷺ ay naglagay ng hangganan para sa *Zakatul-Fitr* na isang *sa'a* (sukat na katumbas ng apat na punong magkadikit na kamay ng isang lalaking katamtaman ang laki) mula sa pagkain, tulad ng *Hadith* ni Ibnu 'Umar ﷺ: *"Ipinag-utos ng Propeta ang Zakatul-Fitr sa Ramadhan ng isang sa'a na datiles o sebada (barley) para sa alipin at malayang tao, lalaki at babae, bata at matanda mula sa mga Muslim, at kanyang ipinag-utos na ibibigay ito bago lalabas ang mga tao patungong Salatul-'Eid".*⁽³⁾

Ang obligado ay isang *sa'a* sa lahat ng uri ng pagkain na tulad ng *sa'a* ng Propeta ﷺ. Ang *sa'a* ay katumbas ng apat na *mudd*. Ang isang *mudd* ay katumbas ng punong magkadikit na kamay ng isang lalaking katamtaman ang laki, hindi matangkad at hindi mababa.

Maaaring ibigay ito ng isang Muslim mula sa kung ano ang uri ng kinakain sa kanyang bayan gaya ng bigas, trigo, mais o iba pa, kahit hindi nabanggit sa *Hadith* na ito. Hindi maaaring ibigay ang katumbas na halaga nito sa pera dahil ang sinabi ng Propeta ﷺ ay pagkain hindi pera.

(1) Abu Dawood at Ibn Majah

(2) Abu Dawood at Ibn Majah

(3) Bukhari



Nakasulat na Pagsasanay

T1. Kumpletuhin ang mga sumusunod:

- a. Ang *nisab* ng ginto ay: at ang *nisab* ng pilak ay:
- b. Ang *Zakatul-Fitr* ay obligado sa bawat:
.....
- c. Ang halaga ng *Zakatul-Fitr* ay:
obligadong ibigay ito bago ang:
at maaari rin ibigay bago:
- d. Ang hatol sa pagbibigay ng *Zakah* para sa sanggol sa sinapupunan ay:
.....

T2: Anu-ano ang mga kondisyon upang maging obligado ang *Zakah*?

1.
2.
3.
4.
5.

T3: Isulat ang mga pag-aari na dapat binabayaran ang *Zakah*:

1.
2.
3.
4.

Mga Bagong Salita at Termino

Nu.	Arabiko	Pagkasulat	Kahulugan
1	حَوْل	H awl	Isang buong taon (Kalendaryong Hijri)
2	نَقْد	Naq d	Pera, Salapi
3	ذَهَب	T hahab	Ginto
4	فِضَّة	Fidh-d hah	Pilak (eng. Silver)
5	صَاع	Sa'a	Sukat na katumbas ng apat na mudd
6	مُد	Mudd	Sukat na katumbas ng isang punong magkadikit na kamay ng isang lalaking katamtaman ang laki.
7	فَقِير	Faqeer	Dukha; Mahirap; Pulubing nanglilimos
8	مِسْكِين	Miskeen	Gipit sa buhay; Nangangailangan, ngunit hindi nanglilimos
9	فِطْر	Fitr	Pagtigil ng pag-aayuno
10	طَعَام	Ta'aam	Pagkain



“O kayong mga mananampalataya! Ang pag-aayuno ay ipinag-utos sa inyo, na kagaya ng pag-uutos sa mga nangauna sa inyo, upang kayo ay maging Al-Muttaqun.” (magkaroon ng takot sa Allah).⁽¹⁾

Yunit ng Siyam

(Pag-aayuno)



(1) Surah Al-Baqarah 2 : 183

Talaan ng mga Nilalaman

Pahina	Mga Paksa
132	Unang Aralin: Ang Pag-aayuno
133	Ang Kahulugan ng <i>Siyam</i> (Pag-aayuno)
133	Ang Pag-aayuno sa buwan ng <i>Ramadhan</i>
133	Kailan magsimula at kailan magtatapos ang buwan ng <i>Ramadhan</i> ?
134	Kabutihan ng pag-aayuno
134	Ang karunungan (wisdom) ng Pag-aayuno
136	Nakasulat na Pagsasanay
137	Mga Bagong Salita at Termino
138	Pangalawang Aralin: Ang mga alituntunin ng Pag-aayuno
139	Ang Mga Kondisyon ng Pag-aayuno
140	Ang alituntunin ng pag-aayuno sa buwan ng <i>Ramadhan</i>
140	Ang oras ng pag-aayuno
141	Mga nakasisira ng Pag-aayuno
141	Mga gawaing hindi nakasisira ng Pag-aayuno
142	Nakasulat na Pagsasanay
143	Mga Bagong Salita at Termino

Unang Aralin

Ang Pag-aayuno

Itatagal:



Isang Oras



● Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Maintindihan ang kahulugan ng *Siyam* (pag-aayuno).
- Matandaan ang mga alintuntunin ng pag-aayuno sa buwan ng *Ramadhan*.
- Malaman ang kabutihan na dulot ng pag-aayuno.
- Maipaliwanag ang karunungan (wisdom) sa pag-aayuno.

● Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino



● Kinakailangang napag-aralan na:

- Pag-aaral ng panimula

● Kaakibat na aralin:

- Pag-aaral ng Yunit ng *Taharah*

Ang Kahulugan ng Siyam (Pag-aayuno)

Ang kahulugan sa salita ay: Pagpigil. Ito ay hinango mula sa pandiwang “*sama*” na ang ibig sabihin sa wikang Arabe ay “hawakan o pigilin”.

Ang kahulugan sa Islamikong pananaw ay: Ang pagsamba sa Allah ﷻ sa pamamagitan ng pag-iwas sa pagkain, inumin at sa pakikipagtalik sa asawa, ganundin sa lahat ng mga gawaing makasisira ng pag-aayuno, mula sa buwang-liwayway hanggang sa paglubog ng araw.

Ang Pag-aayuno sa buwan ng Ramadhan

Ang *Siyam* ay ang ika-apat sa mga haligi ng Islam. Ang buwan ng *Ramadhan* ay ang ika-9 na buwan sa kalendaryong *Hijri* (Kalendaryong Islamiko) na nakabatay sa buwan (moon). Kaya ang buwan ng *Ramadhan* ay iba-iba ang kapanahunan ng taon, minsan ay sa panahon ng tag-lamig, minsan naman ay sa panahon ng tag-init. Ang buwan ng *Ramadhan* ay maaari ding 29 araw o 30 araw, sapagkat ang simula ng mga buwan (*months*) ay naka-batay sa paglabas ng *hilaal* o bagong-buwan (*new moon*) sa kanluran, kaya hindi magkakatulad ang mga buwan.

Kailan magsisimula at magtatapos ang buwan ng Ramadhan?

Ang buwan ng *Ramadhan* ay magsisimula kapag nakita na ang *hilaal* sa huling araw ng buwan ng *Sha'ban* (ika-8 buwan sa kalendaryong *Hijri*). Sinabi ng Allah ﷻ :

﴿ فَمَنْ شَهِدَ مِنْكُمُ الشَّهْرَ فَلْيَصُمْهُ ﴾

“Sinuman sa inyo ang makakita ng buwan (ng Ramadhan) ay dapat mag-ayuno.”⁽¹⁾

Ang buwan ng *Ramadhan* ay ang ika-9 na buwan sa kalendaryong *Hijri*. Ang buwan ng Arabe ay nakabatay sa *hilaal* o bagong-buwan (*eng. new moon*) kung kaya minsan ito ay 29 araw, minsan naman ay 30 araw. Ang bawat buwan ay magsisimula sa paglabas ng *hilaal*. Magsisimula ang pag-aayuno sa buwan ng *Ramadhan* kapag nakita ang *hilaal*. Kapag hindi nasilayan ang *hilaal* ng *Ramadhan* sa ika-29 araw ng *Sha'ban* ay kukumpletuhin ang bilang ng *Sha'ban* ng 30 araw, at magsisimula na ang pag-aayuno pagkatapos nito.

Sinabi ni Ibn Umar ؓ: Sinabi ng Propeta ﷺ : *“Huwag magsimulang mag-ayuno (sa Ramadhan) hangga't hindi ninyo nakikita ang bagong buwan, at huwag tapusin ang pag-aayuno hanggang sa makita ninyo ito; subalit kung maulap ang panahon, tuusin na lamang ito (kung ilang araw ang para sa buwang iyon).”*⁽²⁾

At hindi maaaring magsimulang mag-ayuno ng isa o dalawang araw bago mag-umpisa ang buwan ng *Ramadhan* bilang pagbabaka-sakali sapagkat ipinagbawal ito ng Propeta ﷺ.

Isinaad ni Abu Hurairah ؓ: Sinabi ng Propeta ﷺ : *“Huwag mag-ayuno ng isa o dalawang araw bago ang buwan ng Ramadhan, maliban sa isang tao na nakagawian na ang magsagawa ng pag-aayuno; maaari siyang mag-ayuno sa mga araw na yaon.”*⁽³⁾

(1) Surah Al-Baqarah 2 : 185

(2) Bukhari at Muslim

(3) Bukhari at Muslim

Ngunit ang pag-aayuno ay pinahihintulutan kapag tumapat ang huling araw ng buwan ng *Sha'ban* sa nakagawian nang pag-aayuno ng isang Muslim tulad ng pag-aayuno ng Huwebes o Lunes, dahil ang kanyang intensiyon ay hindi ang iwasan ang posibilidad na ang araw na iyon ay posibleng araw na ng *Ramadhan*.

Ang buwan ng *Ramadhan* ay magtatapos kapag nakita na ang *hilaal* ng *Shawwal* (ika-10 buwan ng kalendaryong hijri). Kung kaya, dapat abangan sa ika-29 ng *Ramadhan* ang paglabas ng *hilaal* ng *Shawwal*. Ang sinumang makakita nito ay dapat ipagbigay alam ito sa mga kinauukulan. Kailangan din na mayroong makasaksi na dalawang Muslim bago mapatunayan ang paglabas ng *hilaal*, hindi katulad sa simula ng *Ramadhan* na isang Muslim lamang ang kinakailangang makakita ng *hilaal*.

Kabutihan ng pag-aayuno

Ang pag-aayuno ay isang dakilang pagsamba sa Allah ﷻ at ang gantimpala nito ay walang nakakabatid maliban sa Allah ﷻ:

Isinalaysay ni Abu Hurayrah ؓ: sinabi ng Propeta ﷺ na sinabi ng Allah ﷻ: *"Ang lahat ng gawa ng angkan ni Adam ay para sa kanya maliban sa Siyam sapagkat ito ay para sa Akin at Ako ang magbibigay ng gantimpala sa kanya. Ang pag-aayuno ay tulad ng isang kalasag. Sa loob ng araw na nag-aayuno ang isang tao ay iniwasan niya ang lahat ng pagnanasa sa asawa at lahat ng masamang gawain. Kapag ang isang nagaayuno ay iniinsulto o inaaway ng ibang tao, ang sasabihin niya ay 'ako ay nag-aayuno'. Sumumpa ang Propeta Muhammad sa Kanya na may hawak ng kanyang buhay na ang hindi kanais-nais na amoy ng bibig ng isang nag-aayuno ay mas mabango kaysa sa pabangong musk sa paningin ng Allah. At mayroong dalawang kasiyahan sa taong nag-aayuno: nasisiyahan siya kapag tinapos ang kanyang pag-aayuno at kapag nakatagpo na niya ang kanyang Rabb".*⁽¹⁾

Isinalaysay ni Sahl ؓ: sinabi ng Propeta ﷺ: *"Katunayan, mayroong pintuan sa paraiso na ang pangalan ay Ar-Rayyan. Dito pumapasok ang mga nag-aayuno pagdating ng araw ng muling pagkabuhay at walang sinumang makapasok dito maliban sa kanila. Sasabihin sa kanila: "nasaan na ang mga nag-aayuno?" Kung kaya tatayo sila upang pumasok. Walang sinumang makapasok maliban sa kanila, at isasara na ito kapag nakapasok na sila."*⁽²⁾

Ang karunungan (wisdom) ng Pag-aayuno

Ang pangunahing layunin ng Ppag-aayuno ay upang makamit ang pagiging matuwid at magkaroon ng takot sa Allah ﷻ, tulad ng sinabi ng Allah ﷻ:

يَا أَيُّهَا الَّذِينَ آمَنُوا كُتِبَ عَلَيْكُمُ الصِّيَامُ كَمَا كُتِبَ عَلَى الَّذِينَ مِن قَبْلِكُمْ لَعَلَّكُمْ تَتَّقُونَ

"O kayong mga mananampalataya! Ang pag-aayuno ay ipinag-utos sa inyo, katulad ng pag-uutos nito sa mga taong nauna sa inyo, upang kayo ay maging Al-Muttaqun (matuwid at may takot sa Allah)."⁽³⁾

(1) Bukhari at Muslim

(2) Bukhari at Muslim

(3) Surah Al-Baqarah 2 : 183

Tunay na ang isang Muslim ay nag-aayuno bilang pagsunod sa kautusan ng Allah ﷻ. Batid man niya o hindi ang karunungan na nakapaloob sa kautusang ito, ginagawa niya ang pag-aayuno dahil ito ay ipinag-utos sa kanya ng kanyang Tagapaglikha at Panginoon, at ganoon din sa lahat ng uri ng pagsamba. Subalit hindi naman nangangahulugan na hindi na natin aalamin ang karunungan na makukuha sa kautusang ito. Batid natin na anumang kautusan na nagmula sa Allah ﷻ ay may karunungang dulot at lohikal na kadahilanan na maaaring alam natin o hindi. Bagamat hindi natin ito alam sa ngayon, maaaring ang mga susunod na henerasyon ang makatutuklas at makababatid. Tulad ng mga kapakinabangang pangkalusugan na natuklasan ng mga dalubhasang mang-gagamot na dulot ng pag-aayuno dahil sa progreso ng medisina.

Ang ilan sa mga karunungan at benepisyong pag-aayuno ay ang mga sumusunod:

1. Itinuturo nito sa isang Muslim ang prinsipyo ng katapatan at kadalisayan. Ang pag-aayuno ay isang lihim na pagsamba sa Allah ﷻ na walang nakakaalam at walang nakakakita maliban sa Allah ﷻ, dahil kapag ang isang Muslim ay nag-iisa kaya niyang kumain at uminom na walang nakakakita sa kanya, ngunit ang pumipigil lamang sa kanya ay ang katapatan at pagmamahal niya sa Allah ﷻ.
2. Ang pag-aayuno ng isang Muslim ay tanda ng kanyang katiyakan sa mga pangako ng Allah ﷻ at pagtitiwala sa napakaraming gantimpala mula sa Allah ﷻ para sa sinuman na sumunod sa Kanyang mga kautusan. Pinipigil at tinitiiis niya ang mga bagay na nais ng kanyang sarili dahil sa pag-asa at pangarap sa mga gantimpalang pangako ng kanyang *Rabb*.
3. Tinuturuan ang isang Muslim ng kahulugan ng pagmamaside ng Allah ﷻ sa praktikal na paraan. Walang nakakakita sa kanyang pag-aayuno maliban sa Allah ﷻ at ito ang nagsasanay sa kanya sa pagmamaside ng Allah ﷻ sa lahat ng kanyang mga gawain sa kanyang buhay. Hindi siya sasalungat sa mga kautusan ng Allah ﷻ habang siya ay nabubuhay, at hindi na nangangailangan pa ng tagabantay mula sa kinauukulan upang gampanan ang kaniyang tungkulin.
4. Tinuturuan ang isang Muslim ng pagiging mapag-pasensiya at matiisin at magkaroon ng kakayahang kontrolin at pagbawalan ang kanyang sarili sa mga bawal na pagnanasa. Sinuman ang kaya na magpigil sa pagkain at pag-inom samantalang ito ang mga pangunahing kailangan ng buhay ay kaya rin niyang umiwas at layuan ang mga ibang bagay na hindi naman gaano kailangan sa kanyang buhay tulad ng paninigarilyo.
5. Tinuturuan siya na madama ang nararamdamang paghihirap ng ibang mga tao. Sa tuwing makakaramdam siya ng gutom at uhaw ay maaalala niya ang nadarama ng milyon-milyong mga tao na walang makain, kung kaya magkakaroon siya ng awa para sa kanila at kaagad siyang tutulong sa kanila at siya ay magpapasalamat sa Allah ﷻ sa kanyang mga biyaya na hindi ibinigay sa iba.
6. Ang pag-aayuno ay nagpapalaya sa isang Muslim sa kontrol ng mga bagay na nakagawian. Ang kanyang kakayahang mapalaya ang sarili sa kinasanayang pagkain at pag-inom at iba pang nakakasira ng pag-aayuno sa loob ng naitalagang mga oras ay nagbibigay ng tiwala sa kanyang sarili na kaya niyang umiwas sa kahit anong iba pang kinasanayan at hindi siya magiging bihag nito.
7. Makakamit niya ang ibig sabihin ng kapatiran ng mga Muslim sa Islam, sapagkat ang lahat ng mga Muslim ay nag-aayuno at tumitigil ng pag-aayuno ng parehong oras.
8. Makakamit niya ang ibig sabihin ng *Taqwa* (pagkatakot sa Allah ﷻ) sa pamumuhay ng isang Muslim, at ito ang pinaka hinahangad sa pag-aayuno, tulad ng sinabi ng Allah ﷻ: ***“upang kayo ay maging Al-Muttaqun (may tunay na pagkatakot sa Allah)”***.⁽¹⁾

(1) Surah Al-Baqarah 2 : 183



Nakasulat na Pagsasanay

T1. Kumpletuhin ang mga sumusunod:

- a. Ang ibig sabihin ng *Siyam* sa Salita ay:
- at ang ibig sabihin ng *Siyam* sa Islamikong Pananaw ay:
-
- b. Mag-uumpisa ang buwan ng *Ramadhan* kapag:
-
- at magtatapos naman kapag:
- c. Ang hinahangad sa pag-aayuno ay upang makamit ang:
-
- d. Ang buwan ng *Ramadhan* ay ika: sa kalendaryong Hijri.

T2: Magbigay ng mga kabutihan ng pag-aayuno, at mga benepisyo nito?

1.
-
2.
-
3.
-
4.
-
5.
-

Mga Bagong Salita at Termino

Nu.	Arabiko	Pagkasulat	Kahulugan
1	صَوْمٌ أَوْ صِيَامٌ	Sawm o Siyam	Pag-aayuno
2	رَمَضَانٌ	Ramadh <u>a</u> an	Pangalan ng ika-siyam na buwan ng kalendaryong Hijri
3	إِفْطَارٌ	I <u>f</u> taar	Pagtigil ng pag-aayuno
4	غُرُوبٌ	G <u>h</u> uroob	Paglubog ng araw
5	هِلَالٌ	H <u>l</u> aal	Bagong buwan
6	عِيدٌ	'Eid	Pagdiriwang
7	شَهْرٌ	Shah-r	Buwan (eng. Month)
8	تَقْوِيمٌ	Taqweem	Kalendaryo
9	أَحْكَامٌ	A <u>h</u> kaam	Hukom; Hatol; Panuntunan; Alituntunin
10	إِمْسَاكٌ	Imsaak	Pangilin; Pagpipigil

Pangalawang Aralin

Ang mga alituntunin ng Pag-aayuno

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Maibigay ang mga kondisyon ng pag-aayuno.
- Maipaliwanag ang mga alituntunin ng pag-aayuno.
- Malaman ang oras ng pag-aayuno.
- Matandaan mo ang mga magpapawalang-bisa ng pag-aayuno.

Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino



Kinakailangang napag-aralan na:

- Unang aralin sa Yunit ng Siyam
- Mga aralin sa Yunit ng Taharah

Ang Mga Kondisyon ng Pag-aayuno

Ang pag-aayuno sa buwan ng *Ramadhan* ay obligado para sa bawat isang Muslim sa mga sumusunod na kondisyon:

1. **Muslim:** Ang pag-aayuno ay isang gawaing pagsamba sa Allah ﷻ. Ang lahat ng uri ng pagsamba ay hindi tatanggapin maliban sa isang Muslim, na kung kaya kahit pa mag-aayuno ang isang *kafir* (walang pananampalataya) ay hindi ito tatanggapin mula sa kanya.
2. **Tamang gulang at tamang pag-iisip:** Ang tamang gulang ay ang sinuman na umabot ng gulang na dapat nang magsagawa ng mga ipinag-uutos sa Islam. Ang batang maliit ay hindi obligadong mag-aayuno, ngunit kanais-nais ito bilang pagsasanay para sa kanya. At kapag batid na niya ang pagitan ng masama at mabuti ang kanyang pag-aayuno ay magiging tama. Ang tamang pag-iisip naman ay ang hindi nasisiraan ng bait dahil sa pagkabalihaw o katandaan, kaya hindi tama ang pag-aayuno ng sinuman na wala sa tamang pag-iisip sapagkat hindi ito nagkakaroon ng *Niyah* (intensyon).
3. **May kakayahang mag-aayuno:** Hindi nakakasira sa kanyang kalusugan at buhay. Sinuman ang walang kakayahan dahil sa katandaan o sakit na walang lunas ay hindi na dapat mag-aayuno ngunit dapat magpakain ng isang *Miskin* (mahirap) sa bawat araw ng *Ramadhan*. Isinalaysay ni Ibn Abbas ؓ: *"Pinapayagan ang sinumang ubod ng katandaan na hindi na mag-aayuno at siya ay magpakain na lamang sa bawat araw ng isang Miskin at hindi na kailangan pang magbayad ng pag-aayuno"*.⁽¹⁾
4. **Nasa kanyang lugar ng tirahan:** Ang manlalakbay ay hindi kinakailangan mag-aayuno ngunit dapat niyang bayaran ang mga araw na hindi siya nag-aayuno kapag nakabalik na sa kanyang bayan kung ang kanyang paglalakbay ay hindi para sa mga ipinagbabawal (*haram*).
5. **Kapag walang nakahahadlang:** Tulad ng regla ng babae at pagdurugo na sanhi ng panganganak para sa mga kababaihan. Ipinagbabawal na mag-aayuno ang babae sa katayuang ito ngunit dapat pagbayaran ang mga araw na hindi nakapag-aayuno sa buwan ng *Ramadhan* pagkatapos ng regla o mawala na ang pagdurugo.

Ang lahat ng nabanggit ay mga kondisyon na dapat makamit upang maging obligado ang pag-aayuno, kaya hindi obligado ang pag-aayuno sa sinuman na wala ang isa man sa mga nabanggit na mga kondisyong ito.

Mayroong pang isang mahalagang kondisyon upang maging tama ang pag-aayuno: ang *Niyah* (intensyon). Sinuman ang nagnanais na mag-aayuno ng obligadong pag-aayuno tulad ng *Ramadhan*, o magbayad ng araw ng pag-aayuno sa *Ramadhan* ay kinakailangang magkaroon ng intensyon sa gabi bago ang araw ng pag-aayuno, tulad ng sinabi ng Propeta ﷺ: *"Sinuman ang hindi nakapag-intensyon sa gabi bago ang araw ng pag-aayuno bago sumikat ang buwang-liwayway ay hindi nakapag-aayuno"*.⁽²⁾

Hindi na kinakailangang magkaroon ng intensyon sa gabi para sa mga boluntaryong pag-aayuno. Maaari siyang mag-intensyon bago mag tanghali kung hindi siya nakagawa ng anumang makakasira ng pagaayuno, tulad ng isinalaysay ni A'isha ؓ: *Isang araw dumating ang Propeta at nagsabi: "Mayroon bang kahit na anong makakain?" Sinabi namin: "wala". Sinabi niya: "Kung ganoon ako ay nag-aayuno." Isang araw dumating naman siya at sinabi namin: "Mayroon nagregalo sa atin ng Hais (pagkain)." Sinabi niya: "Ipakita mo sa akin sapagkat ako ay nag-aayuno mula pa kaninang umaga," at siya ay kumain."*⁽³⁾

(1) Isinalaysay ni Al-Daraqutni at al-Hakim at ito ay Saheeh

(2) Isinalaysay ng Lima

(3) Isinalaysay ni Muslim

Mga alituntunin ng pag-aayuno sa buwan ng Ramadhan

Ang pag-aayuno sa buwan ng *Ramadhan* ay obligado sa bawat Muslim na nasa tamang gulang at pag-iisip. Tulad ng sinabi ng Allah ﷻ:

﴿ يَا أَيُّهَا الَّذِينَ آمَنُوا كُتِبَ عَلَيْكُمُ الصِّيَامُ كَمَا كُتِبَ عَلَى الَّذِينَ مِن قَبْلِكُمْ لَعَلَّكُمْ تَتَّقُونَ ﴾

O kayong mga mananampalataya! Ang pag-aayuno ay ipinag-uutos sa inyo, katulad ng pag-uutos nito sa mga taong nauna sa inyo, upang kayo ay maging Al-Muttaqun (may tunay na pagkatakot sa Allah).⁽¹⁾

at sinabi rin ng Allah ﷻ:

﴿ شَهْرُ رَمَضَانَ الَّذِي أُنزِلَ فِيهِ الْقُرْآنُ هُدًى لِّلنَّاسِ وَبَيِّنَاتٍ مِّنَ الْهُدَىٰ وَالْفُرْقَانِ فَمَن شَهِدَ مِنْكُمُ الشَّهْرَ فَلْيَصُمْهُ ﴾

Buwan ng Ramadhan kung kailan ipinahayag ang Qur'an bilang gabay sa sangkatauhan, ganundin naman bilang maliwanag na palatandaan na gabay at sa paghatol (sa pagitan ng tama at mali). Sinuman sa inyo ang naroroon sa kani-kanilang mga tahanan sa panahong ito, gugulin ito sa pag-aayuno.⁽²⁾

At ang katibayan mula sa sunnah ng Propeta ﷺ ay: Isinalaysay ni Abdullah bin 'Umar ibn al-Khattab ؓ, sinabi niya: Narinig ko ang Propeta Muhammad ﷺ na nagsabi: "Ang Islam ay nakabatay sa limang haligi; pagtestigo na walang sinuman ang may karapatang sambahin kundi ang Allah at si Muhammad ay Kanyang Sugo, pagsasagawa ng Salah, pagbabayad ng Zakah, Pag-aayuno sa buwan ng Ramadhan at ang Hajj sa Bahay ng Allah."⁽³⁾

Ang mga maysakit at manlalakbay ay pinapahintulutan na huminto sa pag-aayuno. Ganoon din ang babaing nagdadalang-tao kapag natatakot siya para sa kanyang sarili o sa kanyang anak sa sinapupunan, pati na rin ang babaing nagpapasuso ng kanyang anak kapag nangangamba para sa kaniyang anak.

Sinuman ang nakasira ng kanyang pag-aayuno na may sapat na dahilan ay dapat din bayaran pagkatapos ng *Ramadhan*. At ang mga kapaliwanagan ay matutunghayan sa pangalawang baytang sa kapahintulutan ng Allah ﷻ.

Ang oras ng pag-aayuno

Ang pag-aayuno ay magsisimula sa madaling-araw sa pagpasok ng oras ng *Salatul-Fajr*, hanggang sa paglubog ng araw sa oras ng *Salatul-Maghrib*. Ang isang nag-aayuno ay hindi dapat kumain o uminom o di kaya'y gumawa ng anumang nakakasira ng pag-aayuno sa buong maghapon. Sinabi ng Allah ﷻ sa Qur'an:

﴿ وَكُلُوا وَاشْرَبُوا حَتَّىٰ يَبَيِّنَ لَكُمُ الْخَيْطُ الْأَبْيَضُ مِنَ الْخَيْطِ الْأَسْوَدِ مِنَ الْفَجْرِ ثُمَّ أَتَمُوا الصِّيَامَ إِلَى اللَّيْلِ ﴾

...at kumain at uminom hanggang sa ang puting hibla (liwanag) ng buwang liwayway ay magpakita sa inyo, na magpapa-iba sa itim na hibla (kadiliman ng gabi), at pagkatapos ay kumpletuhin ang inyong pag-aayuno hanggang sa pagdating ng gabi...⁽⁴⁾

Ang katibayan mula sa Sunnah ng Propeta ﷺ Sinabi ni 'Umar ؓ: sinabi ng Propeta ﷺ "Sa pagdating ng gabi, pagkawala ng liwanag at paglubog nang araw, ang nag-aayuno ay dapat nang huminto sa pag-aayuno (para sa araw na yaon)."⁽⁵⁾

(1) Surah Al-Baqarah 2 : 183 (2) Surah Al-Baqarah 2 : 185

(3) Isinalaysay ni Bukhari at Muslim (4) Surah Al-Baqarah 2 : 187

(5) Isinalaysay ni Bukhari at Muslim

Mga nakasisira ng Pag-aayuno

Dapat iwasan ng isang nag-aayuno ang lahat ng nakakasira ng pag-aayuno, tulad ng:

1. Pagkain, pag-inom, o anumang sustansya sa katawan, gaya ng pagtuturok ng mga likido na pinapadaan sa ugat (*I.V. liquids*) gaya ng dextrose. Sinuman ang gumawa nito at alam niya na makakasira ito ng pagaayuno at alam niya na siya ay nag-aayuno at ginawa pa rin niya ito, ay nasira niya ang kanyang pag-aayuno. Dapat niyang bayaran ang araw na ito ng pag-aayuno. Ngunit hindi masisira ang pag-aayuno kung ito ay nagawa dahil sa pagkalimot, kaya dapat ituloy ang pag-aayuno at walang dapat bayaran.
2. Sinadyang pagsusuka.
3. May regla at ang dinudugo dahil sa panganganak.
4. Ang pakikipagtalik sa asawa sa araw ng *Ramadhan*.
5. Sinadyang pagpapalabas ng semilya. Ang hindi sinasadyang paglabas ng semilya (tulad ng wet dreams) ay hindi nakakasira ng pag-aayuno.
6. Pagkuha ng dugo mula sa katawan tulad ng pagdo-donasyon ng dugo, at *hijaama* (*cupping*; isang paraan ng pagkuha ng maruming dugo sa katawan).

Mga gawaing hindi nakasisira ng Pag-aayuno

1. Ang pagkain o pag-inom nang dahil sa pagkalimot ay hindi nakakasira sa pag-aayuno. Isinalaysay ni Abu Hurairah رضي الله عنه: sinabi ng Propeta ﷺ: "*Sinuman ang nakalimot habang nag-aayuno at siya ay kumain o uminom, dapat niyang ipagpatuloy at kumpletuhin ang kanyang pag-aayuno. Ang Allah ang nagpakain sa kanya at nagkaloob sa kanya ng inumin.*"⁽¹⁾ Sa bersiyon ni Hakim: "*Sinuman ang nakasira ng pag-aayuno dahil sa pagkalimot, hindi na niya ito kailangang ulitin o bayaran pa.*"⁽²⁾
2. Kung siya ay nagising na nasa kalagayan ng janabah sa araw ng kanyang pag-aayuno, ang kanyang pag-aayuno ay tama. Dapat lamang niyang linisin ang kanyang sarili (*ghusl*) para sa pagsasagawa ng Salah. Ibinalita nina 'Aisha at Umm Salama رضي الله عنهما, "*karaniwang bumabangon ang Propeta ﷺ sa madaling-araw habang nasa kalagayan ng Janabah (nakipagtalik sa asawa), at pagkatapos siya ay maliligo at mag-aayuno.*" Sa salaysay ni Umm Salamah رضي الله عنها "...at hindi siya nagbabayad."⁽³⁾
3. Hindi sinasadyang pagsusuka: Ang pag-aayuno nito ay tama. Isinalaysay ni Abu Hurairah رضي الله عنه, sinabi ng Propeta ﷺ: "*Sinuman ang nagsuka (habang nag-aayuno) wala siyang gagawing kabayaran para dito, subalit kung ito ay sinasadyang pagsusuka, mayroon siyang dapat na bayaran.*"⁽⁴⁾
4. Ang paggamit ng pabango, maliban lamang kung ito ay may usok tulad ng *bakhur* na malalanghap papasok sa katawan.
5. Ang pagtikim ng pagkain para sa isang nagluluto. Dapat niyang siguraduhin na walang papasok patungo sa sikmura.
6. Paggamit ng *miswak* o toothbrush sa anumang oras sa araw. Subalit makabubuting umiwas sa paggamit ng toothpaste, dahil maaari itong makapasok sa loob ng katawan.
7. Ang paglunok ng laway, o basain ang bibig ng tubig at ang pagliligo upang magpalamig.
8. Pagkuha ng kaunting dugo para sa mga pagsusuri (*blood test*).

(1) Bukhari at Muslim

(2) Al-Hakim

(3) Bukhari at Muslim

(4) Isinalaysay ng lima at ito ay saheeh



Nakasulat na Pagsasanay

T1. Kumpletuhin ang mga sumusunod:

- Sinuman ang nakalimot na siya ay nag-aayuno, at siya ay kumain o uminom, ang kanyang pagaayuno ay: at dapat niyang:
- Ang pagtuturok na ay hindi makakasira ng pagaayuno, ngunit ang pagtuturok na ay makakasira ng pagaayuno.
- Ang pagdo-donasyon ng dugo ay ng pagaayuno, ngunit ang pagkuha ng kaunting dugo para sa pagsusuri ay ng pagaayuno.
- Sinuman ang tumigil sa kanyang pagaayuno dahil sa sakit o paglalakbay ay dapat:
.....
.....
- Sinuman ang hindi makakayanan ang pag-aayuno dahil sa katandaan o sakit na walang lunas ay kinakailangang:
- Pinagbabawal para sa ang pag-aayuno sa *Ramadhan* at dapat niya itong

T2: Anu-ano ang mga kondisyon ng pag-aayuno?

-
-
-
-
-

T3: Sumulat ng lima na nakakasira ng pag-aayuno?

-
-
-
-
-

T4: Ano ang hatol ng pag-aayuno sa buwan ng *Ramadhan*?


-
-

Mga Bagong Salita at Termino

Nu.	Arabiko	Pagkasulat	Kahulugan
1	أَكْل	Akl	Pagkain
2	شُرْب	Shurb	Inumin
3	مُكَلَّف	Mukallaf	Nasa tamang-edad upang maging obligado ang pagsamba
4	مُسَافِر	Musaafir	Manlalakbay
5	مُقِيم	Muqeeem	Residente; Isang taong nananatili sa kanyang lugar ng tirahan.
6	قَادِر	Qaadir	May kakayahan; Pagkakaroon ng sapat na lakas
7	مُفْطِر	Muftir	Isang tao na tinatapos ang kanyang ayuno sa pamamagitan ng pagkain o paginom
8	الْقِيَاء	Al-Qay'u	Pagsusuka
9	حِجَامَةٌ	<u>H</u> ijamah	Pagkuha ng masamang dugo sa katawan sa pamamagitan ng maliliit na baso (<i>eng. Cupping</i>)
10	جِمَاع	Jimaa'	Pakikipagtalik

“At ipahayag sa sangkatauhan ang Hajj...”

Yunit ng Hajj at ‘Umrah



Talaan ng mga Nilalaman

Pahina	Mga Paksa
146	Unang Aralin: Ang Hajj at ang 'Umrah
147	Ang Hajj (Paglalakbay)
148	Ang kahulugan ng Hajj at 'Umrah
148	Ang hatol para sa Hajj at 'Umrah
149	Ang mga kondisyon upang maging obligado ang Hajj
150	Mawaqeeet (mga itinalagang lugar at oras na magsusuot ng Ihram)
151	Nakasulat na Pagsasanay
152	Mga Bagong Salita at Termino
154	Pangalawang Aralin: Mga Pamamaraan ng Hajj at 'Umrah
155	Ang pamamaraan ng pagsasagawa ng 'Umrah
158	Ang mga Pamamaraan ng Pagsasagawa ng Hajj
161	Nakasulat na Pagsasanay
162	Mga Bagong Salita at Termino

Unang Aralin

Ang Hajj at ang 'Umrah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Malaman ang kahulugan ng Hajj at 'Umrah.
- Paniwalaan ang mga kabutihan ng Hajj at 'Umrah.
- Malaman ang alituntunin ng Hajj at 'Umrah.
- Matandaan ang mga kondisyon ng Hajj at 'Umrah.
- Matandaan ang mga Meeqaat (itinalaga) ng oras.
- Mabilang ang mga Meeqaat (itinalaga) ng lugar.



Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Pag-aaral sa yunit ng Tahaarah
- Pag-aaral sa yunit ng Salah
- Pag-aaral sa yunit ng Athkarus-Salah

Ang Hajj (Paglalakbay)

Ang *Hajj* ay ang ika-5 haligi ng Islam. Ito ay obligado sa isang Muslim na may kakayanan, isang beses sa kanyang buong buhay.

Katotohanan, inutusan ng Allah ﷻ ang kanyang Propeta Ibrahīm (Abraham) at anak na si Ismael ﷺ upang ipatayo ang *Ka'bah*. Sinabi ng Allah ﷻ:

﴿ وَإِذْ جَعَلْنَا الْبَيْتَ مَثَابَةً لِّلنَّاسِ وَأَمْنَا وَانۢخَدُوا مِنۢ مَّقَامِ إِبْرٰهٖمَ مُصَلِّٖ ۖ وَعٰهَدْنَا إِلَىٰٓ اِبْرٰهٖمَ وَاِسْمٰعٖلَ اَنۢ طَهِّرَا بَيْتِيَ لِلطَّٰٓئِفِیۡنَ وَالۡعٰكِفِیۡنَ وَالرُّكَّعِ السُّجُوۡدِ ۝﴾

"At banggitin mo (O Muhammad) nang Aming ginawa ang bahay dalanginan (Ka'bah) bilang pook ng pagbabalik (kanlungan at pagdalaw) para sa sangkatauhan at kaligtasan, at inyong ituring mula sa kinatatayuan ni Ibrahīm ang isang pook ng dalanginan. At Aming iniatas kina Ibrahīm at Ismael na inyong padalisayin ang Aking bahay-dalanginan para sa mga nagsisiikot (tawaf) dito at sa mga nananatili (rito para sa pagsamba), at sa mga nagsisiyuko at nagpapatirapa (sa pagdarasal)".⁽¹⁾

Pagkatapos, inatasan si Propeta Ibraheem ﷺ na imbitahan ang sangkatauhan upang dalawin ang bahay-dalanginan ng Allah ﷻ, tulad ng sinabi ng Allah ﷻ:

﴿ وَإِذۡ بَوَّأْنَا لِاِبْرٰهٖمَ مَكَانَ الْبَيْتِ اَنۢ لَا تُشْرِكۡ بِیۡ شَیًۡٔا وَّطَهَّرَ بَيْتِیۡ لِلطَّٰٓئِفِیۡنَ وَالۡاَلۡفَاٖمِیۡنَ وَالرُّكَّعِ السُّجُوۡدِ ۝ وَاٰذِنۡ فِی النَّاسِ بِالۡحٰجِجِ یَأۡتُوۡکَ رِجَالًا وَّعَلٰی کُلِّ ضَامِرٍ یَّاتِیۡنَ مِنۡ کُلِّ فِجٍّ عَمِیقٍ ۝﴾

"At alalahanin nang Aming italaga kay Ibrahīm ang pook ng sagradong bahay (Ka'bah) (nagsasabing): Huwag magtambal sa Akin ng anuman at gawin dalisay ang Aking bahay para sa mga nagsisiikot at yaong mga nagsisitayo at yaong mga nagsisiyuko at mga nagpapatirapa. At ipanawagan mo sa sangkatauhan ang (kahalagahan ng) Hajj, sila ay darating sa iyong nakayapak at nakasakay sa kamelyo, at sila ay magsisirating mula sa matatarik at malalayong daan".⁽²⁾

Ang mga ritwal ng *Hajj* ay mayroong naitakdang mga araw. Ito ay magsisimula ng ika-8 araw ng buwan ng *Thul-Hijjah* (ang pang-12 buwan ng kalendaryong *hijri*) at magtatapos ng ika-13 araw ng buwan ding ito.

Ang tungkol naman sa *'Umrah* ay maaaring isagawa ito ng kahit anong araw sa loob ng isang taon. Ang mga detalye ukol sa pamamaraan at mga batas ng *'Umrah* at *Hajj* ay matutunghayan sa pag-aaral na ito sa kapahintulutan ng Allah ﷻ.

(1) Surah Al-Baqarah 2: 125

(2) Surah Al-Hajj 22: 26-27

Ang kahulugan ng Hajj at 'Umrah

Ang kahulugan ng Hajj sa salita ay: Paghahangad.

Ang kahulugan naman sa Islamikong pananaw ay: Pagsamba sa Allah ﷻ sa pamamagitan ng pagsasagawa ng mga ritwal ng Hajj ayon sa Sunnah ng Propeta Muhammad ﷺ.

Ang kahulugan ng 'Umrah sa salita ay: Pagbisita.

Ang kahulugan naman sa Islamikong pananaw ay: Pagsamba sa Allah ﷻ sa pamamagitan ng pag-ikot (tawaf) sa bahay ng Allah ﷻ, at paglalakad sa pagitan ng *As-Safa* at *Al-Marwah*, at pagpapakalbo o pagputol ng buhok.


Ang mga kabutihan ng Hajj at 'Umrah

Katunayan, maraming naisalaysay na mga Hadith at mga kasabihan ng mga *Sahabah* ang nagpapaliwanag ukol sa kahalagahan, katayuan at kabutihan ng Hajj sa Islam. Kabilang sa mga kabutihan ng Hajj at 'Umrah ang mga sumusunod:

1. Ang tanggap na Hajj ay paraiso ang gantimpala, tulad ng sinabi ng Propeta ﷺ: *"Ang pagsasagawa ng 'Umrah hanggang sa kasunod na pagsasagawa nito ay nabubura ang mga kasalanan sa pagitan ng dalawang ito, at ang tanggap na Hajj ay walang gantimpala maliban sa paraiso."*⁽¹⁾
2. Matatanggal ang mga kasalanan at masasamang gawain, tulad ng sinabi ng Propeta ﷺ: *"Si-numan ang magsasagawa ng Hajj sa bahay na ito na hindi gumawa ng kasamaan ay babalik sa kanyang pinanggalingang lugar katulad sa araw na isinilang siya ng kanyang ina."*⁽²⁾
3. Hajj ang pinakamabuting gawain pagkatapos ng *Eeman* (pananampalataya) at *Jihad* (pakikipaglaban sa daan ng Allah ﷻ). Tinanong ang Propeta ﷺ: *Alin ang pinakamabuting gawain? Sinabi niya: "Paniniwala sa Allah at sa Kanyang sugo."* Tinanong siya ulit: *Ano ang susunod? Sinabi niya: "Ang Jihad sa daan ng Allah."* Tinanong siya ulit: *Ano ang susunod? Sinabi niya: "Ang tanggap na Hajj."*⁽³⁾

Ang hatol para sa Hajj at 'Umrah

Ang Hajj ay ika-5 haligi ng Islam. Ito ay obligado sa lahat ng Muslim na nasa tamang gulang at pag-iisip, malaya at may kakayahan. Ito ay obligadong isagawa isang beses lamang sa buong buhay ng isang Muslim. At ang 'Umrah, katulad ng Hajj, ay obligado din isang beses lamang sa buhay ng isang Muslim.



(1) Isinalaysay ni Bukhari at Muslim

(2) sinalaysay ni Bukhari at Muslim

(3) sinalaysay ni Bukhari at Muslim

Ang mga kondisyon upang maging obligado ang Hajj

1. **Islam:** Hindi ito tinatanggap sa hindi Muslim, tulad din ng iba pang pagsamba.
2. **Tamang gulang:** Hindi obligado sa mga bata. Kapag ang isang bata ay magsasagawa ng Hajj ito ay tatanggapin ngunit hindi maaaring ipalit sa obligado ng Hajj, kung kaya kapag nasa tamang gulang na siya ay dapat magsagawa ulit ng Hajj.
3. **Tamang pag-iisip:** Ang baliw ay hindi kinakailangang magsagawa ng Hajj.
4. **Malaya.**
5. **Kakayanan:** Ito ay kakayahang pisikal at pinansyal.
6. **Mahram** (asawa o lahat ng lalaking bawal maging asawa) para sa mga kababaihan: Kapag walang mahram ang isang babae ay hindi kinakailangang mag-Hajj, dahil hindi pinahihintulatang maglalakbay ang isang babae upang mag-Hajj o iba pang lugar ng walang mahram. Sinabi ng Propeta ﷺ: *"Hindi maaaring maglakbay ang babae ng walang kasamang Mahram, at hindi maaaring pumasok ang isang lalaki sa kanyang bahay maliban kung may kasamang Mahram".*⁽¹⁾

Sinabi ng isang lalaki sa Propeta ﷺ: *"Katotohanan, ang aking asawa ay umalis papuntang Hajj, ako naman ay naatasang sumama sa pakipaglaban sa daan ng Allah". Sinabi ng Propeta ﷺ: "Pumunta ka at mag-Hajj kasama ng iyong asawa".*⁽²⁾

Kailan dapat isagawa ng isang Muslim ang Hajj?

Ang pagsasagawa ng Hajj ay dapat madaliin kapag naisakatuparan ang mga kondisyon ng Hajj upang maligtas sa pananagutan, at pagtugon kaagad sa utos ng Allah ﷻ:

﴿وَلِلَّهِ عَلَى النَّاسِ حِجُّ الْبَيْتِ مَنِ اسْتَطَاعَ إِلَيْهِ سَبِيلًا﴾

"At iniatang ng Allah para sa mga tao na magsagawa sila ng Hajj sa bahay (ka'bah sa Makkah) sa sinuman na may kakayahang maglakbay para dito".⁽³⁾

Iniulat ni 'Abdullah bin 'Abbas رضي الله عنه na sinabi ng Propeta ﷺ: *"Madaliin ninyo ang pagsasagawa ng Hajj na obligado para sa inyo, sapagkat walang sinuman ang nakababatid kung ano ang maaaring humadlang sa kanya (upang maisagawa ito)."*⁽⁴⁾

Ang Pagsasagawa ng Hajj at 'Umrah para sa iba

Dapat isagawa ang Hajj at 'Umrah alang-alang sa iba sa mga sumusunod na sitwasyon:

1. Para sa mga hindi pa nakagawa ng Hajj at 'Umrah at may kakayanang pananalapi ngunit hindi kaya ng kanyang katawan dahil sa katandaan, o sakit na walang lunas. Isinalaysay ni Ibnu Abbas رضي الله عنه: *Katunayan, nagsabi ang isang babaing taga Khath'am: Oh Rasoolullah ang aking ama ay matanda na noon pagdating ng pagiging obligado ng Hajj at hindi na kayang maglakbay, maaari ba akong mag-Hajj para sa kanya? Sinabi ng Propeta: "Mag-Hajj ka para sa kanya".*⁽⁵⁾
2. Para sa mga namatay samantalang malakas ang kanyang katawan at may pera ngunit hindi naisagawa ang Hajj hanggang sa namatay, ay maaring mag-Hajj at 'Umrah para sa kanya.

(1) Isinalaysay ni Ahmad, saheeh ang pagkasunod-sunod ng tagapagsalaysay

(2) Isinalaysay ni Bukhari at Muslim

(3) Surah Ali Imran 3 : 97

(4) Isinalaysay ni Ahmad

(5) Isinalaysay ni Bukhari at Muslim

Mawaqeet (mga itinalagang lugar at panahon upang pumasok sa Ihram)

Ang *Hajj* at *'Umrah* ay nakaugnay sa *Meeqat*. Ito ay dapat mabatid ng sinuman na magsasagawa ng *Hajj* at *'Umrah*. Ang sumusunod ay pagpapaliwanag:

Una: Mawaqeet Zamaniyah: Ito ang panahon kung kailan ipinag-utos sa isang Muslim na pumasok sa sagradong kalagayan ng ihram para sa *Hajj* at *'Umrah*. Ang mga buwan ng *Hajj* ay Shawwal, Thul-Qaidah at Thulul-Hijjah (ang ika-10, 11 at 12 na buwan ng kalendaryong *hijri*). Tungkol naman sa *'Umrah*, ito ay maaaring isagawa anumang oras sa loob ng isang taon, at walang natatanging panahon para dito.

Pangalawa: Mawaqeet Makaniyah: Ito ang mga itinalagang lugar kung saan kinakailangang pumasok sa sagradong kalagayan ng *ihram* (ang intensyon upang umpisahan ang ritwal) ang sinumang magsasagawa ng *Hajj* at *'Umrah*. Hindi pinahihintulutan na makalampas dito ang sinuman kung wala siya sa sagradong kalagayan ng *ihram*. Ito ay ang mga sumusunod:

1. **Thulul-Hulayfah:** Ito ang *Meeqat* ng mga taga Madinah at sa lahat ng dumarating mula sa bandang Madinah. Tinatawag ito sa ngayon ng *Abyar 'Alee*.
2. **Al-Juhfah:** *Meeqat* ng mga taga Sham, Egypt at Morocco. Mayroon ngayon doon na malaking masjid at maaari itong marating sa pamamagitan ng Hijra Road o kaya ay ang Coastal Road. Ito ay katapat ng Rabigh City.
3. **Yalamlam:** *Meeqat* ng mga taga Yemen at sa lahat ng dumarating mula sa bandang Yemen, kilala ngayon sa pangalan na Bayan ng Sa'diyah.
4. **Qarnul-Manazil:** *Meeqat* ng mga taga Najd (Riyadh, Al-Qassim, at Ha'il), kilala ngayon sa pangalan na Al-Saylul-Khabeer sa pagitan ng Taif at Makkah.
5. **Dhatu Ireq:** Ito ang *Meeqat* ng mga taga silangan.

Ang lahat ng magsasagawa ng *Hajj* at *'Umrah* ay hindi pinahihintulutang lumampas sa mga *Meeqat* na ito nang hindi pumapasok sa sagradong kalagayan ng *ihram*. Para sa sinuman na naninirahan sa loob ng nabanggit na mga *Meeqat*, ang kanilang *Meeqat* ay ang kanilang mga bahay. Ang mga taga Makkah naman ay papasok ng *ihram* para sa *Hajj* sa kanilang bahay, ngunit sila ay papasok ng *ihram* para sa *'Umrah* sa labas ng hangganan ng *Haram*, tulad ng Masjid 'Ayesha Ummul-Mu'mineen ﷺ sa Tan'eem at sa iba pang lugar tulad ng Juranah, Al-hudaybiyah (Al-Shumaysie).





Nakasulat na Pagsasanay

T1. Kumpletuhin ang mga sumusunod:

- a) Ang ibig sabihin ng *'Umrah* sa Salita:
- b) Ang ibig sabihin ng *'Umrah* sa Islamikong pananaw:
- c) Ang ibig sabihin ng *Hajj* sa Salita:
- d) Ang ibig sabihin ng *Hajj* sa Islamikong pananaw:
- e) *Thul-Hulayfah* ay ang *meeqat* para
at tinatawag ito ngayon na
- f) Ang *meeqat* ng mga taga Sham, Egypt at Morocco ay
at ito ay nasa tapat ng
- g) Yalamlam ang *meeqat* ng mga taga
at ito ay kilala ngayon na bayan ng
- h) Ang *meeqat* ng mga taga-Najd ay
at ito ay tinatawag ngayon na
- i) Ang Datu 'Irq ay ang *meeqat* ng mga nanggagaling sa

T2. Ano ang hatol para sa *Hajj*?

T3. Isulat ang mga kondisyon ng *Hajj*:

1.
2.
3.
4.
5.
6.

T4. Ano ang ibig sabihin ng *meeqat*? :

Mga Bagong Salita at Termino

Nu.	Arabiko	Pagkasulat	Kahulugan
1	مَيْقَاتُ	Meeqat	Itinalagang oras o lugar kung saan magsusuot ng Ihram
2	الْحَرَمَ	Al-Haram	Sagrado; bawal; Ang sagradong masjid sa Makkah
3	مَقَام	Maqaam	Dambana; Altar; Istasyon
4	مَنَاسِكُ	Manaasik	Seremonya; Ritwal; Pamamaraan ng Hajj;
5	طَوَاف	Tawaaf	Pag-ikot sa palibot ng Ka'bah
6	سَعْي	Sa'ee	Paglakad sa pagitan ng Safa at Marwah
7	الصَّفَا	As-Safaa	Ang bundok na malapit sa Ka'bah, kung saan nag-uumpisa ng Sa'ee
8	الْمَرْوَة	Al-Marwah	Ang bundok na malapit sa Ka'bah, kung saan nagtatapos ang Sa'ee
9	زِيَارَة	Ziyaarah	Pagbisita
10	مَحْظُور	Mah-dhoor	Ipinagbabawal



Pangalawang Aralin

Mga Pamamaraan ng Hajj at ang 'Umrah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Maisasagawa mo ang 'Umrah sa tamang pamamaraan.
- Matatandaan mo ang mga ipinagbabawal sa ihram.
- Maisasagawa mo ang Hajj sa tamang pamamaraan.
- Malalaman mo ang pagkakaiba ng Hajj Ifrad, Tamattu at Qiran.

Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino



Kinakailangang napag-aralan na:

- Ang Unang Aralin sa Yunit ng Hajj at 'Umrah
- Yunit ng Tahaarah
- Yunit ng Salah
- Yunit ng Athkarus-Salah

Ang pamamaraan ng pagsasagawa ng 'Umrah

Ang 'Umrah ay pagsamba sa Allah ﷻ sa pamamagitan ng pagbisita sa Masjid al-Haram (Ka'bah). Maaaring isagawa ito kahit anong oras sa loob ng isang taon. Ang pagsasagawa ng 'Umrah sa buwan ng *Ramadhan* ay may malaking kabutihán, tulad ng sinabi ng Propeta ﷺ: "Ang pagsasagawa ng 'Umrah sa buwan ng *Ramadhan* ay katumbas ng *Hajj*".⁽¹⁾ Ang ibig sabihin ay katumbas ng gantimpala ng pagsasagawa ng *Hajj*.

Sinuman ang nais magsagawa ng 'Umrah ay magsisimula sa pagpasok sa sagradong kalagayan ng *ihram* bago lumampas sa kanyang *Meeqat*, umikot (*tawaf*) sa paligid ng *Ka'bah*, maglakad (*Sa'i*) sa pagitan ng *As-Safa* at *Al-Marwah*, at pagkatapos ay ahitin o gupitan ang buhok.

Ang sumusunod ay paliwanag ukol sa pagsagawa ng 'Umrah:

1. **Al-ihram:** Ito ang unang haligi ng *Hajj* at 'Umrah. Ang tinutukoy sa *ihram* ay ang *Niyah* (intensyon) upang simulan ang ritwal, hindi ang isinusuot ng isang *Muhrim* (nakasuot ng *ihram*).


Kapag nakapag-intensyon na ang isang Muslim para sa *Hajj* at 'Umrah at nakasuot na ng *ihram* ay nakapasok na siya sa kalagayan ng *ihram*, at ang mga sumusunod ay bawal na para sa kanya:

- a. Pagsuot ng damit na may tahi para sa mga kalalakihan. Ang tinutukoy dito ay damit na may tahi at nakasukat sa mga bahagi ng katawan tulad halimbawa ng pantalon, chaketa, baro at iba pa. Ang isusuot lamang ay dalawang tela. Ang pang-ibaba ay tinatawag na *Izaar* at ang pang-itaas naman ay *Rida* at walang tahi. Pinakamainam kung ito ay puti para sa mga lalaki. Para sa mga babae naman ay pinahihintulutang magsuot ng kahit anong nais nila, hindi tatakpan ang kanilang mga mukha at huwag magsuot ng gwantes sa kamay, ngunit kapag nasa harap ng mga lalaking hindi *Mahram* ay dapat nilang takpan ang kanilang mukha at kamay.
- b. Ang pabango: Hindi dapat maglagay ng pabango pagkatapos pumasok sa kalagayan ng *ihram*.
- c. Pakikipagtalik sa asawa at anumang bagay na makakaakit dito.
- d. Pagputol ng kuko at buhok.
- e. Ang pagtakip ng ulo o mukha para sa mga kalalakihan. Ang mga kababaihan naman ay nakalabas ang mukha at kamay at tinatakpan lang ito kapag may mga kalalakihan sa paligid.
- f. Pagpapakasal: Hindi maaaring magpakasal o magkasal ng iba.
- g. Pangangaso ng mga hayop sa kalupaan.

Kanais-nais sa sinuman na magsasagawa ng 'Umrah bago pumasok sa kalagayan ng *ihram* na maligo, magpabango, magputol ng mga kuko at magsuot ng dalawang telang puti para sa *ihram*. Pagkatapos ay mag-intensyon upang simulan ang 'Umrah at sabihin ang "**Labbaik Allahumma 'Umrah**" at magpatuloy sa pagbigkas ng *Talbiyah* hangang sa makita niya ang *Ka'bah* at umpisahan ang pagta-*tawaf*.

2. **Tawaf:** Ang paglalakad sa palibot ng *Ka'bah*. Ito ay binubuo ng pitong ikot. Bawat ikot ay magsisimula at magtatapos sa tapat ng panulukan ng *Hajarul-aswad* (Ang itim na bato). Bigkasin ang "**Allahu Akbar**" at humalik sa bato kung ang sitwasyon ay hindi mahirap ngunit kung ito ay mahirap dahil sa maraming tao ay itaas na lamang ang mga kamay tuwing tatapat nito.

(1) Isinalaysay ni Muslim



Sa oras ng pag-ikot ay mananalangin (*Du'a*) sa Allah ﷻ, bigkasin ang "*Subhan Allah*" at "*Laa ilaha ilal-lah*" at bumigkas ng mga *Thikr* sa Allah ﷻ. Walang naitalagang panalangin sa oras ng *tawaf* maliban sa pagitan ng panulukan ng *Al-Yamani* at *Hajarul-Aswad*, dahil sinabi ng Propeta ﷺ na bigkasin dito ang:

﴿ رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ ﴾

"Oh aming Rabb! Ibigay po Ninyo sa amin ang kabutihan sa daigdig na ito at ang kabutihan sa kabilang-buhay, at iligtas po Ninyo kami sa apoy ng Impiyerno."⁽¹⁾


Ang kanang balikat ay nakalabas sa oras ng pagta-*tawaf* lamang, at kinakailangan na may *Wudhu'*. Pagkatapos ng *tawaf* ay magsagawa ng dalawang *rak'ah* sa likuran ng *Maqam Ibrahim* ngunit kapag walang pagkakataon dahil sa dami ng tao ay maaaring gawin ito sa kahit saang lugar sa loob ng *Masjidul-Haram*.

3. *Sa'ee*: Pagkatapos magsagawa ng *Tawaf* ay tutungo sa *Safa*. Kapag nakalapit na dito ay bigkasin ang Talata sa Qur'an: sinabi ng Allah ﷻ:

﴿ إِنَّ الصَّفَا وَالْمَرْوَةَ مِن شَعَائِرِ اللَّهِ فَمَنْ حَجَّ الْبَيْتَ أَوْ اعْتَمَرَ فَلَا جُنَاحَ عَلَيْهِ أَن يَطَّوَّفَ بِهِمَا، وَمَن تَطَوَّعَ خَيْرًا فَإِنَّ اللَّهَ شَاكِرٌ عَلِيمٌ ﴾

"Katiyakan, ang As-safa at Al-Marwah (ang dalawang maliit na bundok na malapit sa Ka'bah) ay kabilang sa malinaw na mga palatandaan ng Deen ng Allah. Kaya't sinuman ang magnais na magsagawa ng Hajj o di kaya ay 'Umrah, ay hindi magiging kasalanan para sa kanya ang paglalakad sa pagitan nito. At sinuman ang gumawa ng mabuti ng kusang-loob, tinatangkilik ng Allah at ginagantimpalaan Niya ang mabuting gawa, at ang Allah ang nakababatid ng lahat."⁽²⁾

(1) Napagkasunduan ng lahat
(2) Surah Al-Baqarah 2 : 158



Kapag nakarating sa *Safa* humarap sa *Ka'bah*, itaas ang mga kamay, bigkasin ang "*Allahu Akbar*" ng tatlong beses, at bigkasin ang:

*"La ilaha illal-lahu wahdahu la shareeka lah,
lahul-Mulku wa lahul-Hamd, wa huwa 'ala kulli shay-in qadeer,
La ilaha illal-lahu wahdah, anjaza wa'dah, wa nasara 'abdah,
wa hazamal-ahzaba wahdah".*

"Walang sinumang may karapatang sambahin maliban sa Allah, Siya ay nag-iisa at walang kapareha. Sa Kanya ang Kaharian at lahat ng papuri, at Siya ay may kapangyarihan sa lahat ng bagay. Walang sinumang may karapatang sambahin maliban sa Allah, Siya ay nag-iisa. Tinupad Niya ang Kanyang pangako, tinulungan ang Kanyang alipin at nag-iisang tinalo ang mga kalaban."

Pagkatapos ay manalangin ng kung anong nais na makakabuti sa daigdig at sa kabilang buhay. Ulitin ang pagbigkas ng "*Allahu Akbar*" at mga *Thikr* na ito maliban sa Talata sa Qur'an na nabanggit sa unahan ng tatlong beses. Pagkatapos ay maglakad papuntang *Marwah* sa kabilang linya. Ang mga lalaki ay lalakad ng mabilis (jogging) sa pagitan ng dalawang berdeng ilaw. Manalangin habang lumalakad ng kung ano ang nais na panalangin hanggang sa makarating sa *Marwah*. Walang natatanging panalangin sa bawat pag-ikot. Ito ang unang ikot. Pagkatapos ay babalik mula sa *Marwah* papuntang *Safa* bilang pangalawang ikot hanggang sa mabuo ang pitong ikot na magsisimula sa *Safa* at magtatapos sa *Marwah*.

4. **Ang pag-ahit o pagputol ng buhok:** Pagkatapos ng *Sa'ee* ay magpa-ahit ng ulo o gupitan ang lahat ng bahagi ng kanyang buhok. Ang pagpapakalbo ay higit na mabuti kaysa pag-gupit ng buhok. Ang mga kababaihan ay puputol lamang ng maliit sa dulo ng kanilang buhok. Pagkatapos nito ay magtanggap na ng suot na *ihram* sapagkat natapos na ang '*Umrah*.

Ang mga Pamamaraan ng Pagsasagawa ng Haji

Ang Haji ay obligasyon ng bawat Muslim na nasa tamang gulang, pag-iisip at may kakayanang magsagawa nito. Ito ay obligado ng minsan lamang sa buhay ng isang Muslim. Ang pagsasagawa ulit nito ng kusang-loob ay magkakamit ng napakalaking gantimpala. Ang mga buwan ng Haji, tulad ng nabanggit sa unahan, ay ang buwan ng Shawwal, Thul-Qaidah at Thul-Hijjah.

May tatlong uri ng Haji:

Ifrad • Tamattu' • Qiran

Ito ang mga paliwanag:

1. **Ifrad** - Ang Niyyah ay para lamang sa Haji. Ang pamamaraan ay ang sumusunod:

- 🕌 **Ihram**: Pumasok sa sagradong kalagayan ng ihram para sa Haji lamang at bigkasin ang "Labbayka hajjan" ("O Allah, narito ako upang magsagawa ng Haji"). Nauna na ang paliwanag tungkol sa ihram at ano ang mga makaka walang-bisa dito. Pagkatapos ay Palaging pagbigkas ang sumusunod na Talbiyyah:

*"Labbaik-Allahumma labbaik,
Labbaik La shareeka laka labbaik.
innal-hamda, wan-ni'mata, laka walmulk, la shareeka Lak."*

Huwag tumigil hanggang sa unang pagbato sa Jamarah al-aqabah sa araw ng pag-aalay sapagkat papalitan ito ng Takbeer ("Allahu Akbar"). Kaya magsumikap sa pagbigkas ng mga panalangin at pag-alaala sa Allah ﷻ habang naglalakbay para sa Haji.

- 🕌 **Tawaf Al-Qudoom**: Ito ay Sunnah. Pagdating sa Masjidul-Haram ay mag-Tawaf Al-Qudoom (tawaf ng pagdating) na pitong ikot sa Ka'bah tulad ng naipaliwanag na sa pamamaraan ng 'Umrah. Pagkatapos ay magsagawa ng 2 Rak'ah bilang Sunnah ng Tawaf.
- 🕌 **Sa'ee para sa Haji**: Ito ay ang paglalakad sa pagitan ng Safa at Marwah tulad ng nabanggit na sa 'Umrah, ngunit mananatili sa kanyang ihram kahit natapos na ang kanyang Sa'ee. Hindi magpapakalbo o magpapaputol ng buhok. Ang Sa'ee na ito ay isa sa mga haligi ng Haji. Maaaring itong isagawa kasama ng Tawaf Al-Qudoom o maaaring iantala pagkatapos ng Tawaf Al-Ifadah (Haji) para sa sinumang nagsasagawa ng Haji Ifrad.
- 🕌 **Araw ng Tarwiyah**: Ito ay ika-8 araw ng buwan ng Thul-Hijjah. Sa araw na ito ay tutungo ang nagsasagawa ng Haji sa Mina at doon magsa-Salah ng Dhuhr, 'Asr, Maghrib, 'Isha, at Fajr sa susunod na araw (ika-9) nang pinaikli (Qasr). Dalawa lamang ang Rak'ah sa Salah ng Dhuhr, 'Asr at 'Isha sa tamang oras nito at hindi pagsasamahin (Jama'a).
- 🕌 **Araw ng Arafah**: Ito ay ika-9 araw ng buwan ng Thul-Hijjah. Sa araw na ito ay tutungo ang nagsasagawa ng Haji sa Arafah mula sa Mina pagkatapos ng Salah ng Fajr. Kinakailangan na tiyakin na nakapasok sa loob ng Arafah. Doon magsasagawa ng Salah ng Dhuhr at 'Asr na pinaikli (Qasr) at pinagsama (Jama'a).

Mananatili dito hanggang sa paglubog ang araw at gugulin ang pagkakataong ito para sa mga *du'a* at pag-alaala sa Allah ﷻ. Maaaring manatili kahit saan sa loob ng Arafah. Hindi kinakailangang pumunta pa at umakyat sa bundok ng *Arafah* dahil sinabi ng Propeta ﷺ: “*Dito ako tumayo ngunit ang buong Arafah ay Mawqif (lugar ng pananatili)*”.⁽¹⁾

🕌 **Muzdalifah:** Pagkalipas ng paglubog ng araw sa *Arafah* ay tutungo sa *Muzdalifah*. Ito ay isang lugar sa pagitan ng *Arafah* at *Mina*. Dito magsagawa ng Salah ng Maghrib at 'Isha na pinagsama, at pinaiksi ang 'Isha. Pagkatapos ay manatili at matulog dito hanggang Fajr. Pagkatapos ng Salah ng Fajr ay manalangin hanggang sa bago sumikat ang araw, at pagkatapos ay tutungo na sa *Mina*. Ganito ang para sa mga may kakayanan. Ang mga mahihina at may karamdaman at kanilang mga kasamahan ay pinahihintulatang umalis ng *Muzdalifah* patungo ng *Mina* simula sa ikatlong-bahagi ng gabi.

🕌 **Ang Araw ng Nahr (pag-aalay):** Ito ay ika-10 araw ng buwan ng *Thul-Hijjah*. Ito ang araw ng *Hajjul-Akbar* (dakilang *Hajj*), ang pinakadakilang araw sa paningin ng Allah ﷻ. Sa araw na ito ay darating ang nagsasagawa ng *Hajj* sa *Mina* mula sa *Muzdalifah* pagkatapos magpalipas ng gabi at mag-Salah ng Fajr doon. Ang dapat gawin sa araw na ito ay ang mga sumusunod:

1. **Pagbato ng *Jamaratul-aqabah*:** Pagdating sa *Mina* mula sa *Muzdalifah* ay magbato sa *Jamaratul-aqabah* ng pitong maliliit na bato – kasing laki ng dulo ng daliring hintuturo – at bigkasin ang “*Allahu Akbar*” sa bawat pagbato.
2. **Pagpapakalbo o pagputol ng buhok:** Pagkatapos ng pagbabato ay magpapakalbo o magpaputol ng buhok. Ang pagpapakalbo ay higit na mabuti at malaki ang gantimpala. Pagkatapos magpakalbo ay magtanggap na ng *ihram*. Ito ang unang *Tahallul* (paglabas mula sa sagradong katayuan ng *ihram*), at ipinapahintulot na ang lahat ng mga ipinagbabawal habang nakasuot ng *ihram* tulad ng pagsuot ng may-tahi, pabango at pagputol ng mga kuko, maliban sa pakipagtalik sa asawa at kung ano ang nakakaakit dito hanggang sa maisagawa ang *Tawaf Al-Ifadah* (*Tawaf* ng *Hajj*).
3. ***Tawaf Al-Ifadah*:** Pagkatapos magpakalbo o magputol ng buhok ay maliligo at magsusuot na ng ordinaryong damit, magpabango at magtungo ng *Masjid Al-Haram* upang mag-*Tawaf* sa palibot ng *Ka'bah* ng pitong ulit, kung ito ay madali para sa kanya. Kapag mahirap ang sitwasyon ay maaari itong ipagpaliban. Ang *tawaf* na ito ay kilala sa tawag na *Tawaf Al-Ifadah*. Pagkatapos ay babalik ulit sa *Mina* at mananatili dito sa loob ng mga Araw ng *Tashreeq*.

🕌 **Mga araw ng *Tashreeq*:** Ito ay mga araw ng ika-11, 12 at 13 ng buwan ng *Thul-Hijjah*. Sa loob ng mga araw na ito ay nararapat sa lahat ng mga *Hujjaj* na matulog sa *Mina* tuwing gabi, at magsa-Salah ng *Dhuhr*, 'Asr at 'Isha ng *Qasr* (pinaiksi) at hindi pinagsama (*Jama'a*). Magbabato sa tatlong *Jamarat* sa araw ng ika-11, 12 at 13 pagkatapos ng *Zawal* (Adhan ng *Dhuhr*). Pagkatapos ay aalis patungong Makkah upang magsagawa ng *Tawaf Al-Wida*.

🕌 ***Tawaf Al-Wida*** (*Tawaf* ng pagpapaalam): Kapag nakarating sa Makkah mula sa *Mina* ay magsagawa ng *Tawaf Al-Wida* at pagkatapos ay kaagad na babalik sa kanyang pinanggalingan na bayan. Kapag gusto pang manatili sa Makkah ng mga ilang araw ay hindi muna magsagawa ng *Tawaf Al-Wida* hanggang sa araw na kanyang pag-alis. Ang pamamaraan ng *Tawaf Al-Wida* ay katulad din ng ibang *Tawaf* maliban lamang sa hindi nakasuot ng *ihram* kundi ng karaniwang damit lamang.

Dito nagtatapos ang pagsasagawa ng *Hajj*. Marami pang mga paliwanag ukol dito na kinakailangang ipapaliwanag sa tamang oras. Dapat sa bawat Muslim na kapag mayroong hindi malinaw sa kanya ukol sa kanyang Relihiyon ay magtanong sa mga '*Ulama* (paham) upang makatiyak sa pagsamba sa Kanyang *Rabb*.

(1) Sunan Abu Dawood

2. **Hajj Qiran** - Ito ang pangalawang uri ng **Hajj**. Magkaiba ito sa **Hajj Ifrad** sa sumusunod:

- a) Ang intensyon na pagsamahin ang **'Umrah** at **Hajj**.
- b) Ang pagkatay ng tupa sa Araw ng **Nahr** pagkatapos ng pagbato ng **Jamaratul-Aqabah**, at maaaring iantala ang pagkatay hanggang sa ika-13 na araw **Thul-Hijjah**. Dapat ipamahagi ang karne sa mga mahihirap na tao sa **Haram** at Sunnah rin ang kumain mula dito. Maaari din itong ipamigay sa labas ng **Haram**. Ito ay kilala sa tawag na **Al-Had'ee**.

3. **Hajj At-Tamattu'** - Ito ang pangatlong uri ng **Hajj**. Ang Pagkakaiba nito sa **Hajj Ifrad** ay ang mga sumusunod:

- a) Ang nagsasagawa ng **Tamattu'** ay kinakailangang mag-**'Umrah** sa loob ng mga buwan ng **Hajj** at mag-intensyon ng pagsasagawa ng **Hajj** sa taon din na iyon.
- b) Pagkatapos pumasok sa sagradong kalagayan ng **ihram** para sa **'Umrah** at makarating ng Makkah ay buuin ang pagsasagawa ng **'Umrah**. Pagkatapos ng **Sa'ee** sa pagitan ng **Safa** at **Marwah** ay magputol ng buhok ngunit huwag magpakalbo. Pagkatapos ng pagputol ng buhok ay lumabas sa kalagayan ng **ihram**.
- c) Pagsapit ng ika-8 araw ng buwan ng **Thul-Hijjah** ay pumasok ulit sa kalagayan ng **ihram** para sa **Hajj** sa lugar kung saan naroroon at buuin ang pagsasagawa ng **Hajj** gaya ng naunang nabanggit.
- d) Ang pagkatay ng tupa sa Araw ng **Nahr** pagkatapos ng pagbato ng **Jamaratul-Aqabah**, at maaaring iantala ang pagkatay hanggang sa ika-13 araw ng **Thul-Hijjah**.

Ang pagkakaiba ng Qiran at Tamattu' ay ang sumusunod:

- a) Ang nagsasagawa ng **Hajj Tamattu'** at **Hajj Qiran** ay magkatulad na magkakatay ng **Had'ee** sa Makkah at ipapamahagi sa mga mahihirap na tao sa **Haram**.
- b) Ang nagsasagawa ng **Hajj Qiran** ay nananatili sa kanyang **ihram** hanggang sa matapos ang **Hajj**, samantalang ang **Tamattu'** ay lumalabas sa **ihram** pagkatapos magsagawa ng **'Umrah**, at papasok ulit ng **ihram** para sa **Hajj**.
- c) Ang nagsasagawa ng **Tamattu'** ay kailangang magsagawa ng dalawang **Sa'ee**, ang una ay para sa **'Umrah**, at ang pangalawa ay para sa **Hajj** pagkatapos ng **Tawaf Al-Ifadah**, samantalang ang nagsasagawa ng **Qiran** ay isa lamang ang **Sa'ee** na kasama sa **Tawaf Al-Qudoom** o sa **Tawaf Al-Ifadah**.





Nakasulat na Pagsasanay

T1. Kumpletuhin ang mga sumusunod:

- Ang *ihram* ay: at hindi ang pagsusuot ng tela ng *ihram*.
- Magsisimula ang *Tawaf* sa: at magtatapos sa: at mag-uumpisa ang *Sa'ee* mula: at magtatapos sa:
- Ang *Hajj Tamattu'* ay: at ang *Hajj Ifraad* ay:
- Ang araw ng *Tarwiyyah* ay: sa buwan ng *Thul-Hijjah*, at ang araw ng *Nahr* (pag-aalay) ay: at ang araw ng *Arafah* ay: sa buwan ng *Thul-Hijjah*.
- Ang mga buwan ng *Hajj* ay: at: at:
- Ang kahulugan ng mga *mahdooratul-ihram* (pinagbabawal habang nasa kalagayan ng *ihram*) ay:

T2. Isulat ang mga ipinagbabawal habang nasa kalagayan ng *ihram*:

-
-
-
-
-
-

T3. Paano ang pamamaraan ng pagsasagawa ng *'Umrah*?

.....

.....

.....

.....

T4. Ilarawan sa maikling pagsasalaysay ang iyong paglalakbay para sa *Hajj Tamattu'* magsimula nang ikaw ay umalis sa iyong bayan hanggang sa ikaw ay makabalik:

.....

.....

.....

.....

.....

.....

Mga Bagong Salita at Termino

Nu.	Arabiko	Pagkasulat	Kahulugan
1	إحرام	Ihram	Intensyon at dalawang telang sinusuot para sa 'Umrah at Hajj.
2	هَدْي	Had-ee	Ang tawag sa alay na kambing, baka at kamelyo. Para sa Hajj Tamattu at Qiran. Kinakatay sa Makkah.
3	أَضْحِيَّة	Udh-hiyyah	Tawag sa alay na hayop ng sinuman na hindi nagsasagawa ng Hajj.
4	نَحْر	Nahr	Pagkatay ng alay na hayop.
5	إِفْرَاد	Ifraad	Ang niyyah ay para sa pagsasagawa ng Hajj lamang.
6	قِرَان	Qiraan	'Umrah at Hajj nang magkasama. Walang tahallul pagkatapos ng 'Umrah.
7	تَمَتُّع	Tamat-tu'	'Umrah at Hajj nang magkasama. May tahallul pagkatapos ng 'Umrah, at papasok ulit sa kalagayan ng ihram para sa pagsasagawa ng Hajj.
8	حَلْق	Halq	Pag-ahit ng buhok sa ulo
9	تَقْصِير	Taqseer	Paiklihin
10	تَحَلُّل	Tahal-lul	Paglabas sa sagradong kalagayan ng ihram



"Sabihin mo, O Muhammad: Katotohanan ang aking Salah, ang aking Sakripisyo, ang aking buhay at ang aking kamatayan ay para sa Allah, ang Panginoon ng lahat ng mga nilikha. Wala Siyang katambal. At iyan ay ipinag-utos sa akin, at ako ang una sa hanay ng mga Muslim." ⁽¹⁾

Yunit ng Buhay ng Muslim



Talaan ng mga Nilalaman

Pahina	Mga Paksa
166	Unang Aralin: Ang buhay ng isang Muslim
167	Ang buhay ng isang Muslim
167	Ang katayuan ng kaalaman sa buhay ng isang Muslim
168	Ang moralidad ng isang Muslim
168	Pagkain at inumin ng isang Muslim
168	Ang damit ng isang Muslim
168	Panlipunang relasyon ng isang Muslim
171	Nakasulat na pagsasanay
172	Mga Bagong Salita at Termino

Unang Aralin

Ang buhay ng isang Muslim

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kapahintulutan ng Allah ﷻ na:

- Maniniwala sa kahalagahan ng kaalaman sa Islam.
- Magkaroon ng katangian ng moralidad sa Islam.
- Mababatid mo ang mga karapatan ng mga magulang at pamilya.
- Makikitungo sa ibang tao ayon sa kaugalian at katuruan ng Islam.
- Maipaliwanag mo ang kahulugan ng *Mahram* ng babaing Muslimah.



Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Pag-aaral ng lahat ng Yunit ng kurikulum na ito

Ang buhay ng isang Muslim

Ang Islam ay isang kumpletong pamamaraan ng pamumuhay na nagbibigay ng maayos na buhay sa isang Muslim sa lahat ng aspetong pangrelihiyon at pangdaigdigang. Ito ang buhay na tumatayo sa pamamagitan ng kaalaman, pagsasagawa at nagtuturo sa pamamagitan ng liwanag ng rebelasyon mula sa Qur'an at Sunnah ng Propeta ﷺ sa lahat ng bahagi ng buhay. Mababatid natin dito ang mga katuruan at mga batas ng Islam na nagbibigay ng maayos na buhay para sa isang Muslim sa kanyang pakikitungo sa pamayanan, kabutihang-asal at sa ekonomiya.

Ang katayuan ng kaalaman sa buhay ng isang Muslim

Ang unang talata na ipinahayag sa Sugo ng Allah ﷻ ay humihimok ng pagsasaliksik ng kaalaman.

﴿ اقْرَأْ بِاسْمِ رَبِّكَ الَّذِي خَلَقَ ﴾

"Basahin (o bigkasin) mo sa ngalan ng iyong Rabb na Lumikha."⁽¹⁾

Hindi ipinag-utos sa Propeta ﷺ na humiling ng karagdagan dito sa daigdig maliban sa dagdag na kaalaman.

﴿ وَقُلْ رَبِّ زِدْنِي عِلْمًا ﴾

"At sabihin mo (O Muhammad): O aking Rabb dagdagan mo ang aking kaalaman."⁽²⁾

Kung kaya ang isang Muslim ay dapat maging masigasig sa pagsasaliksik ng kaalaman ukol sa batas ng Islam. Dito niya makikilala ang kanyang Rabb at malalaman ang mga batas upang maging tama at maliwanag ang kanyang pamamaraan ng pagsamba mula sa Aklat ng Allah at Sunnah ng Propeta ﷺ.

Ang pagsasaliksik ng Islamikong kaalaman ay tungkulin ng bawat Muslim at Muslimah sa lahat ng mga mahalagang bagay, lalong-lalo na ang mga haligi at mga tungkulin sa Islam, tulad ng kaalaman tungkol sa Salah, Zakah, Siyam at iba pa. Tulad ng sinabi ng Propeta ﷺ: *"Ang pagsasaliksik ng kaalaman ay tungkulin ng bawat Muslim"*.⁽³⁾

Ang batayan ng Muslim sa kanyang buhay ay ang Aklat ng Allah at ang Sunnah ng Propeta ﷺ. Hindi tinatanggap ang anumang salita o opinyon kung ito ay hindi naaayon sa Qur'an at sa Sunnah, kahit ano pa ang katayuan at katungkulan ng nagmamay-ari ng salita o opinyong ito. Tulad ng sinasabi ng Allah ﷻ:

﴿ فَإِن تَنَزَعْتُمْ فِي شَيْءٍ فَرُدُّوهُ إِلَى اللَّهِ وَالرَّسُولِ ﴾

"At kung kayo ay hindi magkasundo hinggil sa anumang bagay, isangguni ito sa Allah at sa Kanyang Sugo".⁽⁴⁾

Walang mga pari o pastor sa Islam, bagkus mayroong mga mabubuting 'Ulama (mga paham) na may takot sa Diyos. Sila ang pinupuntahan ng mga Muslim upang magtanong, at nagtuturo sa kanila ng batas ng Allah ﷻ na nagmumula sa Qur'an at Sunnah at hindi sa sariling kaisipan. Kung kaya inutusan tayong magtanong sa mga 'Ulama para sa batas ng Islam. Tulad ng sinabi ng Allah ﷻ:

﴿ فَسَلُّوا أَهْلَ الذِّكْرِ إِن كُنتُمْ لَا تَعْلَمُونَ ﴾

"Kaya inyong tanungin ang angkan (na pinagkalooban) ng mensahe (kaalaman) kung hindi ninyo nalalaman."⁽⁵⁾

(1) Surah Al-'Alaq 96:1

(2) Surah Taha 20:114

(3) Ibn Maajah

(4) Surah An-Nisa' 4:59

(5) Surah An-Nahl 16:43

Ang moralidad ng isang Muslim

Iminumungkahi sa Islam ang magandang pag-uugali, kaya ang bawat Muslim ay dapat magkaroon ng katangian ng pagkatotoo, mapagkakatiwalaan, kalinisan, mapagbigay, matapang, pinangangalagaan ang mga pangako, matiisin, makatarungan, mahabagin, mabuti sa lahat ng mga nilikha at iba pang mga mabubuting kaugalian. Ipinagbabawal sa Islam ang panloloko, pang-aapi, labis na pagtitipid (kuripot), kaduwagan, pagtataksil, pagsisinungaling, panirang-puri, pang-iinsulto at iba pang mga katangian ng masamang-asal. Kung ano man ang nakikitang ginagawa ng ibang nag-aangkin na Muslim ito ay mula sa kanilang likas na kaugalian o masamang-asal na kinagisnan. Ito ay salungat sa katuruan ng Islam at labas ang Islam dito. Ito ay nagmumula sa kanilang sarili na nagpapakita ng kanilang kahinaan at paglayo sa katuruan ng Islam sa kanilang buhay.

Pagkain at inumin ng isang Muslim

Ang pangkalahatang alituntunin ng pagkain at inumin ay: pinapayagan ang Muslim na kainin o inumin ang lahat ng mabubuting pagkain at inumin kung ito ay hindi makakasama sa kanya o hindi ipinagbabawal sa batas ng Islam, gaya ng pagkain ng baboy, patay na hayop at dugo. Pinapayagan din sa isang Muslim ang pag-inom ng anumang mabuting inumin kung ito ay hindi makakasama o makakalasing, gaya ng alak at droga.

Ang damit ng isang Muslim

Maaaring magsuot ang isang Muslim ng kung ano man ang kanyang nais na damit na matatakpan ang kanyang *'Awwrah* (pribadong bahagi ng katawan), ngunit hind dapat katulad ng damit ng kabilang kasarian. Mapag-aaralan ang detalye tungkol dito sa pangalawang baytang (*In sha' Allah*).

Panlipunang relasyon ng isang Muslim

Ang isang Muslim ay lumalapit sa kanyang *Rabb* sa pamamagitan ng pagiging mabuti sa lahat ng nilikha, magandang pakikitungo sa kanila at pagbibigay ng kanilang karapatan ayon sa mabuting moralidad sa Islam. Kabilang dito ang mga sumusunod:

1. **Relasyon ng isang Muslim sa kanyang mga magulang:** Ipinag-utos ng Islam ang magandang pakikitungo sa mga magulang at pagiging mabuti sa kanila. Pinagsama ng Allah ﷻ ang kautusan ng pagsamba sa Kanya at pagiging mabuti sa magulang. Sinabi ng Allah ﷻ:

﴿وَقَضَىٰ رَبُّكَ أَلَّا تَعْبُدُوا إِلَّا إِيَّاهُ وَبِالْوَالِدَيْنِ إِحْسَانًا﴾

"At ipinag-utos ng iyong Rabb na wala kang ibang dapat na sasambahin maliban sa Kanya na bukod-Tangi, at ipinag-utos din Niya na maging Mabuti sa iyong mga magulang."⁽¹⁾

Maraming mga talata sa Qur'an at mga *Hadith* ng Propeta ﷺ ang nagpapaliwanag ng kadakilaan ng karapatan ng mga magulang at magandang pakikitungo sa kanila. Kung kaya ang bawat Muslim ay dapat maging masigasig sa pagsunod sa kanila at hindi sumuway sa kanilang mga utos maliban na lang kung ang kanilang ipinag-utos ay salungat sa kautusan ng Allah ﷻ at ng Kanyang Sugo ﷺ. Sinabi ng Allah ﷻ:

﴿وَإِنْ جَاهِدَاكَ عَلَىٰ أَنْ تُشْرِكَ بِي مَا لَيْسَ لَكَ بِهِ عِلْمٌ فَلَا تُطِعْهُمَا وَصَاحِبِهُمَا فِي الدُّنْيَا مَعْرُوفًا﴾

(1) Surah Al-Isra' 17 : 23

“Subalit kapag pinilit ka ng iyong mga magulang na magtambal ng iba sa pagsamba sa Akin na walang kaalaman ay huwag mo silang sundin sa bagay na ito; magkagayunpaman ay pakitunguhan mo pa rin silang dalawa ng mabuting pakikitungo dito sa daigdig.”⁽¹⁾

Ito ang nagpapaliwanag ng katungkulan ng mabuting pakikitungo sa mga magulang at pangangalaga sa kanila kahit sila ay hindi pa mga Muslim, lalung-lalo na sa panahon ng kanilang kahinaan at katandaan. Ang pakikipagmabutihan sa kanila ay sa pamamagitan ng magandang pakikiusap at pananalita, mabuting gawain para sa kanila, paglilingkod sa kanila, tulong sa pananalapi sa kanila at pagbibigay ng regalo.

2. **Relasyon ng isang Muslim sa kanyang pamilya:** Ang pamilyang Muslim ay tumatayo sa awa, pag-iibigan, paggalang at mabuting samahan sa pagitan ng dalawang mag-asawa. May mga taong mas pinapahalagahan ang ugnayan sa mga kaibigan at mga kasamahan sa trabaho at sa kanila nauubos ang kanyang oras at napapabayaang kanyang pamilya. Ito ay salungat sa turo ng Propeta ﷺ. Sinabi ng Propeta ﷺ: *“Ang pinakamahasay sa inyo ay kung sino ang mabuti sa kanyang pamilya, at ako ang pinakamahasay sa inyo sa pamilya.”⁽²⁾*

Mayroong mga alituntunin sa Islam na nag-aayos ng mga karapatan at mga tungkulin sa pagitan ng dalawang mag-asawa na dapat alamin ng lahat ng mga Muslim, lalaki o babae. At dapat din maging masigasig ang mag-asawa na palakihin ang kanilang mga anak sa pamamagitan ng:

- 🕌 Islamikong edukasyon,
- 🕌 Pagsasanay sa kanila ng mabuting-asal simula sa kanilang kamusmusan,
- 🕌 Pagsasanay sa kanila ng pagsasagawa ng Salah,
- 🕌 Pagsasaulo ng Banal na Qur'an,
- 🕌 Pagkamit ng mga pangunahing kaalaman sa batas ng Islam upang makatulong sa kanila na maintindihan ang kanilang relihiyon at papaano ang pagsamba sa kanilang *Rabb*,
- 🕌 Pagsama sa mga mabubuting tao, at
- 🕌 Pangangalaga sa kanila sa lahat ng makakasira sa kanilang pag-uugali gaya ng pakikisama sa mga masasamang tao o mula sa mga masasamang midya (pakikipagtalastasan).

3. **Relasyon ng isang Muslim sa kapuwa Muslim:** Ang relasyon ng isang Muslim sa kanyang mga kapatid na Muslim ay tumatayo sa haligi ng kapatiran na ayon sa sinabi ng Allah ﷻ:

﴿ إِنَّمَا الْمُؤْمِنُونَ إِخْوَةٌ ﴾

“Katiyakan, ang mga mananampalataya ang tunay na magkapatid sa Deen.”⁽³⁾

Kaya mahal niya para sa kanila kung ano ang kanyang mahal para sa kanyang sarili. Naisalaysay sa Hadith ni Abi Hurairah رضي الله عنه na sinabi ng Propeta ﷺ: *“Ang karapatan ng Muslim sa kapuwa Muslim ay anim.”* Sinabi nila (mga sahaaba), *“anu-ano yon O Sugo ng Allah?”* Sinabi niya: *“Batiin siya ng ‘Salaam’ kapag nagkasalubong, tutugunan ang kanyang paanyaya, payuhan siya kapag humingi ng payo, tugunan mo ng ‘yarhamukallaah’ kapag siya ay bumahing at nagsabi ng ‘Alhamdu Lillaah’, dalawin siya kapag nagkasakit, at makisama sa kanyang paglilibing kapag siya ay namatay.”⁽⁴⁾*

(1) Surah Luqman 31 : 15

(2) Isinalaysay ni At-Tirmithi

(3) Surah Al-Hujurat 49:10

(4) Isinalaysay ni Muslim

4. **Relasyon ng isang Muslim sa hindi Muslim:** Nag-uutos ang Islam ng magandang pakipagkapuwa-tao sa lahat na hindi tinitingnan ang kanilang relihiyon, lahi, kulay at nasyonalidad. Sinabi ng Allah ﷻ:

﴿ وَقُولُوا لِلنَّاسِ حُسْنًا ﴾

“At kapag kayo ay nagsalita sa mga tao ay pawang mabubuting salita lamang ang inyong sasabihin.” ⁽¹⁾

Hindi pinahihintulutan ang isang Muslim na gumawa ng masama sa hindi Muslim, lokohin sila at angkinin ang kanilang karapatan, bagkus maging masigasig sa pakikitungo sa kanila ng matuwid, makatarungan at kabutihan, at anyayahan sila tungo sa Islam. Ngunit hindi dapat sila sang-ayunan sa kanilang maling paniniwala at hindi sila pakisamahan sa kanilang mga okasyong pangrelihiyon o di kaya’y pagbibigay ng pagbati sa kanila ukol dito. Hindi ipinagbabawal na makisama sa kanila sa mga panlipunang pagdiriwang tulad ng mga kasalan, promosyon sa trabaho, pagkakaroon ng bagong silang na anak o pagdating ng manlalakbay kung hindi mahahaluan ng mga ritwal ng kanilang relihiyon o mga bagay na salungat sa katuruan ng Islam. Ang isang kapitbahay ay mayroong karapatan sa kanyang kapitbahay kahit ito ay hindi Muslim.

5. **Relasyon ng isang Muslim sa kabilang kasarian:** Ang ugnayan sa pagitan ng lalaki at babae sa Islam ay tumatayo sa maraming mga bagay, kabilang dito ang:

🕌 **Maharim:** Ang *Mahram* ay ang lalaking hindi maaaring pakasalan ng isang babae dahil siya ay may relasyong kamag-anak na nagbabawal ng pag-aasawa sa kanya magpakailanman. Kabilang dito ang ama, kapatid, mga pamangkin, mga tiyuhin, tatay ng asawa, anak na lalaki ng asawa (*eng. stepson*) at asawa ng ina (*eng. stepfather*). Ito ay nabanggit sa talata 31 sa *Surah An-Noor* sa banal na Qur’an. Maaaring maglakbay ang isang babae kasama ang isa sa kanyang mga *Mahram* at hindi niya kailangang mag-*hijab* (magtakip) para sa kanila, hindi katulad sa ibang mga kalalakhian.

🕌 **Babaing hindi Mahram:** Hindi pinapayagan ang isang Muslim na lalaki na magkaroon ng relasyon sa sinumang babae na ligal para sa kanya na mapangasawa, maliban kung ito ay kanyang pakasalan ayon sa batas ng Islam. Ang Muslimah ay hindi rin maaaring makipag-relasyon sa lalaking hindi niya *Mahram*. Hindi rin maaaring magkaroon ng relasyong pag-iibigan, o di kaya’y pribadong magsama ang isang babae at lalaki sa isang lugar na walang kasamang ibang tao kapag hindi sila kasal.



(1) Surah Al-Baqarah 2 : 83



Nakasulat na Pagsasanay

T1. Buuin ang mga sumusunod:

- a. Ang pagsasaliksik ng kaalaman ay: ng bawat Muslim
Ang dalawang basehan ng batas sa Islam ay: at :
- b. Wala sa Islam ang tinatawag na mga pari o pastor ngunit mayroong mga:
Kapag hindi alam ng isang Muslim ang isang bagay sa kanyang relihiyon ay dapat:
siyang sa mga *'Ulama*.
- c. Lahat ng mga pagkain ay legal para sa mga Muslim maliban sa:
o di kaya ay:
- d. Ang *mahram* ng isang babae ay ang sinumang lalaki na:
.....
- e. Hindi pinapahintulutan ang isang Muslim na makipag-relasyon sa isang babae na ligal
sa kanya na mapangasawa maliban sa pamamagitan ng:

T2. Kabilang sa mga karapatan ng Muslim sa kapuwa Muslim ay:

1.
2.
3.
4.
5.

T3. Isalaysay ang mga katuruan sa Islam tungkol sa relasyon ng Muslim sa mga hindi muslim?

.....

.....

.....

.....

.....

.....

Mga Bagong Salita at Termino

Nu.	Arabiko	Pagkasulat	Kahulugan
1	حَلَال	<u>H</u> alaal	Pinapahintulutan; Ligal
2	حَرَام	<u>H</u> araam	Pinagbabawal; Sagrado; ilegal
3	مَحْرَم	<u>M</u> ahram	Lalaking hindi maaaring maging asawa ng isang babae
4	أَخْلَاق	<u>A</u> khlaaq	Moralidad
5	حِجَاب	<u>H</u> ijaab	Harang; Takip
6	خَمْر	<u>K</u> hamr	Nakalalasing; Alak
7	لِبَاس	<u>L</u> ibaas	Damit; Kasuotan
8	جَار	<u>J</u> aar	Kapitbahay
9	نِكَاح	<u>N</u> ikaah	Kasal
10	عَقْد	<u>'A</u> qd	Kontrata

Talaan ng mga nilalaman para sa unang baytang

MGA PAKSA	PAHINA	MGA PAKSA	PAHINA
Mula sa Qur'an	3	Ang mga kondisyon ng Wudhu'	47
Mula sa Hadeeth	4	Ang mga obligado sa pagsagawa ng Wudhu'	48
Pambungad	5	Mga Sunnah ng Wudhu'	49
Ang Katangian ng Kurikulum na ito	6	Mga Nakasulat na Pagsasanay	50
Ang mga Layunin ng Kurikulum na ito	7	Mga Bagong Salita at Termino	51
Talaan ng mga aralin at oras ng mga yunit ng aklat	10	Pangatlong Aralin: Ang Pagsasagawa ng Tamang Wudhu', at mga Bagay na Makasisira Dito	52
Yunit ng 'Aqeedah	12		
Talaan ng mga Nilalaman	13	Mga hakbang ng kumpletong pagsasagawa ng Wudhu'	53
Unang Aralin – Ang Tawheed Ar-Rubboobiyah	14	Ang mga nakakasira ng Wudhu'	54
Ang Kahalagahan na maintindihan ang kahulugan ng Tawheed	15	Nakasulat na pagsasanay	55
Ang kahulugan ng Tawheed	15	Ginagawang pagsasanay	55
Una: Ang Tawheed Ar-Rubboobiyah	16	Mga Bagong Salita at Termino	56
Nakasulat na Pagsasanay	18	Yunit ng Salah (Pagdarasal)	58
Mga Bagong Salita at Termino	19	Mga Nilalaman	59
Pangalawang Aralin - Ang Tawheed Al-Uloohiyah at ang Tawheed Al-Asmaa was-Sifaat	20	Unang Aralin: Ang Salah	60
Pangalawa: Tawheed Al-Uloohiya	21	Ang Kahulugan ng Salah	61
Pangatlo: Tawheed Al-Asma Was-Sifat	23	Ang kahalagahan ng Salah	61
Nakasulat na Pagsasanay	25	Ang benepisyo ng Salah sa buhay ng isang Muslim	64
Mga Bagong Salita at Termino	26	Mga kondisyon ng Salah	65
Pangatlong Aralin: Ang dalawang Shahadah	28	Mga Nakasulat na Pagsasanay	66
Ang kahulugan ng Shahadah "An La ilaha illa-lah"	29	Mga Bagong Salita at Termino	67
Ang kahulugan ng Shahadah "Anna Muhammadan Rasoolullah"	29	Pangalawang Aralin: Ang Mga haligi ng Salah at mga obligadong gawain sa Salah	68
Ang mga kondisyon ng Shahadah "an La ilaha illa-lah"	30	Ang mga posisyon sa Salah	69
Ang nagpapawalang-bisa sa dalawang Shahadah	31	Ang mga Haligi ng Salah	70
Nakasulat na Pagsasanay	32	Ang mga obligadong gawain sa Salah	71
Mga Bagong Salita at Termino	33	Ang mga gawaing Sunnah sa Salah	72
Yunit ng Taharah	34	Nakasulat na Pagsasanay	74
Mga Nilalaman	35	Ginagawang pagsasanay	75
Unang Aralin: Kahalagahan ng Taharah	36	Mga Bagong Salita at Termino	75
Paunang salita	37	Pangatlong Aralin: Ang mga obligadong Salah	76
Ang kahalagahan ng Taharah	38	Ang mga Obligadong Salah, at mga bilang ng Rak'ah nito	77
Ang Kahulugan ng Taharah	38	Mga Oras ng Obligadong Salah	77
Mga uri ng tubig	38	Ang Pagbabayad ng Obligadong Salah	79
Mga mabubuting asal sa pag-gamit ng paikuran	39	Ang mga nakakasira ng Salah	79
Ang Istinja at Istimar	40	Nakasulat na pagsasanay	80
Mga uri ng Najis	40	Ginagawang Pagsasanay	81
Mga Nakasulat na Pagsasanay	41	Mga Bagong Salita at Termino	82
Mga Bagong Salita at Termino	42	Pang-apat na Aralin: Paglalarawan ng Salah	84
Pangalawang Aralin: Ang Wudhu'	44	Paglalarawan ng mga posisyon ng Salah na may dalawang rak'ah	86
Sunan al-Fitrah	45	Paglalarawan ng mga posisyon ng Salah na may tatlong Rak'ah	87
Ang mga uri ng Hadath at ano ang dapat gawin kapag nagka-Hadath ang tao	46	Paglalarawan ng mga posisyon ng Salah na may apat na Rak'ah	88
Ang Wudhu'	47	Nakasulat na pagsasanay	89

Talaan ng mga nilalaman para sa unang baytang

MGA PAKSA	PAHINA	MGA PAKSA	PAHINA
Ginagawang pagsasanay	89	Yunit sa Siyam	130
Mga Bagong Salita at Termino		Mga Nilalaman	131
Yunit ng Athkarus-Salah	90	Unang Aralin: Ang Pag-aayuno	132
Mga Nilalaman	91	Ang Kahulugan ng Siyam	133
Unang Aralin – Panimula sa Athkarus-Salah	92	Ang Pag-aayuno sa buwan ng Ramadhan	133
Pangkalahatang panuntunan sa mga maaaring bigkasin sa Salah	93	Kailan magsimula at kailan magtatapos ang buwan ng Ramadhan?	133
Ang kahalagahan ng tamang pagbasa at pagbigkas	93	Kabutihan ng pag-aayuno	134
Ang paggamit ng ibang letra sa pagsulat ng Arabiko	94	Ang karunungan (wisdom) ng Pag-aayuno	134
Ang buong Alpabeto ng Arabiko, at ang katumbas nito sa Tagalog	95	Nakasulat na Pagsasanay	136
Ang dalawang Shahadah	96	Mga Bagong Salita at Termino	137
Ang bibigkasin sa pagsasagawa ng Wudhu?	96	Pangalawang Aralin: Ang mga alituntunin ng Pag-aayuno	138
Nakasulat na Pagsasanay	97	Ang Mga Kondisyon ng Pag-aayuno	139
Mga Ginagawang Pagsasanay	97	Ang alituntunin ng pag-aayuno sa buwan ng Ramadhan	140
Mga Bagong Salita at Termino	98	Ang oras ng pag-aayuno	140
Pangalawang Aralin - Ang mga Binibigkas sa Salah (1)	100	Mga nakasisira ng Pag-aayuno	141
Ang binibigkas sa posisyon na nakatayo	101	Mga gawaing hindi nakasisira ng Pag-aayuno	141
Nakasulat na Pagsasanay	103	Nakasulat na Pagsasanay	142
Ginagawang na pagsasanay:	103	Mga Bagong Salita at Termino	143
Mga Bagong Salita at Termino	104	Yunit ng Hajj At 'Umrah	144
Pangatlong Aralin: Ang mga Binibigkas sa Salah (2)	106	Mga Nilalaman	145
Ang mga binibigkas sa posisyon na nakayuko (ruku')	107	Unang Aralin: Ang Hajj at ang 'Umrah	146
Ang mga binibigkas sa posisyon na pagpapatirapa (sujood)	108	Ang Hajj (Paglalakbay)	147
Ang mga binibigkas sa posisyon na naka-upo (juloos)	109	Ang kahulugan ng Hajj at 'Umrah	148
Ang mga binibigkas pagkatapos ng Salah	110	Ang hatol para sa Hajj at 'Umrah	148
Nakasulat na Pagsasanay	113	Ang mga kondisyon upang maging obligado ang Hajj	149
Ginagawang Pagsasanay	113	Mawaqeet	150
Mga Bagong Salita at Termino	114	Nakasulat na Pagsasanay	151
Yunit ng Zakah	116	Mga Bagong Salita at Termino	152
Mga Nilalaman	117	Pangalawang Aralin: Mga Pamamaraan ng Hajj at 'Umrah	154
Unang Aralin: Ang Zakah	118	Ang pamamaraan ng pagsasagawa ng 'Umrah	155
Ang katayuan ng Zakah sa Islam	119	Ang mga Pamamaraan ng Pagsasagawa ng Hajj	158
Ang kahulugan ng Zakah	119	Nakasulat na Pagsasanay	161
Ang karunungan (wisdom) mula sa Zakah	120	Mga Bagong Salita at Termino	162
Sino ang dapat na magbigay o magbayad ng Zakah?	121	Yunit ng Buhay ng Muslim	164
Ang hatol ukol sa mga hindi nagbabayad ng Zakah	121	Mga Nilalaman	165
Nakasulat na Pagsasanay	122	Unang Aralin: Ang buhay ng isang Muslim	166
Mga Bagong Salita at Termino	123	Ang buhay ng isang Muslim	167
Pangalawang Aralin: Mga Alituntunin ng Zakah	124	Ang katayuan ng kaalaman sa buhay ng isang Muslim	167
Mga Kondisyon ng Zakah	125	Ang moralidad ng isang Muslim	168
Mga Ari-arian na kinakailangang kuhanan ng Zakah	125	Pagkain at inumin ng isang Muslim	168
Ang Zakatul-Fitr	126	Ang damit ng isang Muslim	168
Nakasulat na Pagsasanay	127	Panlipunang relasyon ng isang Muslim	168
Mga Bagong Salita at Termino	128	Nakasulat na pagsasanay	171
		Mga Bagong Salita at Termino	172

Aqeedah



Ang Tahaarah



Ang Salah



Athkaarus-Salah



Ang Zakah



Ang Siyam



Hajj at 'Umrah



Buhay ng Muslim



Batayan ng Muslim Sa Paniniwala at Pagsamba



Pangalawang Baytang

Dr. Yahya Salman AlBaheth





Batayan ng Muslim

Sa Paniniwala at Pagsamba

Dr. Yahya Bin Salman AlBaheth

Inihanda ni:

Dr. Yahya Salman AlBaheth

Pagsusuri ng paksang kaalaman nila:

Ang Kagalang-galang na
**Sheikh Dr. Ahmed Abdulaziz
Al-Hamdan**

Dating Direktor ng Opisina ng
Da'wah at Patnubay sa Jeddah


Ang Kagalang-galang na
**Prof. Dr. Sheikh Ghazi Saeed
Al-Matrafi**


Propesor ng Fiqh sa Kolehiyo ng Sharia
Umm Al-Qura University sa Makkah

Tagapamahala ng proyekto	Ali bin Ahmed Al-Ajlani
Katulond sa Pananaliksik	Muhammad Mahdi Al-Subhi
Katulong sa Pananaliksik	Ismail David
Nagsalin sa Tagalog	Alim Amil
Tagasuri	Abdullah Lorenzo
Tagasuri	Yusuf Reyes
Tagasuri	Ahmad Peradilla
Dinisenyo at pinamamahalaan ng	Smart Corners Corporation

هذا الاصدار متاح للطباعة والنشر بأي وسيلة مع الالتزام بذكر المصدر وعدم اجراء أي تعديل على المحتوى

 Asasiyyat@gmail.com

 +966-541708014

 +966-501570911

٢١٠ Yahya Salman Salim Albaheth ، 1442 (ح)

فهرسة مكتبة الملك فهد الوطنية أثناء النشر

Yahya Salman Salim ، Albaheth
Batayan ng Mga Muslim (Muslim Basics in Belief and
Worship). / Yahya Salman Salim Albaheth

١٧٧ ص.؛ اسم

ردمك: ٩٧٨-٦٠٣-٠٣-٧٤٥٢-٦

١- Islam 2- Worship أ.العنوان

١٤٤٢/٦٥٤٤

ديوي ٢١٠

رقم الإيداع: ١٤٤٢/٦٥٤٤

ردمك: ٩٧٨-٦٠٣-٠٣-٧٤٥٢-٦

Pangalawang Edisyon

AH 1444

Nakalaan ang lahat ng mga karapatan sa may-akda

asasiyyat@gmail.com

0541708014



Asasiyyat

بِسْمِ اللَّهِ الرَّحْمَنِ الرَّحِيمِ

Mula sa Qur'an

﴿ لَيْسَ الْبِرَّ أَنْ تُوَلُّوا وُجُوهَكُمْ قِبَلَ الْمَشْرِقِ وَالْمَغْرِبِ وَلَكِنَّ الْبِرَّ مَنْ آمَنَ بِاللَّهِ وَالْيَوْمِ الْآخِرِ وَالْمَلَائِكَةِ وَالْكِتَابِ وَالنَّبِيِّينَ وَآتَى الْمَالَ عَلَى حُبِّهِ ذَوِي الْقُرْبَىٰ وَالْيَتَامَىٰ وَالْمَسَاكِينَ وَابْنَ السَّبِيلِ وَالسَّائِلِينَ وَفِي الرِّقَابِ وَأَقَامَ الصَّلَاةَ وَآتَى الزَّكَاةَ وَالْمُوفُونَ بِعَهْدِهِمْ إِذَا عَاهَدُوا وَالصَّابِرِينَ فِي الْبَأْسَاءِ وَالضَّرَّاءِ وَحِينَ الْبَأْسِ أُولَئِكَ الَّذِينَ صَدَقُوا وَأُولَئِكَ هُمُ الْمُتَّقُونَ ﴿١﴾

Hindi kabutihan sa paningin ng Allāh ang ilingon ang inyong mga mukha sa silangan o sa kanluran sa tuwing magsa-Salāh. Subali't ang tunay na kabutihan ay ang gawain ng sinumang naniwala sa Allāh – na Siya lamang ang nararapat na sinasamba, bukod-tangi at walang katambal; at naniwala sa Araw ng Muling Pagkabuhay at Araw ng Paghuhukom, at naniwala sa lahat ng mga anghel, at sa lahat ng mga ipinahayag na mga Aklat, at sa lahat ng mga Propeta at Sugo nang walang pagtatangi, at nagbibigay ng kawanggawa kahit na ito ay labis pa niyang minamahal – sa mga kamag-anak at sa mga ulilang nangangailangan, at sa mga mahihirap na naghihikahos, at sa mga manlalakbay na nangangailangan ng panggastos dahil sa nalayo sila sa kanilang pamilya at kayamanan, at sa mga namamalimos dahil sa tindi ng pangangailangan, at paggasta sa pagpapalaya ng alipin at mga bihag; at taimtim na nagsasagawa ng Salāh, at nagbibigay ng obligadong kawanggawa (Zakāh), at yaong mga tumutupad sa kanilang pangako, at nagtitiis dahil sa kahirapan, karamdaman at gayundin sa mga matitinding labanan (sa Landas ng Allāh). Ang mga mayroong ganitong katangian o pag-uugali, sila ang matatapat sa kanilang paniniwala at sila ang natatakot sa kaparusahan ng Allāh, na kung kaya, iniawasan nila ang mga pagkakasala.



Mula sa Sunnah ng Propeta ﷺ

Isinalaysay ni 'Umar bin Al-Khattab ؓ: Isang araw habang nakaupo kami kasama ang Sugo ng Allah ﷺ ay lumitaw sa harap namin ang isang tao na ang mga damit ay lubos na maputi at ang buhok ay labis na itim; walang mga tanda ng paglalakbay na makikita sa kanya at wala sa amin ang nakakakilala sa kanya. Lumakad siya at umupo sa tabi ng propeta ﷺ. Itinabi niya ang kanyang tuhod sa tabi ng tuhod ng propeta ﷺ, at inilagay ang palad ng kanyang mga kamay sa mga hita ng propeta ﷺ, at sinabi niya: "O Muhammad, sabihin mo sa akin ang tungkol sa Islam."

Ang Sugo ng Allah ﷺ ay nagsabi: "Ang Islam ay magpapatotoo na walang diyos maliban sa Allah lamang at si Muhammad ay ang sugo ng Allah, isagawa ang Salah, bayaran ang Zakah, mag-ayuno sa buwan ng Ramadhan, at isagawa ang Hajj sa Bahay (Ka'bah, sa Makkah) kung may kakayahan."

Sinabi ng lalaki: "Tama ang sinabi mo," at nagulat kami sa kanya na nagtanong at nagsabing tama ang sinabi niya. Pagkatapos ay sinabi niya: "Sabihin mo sa akin ang tungkol sa Iman (pananampalataya)." Ang Propeta ﷺ ay nagsabi: "Ito ay maniwala sa Allah, sa Kanyang mga anghel, Kanyang mga Aklat, Kanyang mga Sugo, sa Huling Araw, at maniwala sa Al-Qadr (banal na kapalaran), mabuti at masama."

Sinabi ng lalaki: "Tama ang sinabi mo. Sabihin mo sa akin ang tungkol sa Ihsan (pagiging perpekto)." Ang Propeta ﷺ ay nagsabi: "Ito ay sambahin ang Allah na parang nakikita mo Siya, na datapwat hindi mo Siya nakikita ay tunay na nakikita ka Niya."

Sinabi ng lalaki: "Pagkatapos ay sabihin mo sa akin ang tungkol sa Oras (ng pagkagunaw ng mundo)." Ang Propeta ﷺ ay nagsabi: "Ang tinatanong tungkol dito ay hindi nakakaalam ng mas mahusay kaysa sa nagtatanong."

Sinabi ng lalaki: "Sabihin mo sa akin ang tungkol sa mga palatandaan nito." Ang Propeta ﷺ ay nagsabi: "Na ang aliping babae ay manganganak ng kanyang magiging amo na babae at makikita mo ang naka-paa, hubad, na taga-pastol ng kambing na nakikipag-paligsahan sa paggawa ng matataas na mga gusali."

Pagkatapos ay umalis ang lalaki at nanatili ako ng ilang sandali. Pagkatapos ay sinabi niya ﷺ: "O 'Umar, alam mo ba kung sino ang nagtanong?" Sinabi ko: "Ang Allah at ang Kanyang sugo ay higit na nakakaalam." Siya ﷺ ay nagsabi: "Siya si (Anghel) Jibreel (Gabriel), na pumarito upang ituro sa iyo ang iyong relihiyon."⁽¹⁾



(1) Muslim

Pambungad

Ang lahat ng pagpuri ay para lamang sa Allah ﷻ, dahil sa Kanyang mga biyaya ay nakumpleto ang mga magagandang gawa. Ang mga panalangin at kapayapaan ay sumasa pinaka-mabuting tao at pinuno ng lahat ng nilalang, Sugo ng *Rabb* (Panginoon) ng Sanlibutan, at Selyo ng mga Propeta at Sugo, ang ating pinuno na si Muhammad ﷺ at sa kanyang mga pamilya at mga kasamahan, at sa sinuman na tumatahak sa kanyang landas hanggang sa Araw ng muling pagkabuhay. Sa pagpapatuloy:

Ito ang ikalawang baytang ng **Batayan ng Muslim sa Paniniwala at Pagsamba** na kung saan sa pag-aaral nito, inaasahan namin na makukumpleto ng Muslim ang lahat ng pangunahing kaalaman na kailangan niya sa kabanata tungkol sa paniniwala at pagsamba, sa kapahintulutan ng Allah ﷻ. Naglalaman ito ng mga aralin at aplikasyon, dahil ang baytang na ito ay batay sa nabanggit sa unang baytang. At hinihiling namin sa Allah ﷻ na dagdagan ang aming pananampalataya at gawin itong naaangkop sa relihiyon.

Dr. Yahya Salman AlBaheth



doctor_yahya@yahoo.com



"Kaya't alamin (O Muhammad) na walang may karapatang sambahin maliban sa Allaah, at humingi ng kapatawaran para sa iyong kasalanan."⁽¹⁾

Yunit ng Aqeedah (Panampalataya)



(1) Surah Muhammad 47:19)

Talaan ng mga Nilalaman

Pahina	Mga Paksa
8	Unang aralin: Ang mga Haligi ng Imaan (Paniniwala sa Allah - Paniniwala sa mga Anghel - Paniniwala sa mga Aklat)
9	Ang Mga Haligi ng Imaan
10	Una: Ang Paniniwala sa Allah (Ang Kataas-taasan)
12	Pangalawa: Ang Paniniwala sa mga Anghel
14	Pangatlo: Ang Paniniwala sa mga Aklat
16	Nakasulat na Pagsasanay
18	Mga Bagong Salita at Termino
20	Pangalawang aralin: Ang mga haligi ng Imaan (Paniniwala sa mga Sugo ng Allah)
21	Mga Haligi ng Imaan (ipinagpatuloy sa nakaraang aralin)
22	Pang-apat: Ang Paniniwala sa Mga Sugo ng Allah
24	Ang Buhay ni Propeta Muhammad
26	Ang mga Natatanging Katangian ni Propeta Muhammad
27	Nakasulat na Pagsasanay
28	Mga Bagong Salita at Termino
30	Pangatlong Aralin: Ang Mga Haligi ng Imaan (Paniniwala sa Huling Araw - Paniniwala sa Al-Qadr)
31	Panglima: Paniniwala sa Huling Araw
34	Pang-anim: Ang Paniniwala sa Al-Qadr, Mabuti man o Masama
36	Nakasulat na Pagsasanay
37	Mga Bagong Salita at Termino
38	Pang-apat na Aralin: Shirk (Ang pagtatambal)
39	Ang Kahulugan ng Shirk
39	Mga Anyo ng Shirk
40	Mga Uri ng Shirk
42	Nakasulat na Pagsasanay
43	Mga Bagong Salita at Termino

Unang Aralin

Mga haligi ng Imaan

(Paniniwala sa Allah, Paniniwala sa mga anghel,
at paniniwala sa mga aklat)

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kaphahintulutan ng Allah ﷻ na:

- Malaman mo ang mga bilang ng mga haligi ng Imaan.
- Mauunawaan mo ang kahulugan ng paniniwala sa Allah.
- Maipapaliwanag mo ang kahulugan ng paniniwala sa mga anghel.
- Maipapaliwanag mo ang kahulugan ng paniniwala sa mga aklat.
- Maalaala mo ang mga pangalan ng ibang pinahayag na mga aklat.
- Makita mo ang pagkakaiba ng Banal na Qur'an sa mga naunang kasulatan.



Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Lahat ng mga aralin sa unang baytang.

Mga haligi ng Imaan

Ang kahulugan ng *Imaan* sa *Lugah* (salita) o *linguahe*: paniniwala na may pagpapatotoo na may kasamang pagtanggap.

Ang kahulugan naman ng *Imaan* sa *batas ng Islam* (Istilaah): paniniwala na pinatotohanan ng puso, sinasabi ng dila, at ginagawa ng buong katawan. Hindi maibibilang ang isang tao na Mu'min (mananampalataya) maliban kung ito ay pinatotohanan ng kanyang puso at sinasabi ng kanyang dila, at ginagawa ng kanyang buong katawan, hayagan man tulad ng ginagawa ng mga bahagi ng katawan, o kaya'y palihim tulad ng pagmamahal at pagkatakot na nasa puso. Naaayon ang mga ito sa pagtanggap ng katotohanan.

Ang mga sumusunod ay ang anim na haligi ng *Imaan* (pananampalataya):

1. Paniniwala sa Allah ﷻ
2. Paniniwala sa mga Anghel
3. Paniniwala sa mga Aklat
4. Paniniwala sa mga Sugo
5. Paniniwala sa Huling Araw
6. Paniniwala sa *Al-Qadr* (itinakdang kapalaran), mabuti man o masama.

Bilang pagpapatunay sa unang mga haligi na ito, sinabi ng Allah ﷻ:

﴿لَيْسَ الْبِرَّ أَنْ تُوَلُّوا وُجُوهَكُمْ قِبَلَ الْمَشْرِقِ وَالْمَغْرِبِ وَلَكِنَّ الْبِرَّ مَنْ آمَنَ بِاللَّهِ وَالْيَوْمِ الْآخِرِ
وَالْمَلَائِكَةِ وَالْكِتَابِ وَالنَّبِيِّينَ﴾⁽¹⁾

"Hindi kabutihan sa paningin ng Allah ang ibaling ang inyong mga mukha sa silangan o sa kanluran sa tuwing magsa-Salah, subalit ang tunay na kabutihan ay gawain ng sinumang naniniwala sa Allah, naniniwala sa huling Araw, naniniwala sa lahat ng mga anghel, sa lahat ng ipinahayag na mga Aklat, at sa mga Propeta at mga Sugo."

At ang katibayan ng ika-anim ng haligi, ang *Al-Qadr*, sinabi ng Allah ﷻ:

﴿إِنَّا كُلَّ شَيْءٍ خَلَقْنَاهُ بِقَدَرٍ﴾⁽²⁾

"Katiyakan, ang lahat ng bagay ay nilikha Namin sa ganap at tamang pagkakatakda at pinagpasiyahan Namin, at nauna na sa Aming kaalaman ang hinggil dito."



(1) Surah Al-Baqarah 2:177

(2) Surah Al-Qamar 54:49

Una: Ang paniniwala sa Allah (Ang kataas-taasan)

Ang paniniwala sa Allah ﷻ ay nag-uutos sa paniniwala sa Kaisahan ng Allah ﷻ, ang Kanyang pagka-panginoon, ang Kanyang pagka-Diyos na dapat sambahin, at paniniwala sa Kanyang mga Pangalan at mga Katangian. Ang mga sumusunod ay paliwanag tungkol dito:

- a. **Ang paniniwala sa Kanyang Pagka-Panginoon:** Ito ay katunayan na ang Allah ﷻ ang nag-iisang Tagapaglikha, Tagapanustos, Nagbibigay ng Buhay at Kamatayan, Pinaka-Makapangyarihan, Taga-Pangalaga, at Nagbibigay ng Batas. Sinabi ng Allah ﷻ:

﴿ قُلْ مَنْ رَبُّ السَّمَاوَاتِ وَالْأَرْضِ قُلِ اللَّهُ ۚ قُلْ أَفَاتَّخَذْتُمْ مِنْ دُونِهِ أَوْلِيَاءَ لَا يَمْلِكُونَ لِأَنْفُسِهِمْ نَفْعًا وَلَا ضَرًّا ۚ قُلْ هَلْ يَسْتَوِي الْأَعْمَىٰ وَالْبَصِيرُ ۗ أَمْ هَلْ تُسْتَوَىٰ الظُّلُمَاتُ وَالنُّورُ ۗ أَمْ جَعَلُوا لِلَّهِ شُرَكَاءَ خَلَقُوا كَخَلْقِهِ فَتَشَابَهَ الْخَلْقُ عَلَيْهِمْ ۚ قُلِ اللَّهُ خَالِقُ كُلِّ شَيْءٍ وَهُوَ الْوَاحِدُ الْقَهَّارُ ﴿١﴾

"Sabihin mo O Muhammad sa mga Mushrikeen; Sino ang lumikha ng mga kalangitan at kalupaan at nangangasiwa nito? Sabihin mo: Ang Allah ang siyang lumikha at nangangasiwa nito, at ito ay inyong sinasang-ayunan. Sabihin mo: Itinuturing ba ninyo bilang tagapangalaga at sinasamba ang iba maliban sa Allah, samantalang ang mga ito ay walang kakayahan na magdulot ng anumang kapakinabangan ni kapinsalaan sa kanilang mga sarili, paano pa kaya sa inyo? Sabihin mo sa kanila: Maari bang magkatulad sa inyong paningin ang walang pananampalataya na bulag at ang mananampalataya na nakakakita? O di kaya, maari bang magkatulad sa inyo ang kadiliman at liwanag? O di kaya, ang kanila bang sinasamba na itinuturing nila bilang katambal ng Allah ay makalilikha ng tulad ng nilikha ng Allah? Kaya naghalo sa kanilang pananaw kung ano ang nilikha ng kanilang mga sinasamba sa anumang nilikha ng Allah. Sabihin mo sa kanila: Ang Allah ang Siyang Lumikha ng lahat ng bagay, at Siya rin ay Bukod-Tangi at nag-iisa, ang Ganap na Tagapangasiwa."

﴿ إِنَّ رَبَّكُمْ اللَّهُ الَّذِي خَلَقَ السَّمَاوَاتِ وَالْأَرْضَ فِي سِتَّةِ أَيَّامٍ ثُمَّ اسْتَوَىٰ عَلَى الْعَرْشِ يُغْشِي اللَّيْلَ النَّهَارَ يَطْلُبُهُ حَبِيبًا وَالشَّمْسَ وَالْقَمَرَ وَالنُّجُومَ مُسَخَّرَاتٍ بِأَمْرِهِ ۗ أَلَا لَهُ الْخَلْقُ وَالْأَمْرُ ۗ تَبَارَكَ اللَّهُ رَبُّ الْعَالَمِينَ ﴿٢﴾

Sinabi ng Allah ﷻ: *"Katiyakan, ang inyong Rabb ay ang Allah, na Siyang Lumikha ng mga kalangitan at ng kalupaan sa loob ng Anim na Araw, pagkatapos Siya ay nag-Istiwa -- pumaroon sa taas ng Kanyang Arsh (Trono) sa pamamaraan na angkop sa Kanyang Kadakilaan. Ipinapasok Niya ang gabi sa araw hanggang sa ito ay sumanib sa araw hanggang sa mawala ang liwanag nito, at ipinapasok Niya ang araw sa gabi upang mawala ang kadiliman nito. Siya ang Allah na Lumikha ng araw at ng buwan at mga bituin at ipinapasailalim Niya ang mga ito sa Kanyang pag-aatas, na sumusunod sa kung ano ang Kanyang nais. Na kung kaya, dapat ninyong mabatid na Siya lamang ang Lumikha ng lahat at gayundin ang lahat ng pag-aatas. Luwalhati sa Allah ang Napakadakila, na Siya ang Rabb ng lahat ng nilalang."*

(1) Surah Ar-Ra'd 13:16

(2) Surah Al-A'raf 7:54

- b. **Ang paniniwala sa Kanyang Pagka-Diyos:** Ang Allah ﷻ ay nag-iisa at Siya lamang ang tunay na Diyos na karapatdapat sambahin, at hindi dapat ialay ang kahit anong uri ng pagsamba sa iba maliban sa Kanya, at hindi maaaring gumawa ng katambal sa pagsamba sa Kanya. Sinabi ng Allah ﷻ:

﴿ وَمَا أَرْسَلْنَا مِنْ قَبْلِكَ مِنْ رَسُولٍ إِلَّا نُوحِي إِلَيْهِ أَنَّهُ لَا إِلَهَ إِلَّا أَنَا فَاعْبُدُونِي ﴾⁽¹⁾

“At wala Kaming ipinadala na Sugo na nauna sa iyo, O Muhammad, kundi nagpahayag Kami sa kanya, na katiyakang walang sinuman ang may karapatan at karapat-dapat na sambahin maliban sa Allah, na kung kaya sambahin ninyo ang Allah”.

﴿ قُلْ إِنْ صَلَاتِي وَنُسُكِي وَمَحْيَايَ وَمَمَاتِي لِلَّهِ رَبِّ الْعَالَمِينَ * لَا شَرِيكَ لَهُ وَبِذَلِكَ أُمِرْتُ وَأَنَا أَوَّلُ الْمُسْلِمِينَ ﴾⁽²⁾

“Sabihin mo O Muhammad sa kanila: Katiyakan, ang aking Salah, ang aking pag-aalay na katulad ng pagkatay ng hayop sa pangalan ng Allah, ang aking buhay, ang aking kamatayan ay pagmamay-ari lamang ng Allah na Rabb ng lahat ng mga nilalang. Na siya ay walang katambal sa Kanyang pagiging Diyos, at sa pamamagitan ng Kanyang dalisay na kaisahan ay inutusan Niya ako na maging kauna-unahang sumaksi at magpasailalim sa Kanya mula sa sambayanang ito bilang Muslim”.

- c. **Ang paniniwala sa Kanyang mga Pangalan at mga Katangian,** na nabanggit sa Banal na Qur’an at Sunnah ng Propeta ﷺ, ng walang *Ta’teel* (hindi itatanggi ang kahulugan), walang *Ta’weel* (hindi bibigyan ng ibang pakahulugan), walang *Takyeef* (hindi ipapaliwanang kung paano), at walang *Tamtheel* (hindi ihahalintulad). Manalangin sa pamamagitan ng mga ito, at hindi maaaring maglagay ng kahit anong pangalan o katangian para sa Allah ﷻ na hindi nabanggit sa Qur’an o Sunnah ng Propeta ﷺ. Sinabi ng Allah ﷻ:

﴿ لَيْسَ كَمِثْلِهِ شَيْءٌ وَهُوَ السَّمِيعُ الْبَصِيرُ ﴾⁽³⁾

“Siya (Allah) ay walang katulad at walang maihahambing sa Kanya mula sa anuman na Kanyang nilikha, Siya ay Ganap na Nakakarinig at Ganap na Nakakakita”.

Ang dakilang salita na **“Allah”** ay ang Dakilang Pangalan ng Allah ﷻ, tulad ng sinasabi ng mga *Ulama* (Pantas) ng Islam katulad ni Imam At-Tahawee, at Imam Ibnul-Qayyim (*rahimahumullah*). Ito ang pangalan na hindi maaaring itawag sa sinuman maliban sa Kanya. Ang pangalan na ito ang pangunahin sa Kanyang mga pangalan. Ang natitirang mga pangalan at mga katangian ay sumusunod dito.

﴿ وَلِلَّهِ الْأَسْمَاءُ الْحُسْنَىٰ فَادْعُوهُ بِهَا ﴾⁽⁴⁾

Sinabi ng Allah ﷻ: *“At ang Allah ay nagtataglay ng mga Pinakamagandang Pangalan, na kung kaya humiling kayo sa Kanya ng anuman na inyong nais sa pamamagitan ng mga Pangalan na ito”.*

﴿ بِسْمِ اللَّهِ الرَّحْمَنِ الرَّحِيمِ ﴾⁽⁵⁾

Sinabi rin ng Allah ﷻ: *“Ako ay magsisimula sa Pangalan ng Allah, ang Pinakamahabagin, ang Napakamaawain at Ganap na Mapagmahal”.*

(1) Surah Al-Anbiya 21:25, (2) Surah An'am 6:162-163

(3) Surah Ash-Shura 42:11, (4) Surah Al-Araf 7:180

(5) Surah An-naml 27:30

Naiiba ang dakilang salita na **"Allah"** sa salitang "diyos", sapagkat ang **"Allah"** ay hindi maaaring pangmaramihan at hindi rin maaaring gawin na pangbabae, samantalang ang salitang "diyos" ay isang katangian ng kahit na anong sinasamba at hindi pangalan, at maaaring pangmaramihan at pangbabae tulad ng paniniwala ng mga *mushrikoon* at *wasaniyoon* (mga sumasamba sa mga rebulto) na tinatawag nilang *alihah* (mga diyos-diyosan), at ginagawa rin nilang mga lalaki at mga babae.

Ang paniniwala na ang Allah ﷻ ay nag-utos ng pagmamahal at pagkatakot sa Kanya, umaasa sa Kanyang habag, Kanyang kaluguran, Kanyang mga gantimpala, at pagkatakot sa Kanyang galit at kaparusahan.

Ang kalagayan ng *Mu'min* (mananampalataya) ay dapat na balansehin sa pagitan ng pagkatakot at pagasa. Hindi nagpapatalo sa pagkatakot sapagkat mawawalan siya ng pag-asa sa Habag ng Allah ﷻ. Ang pag-asa ay hindi rin dapat mananaig sa kanya at akalaing ligtas siya sa kaparusahan ng Allah ﷻ. Ngunit dapat mangingibabaw ang pag-asa sa panahon ng pagsunod sa Allah ﷻ, sa pagbabalik-loob at pagsisisi, at kahinaan. At mangingibabaw ang pagkatakot sa panahon ng kalakasan at paggawa ng kasalanan upang siya ay magbalik-loob at magsisi.

Pangalawa: Paniniwala sa mga Anghel

Ito ay isa sa mga haligi ng *Imaan* na hindi magiging ganap maliban kung kasama ito. Ang mga sumusunod ay kasama sa paniniwala dito:

1. Maniwala sa pagkakaroon ng mga Anghel, sapagkat binanggit sila ng Allah ﷻ sa Kanyang Banal na Aklat, at nabanggit din sila at ang kanilang mga katangian sa mga Hadith ng Propeta ﷺ.
2. Ang paniniwala na sila ay nilikha ng Allah ﷻ mula sa *Noor* (liwanag), at walang nakakaalam sa kanilang bilang maliban sa Allah ﷻ. Sapat nang maabot ng kaalaman natin ang dami ng kanilang bilang sa nabanggit na Hadith ng Propeta ﷺ, na ang *Baitul-Ma'moor* sa kalangitan ay may pumapasok dito araw-araw na pitumpong libong anghel na hindi na makababalik hanggang sa Araw ng Muling Pagkabuhay. At sila ay magkakaiba sa pagkakalikha. Mayroon sa kanila ang may dalawang pakpak, mayroong tatlo, apat o mas marami pa. Tulad ng sinabi ng Allah ﷻ :

﴿ الْحَمْدُ لِلَّهِ فَاطِرِ السَّمَاوَاتِ وَالْأَرْضِ جَاعِلِ الْمَلَائِكَةِ رُسُلًا أُولِي أَجْنِحَةٍ مَثْنَى وَثُلَاثَ وَرُبَاعَ
يَزِيدُ فِي الْخَلْقِ مَا يَشَاءُ إِنَّ اللَّهَ عَلَى كُلِّ شَيْءٍ قَدِيرٌ ﴾⁽¹⁾

"Ang ganap na papuri at pasasalamat ay pagmamay-ari lamang ng Allah, na Nagpanimula ng Paglikha sa mga kalangitan at kalupaan, at ginawa Niya ang mga anghel bilang mga sugo na may mga pakpak na dalawa, tatlo o apat, at dinaragdagan Niya ang paglikha sa anuman na Kanyang naisin. Katiyakan, ang Allah ay Ganap na Makapangyarihan sa lahat ng bagay".

(1) Surah Faatir 35:1

Tulad ng nabanggit sa Sunnah ng Propeta ﷺ, na katiyakan si Anghel Jibreel ﷺ ay mayroong anim na daang pakpak. Ang mga anghel ay mga lingkod ng Allah ﷻ na iginagalang. Nilikha sila ng Allah ﷻ na susunod lamang sa Kanya, kaya hindi sila maaaring sumuway, at gagawin nila kung ano ang ipinag-utos ng Allah ﷻ sa kanila. Dapat silang mahalín dahil sa pagpapasailalim nila sa kagustuhan ng Allah ﷻ, at sila ay pinagkatiwalaan ng iba't ibang mga tungkulin. Sinabi ng Allah ﷻ:

﴿ لَا يَعْصُونَ اللَّهَ مَا أَمَرَهُمْ وَيَفْعَلُونَ مَا يُؤْمَرُونَ ﴾⁽¹⁾

"Hindi nila nilalabag ang anumang ipinag-utos ng Allah, at ipinapatupad ang anumang ipinag-utos sa kanila".

3. Ang paniniwala sa sinuman na nabanggit sa kanila sa pamamagitan ng kanilang mga pangalan o kanilang mga tungkulin, kabilang si **Jibreel** ﷺ na siyang pinagkatiwalaan ng *Wahy* (Rebelasyon) at siya ang pinakamabuti sa lahat ng mga anghel. Si **Mikaeel** na pinagkatiwalaan ng ulan, si **Israfeel** na pinagkatiwalaan sa pag-hip ng trumpeta, si **Malik** na katiwala sa impiyernong-apoy, si **Ridhwan** na katiwala sa paraiso, si **Munkar** at **Nakir**, at si **Haroot** at **Maroot**. Mayroon ding mga anghel na may katungkulan na hindi nabanggit ang kanilang mga pangalan, tulad ng mga **Tagabuhat ng Arsh** (Trono), ang **Iginagalang na mga Tagasulat** ng mga ginagawa ng tao, **Anghel ng Kamatayan**, **Anghel ng Kabundukan**, ang mga **Tagapangalaga**, at iba pa na nabanggit sa Qur'an at Sunnah ng Propeta ﷺ.
4. Ang paniniwala na sila ay nilikha ng Allah ﷻ, na wala silang bahagi sa paglikha, pag-aaruga at pamamahala ng mga gawain, at wala silang taglay na katangian ng pagka-diyos o pagka-panginoon. Ang mga katangiang ito ay bukod-tangi lamang sa Allah ﷻ, at sila ay mga lingkod ng Allah ﷻ na iginagalang. Nilikha sila ng Allah ﷻ upang sumamba sa Kanya, sumunod at magpapatupad sa Kanyang kautusan, kung kaya hindi maaaring ialay sa kanila ang kahit anong uri ng pagsamba, at sinumang gagawa nito ay nahuhulog sa *Shirk* (pagtatambal). Sinabi ng Allah ﷻ:

﴿ وَلَا يَأْمُرُكُمْ أَنْ تَتَّخِذُوا الْمَلَائِكَةَ وَالنَّبِيِّينَ أَرْبَابًا ۗ أَيَأْمُرُكُمْ بِالْكُفْرِ بَعْدَ إِذْ أَنْتُمْ مُسْلِمُونَ ﴾⁽²⁾

"At hindi maaari ang sinuman sa kanila na ipag-utos sa inyo na gawin ang mga anghel at ang mga Propeta bilang mga Rabb na Tagapaglikha at sasambahin ninyo bukod sa Allah. Ipinag-utos ba sa inyo ang paglabag sa Allah pagkatapos ninyong sumunod sa Kanyang mga utos?"

Ang paniniwala sa mga anghel ay nakakadagdag sa tao ng katiyakan sa kadakilaan ng Allah ﷻ at ang Kanyang walang hanggang kakayahan, na Siya ang Tagapaglikha ng lahat ng mga dakilang nilikha sa anumang kanilang kalagayan at kakayahan. At mababatid din dito na ang Allah ﷻ ay mayroong pinagkatiwalaan upang mangalaga at magbantay sa Kanyang mga sinasabi at ginagawa, kung kaya pagsisikapan niyang umiwas sa lahat ng ipinagbabawal ng Allah ﷻ at mapilitan siyang gawin kung ano ang ipinag-utos ng Allah ﷻ sa kanya, at kanyang mabatid ang kabutihan ng Allah ﷻ sa kanya.

(1) Surah Tahreem 66:6

(2) Surah Aali Imran 3:80

Pangatlo: Ang paniniwala sa mga Aklat

Ito ay paniniwala sa mga Aklat na mula sa Allah ﷻ na ipinadala Niya sa Kanyang mga Sugo. Sinabi ng Allah ﷻ:

﴿ قُولُوا آمَنَّا بِاللَّهِ وَمَا أُنزِلَ إِلَيْنَا وَمَا أُنزِلَ إِلَىٰ إِبْرَاهِيمَ وَإِسْمَاعِيلَ وَإِسْحَاقَ وَيَعْقُوبَ وَالْأَسْبَاطِ وَمَا أُوتِيَ مُوسَىٰ وَعِيسَىٰ وَمَا أُوتِيَ النَّبِيُّونَ مِنْ رَبِّهِمْ لَا نُفَرِّقُ بَيْنَ أَحَدٍ مِنْهُمْ وَنَحْنُ لَهُ مُسْلِمُونَ ﴾⁽¹⁾

"O kayong mga mananampalataya! Sabihin ninyo: Naniniwala kami sa Allah, at sa Banal na Qur'an na ipinahayag ng Allah kay Propeta Muhammad, at sa ipinahayag kay Ibraheem (na Suhuf), sa kanyang dalawang anak na sina Ismail at Ishaq, gayon din kay Ya'qub at sa kanyang mga anak na tinatawag na Al-Asbat. Naniniwala rin kami sa anumang ipinagkaloob kay Moosa (na Tawrah), sa ipinagkaloob kay 'Eesa (Hesus) na Injeel, at sa lahat na naipagkaloob sa mga Propeta bilang Rebelasyon mula sa kanilang Rabb, ang Allah. Wala kaming ginagawang pagtatangi hinggil sa paniniwala sa sinuman sa kanila at kami ay mga Muslim."

Ang lahat ng mga ito ay Salita ng Allah ﷻ na naipahayag sa kanila. Dapat din na paniwalaan ang mga Aklat na nabanggit sa Maluwalhating Qur'an, at ito ay lima:

1. **Suhuf:** Ipinahayag kay Propeta Ibraheem ﷺ.
2. **Tawrah (Torah):** Ipinahayag kay Propeta Moosa ﷺ.
3. **Zaboor (Salmo):** Ipinahayag kay Propeta Dawood ﷺ.
4. **Injeel (Ebanghelyo):** Ipinahayag kay Propeta 'Eesa ﷺ.
5. **Qur'an:** ipinahayag kay Propeta Muhammad ﷺ.

Ang lahat na naipahayag na mga Aklat ay tama at totoo noong panahon ng rebelasyon nito. Ngunit nawala o napalitan na ang mga ito, maliban sa Maluwalhating Qur'an sapagkat ang Allah ﷻ ang nangangalaga dito, kung kaya hindi napalitan at nabago. Sinabi ng Allah ﷻ:

﴿ إِنَّا نَحْنُ نَزَّلْنَا الذِّكْرَ وَإِنَّا لَهُ لَحَافِظُونَ ﴾⁽²⁾

"Walang pag-aalinlangan, Kami ang nagbaba ng Qur'an kay Propeta Muhammad at walang pag-aalinlangan na Kami rin ang patuloy na mangangalaga nito mula sa anumang kasiraan."

Ang Maluwalhating Qur'an ang kapalit ng lahat ng mga Aklat na naipahayag na nauna dito.

Ang posisyon ng isang Muslim ukol sa mga nakaraang Aklat o kasulatan:

Nawala o napalitan na ang lahat ng mga naunang aklat bago ang Maluwalhating Qur'an. Pinatunayan ng Maluwalhating Qur'an na binago ng mga *Angkan ng Kasulatan* (mga hudyo at kristiyano) ang kanilang mga Aklat. Sinabi ng Allah ﷻ:

﴿ مِنَ الَّذِينَ هَادُوا يُحَرِّفُونَ الْكَلِمَٰتَ عَن مَّوَٰضِعِهَا ﴾⁽³⁾

"Mayroong grupong kabilang sa mga Hudyo, na naging kaugalian na nilang pagpalit-palitin at baguhin ang mga salita ng Allah.."

﴿ وَمِنَ الَّذِينَ قَالُوا إِنَّا نَصَارَىٰ أَخَذْنَا مِيثَاقَهُمْ فَنَسُوا حَظًّا مِمَّا ذُكِّرُوا بِهِ ﴾⁽⁴⁾

"At mula sa kanila na nagsasabing sila ay mga Kristiyano ay gumawa rin kami ng kasunduan na sundin nila ang Sugo na naipadala sa kanila, subali't pinalitan nila ang kanilang Relihiyon at tinalikuran ang anumang ipinaalaala sa kanila."

(1) Surah Al-Baqarah 2:136, (2) Surah Al-Hijr 15:9

(3) Surah An-Nisa' 4:46, (4) Surah Surah Al-Maidah 5:14

Tinipon ng mga Angkan ng Kasulatan ang natitira sa kanilang pinalitang mga Aklat, minanang relihiyon mula sa kanilang mga paham at kanilang kasaysayan, sa iisang kasulatan na tinawag nilang Bibliya. Ito ay hindi maaaring gawing batayan ng isang Muslim, dahil ang anumang katotohanan na nilalaman nito ay nasa Maluwalhating Qur'an na at hindi na ito kailangan pa ng isang Muslim. Ang mismong mga Angkan ng Kasulatan ay hindi rin nagkakaisa sa katotohanan ng mga nilalaman nito.

Mga Katangian ng Maluwalhating Qur'an

Ang Maluwalhating Qur'an ay salita ng Allah ﷻ na ibinaba ni anghel Jibreel ﷺ mula sa Allah ﷻ at ipinahayag kay Propeta Muhammad ﷺ. Ang mga Muslim ay sumasamba sa Allah ﷻ sa pamamagitan ng pagbigkas nito. Ibinaba ito ng paunti-unti kay propeta Muhammad ﷺ sa loob ng 23 taon at hindi minsanan lamang. Ang unang talata na ipinahayag ng Allah ﷻ ay:

﴿ اقْرَأْ بِاسْمِ رَبِّكَ الَّذِي خَلَقَ، خَلَقَ الْإِنْسَانَ مِنْ عَلَقٍ، اقْرَأْ وَرَبُّكَ الْأَكْرَمُ، الَّذِي عَلَّمَ بِالْقَلَمِ، عَلَّمَ الْإِنْسَانَ مَا لَمْ يَعْلَمْ ﴾⁽¹⁾

"Bigkasin mo, O Muhammad, ang anumang ipinahayag sa iyo na mula sa Dakilang Qur'an bilang iyong pagsisimula sa pangalan ng iyong Rabb na bukod-Tanging Tagapaglikha, na Siya ang lumikha ng lahat ng tao mula sa namuong dugo na malapot. Bigkasin mo, O Muhammad, ang anumang ipinahayag sa iyo! At katiyakan ang iyong Rabb na Tagapaglikha ay sagana sa kabutihan at malawak ang kagandahang loob na Siya ang nagturo sa Kanyang nilikha ng pagsusulat sa pamamagitan ng panulat, na tinuruan Niya ang tao ng bagay na hindi nito alam."

Ito ang walang hanggang himala ng Allah ﷻ, na naghahamon sa mga tao na gumawa ng kahit isang kabanata na katulad nito. Sinabi ng Allah ﷻ:

﴿ أَمْ يَقُولُونَ افْتَرَاهُ قُلْ فَأْتُوا بِسُورَةٍ مِثْلِهِ وَادْعُوا مَنِ اسْتَلَطْتُمْ مِنْ دُونِ اللَّهِ إِنْ كُنْتُمْ صَادِقِينَ ﴾⁽²⁾

"O sinasabi ba nila: Ang Qur'an na ito ay sariling gawa lamang ni Muhammad? Sabihin mo sa kanila O Muhammad: Gumawa nga kayo ng isang kabanata na katulad ng Qur'an at magpatulong kayo sa sinumang may kakayahan na tumulong sa inyo bukod sa Allah kung kayo ay totoo."

Nakapaloob dito ang maraming mga himala sa kaalaman, sa salita, sa kasaysayan, sa batas, at iba pa. At ito ay nasa pangangalaga ng Allah ﷻ kung kaya walang sinuman ang may kakayahang baguhin o palitan ito. Pinakinggan ni Propeta Muhammad ﷺ mula kay Jibreel ﷺ, isinaulo niya, binasa ito sa kanyang mga kasamahan (Sahaabah) at isinulat ng mga tagasulat ng Wahee (rebelasyon) mula sa mga Sahaabah, pagkatapos ay tinipon ang lahat ng naisulat sa isang Aklat sa panahon ni Abu Bakr ؓ.

Ang pagbigkas ng Maluwalhating Qur'an ay isang gawaing pagsamba sa Allah ﷻ, na sa bawat isang titik na mabasa ay mayroong gantimpala na sampung kabutihan, katulad ng nabanggit sa Hadith ng Propeta ﷺ. At pinadali ng Allah ﷻ ang pagsasaulo nito, na kahit ang mga kabataan at mga hindi marunong ng salitang Arabe ay naisasaulo nila, at ito ay isa mga himala ng Qur'an. Dapat magsaulo ng Qur'an ang bawat Muslim sa abot ng kanyang makakaya, sundin ang mga alituntunin na dala nito, patotohanan ang mga balita na dala nito, isagawa ang lahat ng tungkulin na nakapaloob dito sa kanyang buhay, at huwag itong salungatin.

(1) Surah Al-Waq 96:1-5

(2) Surah Yunus 10:38



Nakasulat na Pagsasanay

1. Buuin ang mga sumusunod:

a) Ang kahulugan ng Imaan sa salita (Lugah) ay:

.....

b) Ang kahulugan ng Imaan sa Islamikong pananaw (Istilaah) ay:

.....

.....

c) Ang mga Haligi ng Imaan ay:

1.

2.

3.

4.

5.

6.

d) Saklaw ng Paniniwala sa Allah ang mga ito:

1. Ang paniniwala sa Kanyang pagka-Rabb na ang ibig-sabihin ay:

.....

.....

2. Ang paniniwala sa Kanyang pagka-llah na ang ibig sabihin ay:

.....

3. Ang paniniwala sa Kanyang mga Pangalan at mga Katangian na ang ibig sabihin ay:

.....

e) Ang Paniniwala sa mga Anghel ay sumasaklaw sa mga sumusunod:

1.

2.

3.



Nakasulat na Pagsasanay

2. Ang pagkaiba ng salitang "Allah" at salitang "diyos" ay:

.....
.....

3. Isulat ang limang pangalan ng mga Anghel na nabanggit sa Qur'an at sunnah at kanilang mga tungkulin:

1.
2.
3.
4.
5.

4. Ano ang hukom sa mga sumasamba sa mga anghel?

.....

5. Banggitin ang 5 aklat na ipinahayag ng Allah at kung kanino ito ipinahayag:

1.
2.
3.
4.
5.

6. Ang mga katangian ng Banal na Qur'an:

- a)
- b)
- c)
- d)

Mga Bagong Salita at Termino

Nu.	Arabiko	Pagsasatitik	Kahulugan
1	إقرار	Iqraar	Pagtalima / Pagkilala
2	اعتقاد	A'tiqaad	Paniniwala
3	تصديق	Tasdeeq	Pagpapatibay
4	قلب	Qalb	Puso
5	لسان	Lisaan	Dila
6	عمل	'Amal	gawain
7	ملائكة	Mala'ikah	Anghel
8	ملك	Malik	Hari
9	نور	Noor	Ilaw
10	طاعة	Taa'a	Pagsunod



Pangalawang Aralin

Mga Haligi ng Imaan (Paniniwala sa mga Sugo ng Allah)

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kaphahintulutan ng Allah ﷻ na:

- Maipaliwanag ang kahulugan ng paniniwala sa mga Sugo ng Allah.
- Maalala mo ang mga Ulul-Azm (napiling matiisin at mayroong lakas) na mga Sugo.
- Magkaroon ka ng kakayahang sumulat ng maikling talambuhay ni Propeta Muhammad ﷺ sa loob lamang ng isang pahina.
- Mabilang mo ang ilan sa mga katangian ni Propeta Muhammad ﷺ.



Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Mga naunang aralin sa yunit ng 'Aqeedah

Mga haligi ng Imaan: pagpapatuloy mula sa unang aralin

Matatandaan na ang mga haligi ng Imaan ay:

1. Ang paniniwala sa Allah ﷻ.
2. Ang paniniwala sa mga anghel.
3. Ang paniniwala sa mga aklat.
4. Ang paniniwala sa mga Sugo.
5. Ang paniniwala sa kabilang Buhay.
6. Ang paniniwala sa Al-Qadr (tinakdang kapalaran), mabuti man o masama.

Ang naunang tatlong mga haligi ay una nang napag-aralan sa unang aralin, at sa paksang ito ay pag-aaralan natin ang pang-apat na haligi ng Imaan.



Pang-apat: Ang Paniniwala sa mga Sugo ng Allah

Ito ay paniniwala na tiyak na nagpadala ang Allah ﷻ sa bawat nasyon ng isang Sugo na nag-anyaya sa kanila tungo sa paniniwala sa kaisahan ng Allah ﷻ. Sinabi ng Allah ﷻ:

﴿ وَلَقَدْ بَعَثْنَا فِي كُلِّ أُمَّةٍ رَسُولًا أَنْ أُعْبُدُوا اللَّهَ وَاجْتَنِبُوا الطَّاغُوتَ ﴾ ⁽¹⁾

“At katiyakan, nagpadala Kami sa bawat sambayanan ng Sugo na nag-uutos sa kanila ng pagsamba sa Allah, at pag-iwas sa pagsamba ng iba bukod sa Kanya, tulad ng mga Shaytan, mga rebulto at mga sinasandalan ng sinuman bukod sa Allah.”

Ang mga Propeta at Sugo ay marami, at 25 lamang sa kanila ang nabanggit sa Banal na Qur'an. Kinakailangang paniwalaan ang lahat ng propeta at sugo ng Allah ﷻ na walang pagtatangi sa bawat isa sa kanila, gaya ng paniwalaan ang ilan at hindi paniwalaan ang iba. Kinakailangan din paniwalaan ang lahat sa kanila na nabanggit ang mga pangalan sa Banal na Qur'an. Sinabi ng Allah ﷻ:

﴿ إِنَّ الَّذِينَ يَكْفُرُونَ بِاللَّهِ وَرُسُلِهِ وَيُرِيدُونَ أَنْ يُقْرِفُوا بَيْنَ اللَّهِ وَرُسُلِهِ وَيَقُولُونَ نُؤْمِنُ بِبَعْضٍ وَنَكْفُرُ بِبَعْضٍ وَيُرِيدُونَ أَنْ يَتَّخِذُوا بَيْنَ ذَلِكَ سَبِيلًا * أُولَئِكَ هُمُ الْكَافِرُونَ حَقًّا وَأَعْتَدْنَا لِلْكَافِرِينَ عَذَابًا مُهِينًا * وَالَّذِينَ آمَنُوا بِاللَّهِ وَرُسُلِهِ وَمَنْ يُقْرِفُوا بَيْنَ أَحَدٍ مِنْهُمْ أُولَئِكَ سَوْفَ يُؤْتِيهِمْ أَجْرُهُمْ وَكَانَ اللَّهُ غَفُورًا رَحِيمًا ﴾ ⁽²⁾

“Katiyakan, ang mga yaong tumanggi sa Allah at sa Kanyang mga Sugo, na sila ay gumawa ng pagtangi sa pagitan ng Allah at ng Kanyang mga Sugo sa pamamagitan ng kanilang paniniwala sa Allah at pagpapasinungaling sa mga Sugo na ipinadala ng Allah sa Kanyang mga nilikha; o pag-amin nilang naniniwala sa iilang mga Sugo at tinatanggi ang iba; at ninanais nila itong gawing daan tungo sa pagkaligaw na ginawa nilang pagbabago. Sila ang nasa malinaw na paglabag, na walang pag-aalinlangan, ang inihanda Namin sa mga tumanggi sa paniniwala sa Allah ay kaparusahan na magpapahamak sa kanila. At ang mga yaong naniniwala sa kaisahan ng Allah, sa Kanyang mga Sugo, at walang ginawang pagtatangi sa pagitan ng isa at ng iba mula sa kanilang lahat; sila ay walang pag-aalinlangan, pagkakalooban ng gantimpala. At ang Allah ang Ganap na Mapagpatawad at Ganap na Mapagmahal.”

Katunayan, ipinadala ng Allah ﷻ ang mga Sugo na magbibigay ng magandang balita at magpapaabot ng mga babala upang magabayan ang mga tao tungo sa daan ng tagumpay dito sa daigdig at sa kabilang Buhay. Ito ang maliwanag na katibayan sa malaking habag ng Allah ﷻ sa Kanyang mga alipin at kagandahang loob Niya sa Kanyang mga nilikha, sapagkat ang tao ay nangangailangan ng pagkilala sa kanyang *Rabb*, pamamaraan ng pagsamba sa Kanya, pamamaraan kung paano kalulugdan ng Allah ﷻ, at kung ano ang naghahintay sa kanya pagkatapos ng kanyang kamatayan.

Ito ay mga bagay na hindi nakikita. Walang kakayanan ang isang tao na maabot ito at mabatid maliban sa pamamagitan ng *Wahee* (rebelasyon) mula sa Allah ﷻ na itinalaga sa napili Niya sa Kanyang mga nilikhang mga Propeta at mga Sugo. Ang lahat ng mga Sugo ay lalaki. Pinili sila ng Allah ﷻ mula sa pinaka-mabuting mga tao upang ipaabot nila ang Kanyang mensahe, at pinagkalooban sila ng mga himala na nagpapatotoo sa kanila.

(1) Surah An-Nahl 16:36

(2) Surah An-Nisa' 4:150-152

Sila ay huwaran sa kanilang magandang ugali, pagkatotoo, mapagkakatiwalaan, at paghahangad nila na magabayan ang mga tao na kung kanino sila isinugo sa pamamagitan ng kanilang mga pangangaral at pag-aanyaya sa Islam. Sila ay pinagkalooban ng Allah ﷻ ng tulong laban sa sinuman na sumalungat at magpasinungaling sa kanila.

Ang una sa kanila ay si Propeta Nuh ﷺ at ang pinakahuli naman ay si Propeta Muhammad ﷺ. Ang pinakamabuti sa kanila ay ang *Ulul-Azm* (napiling matiisin at mayroong lakas) at sila ay lima: Nuh (Noah), Ibraahim (Abraham), Moosa (Moses), 'Eesa (Hesus) at Muhammad ﷺ. Sila ay binanggit ng Allah ﷻ ng samasama sa isang talata:

﴿ وَإِذْ أَخَذْنَا مِنَ النَّبِيِّينَ مِيثَاقَهُمْ وَمِنكَ وَمِنْ نُوحٍ وَإِبْرَاهِيمَ وَمُوسَىٰ وَعِيسَىٰ ابْنِ مَرْيَمَ وَأَخَذْنَا مِنْهُمْ مِيثَاقًا غَلِيظًا ۝١١﴾

“At alalahanin mo, O Muhammad, noong gumawa kami ng kasunduan sa mga Propeta na pagpaparating ng mensahe, at gumawa rin Kami ng kasunduan sa iyo, kay Nuh, kay Ibraahim, kay Moosa, kay 'Eesa Ibn Maryam, at gumawa kami sa kanila ng matibay na kasunduan”.

Ang pinaka mabuti sa lahat ng mga Propeta at mga Sugo at ang kanilang pinuno ay si Propeta Muhammad ﷺ.

Ang lahat ng mga Propeta at mga Sugo ay tao. Sila ay nilikha ng Allah ﷻ at walang katangian na kahit anong bagay mula sa pagka-*Rabb* at pagka-Diyos, kung kaya dapat natin silang paniwalaan at mahalín ngunit hindi maaaring sambahin. Kasama na dito si 'Eesa (Hesus) ﷺ, na inaangkin ng mga kristyanong siya ay Diyos o anak ng Diyos (Ang Allah ﷻ ay Kataas-taasan sa kanilang mga pinagsasabi). Si Hesus ﷺ ay lingkod at nilikha ng Allah ﷻ sa pamamagitan ng Salita mula sa Kanya, at ipinagbuntis ng kanyang Ina na si birheng Maria, at ipinanganak na walang tatay, ngunit hindi nangangahulugan na anak ng Allah ﷻ, sapagkat ang Allah ﷻ ay may kapangyarihang lumikha ng lahat ng bagay. Ang kanyang kapanganakan na walang ama ay kasama sa mga palatandaan ng kapangyarihan ng Allah ﷻ, at ang katulad niya ay si Adam (Adan) ﷺ. Sinabi ng Allah ﷻ:

﴿ إِنَّ مَثَلَ عِيسَىٰ عِنْدَ اللَّهِ كَمَثَلِ آدَمَ خَلَقَهُ مِنْ تُرَابٍ ثُمَّ قَالَ لَهُ كُنْ فَيَكُونُ ۝٢١﴾

“Katiyakan, ang paglikha ng Allah kay 'Eesa (Hesus) na walang ama ay katulad ng paglikha Niya kay Adam (Adan) na walang ama't ina. Dahil siya ay nilikha ng Allah mula sa alabok, pagkatapos sinabi sa kanya na maging tao at ito ay naging tao”.

Kung kaya, si 'Eesa (Hesus) ﷺ ay isang lingkod at Sugo ng Allah ﷻ.

(1) Surah Al-Ahzab 33:7

(2) Surah Aali Imran 3:59

Ang Buhay ni Propeta Muhammad ﷺ

Si Propeta Muhammad ﷺ ang selyo (pinakahuli) sa lahat ng mga Propeta at Sugo, at wala ng propetang sumunod pa sa kanya. Sinabi ng Allah ﷻ:

﴿ مَا كَانَ مُحَمَّدٌ أَبَا أَحَدٍ مِّن رِّجَالِكُمْ وَلَكِن رَّسُولَ اللَّهِ وَخَاتَمَ النَّبِيِّينَ وَكَانَ اللَّهُ بِكُلِّ شَيْءٍ عَلِيمًا ﴾⁽¹⁾

“Si Muhammad ay hindi ama ng kahit na sinuman sa inyo na mga kalalakihan, kundi siya ay Sugo ng Allah at ang pinakaselyo o pinakahuli sa lahat ng mga Propeta. At ang Allah ang Ganap na Nakakaalam sa lahat ng bagay”.

Siya si Muhammad na anak ni Abdullah na anak ni Abdulmuttalib na anak ni Hashim. Si Hashim ay mula sa angkan ng Quraish. Ang Quraish ay mula sa angkan ng mga Arabo. Umaabot ang kanyang angkan kay Propeta Ismail na anak ni Propeta Ibrahim ﷺ.

Ipinanganak siya sa taon ng Elepante sa Makkah Mukarramah sa taong 571G. Ang kanyang ina ay si Aminah na anak ni Wahb. Namatay ang kanyang ama noong hindi pa siya ipinanganak, kung kaya ipinanganak siyang *Yateem* (ulila), at namatay naman ang kanyang ina noong siya’y anim na taong gulang pa lamang. Inalagaan siya ng kanyang Lolo na si Abdulmuttalib. Pagkatapos mamatay ang kanyang lolo ay nalipat naman ang pangangalaga sa kanya sa kanyang tiyuhin na si Abu Talib. Nagtrabaho siya bilang isang pastol ng mga kambing noong siya ay maliit pa. Siya ay tanyag sa lahat ng mga taga Makkah sa pangalang *As-saadiqul-Ameen* (Ang totoo at mapagkakatiwalaan) dahil siya ay makatotohanan at mapagkakatiwalaan.

Noong siya ay magbibinata na ay nagtrabaho bilang mangangalakal ni Khadijah bint Khuwaylid ﷺ. Ginawa siyang tagakalakal noong nalaman ni Khadijah ﷺ ang kanyang pagiging totoong tao at mapagkakatiwalaan. Inihayag ni Khadijah ﷺ sa kanya na gusto niya siyang maging asawa, kung kaya nagpakasal sila noong siya ay 25 taon gulang, at 40 taong gulang naman si Khadijah ﷺ. Biniyayaan sila ng dalawang anak na lalaki: si Al-Qasim at Abdullah, at apat na anak na babae: sila Umm kulthoom, Zainab, Ruqayyah, at Fatimah. Wala na siyang ibang anak sa iba niyang mga asawa maliban kay Ibrahim na anak niya kay Mariyah Al-Qibtiyah.

Pinadalhan siya ng Allah ﷻ ng *Wahee* (rebelasyon) noong siya ay 40 taong gulang. Siya ay hindi marunong bumasa at sumulat. Ang unang dumating sa kanya na *Wahee* ay:

﴿ اقْرَأْ بِاسْمِ رَبِّكَ الَّذِي خَلَقَ، خَلَقَ الْإِنْسَانَ مِنْ عَلَقٍ، اقْرَأْ وَرَبُّكَ الْأَكْرَمُ، الَّذِي عَلَّمَ بِالْقَلَمِ، عَلَّمَ الْإِنْسَانَ مَا لَمْ يَعْلَمْ ﴾⁽²⁾

“Bigkasin mo O Muhammad, ang anumang ipinahayag sa iyo na mula sa Dakilang Qur’an bilang iyong pagsisimula! Sa Pangalan ng iyong Rabb na Nag-iisang Tagapaglikha, na Siya ang lumikha ng lahat ng tao mula sa namuong dugo na malapot. Bigkasin mo, O Muhammad ang anumang ipinahayag sa iyo! At katiyakan, ang iyong Rabb ay sagana sa kabutihan at malawak ang kagandahang loob, na Siya ang nagturo sa Kanyang nilikha ng pagsulat sa pamamagitan ng panulat, at tinuruan Niya ang tao ng bagay na hindi nito alam”.

(1) Surah Al-Ahzab 33:40

(2) Surah Al-Falaq 96:1-5

Nag-umpisa ang kanyang pagda-Da'wah ng patago sa loob ng tatlong taon, pagkatapos ay inutusan siya ng Allah ﷻ ng hayagang pagda-Da'wah ng Kanyang ipahayag ang sumusunod na ayah:

﴿ فَاصْدَعْ بِمَا تُؤْمَرُ وَأَعْرِضْ عَنِ الْمُشْرِكِينَ ﴾⁽¹⁾

"Na kung kaya, isagawa mo nang lantaran ang pagpapalaganap ng katotohanan na ipinag-utos ng Allah sa iyo, at pabayaang mo ang mga Mushrikin."

Ang isinalubong sa kanya ng mga kababayan niya ay pagpapasinungaling at pananakit ganoon din ang sinuman sa mga kasamahan niya, pagbibintang ng kasinungalingan, salamangkero at baliw. Sinubukan din siyang patayin, na kung kaya ipinag-utos ng Allah ﷻ na mag-*Hijra* (mangibang-bayan) siya sa *Yathrib* (Al-Madinah) pagkalipas ng 13 taong pagda-Da'wah sa Makkah.

Namuhay siya sa Madinah sa loob ng 10 taon sa pagda-Da'wah at pakikipaglaban sa mga *Mushrik*, hanggang sa binuksan ng Allah ﷻ sa kanila (sinakop) ang Makkah, at nagpasukan ang mga Arabo sa Relihiyong Islam. Namatay siya sa gulang na 63 taon, pagkatapos niyang maipaabot ang mensahe, at maipamahagi ang ipinagkatiwala sa kanya, at nagpunyagi sa landas ng Allah ﷻ, ang tunay na pagpupunyagi.



[1] Surah Al-Hijr 15:94

Ang mga natatanging katangian ng Propeta Muhammad ﷺ

Binigyan ng Allah ﷻ si Propeta Muhammad ﷺ ng mga espesyal na katangian na naiiba sa ibang mga Sugo. Kabilang dito ang mga sumusunod:

Ang Propeta ﷺ ay ang selyo ng lahat ng Propeta at Sugo. Siya ang piniling pinakamabuti sa lahat ng nilikha ng Allah ﷻ, at pinili siya bilang *Khaleel* (Ang pinakamamahal), at ibinababa Niya sa kanya ang pinakamaganda sa Kanyang mga Aklat, ang Maluwalhating Qur'an. Ang mga Sugo na nauna sa kanya ay isinugo lamang sa kani-kanilang mga *Qawm* (pamayanan), samantalang siya ay isinugo sa buong sangkatauhan. Sinabi ng Allah ﷻ:

﴿ قُلْ يَا أَيُّهَا النَّاسُ إِنِّي رَسُولُ اللَّهِ إِلَيْكُمْ جَمِيعًا الَّذِي لَهُ مُلْكُ السَّمَاوَاتِ وَالْأَرْضِ لَا إِلَهَ إِلَّا هُوَ يُحْيِي وَيُمِيتُ فَأَمِنُوا بِاللَّهِ وَرَسُولِهِ النَّبِيِّ الْأُمِّيِّ الَّذِي يُؤْمِنُ بِاللَّهِ وَكَلِمَاتِهِ وَاتَّبِعُوهُ لَعَلَّكُمْ تَهْتَدُونَ ﴾⁽¹⁾

"Sabihin mo O Muhammad sa mga tao: Katiyakan ako ay Sugo ng Allah sa inyong lahat, na Siya ang Allah ang Nagmamay-ari ng buong kalangitan at ng kalupaan. Walang sinuman ang Ilah o diyos na dapat sambahin kundi Siya lamang, na Siya ang Nagbibigay ng buhay at nagsasanhi ng kamatayan. Na kung kaya maniwala kayo sa Allah, at sundin ninyo ang Kanyang Sugo na si Muhammad, ang Propetang hindi marunong bumasa't sumulat, na siya ay naniniwala sa Allah, at anumang ipinahayag Niya sa kanya, at sundin ninyo ang Sugong ito upang kayo ay gabayan sa matuwid na landas."

Ang kanyang dalang mensahe ang pumalit sa lahat na mga batas at mga mensahe na nauna dito, at ang kanyang nasyon ang pinakamabuti sa lahat ng mga nasyon, at pinagkaloob sa kanya ang *Hawdh Al-Kawthar* (imbakan ng tubig sa paraiso), at ang Dakilang *Shafa'ah* (pamamagitan) sa Araw ng *Qiyamah* (pagtayo sa harapan ng Allah ﷻ).

Dapat pag-aralan ng bawat Muslim ang kanyang talambuhay, at sundin ang kanyang Sunnah, at mahalín siya ng higit pa sa pagmamahal sa kanilang mga sarili at kayamanan, pamilya at mga anak, at paramihin ang *Salawat* at *Salam* (pagbigkas ng ﷺ = "*sallallahu alayhi wa sallam*") sa kanya lalung-lalo na kapag nabanggit ang kanyang pangalan.

Ang pagmamahal at pagsunod sa kanya ay dapat na hindi hihigit para sa isang tao lamang. Hindi siya maaaring bigyan ng kahit anong katangian na mula sa mga katangian ng *Rabb* (panginoon), dahil siya ay tao lamang na pinagkalooban ng *Wahee* (rebelasyon), at hindi niya alam ang *Al-Ghayb* (mga hindi nakikita) maliban sa kung ano ang ipinaalam sa kanya ng Allah ﷻ. Sinabi ng Allah ﷻ:

﴿ قُلْ إِنَّمَا أَنَا بَشَرٌ مِّثْلُكُمْ يُوحَىٰ إِلَيَّ أَنَّمَا إِلَهُكُمُ إِلَهٌ وَاحِدٌ فَمَن كَانَ يَرْجُوا لِقَاءَ رَبِّهِ فَلْيَعْمَلْ عَمَلًا صَالِحًا وَلَا يُشْرِكْ بِعِبَادَةِ رَبِّهِ أَحَدًا ﴾⁽²⁾

"Sabihin mo, O Muhammad sa kanila: Ako sa katotohanan ay tao lamang na katulad din ninyo, pinagkalooban ako ng kapahayagan ng aking Rabb na Tagapaglikha, na walang pag-aalinlangan na Siya lamang ang Nag-iisang Ilah na karapat-dapat sambahin, na kung kaya, sinuman ang naghahangad ng gantimpala sa Araw ng kanyang pakikipagtagpo sa Kanya ay hayaang gumawa ng kabutihan, at hindi siya maglalagay ng anumang katamabal sa kanyang pagsamba sa Allah nang kahit na sino."

(1) Surah Al-Araf 7:158

(2) Surah Al-Kahf 18:110



Nakasulat na Pagsasanay

1. Sino ang mga Ulul-Azm (Malalakas at matitibay) na mga Sugo?

- 1)
- 2)
- 3)
- 4)
- 5)

2. Ano ang ating mga tungkulin sa mga Sugo ng Allah?

- a)
- b)
- c)

3. Magbigay ng tatlong espesyal na katangian ni Propeta Muhammad ﷺ:


- a)
- b)
- c)

4. Buuin ang mga sumusunod:

- a. Si Hesus ﷺ ay katulad ni Nilikha siya ng Allah ﷻ mula sa at pagkatapos ay sinabi sa kanya ng Allah ﷻ
- b. Nagtrabaho si Propeta Muhammad ﷺ bago naging sugo bilang isang at
- c. Pinakasalan ni Propeta Muhammad ﷺ ang kanyang unang asawa na si bago siya maging Sugo sa gulang na at ang kanyang asawa naman ay sa gulang na
- d. Biniyayaan si Propeta Muhammad ﷺ ng mga anak na lalaki na sila at at mga anak na babae na sila at at Ang lahat ng kanyang mga anak ay mula sa kanyang unang asawa maliban kay na anak niya kay Maria Qibtiyah.
- e. Dumating ang kapahayagan kay Propeta Muhammad ﷺ sa gulang na at siya ay nag-Da'wah ng hindi-hayagan sa loob ng taon at nananatili sa Makkah sa loob ng taon. Pagkatapos ay lumisan siya patungong Madinah at doon siya nanirahan sa loob ng taon, pagkatapos siya ay pumanaw sa gulang na

Mga Bagong Salita at Termino

Nu.	Arabiko	Pagsasatitik	Kahulugan
1	أمة	Ummah	Bansa / nasyon
2	بشر	Bashar	Mga tao
3	خاتم	Khaatim	Pinakahuli
4	كذب	Kathab	Kasinungalingan
5	سحر	Sihr	Salamangka
6	جنون	Junoon	Kabaliwan
7	طاغوت	Taghoot	Mga dios-diosan
8	قوم	Qawm	Mga tao
9	بشير	Basheer	Tagapagbalita ng mabuti
10	نذير	Natheer	Tagapagbabala



Pangatlong Aralin

Mga haligi ng Imaan

Paniniwala sa kabilang buhay;
Paniniwala sa Al-Qadr (Itinakdang kapalaran)

Itatagal:



Isang Oras



● Mga Layunin:

Sa pagtatapos ng araling ito, magkakaroon ka ng kakayahan sa kaphintulutan ng Allah ﷻ na:

- Pagpapaliwanag ng kahulugan ng paniniwala sa kabilang buhay.
- Pagpapaliwanag ng kahulugan ng paniniwala sa Al-Qadr (Itinakdang kapalaran) - mabuti man o masama.



● Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino

● Kinakailangang napag-aralan na:

- Ang una at pangalawang Aralin sa yunit ng Aqeedah

Nauna na nating napag-aralan ang apat na mga haligi ng *imaan*, at sa araling ito ay pag-aaralan natin ang mga natitira pang mga haligi.

Panglima: Ang Paniniwala sa Huling Araw

Ito ay ang paniniwala na ang buhay dito sa mundo ay walang pag-aalinlangan na may katapusan. Kaya tinawag na Huling Araw sapagkat wala ng araw na susunod pa dito.

Pagkatapos ay bubuhayin uli ng Allah ﷻ ang lahat ng mga nilikha at magsisimula sila ng panibagong buhay na walang-hanggan. Ang mga gantimpala ay para sa mga mananampalataya na naniwala sa utos ng Allah ﷻ at sumunod sa Kanyang mga Sugo, at ang walang hanggang kaparusahan naman ay para sa mga *Kafir* (hindi naniniwala) na sumuway sa mga palatandaan ng Allah ﷻ, nagpapasinungaling at sumuway sa mga Sugo ng Allah ﷻ. Sinabi ng Allah ﷻ:

﴿ كُلُّ نَفْسٍ ذَائِقَةُ الْمَوْتِ وَإِنَّمَا تُوَفَّوْنَ أُجُورَكُمْ يَوْمَ الْقِيَامَةِ فَمَنْ زُحْزِحَ عَنِ النَّارِ وَأُدْخِلَ الْجَنَّةَ فَقَدْ فَازَ وَمَا الْحَيَاةُ الدُّنْيَا إِلَّا مَتَاعُ الْغُرُورِ ﴿١﴾

"Ang bawat may buhay ay matitikman ang kamatayan at sa pamamagitan nito babalik ang mga nilikha sa Allah na kanilang Rabb na Tagapaglikha upang sila ay hukuman. At walang pag-aalinlangan, makakamtan ninyo ang kabayaran sa inyong ginawa nang buo at nang walang kakulang-kulang sa Araw ng Muling Pagkabuhay. Samakatuwid, sinuman ang pinarangalan ng kanyang Rabb at iniligtas Niya sa Impiyerno at pinapasok sa Paraiso; katiyakan, nakamtan niya ang sukdulang tagumpay, dahil ang buhay na makamundo ay isa lamang na mapanlinlang na kaligayahan na may hangganan".

Walang nakakabatid sa pagdating ng Oras ng pagkagunaw ng daigdig maliban sa Allah ﷻ na Bukod-Tangi, at wala ni isa man sa Kanyang mga nilikha ang nakakaalam. Sinabi ng Allah ﷻ:

﴿ يَسْأَلُونَكَ عَنِ السَّاعَةِ أَيَّانَ مُرْسَاهَا قُلْ إِنَّمَا عِلْمُهَا عِنْدَ رَبِّي لَا يُجَلِّيهَا لِوَقْتِهَا إِلَّا هُوَ ثَقُلَتْ فِي السَّمَاوَاتِ وَالْأَرْضِ لَا تَأْتِيكُمُ إِلَّا بَعْتَةً يَسْأَلُونَكَ كَأَنَّكَ حَفِيٌّ عَنْهَا قُلْ إِنَّمَا عِلْمُهَا عِنْدَ اللَّهِ وَلَكِنَّ أَكْثَرَ النَّاسِ لَا يَعْلَمُونَ ﴿٢﴾

"Tinanong ka, O Muhammad, ng mga walang paniniwala sa As-Sa'ah (oras ng pagkagunaw ng sandaigdig) kung kailan ito mangyayari? Sabihin mo sa kanila: Ang kaalaman hinggil dito ay sa Allah lamang na walang sinuman ang makapagpahayag nito bukod sa Kanya, na dahil sa bigat ng kaalamang ito ay hindi ito kayang arukin ng anumang nasa kalangitan at kalupaan, na kung kaya, walang sinuman ang makaaalam ng oras ng pagdating nito na kahit na sino maliban sa Kanya, kundi ito ay biglaan. Tinatanong ka nila hinggil dito na parang sa iyo nagmumula ang kaalaman, sabihin mo sa kanila: Katiyakan, ang kaalaman hinggil dito ay sa Allah lamang na Siyang Ganap na Nakaalam ng anumang lihim, subalit ang karamihan sa mga tao ay hindi nila batid".

Bago dumating ang Oras ng Qiyamah ay mayroong lalabas na mga palatandaan na malapit nang mangyari ito. Ang ibang mga palatandaan ay nangyari na, kaya ang buhay sa ibabaw ng lupa ay nasa huling yugto na lamang.

(1) Surah Aali Imran 3:185

(2) Surah Al-Araf 7:187

Hinati ng mga Ulama ang mga palatandaan sa tatlong bahagi:

1. **Ang mga maliliit na palatandaan:** Ang karamihan sa mga ito ay nangyari na. Kabilang dito ang paglabas ng Propeta ﷺ at ang pagkabiya ng buwan sa kapanahunan niya. Sinabi ng Allah ﷻ:

﴿ افْتَرَبْتُ السَّاعَةَ وَأَنْشَقَّ الْقَمَرَ ﴾⁽¹⁾

"Malapit na ang pagkagunaw ng daigdig, at nabiyak na ang buwan ng dalawang hati".

2. **Ang mga pang-gitnang palatandaan:** ang ilan sa mga palatandaan na ito ay nangyari na rin ngunit hindi pa nagwawakas bagkus dumadami pa, at kabilang dito ang paligsahan ng pagpapatayo ng mga matataas na gusali ng mga taong dating nakayapak at tagapastol lamang ng mga tupa (mga Arabo).
3. **Ang mga malalaking palatandaan:** Kapag lumabas na ang mga ito ay kaagad na mangyayari ang pagkagunaw ng mundo. Kasama sa mga palatandaan na ito ay ang paglabas ni *Maseeh Ad-Dajjal* (Bulaang Kristo), *Yaajuj at Majuj* (Gog at Magog), at pagbaba ni 'Eesa (Hesus) na anak ni Maryam ﷺ.

Sa Araw ng Muling Pagkabuhay ay titipunin ng Allah ﷻ ang lahat ng mga nilikha upang papanagutin, at ipagkakaloob sa Propeta ﷺ ang *Shafa'at Al-kubra* (ang dakilang pamamagitan) at ang *Hawdh Al-Kawthar* (ang lawa ng tubig sa paraiso) na kung sinuman ang makainom mula dito ay hindi na makararamdam ng pagkauhaw kailanman. Ito ang Araw na dakila, na kung saan ay titimbangin ang mga gawain sa timbangan, at ipagkakaloob sa bawat tao ang kanyang aklat na nakapaloob dito ang lahat ng kanyang nagawa sa daigdig mabuti man o masama. Tatawid sila sa *Sirat* (tulay sa ibabaw ng impiyernong-apoy), at hahatakin dito ang mga *Kafir sa Jahannam* (Impiyerno) na nakakadena hanggang sa itatapon sila sa ilalim nito. Gagabayan naman ang mga mananampalataya ng buong paggalang papunta sa *Jannah* (Paraiso) at sasalubungin sila ng mga anghel na may pagbati ng "*As-salaamu alaykum*".

Kasama sa paniniwala sa Huling Araw ang tatlong bagay:

1. Ang paniniwala sa muling pagkabuhay pagkatapos ng kamatayan. Sinabi ng Allah ﷻ:

﴿ زَعَمَ الَّذِينَ كَفَرُوا أَنْ لَنْ يُعْعَبُوا قُلْ بَلَىٰ وَرَبِّي لَتُبْعَثُنَّ ثُمَّ لَتُنَبَّؤُنَّ بِمَا عَمِلْتُمْ وَذَلِكَ عَلَىٰ اللَّهِ يَسِيرٌ ﴾⁽²⁾

"Inangkin ng mga hindi naniniwala sa Allah na kailanman sila ay hindi na palalabasin pang muli mula sa kanilang mga libingan pagkatapos ng kanilang kamatayan, sabihin mo sa kanila, O Muhammad: Hindi ang kanilang inaakala ang katotohanan, kundi sumusumpa ako sa Allah na aking Rabb, na palalabasin Niya kayo mula sa inyong mga libingan na buhay, pagkatapos ay ipababatid sa inyo kung ano ang inyong ginawa sa daigdig, at ito ay napakadali lamang para sa Allah".

2. Ang paniniwala sa pagtutuos at pagbibigay ng gantimpala, sapagkat bawat tao ay papanagutin sa kanyang mga ginawa. Sinabi ng Allah ﷻ:

﴿ وَنَضَعُ الْمَوَازِينَ الْقِسْطَ لِيَوْمِ الْقِيَامَةِ فَلَا تُظْلَمُ نَفْسٌ شَيْئًا وَإِنْ كَانَ مِثْقَالَ حَبَّةٍ

(1) Surah Al-Qamar 54:1
(3) Surah Al-Anbiya' 21:47

(2) Surah At-Taghabun 64:7

“At ilalagay ng Allah ang makatarungang Timbangan sa paghuhukom sa Araw ng Muling Pagkabuhay, at hindi Niya sila dadayain nang kahit na kaunti, kahit na ang gawain ay kasimbibat ng buto ng mustasa o kasingliit ng atom (isang napakaliit na bagay), mabuti man o masama at itatala sa nagmamay-ari nito. At sapat na ang Allah bilang Tagapagtuus sa mga gawa ng Kanyang mga alipin”.

3. Ang paniniwala sa paraiso at impiyerno, at tunay na isa lamang sa dalawang ito ang patutunguhan ng mga lingkod ng Allah ﷻ. Sinabi ng Allah ﷻ:

﴿وَكَذَلِكَ أَوْحَيْنَا إِلَيْكَ قُرْآنًا عَرَبِيًّا لِتُنذِرَ أُمَّ الْقُرَىٰ وَمَنْ حَوْلَهَا وَتُنذِرَ يَوْمَ الْجُمُعِ لَا رَيْبَ فِيهِ فَرِيقٌ فِي الْجَنَّةِ وَفَرِيقٌ فِي السَّعِيرِ﴾⁽¹⁾

“At kung paano Kami nagpahayag sa mga Propeta na nauna sa iyo ay ganoon din, ipinahayag Namin sa iyo ang Banal na Qur’an na wikang Arabic upang balaan ang pinaka-Ina o pinakasentro ng mga bayan, na ito ay Makkah at ang mga nakapalibot dito, at balaan sila hinggil sa Araw ng Pagtitipun-tipon, na ito ay Araw ng Muling Pagkabuhay na walang pag-aalinlangang darating. Ang mga tao roon ay dalawang grupo: Grupo na papunta ng Paraiso, at ang isang grupo naman ay sa Impiyerno na naglalagablab”.

Kasama sa mga bunga ng paniniwala sa Huling Araw:

1. Huwag magpalinlang sa buhay sa daigdig, at paghandaan ang walang-hanggang buhay ng may tamang paniniwala at mga mabubuting gawain.
2. Ang *Sabr* (pagtitiis) sa pagsunod sa Allah ﷻ, pagtitiis sa pag-iwas sa pagsuway sa Allah ﷻ, at pagtitiis sa anumang darating na pagsubok.
3. Pagsusuri sa sarili at malaman na ang Allah ﷻ ay palaging nagmamasid sa ating ginagawa.
4. Huwag mang-api ng mga tao, dahil tiyak at walang alinlangan na mapapasakanya ang kanyang karapatan mula sa sinumang nang-api sa kanya.

[1] Surah Ash-Shuraa 42:7

Pang-anim: Ang Paniniwala sa Al-Qadr (Tinakdang Kapalaran) - Mabuti man o Masama

Ito ang paniniwala na tunay na ang Allah ﷻ ang nakakaalam sa anumang nangyari at mangyayari pa, at saklaw ng Kanyang kaalaman ang lahat ng bagay.

﴿لَتَعْلَمُوا أَنَّ اللَّهَ عَلَىٰ كُلِّ شَيْءٍ قَدِيرٌ وَأَنَّ اللَّهَ قَدْ أَحَاطَ بِكُلِّ شَيْءٍ عِلْمًا﴾

Sinabi ng Allah ﷻ: *"Upang mabatid ninyo, O kayong mga tao na ang Allah ang Ganap na Makapangyarihan sa lahat ng bagay na walang anumang makahihigit sa Kanya, at katiyakang saklaw ng kaalaman ng Allah ang lahat ng bagay".*⁽¹⁾

Katotohanan, isinulat ng Allah ﷻ ang lahat na itinakdang kapalaran ng mga nilikha hanggang sa pagdating ng Sa'ah (Oras [ng pagkagunaw sa mundo]).

﴿أَلَمْ تَعْلَمْ أَنَّ اللَّهَ يَعْلَمُ مَا فِي السَّمَاءِ وَالْأَرْضِ إِنَّ ذَلِكَ فِي كِتَابٍ إِنَّ ذَلِكَ عَلَى اللَّهِ يَسِيرٌ﴾

Sinabi ng Allah ﷻ: *"Hindi mo ba batid, O Muhammad, na walang pag-aalinlangang ang Allah ang Nagmamay-ari ng ganap na kaalaman ng anumang nasa kalangitan at kalupaan, na katiyakang ito ay Kanyang itinala sa Aklat. Katiyakan, ang kaalaman na ito ay napakadali lamang sa Allah".*⁽²⁾

Walang anumang bagay na mangyayari sa mundong ito maliban sa ito ay alam ng Allah ﷻ at ayon sa Kanyang kalooban, na kung ano ang nais ng Allah ﷻ ay mangyayari at kung ano naman ang hindi Niya naisin ay hindi mangyayari.

﴿وَمَا تَشَاءُونَ إِلَّا أَنْ يَشَاءَ اللَّهُ إِنَّ اللَّهَ كَانَ عَلِيمًا حَكِيمًا﴾

Sinabi ng Allah ﷻ: *"At ang anumang bagay na inyong nais ay nasa ilalim lahat ng pagtatakda ng Allah at ng Kanyang kagustuhan. Katiyakan, ang Allah ang Ganap na Nakaaalam, na Ganap na Maalam sa Kanyang pangangasiwa at Gawain".*⁽³⁾

Ang paniniwala sa Qadr (tinakdang kapalaran) ay sumasaklaw sa apat na mga haligi na dapat paniwalaan. Walang anumang bagay na mangyayari sa mundong ito maliban sa nakapaloob sa apat na mga haliging ito:

1. Ang paniniwala sa kaalaman ng Allah ﷻ, na walang anumang bagay na mangyayari sa mundong ito maliban sa kaalaman ng Allah ﷻ.
2. Ang paniniwala sa Kasulatan, na walang anumang bagay na mangyayari sa mundong ito maliban sa nakasulat na ito sa *Al-Lawh Al-Mahfoodh* (Protektadong Kasulatan).
3. Ang paniniwala sa Kalooban ng Allah ﷻ, na walang anumang bagay na mangyayari sa mundong ito maliban sa kung ano ang nais Niya.
4. Ang paniniwala na nilikha ng Allah ﷻ ang lahat.

﴿اللَّهُ خَالِقُ كُلِّ شَيْءٍ﴾

Sinabi ng Allah ﷻ: *"Ang Allah ang Bukod-Tanging Tagapaglikha ng lahat ng bagay".*⁽⁴⁾

(1) Surah At-Talaq 65:12

(2) Surah Al-Hajj 22:70

(3) Surah Al-Insan 76:30

(4) Surah Az-Zumar 39:62

Ang ilan sa mga bunga at benepisyo sa buhay ng isang Muslim dahil sa paniniwala sa Al-Qadr:

1. Ang pagtitiwala sa Allah ﷻ pagkatapos ng pagsasagawa ng mga sanhi (cause) upang makamtan ang isang bagay na inaasam (effect).
2. Ang pagtanggap at pagiging kalmado kapag dinatnan ng mga pagsubok o hindi nakamit ang inaasam-asam pagkatapos gawin ang sanhi (cause); sapagkat alam ng mananampalataya na ang lahat ng bagay na mangyayari sa kanya ay dahil sa kalooban ng Allah ﷻ, kung kaya hindi siya magagalit at hindi malulungkot, at tatanggapin niya ng maluwa na ang lahat ng kapalaran na itinakda ng Allah ﷻ para sa kanya ay makabubuti sa kanyang relihiyon at sa kanyang buhay dito sa daigdig.
3. Ang pagpapasalamat sa mga biyaya, at hindi nagmamataas sa sarili dahil alam niya na kung hindi dahil sa kabutihan at habag ng Allah ﷻ ay hindi niya maaabot kung anong nais niya kahit ano pa ang paggawa niya ng sanhi. Sinabi ng Allah ﷻ:

﴿ مَا أَصَابَ مِنْ مُصِيبَةٍ فِي الْأَرْضِ وَلَا فِي أَنْفُسِكُمْ إِلَّا فِي كِتَابٍ مِنْ قَبْلِ أَنْ نَبْرَأَهَا إِنَّ ذَلِكَ عَلَى اللَّهِ يَسِيرٌ، لِكَيْلَا تَأْسَوْا عَلَىٰ مَا فَاتَكُمْ وَلَا تَفْرَحُوا بِمَا آتَاكُمْ وَاللَّهُ لَا يُحِبُّ كُلَّ مُخْتَالٍ فَخُورٍ ﴾ (1)

"Anuman ang nangyari sa inyo, O kayong mga tao, na sakuna rito sa daigdig at gayundin sa inyong mga sarili ay walang iba kundi ito ay itinakda ng Allah sa Kitab (kasulatan) bago pa Niya likhain ang lahat ng mga buhay. Katiyakan, ito ay napakadali para sa Allah.

Upang hindi kayo malungkot sa anuman na hindi ninyo nakamtan, at hindi kayo lubusan na matuwa sa anumang ipinagkaloob sa inyo. At ang Allah ay hindi Niya minamahal ang sinumang nagmamayabang sa



(1) Surah Al-Hadeed 57:22-23



Nakasulat na Pagsasanay

1. Buuin ang mga sumusunod:

a. Ang Huling Araw ay:

.....

b. Kabilang sa mga maliliit na palatandaan ng pagdating ng Huling Araw ay:

1.

2.

3.

c. Kabilang sa mga malalaking palatandaan ng pagdating ng Huling Araw ay:

1.

2.

3.

2. Kabilang sa mga haligi ng paniniwala sa Al-Qadr ay:

a.

b.

c.

4. Ang mga bunga at benepisyo ng paniniwala sa kabilang buhay ay:

a.

.....

b.

.....

c.

.....

d.

.....

Mga Bagong Salita at Termino

Nu.	Arabiko	Pagsasatitik	Kahulugan
1	الساعة	As-Saa'a	Oras
2	البعث	Al-Ba'th	Ang pagkabuhay na mag-uli
3	ثواب	Thawaab	Gantimpala
4	الجنة	Al-Jannah	Paraiso
5	النار	An-Naar	Apoy
6	الشفاعة	Ash-Shafaa'ah	Pamamagitan
7	جزاء	Jaza'	Gantimpala
8	حسنة	<u>H</u> asanah	Mabuti
9	سيئة	Sayyi'ah	Masama
10	عذاب	<u>A</u> thaab	Pagpaparusa

Pang-Apat na Aralin

Shirk (Ang Pagtatambal)

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kaphahintulutan ng Allah ﷻ na:

- Maipaliwanag ng kahulugan ng *Shirk*.
- Mga bilang ng uri ng *Shirk*.
- Maikumpara ang pagkakaiba ng *Shirk* at *Kufr*.
- Maipaliwanag ang ilan pang uri ng *Shirk*.
- Maikumpara ang *Shirk Akbar* (malaking shirk) at *Shirk Asghar* (maliit na shirk).



Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Mga naunang aralin sa yunit ng Aqeedah

Ang Kahulugan ng Shirk at mga Anyo nito

Ang Shirk

Hindi maaaring maintindihan ang katotohanan ng tinatawag na *Tawheed* maliban kung batid mo ang anumang bagay na laban at salungat dito; ito ang *Shirk*. Kung kaya, ano ba ang tinatawag na *Shirk*? Ano ang ibig sabihin nito? Ano ang mga manipestasyon, uri at epekto nito?

Ang kahulugan ng *Shirk*

Ang kahulugan ng *Shirk* sa salita ay: Higit sa isa.

Ang kahulugan ng *Shirk* sa Islamikong pananaw ay: Ang pagtatambal sa Allah ﷻ sa mga bagay na para lamang sa Allah ﷻ.

Ang *Shirk* ay kabaliktaran ng *Tawheed*, ito ang pinakamalaking kasalanan na ipinagbabawal ng Allah ﷻ. Sinabi ng Allah ﷻ:

﴿ وَإِذْ قَالَ لُقْمَانُ لِابْنِهِ وَهُوَ يَعِظُهُ يَا بُنَيَّ لَا تُشْرِكْ بِاللَّهِ إِنَّ الشِّرْكَ لَظُلْمٌ عَظِيمٌ ﴿١﴾

"At alalahanin mo O Muhammad, ang pagpapayo ni Luqman sa kanyang anak na kanyang sinabi sa kanya: O aking anak! Huwag kang sumamba ng iba maliban sa Allah; sa kadahilanang ang pagsamba ng iba maliban sa Allah ay isang napakalaking kasalanan, sukdulang kasamaan at karumal-dumal na gawain."

Sinabi rin ng Propeta ﷺ: *"Gusto ba ninyong sabihin ko sa inyo ang pinakamalaking kasalanan? Sinabi namin; Oo Sugo ng Allah, sinabi niya: Ang pagtatambal sa Allah at paglabag sa magulang."*⁽²⁾

Mga anyo ng Shirk

Kasama sa mga anyo ng Shirk ay ang mga sumusunod:

1. Ang paniniwala na mayroong sa mga nilikha na katambal ng Allah ﷻ sa mga katangian ng pagka-Rabb (panginoon), tulad ng kapangyarihan ng pag-aaruga sa lahat ng mga nilikha, kaalaman ng mga bagay na hindi nakikita, at pagbibigay ng batas. Ang halimbawa nito ay tulad ng paniniwala ng mga Kristiyano kay 'Eesa (Hesus) ﷺ. Sinabi ng Allah ﷻ:

﴿ لَقَدْ كَفَرَ الَّذِينَ قَالُوا إِنَّ اللَّهَ هُوَ الْمَسِيحُ ابْنُ مَرْيَمَ وَقَالَ الْمَسِيحُ يَا بَنِي إِسْرَائِيلَ اعْبُدُوا اللَّهَ رَبِّي وَرَبَّكُمْ إِنَّهُ مَنْ يُشْرِكْ بِاللَّهِ فَقَدْ حَرَّمَ اللَّهُ عَلَيْهِ الْجَنَّةَ وَمَأْوَاهُ النَّارُ وَمَا لِلظَّالِمِينَ مِنْ أَنْصَارٍ لَقَدْ كَفَرَ الَّذِينَ قَالُوا إِنَّ اللَّهَ ثَلَاثَةٌ وَوَمَا مِنْ إِلَهٍ إِلَّا إِلَهٌ وَاحِدٌ وَإِنْ لَمْ يَنْتَهُوا عَمَّا يَقُولُونَ لَيَمَسَّنَّ الَّذِينَ كَفَرُوا مِنْهُمْ عَذَابٌ أَلِيمٌ ﴿٣﴾

"Sumusumpa ang Allah na ang mga yaong nagsasabing: Ang Allah, Siya ay si Al-Maseeh (ang Messiah Hesus) na anak ni Maryam, ay walang pag-aalinlangang sila ay lumabag at nawalan ng pananampalataya dahil sa mga salita nilang ito. Sinabi ni Al-Maseeh sa mga angkan ni Isra'il: Sambahin ninyo ang Allah na nag-iisa na walang katambal, na Siya ang akin at inyong Rabb."

(1) Surah Luqman 31:13

(2) Isinalaysay ni Bukhari at Muslim

(3) Surah Al-Ma'idah 5:72-73

Katiyakan, ang sinumang sumamba ng iba maliban sa Allah ay ipinagbabawal sa kanya ang Paraiso, at inilaan sa kanya ang Impiyerno na kanyang patutungguhan, at walang sinuman ang makakatulong sa kanya. Katiyakan, itinuturing na hindi mananampalataya ang sinumang nagsasabi na ang Allah ay kabilang sa tatlong persona. Hindi ba alam ng mga Kristiyano na walang sinuman ang nararapat sambahin kundi ang Nag-iisa lamang na hindi nanganak at hindi ipinanganak. At kapag hindi tumigil ang mga nagsasabi nito ay darating sa kanila ang masidhing kaparusahan dahil sa paglabag nila sa Allah).

﴿ اتَّخَذُوا أَحْبَابَهُمْ وَأَرْبَابًا مِنْ دُونِ اللَّهِ وَالْمَسِيحَ ابْنَ مَرْيَمَ وَمَا أُمِرُوا إِلَّا لِيَعْبُدُوا إِلَهًا وَاحِدًا لَا إِلَهَ إِلَّا هُوَ سُبْحَانَهُ عَمَّا يُشْرِكُونَ ﴾⁽¹⁾

At sinabi rin ng Allah ﷻ: "Itinuring ng mga Hudyo at mga Kristiyano ang kanilang mga Paham at mga Relihiyoso na mga Diyos na sinasamba at panginoon bukod sa Allah. At itinuturing nila si Eesa (Hesus) na anak ni Maryam na diyos na sinasamba, gayon sa katotohanan ay walang ipinag-utos sa kanila maliban sa pagsamba sa nag-iisang Diyos ang Allah. Walang ibang llah na may karapatang sambahin maliban sa Kanya. Luwalhati sa Kanya. Siya ay Malaya sa anumang iniimbento ng mga nagtatambal".

2. Pagbaling sa anumang gawaing pagsamba maliban sa Allah ﷻ, tulad ng panalangin, pagkatay, paghingi ng tulong, paghingi ng ulan, pagmamahal at pagkatakot.

﴿ وَمَنْ يَدْعُ مَعَ اللَّهِ إِلَهًا آخَرَ لَا بُرْهَانَ لَهُ بِهِ فَإِنَّمَا حِسَابُهُ عِنْدَ رَبِّهِ إِنَّهُ لَا يُفْلِحُ الْكَافِرُونَ ﴾⁽²⁾

Sinabi ng Allah ﷻ: "At ang sinumang sasamba ng iba maliban sa Allah na Bukod-Tangi, na walang anumang katibayan na ito ay karapat-dapat na sambahin, walang pag-aalinlangan, ang kabayaran ng kanyang masamang gawain ay nasa kanyang Rabb. Katiyakan, walang tagumpay ang mga hindi naniniwala".

3. Paniniwala sa mga manghuhula, paggamit ng salamangka, paggamit ng anting-anting, at panunumpa maliban sa Allah ﷻ.

Mga uri ng Shirk

1. **Shirk akbar** (malaking shirk): Ito ay pagtatambal sa Allah ﷻ sa pagka-Panginoon, pagka-Diyos, o sa Kanyang mga Pangalan at mga Katangian tulad ng naipaliwanag na. Sinuman na makagawa ng Shirk na ito ay lumabas na sa Islam at siya ay mananatili sa Impiyernong-apoy magpakailanman.
2. **Shirk asghar** (maliit na shirk): Ang makagawa ng shirk na ito ay nasa loob pa rin ng Islam, ngunit may masamang epekto ito sa Tawheed. Halimbawa ang panunumpa maliban sa Allah ﷻ, ang pagsasabi ng "anuman ang kalooban ng Allah at iyong kalooban", at pagpapaganda ng Salah sa paningin ng ibang tao upang purihin siya. Ito ang tinatawag na Riya (pakitang-tao).
3. **Shirk khafee** (Nakatagong shirk): Ito ay gawa ng puso at intensiyon. Minsan ito ay pumapasok sa shirk akbar, minsan naman ay sa shirk asghar. Ang paniniwala na mayroong mga bagay na magpapabuti o magpapasama sa kanya tulad ng paniniwala sa mga anting-anting ay kabilang sa shirk akbar.

(1) Surah At-Tawbah 9:31

(2) Surah Al-Mu'minun 23:117

Ang mga bunga ng malaking shirk

Ang mga sumusunod ay bunga ng *Shirk* akbar:

1. Ang gumagawa nito ay mananatili sa Impiyernong-apoy kapag hindi nagbalik-loob bago mamatay. Sinabi ng Allah ﷻ:

﴿ إِنَّهُ مَنْ يُشْرِكْ بِاللَّهِ فَقَدْ حَرَّمَ اللَّهُ عَلَيْهِ الْجَنَّةَ وَمَأْوَاهُ النَّارُ وَمَا لِلظَّالِمِينَ مِنْ أَنْصَارٍ ﴾⁽¹⁾

"Katiyakan, ang sinumang sasamba ng iba maliban sa Allah ay ipinagbawal sa kanya ng Allah ang Paraiso, at inilaan sa kanya ang Impiyernong apoy na kanyang patutunguhan, at walang sinuman ang makakatulong sa sinumang nagtatambal sa Allah."

2. Katunayan, ang *Shirk* ay sumisira sa mga mabuting gawain, kaya hindi tatanggapin mula sa kanya ang kanyang mabubuting gawa. Sinabi ng Allah ﷻ:

﴿ وَلَقَدْ أُوحِيَ إِلَيْكَ وَإِلَى الَّذِينَ مِنْ قَبْلِكَ لَئِنْ أَشْرَكْتَ لَيَحْبَطَنَّ عَمَلُكَ وَلَتَكُونَنَّ مِنَ الْخَاسِرِينَ ﴾⁽²⁾

"At katiyakan, ipinahayag sa iyo, O Muhammad, at sa mga Sugo na nauna sa iyo: Kung ikaw ay sasamba ng iba o magtatambal sa pagsamba sa Allah ay mawawalan ng saysay ang iyong gawain at magiging kabilang ka sa mga talunan."

Ang pagkakaiba ng Kawalan ng Pananampalataya (*Kufr*) at Pagtatambal (*Shirk*)

Ang Kawalan ng Pananampalataya (*Kufr*) ay pagtangi sa pagkakaroon ng Allah ﷻ o hindi pagsamba sa Kanya. Ang Pagtatambal (*Shirk*) naman ay pagsamba sa iba maliban sa Allah ﷻ o paggawa ng katambal ng Allah ﷻ sa Kanyang pagsamba at mga katangian.

Kasama ang *Shirk* sa *Kufr*, kaya lahat ng tao na nagtatambal sa Allah ﷻ (*Mushrik*) ay mga taong walang-pananampalataya (*kafir*), ngunit hindi lahat ng *Kafir* ay *Mushrik*.

Ang karamihan sa *Shirk* na nabanggit sa mga talata ng Qur'an at mga *hadith* ng Propeta ﷺ ay ang *Shirk* sa *Ibadah* (pagsamba).

(1) Surah Al-Ma'idah 5:72

(2) Surah Az-Zumar 39:65



Nakasulat na Pagsasanay

1. Buuin ang mga sumusunod:

- a. Ang kahulugan ng Shirk ay:
-
-
- c. Ang pinakamalaking kasalanan ay sapagkat ang nagtatambal ay
..... at sinuman
ang namatay na gumagawa ng Shirk ay papasok ng
- c. Ang maliit na Shirk ay: at tinatawag din na

2. Ano ang mga uri ng Shirk?

- a.
- b.
- c.

3. Magbigay ng ilang anyo ng Shirk:

- a.
- b.
- c.

4. Ang pagkaiba ng Pagtatambal (Shirk) sa Kawalan ng Pananampalataya (Kufr):

- ang Kufr ay
-
- at ang Shirk naman ay
-

5. Ano ang mga bunga ng Malaking Shirk:

- a.
-
- b.
-

Mga Bagong Salita at Termino

Nu.	Arabiko	Pagsasatitik	Kahulugan
1	أكبر	Akbar	Higit na malaki
2	خفي	Khafee	Nakatago
3	رياء	Riyaa'	Pakitang tao
4	أصغر	Asghar	Higit na maliit
5	نفاق	Nifaaq	Pagkukunwari
6	تميمة	Tameemah	Anting-anting
7	استعانة	Isti'aanah	Paghingi ng tulong
8	استغاثة	Istighaathah	Paghingi ng tulong
9	ذنوب	<u>Th</u> unoob	Mga kasalanan
10	جحود	Ju <u>h</u> ood	Kawalan ng pasasalamat

"Ang aking nasyon ay darating sa Araw ng Paghuhukom na mayroong nagniningning na liwanag mula sa bakas ng kanilang isinagawang Wudhu' (ablusyon)." ⁽¹⁾

Yunit ng Tahaarah (Kalinisan)



(1) Bukhari at Muslim

Talaan ng mga Nilalaman

Pahina	Mga Paksa
46	Ang unang aralin: Pagpupunas ng Khuf o medyas at ang Tayammum
47	Pagpupunas ng medyas (Khuf)
48	Ang Tayammum
49	Mga usapin tungkol sa Tayammum
50	Nakasulat na Pagsasanay
51	Ginagawang Pagsasanay
51	Mga Bagong Salita at Termino
52	Pangalawang Aralin: Ang Ghusl (Ritwal na Paliligo)
53	Ang Ghusl (Ritwal na Paliligo)
54	Ang mga Obligadong Ghusl
55	Ang Pamamaraan ng Ghusl
56	Mga Usapin para lamang sa Taharah ng mga Babae
58	Nakasulat na Pagsasanay
59	Mga Bagong Salita at Termino

Unang Aralin

Pagpupunas ng Khuf o Medyas at ang Tayammum

Itatagal:



Isang Oras

Mga Layunin:

Sa pagtatapos ng araling ito, magkakaroon ka ng kakayahan sa kaphahintulutan ng Allah ﷻ na:

- Malaman ang mga alituntunin ng pagpahid ng Khuf o medyas.
- Malaman ang pagpahid ng Khuf o medyas sa tamang pamamaraan.
- Malaman ang mga alituntunin ng Tayammum.
- Malaman ang pagsasagawa ng Tayammum sa tamang pamamaraan.

Kabuuan ng Aralin:

- Mga Nilalaman ng Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino

Kinakailangang napag-aralan na:

- Mga naunang aralin sa yunit ng Aqeedah

Ang Pagpupunas sa Medyas (Khuf)

Dahil sa pagpapagaan ng Allah ﷻ sa Kanyang mga lingkod ay isinabatas sa kanila ang pagpahid ng *Khuf* o medyas na hindi na kailangan pang tanggalin kapalit ng paghuhugas ng dalawang paa kapag nagsasagawa ng Wudhu'. Ito ay sa loob ng isang araw at isang gabi para sa naninirahan, at tatlong araw at tatlong gabi para sa *musafir* (manalakbay). Mag-uumpisa ang pagbilang ng oras mula sa unang pagpahid ng *Khuf* o medyas pagkatapos masira ang kanyang *wudhu'*.

Ang mga Kondisyon ng Pagpupunas ng Medyas

1. Dapat matakpan ng medyas ang mga paa kasama ang bukung-bukong. Maaari ding pahiran ang punit na *Khuf* o medyas kapag maliit lang ang punit.
2. Kapag ang medyas ay pagmamay-ari niya, hindi ninakaw, hindi inagaw, at hindi gawa sa seda.
3. Kailangang isuot pagkatapos ng tamang *wudhu'*, kaya kapag isinuot ng walang *tahaarah* ay hindi maaaring punasan.
4. Kailangang hindi lalampas sa takdang panahon. Ito ay isang araw at isang gabi para sa naninirahan (24 oras), at tatlong araw at tatlong gabi para sa manlalakbay (72 oras).

Ang Pamamaraan ng Pagpupunas sa Medyas

1. Basain ang mga kamay ng tubig at ipahid ng sabay sa ibabaw ng mga paa na may medyas, magsimula sa mga daliri ng paa pataas hanggang sa ibabang dulo ng binti. Dapat punasan ng kanang kamay ang kanang paa, at ng kaliwang kamay ang kaliwang paa, at ibuka ang mga daliri ng mga kamay habang nagpupunas.
2. Bawat paa ay pupunasan ng isang ulit lamang, at hindi na inuulit-ulit.

Ang Pagpupunas ng benda

Maaaring punasan na lamang ng basang kamay katulad ng sa medyas ang nakasuot na benda sa paa, kamay, binti o braso kung kinakailangan kahit ito ay nailagay ng walang *wudhu'*.



Pagpunas sa Benda

Pagpunas sa Medyas

Ang Tayammum

﴿ قَلَمٌ يَجِدُوا مَاءً فَتَيَمَّمُوا صَعِيدًا طَيِّبًا فَامْسَحُوا بِوُجُوهِكُمْ وَأَيْدِيكُمْ مِنْهُ مَا يُرِيدُ اللَّهُ لِيَجْعَلَ عَلَيْكُمْ مِنْ حَرَجٍ وَلَكِنْ يُرِيدُ لِيُطَهِّرَكُمْ وَلِيُنِمْ نِعْمَتَهُ عَلَيْكُمْ لَعَلَّكُمْ تَشْكُرُونَ ﴾ (1)

Sinabi ng Allah ﷻ: (... kapag wala kayong matagpuang tubig ay magtayammum kayo sa malinis na lupa, kung kaya pahiran ninyo ang mga mukha ninyo at mga kamay. Hindi nais ng Allah na pahirapan kayo, ngunit nais Niyang kayo ay madalisay at lubosin Niya ang biyaya sa inyo upang kayo ay makapagpasalamat).

Ang kahulugan ng tayammum

Ang *Tayammum* ay pagsamba sa Allah ﷻ sa pamamagitan ng pagpunas sa mukha at kamay ng malinis na lupa tulad ng buhangin at alikabok sa isang tukoy na paraan bilang kapalit ng tubig para sa *Ghusl* at *Wudhu'* kapag walang tubig o kung walang kakayahang gumamit ng tubig.

Ang Mga kondisyon ng Tayammum

1. Kapag walang tubig o kapag kakaunti lamang ito at hindi sapat sa pangangailangan (paliligo at *Wudhu'*).
2. Kapag mayroon tubig ngunit sapat lamang sa pangangailangan ng tao sa pag-inom at pagluluto at pagtanggap ng dumi sa damit.
3. Mayroong tubig ngunit makakasama ang paggamit ng tao dahil sa kanyang sakit, magpapalala sa kanyang sakit, o magpapatagal sa paggaling.
4. Kapag matindi ang lamig ng tubig at hindi kayang gamitin, at walang paraan upang ito ay painitin.
5. Kapag ang pagkukunan ng tubig ay mapanganib at malalagay siya o ang kanyang ari-arian sa kapahamakan.

Ang Pamamaraan ng Tayammum:

1. Maghanap ng malinis at tuyong lupa, o mga bagay na dinidikitan ng alikabok tulad ng bato o dingding at iba pa.
2. Ang intensyon (niyyah) at pagbigkas ng "*Bismillaahir-rahmaanir- raheem*".
3. Ihampas ang dalawang kamay sa malinis na lupa o alikabok ng isang beses lamang, pagkatapos ay ipahid ang mga kamay sa mukha, at pagkatapos ay ipahid ang palad ng kaliwang kamay sa ibabaw ng kanang kamay, at gayundin ang palad ng kanang kamay sa ibabaw ng kaliwang kamay.

Ang tayammum ay ginagamit sa pagtanggap ng *Hadath Akbar* tulad ng *Janabah* (pakikipagtalik sa asawa o nilabasan dahil sa panaginip), at ng *Hadath Asgar*. Ito ay kapalit ng *Ghusl* at *Wudhu'* sa panahon ng pangangailangan ng *Ghusl* at *Wudhu'*, na ayon sa mga kondisyon na nabanggit sa itaas.



Ang Pamamaraan ng
Tayammum



Ang mga nakasisira ng *Tayammum*

1. Ang lahat ng nakasisira ng *Wudhu'* tulad ng naipaliwanag na sa unang baytang ay makasisira din ng *tayammum*.
2. Kapag nagkaroon na ng tubig, o kapag may kakayahan nang gumamit ng tubig.

Mga usapin tungkol sa *Tayammum*

1. Hindi magiging tama ang *tayammum* kapag ang pagsasagawa nito ay dahil lamang sa kagustuhan ng isang tao ng walang katanggap-tanggap na dahilan sa batas ng Islam tulad ng walang tubig o hindi kayang gumamit ng tubig tulad ng napaliwanag na sa mga kondisyon ng *tayammum*.
2. Kapag ang isang tao ay nagsa-Salah sa pamamagitan ng *tayammum* at nabuo niya ang kanyang Salah bago dumating ang tubig, ang kanyang Salah ay tama at hindi na niya kailangan ulitin pa.
3. Kapag nag-*tayammum* bilang kapalit ng *Ghusl* upang tanggalin ang *Hadath akbar* pagkatapos ay nag-Salah siya, ang kanyang Salah ay tama at hindi na niya kailangan pang ulitin pagkatapos magkaroon ng tubig at maligo, ngunit dapat siyang magsikap sa paghahanap ng tubig upang makaligo.
4. Kapag hindi niya kayang mag-*wudhu'* o mag-*tayammum* dahil sa kanyang karamdaman o sa iba pang mga kadahilanan ay dapat siyang magsagawa ng Salah at huwag ipagpaliban sa kanyang *waqto* (oras) kahit hindi siya nakapag-*wudhu'*, at hindi na rin niya kailangang ulitin pa ito. Ito ang nagpapakita sa kahalagahan ng pagsasagawa ng Salah sa tamang oras.





Nakasulat na Pagsasanay

1. Ang mga kondisyon ng pagpahid ng Khuf o medyas ay:

- a.
- b.
- c.
- d.
- e.

2. Ipaliwanag mo ang pamamaraan ng pagsasagawa ng tayammum:

.....
.....
.....

3. Kailan maaaring mag-tayammum?

.....
.....
.....

4. Ano ang alituntunin ng pagpunas sa benda?

.....
.....

5. Ano ang mga kondisyon ng Tayammum?

- 1.
.....
- 2.
- 3.
- 4.

6. Ano ang mga nakakasira ng Tayammum?

- a.
- b.



Ginagawang Pagsasanay

1. Hilingin ng guro sa kanyang mag-aaral na isagawa ang pagpahid ng Khuf o medyas, at makikipagtalakayan sa kanya at itama ang kanyang kamalian.
2. Hilingin ng guro sa kanyang mag-aaral na isagawa ang pamamaraan ng tayammum, kasabay ang pakikipagtalakayan sa kanya sa mga kondisyon at mga alituntunin ng tayammum at pagtatama sa kanyang mali.

Mga Bagong Salita at Termino

No.	Arabik	Pagsasatitik	Kahulugan
1	خف	Khuf	Khuf (medyas na balat)
2	جوارب	Jawaarib	Mga medyas
3	خلع	Khala'a	Pagtanggal
4	حرير	Hareer	Sutla
5	جميرة	Jubayrah	Benda
6	تيمم	Tayammum	Tayammum (paglilinis kapalit ng tubig)
7	غبار	Ghubaar	Alikabok
8	تراب	Turaab	Lupa
9	كعب	Ka'ab	Takong/bukong-bukong
10	مباح	Mubah	Pinahihintulutan

Pangalawang Aralin

Ang Ghusl

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kakahintulutan ng Allah ﷻ na:

- Maintindihan ang kahulugan ng Ghusl (Ritwal na paliligo).
- Malaman ang mga obligadong Ghusl.
- Malaman kung kailan kanais-nais mag-Ghusl.
- Isa-isahin ang mga uri ng kanaisnais na Ghusl.
- Maintindihan ang ilang mga usapin tungkol sa Taharah para sa mga kababaihan.
- Maikumpara ang mga alituntunin sa pagitan ng Haydh (buwanang dalaw) at Istihadhah (tuloy-tuloy na pagdurugo).



Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Pag-aaral ng naunang Aralin sa yunit ng Taharah

Ang Ghosl (Ritwal na Paliligo)

Ang Ghosl ay pagbabasa ng buong katawan sa pamamagitan ng tubig. Obligadong maligo ang isang Muslim upang tanggalin ang malalaking hadath (*Hadath akbar*). Ang tinutukoy na *Hadath akbar* ay ang mga sumusunod:

1. ***Al-Janaabah***: Ang *Junub* na tao ay hindi maaaring magsagawa ng Salah, mag-*Tawaf*, magbasa ng Banal na Qur'an mula sa *Mus-haf*, o manatili sa loob ng *Masjid*. Mangyayari ang *Janaabah* sa mga sumusunod na dahilan:
 - a. Pakikipagtalik: ito ay ang pagpasok ng ari ng lalaki sa ari ng babae, nilabasan man o hindi ng *Manee* (semilya), o ang pagsasalubong ng dalawang ari. Kinakailangan dito ang *ghosl*.
 - b. Paglabas ng semilya sa pagtulog (*En. Wet dream*): Ito ay paglabas ng *Manee* (semilya) habang natutulog dahil sa panaginip.
 - c. Paglabas ng semilya sa pamamagitan ng pagnanasa sa panahon na ang tao ay gising sa kahit anong kadahilanan. Ngunit kapag lumabas ito ng walang pagnanasa ay hindi mabibilang na *Junub*.
2. ***Al-Haydh (regla)***: Ito ay buwanang-dalaw para sa mga kababaihan. Ang babaing may regla ay hindi maaring mag-Salah, humawak ng *Mus-haf* (*Aklat ng Qur'an*) at pumasok ng *Masjid*. Hindi rin siya maaaring sipingang ng kanyang asawa hanggang sa huminto na ang dugo at nakapaligo na.
3. ***An-Nifas***: Ito ay pagdurugo sanhi ng panganganak, at ito ay katulad din ng regla, at magiging malinis lamang ang babae kapag huminto na ang dugo at nakapaligo na.



Ang mga Obligadong Ghusl

Obligado ang *Ghusl* sa mga sumusunod na pangyayari:

1. ***Al-Janaabah*** (Kapag *junub*).
2. ***Al-Haydh*** (Regla): Obligadong maligo ang babae pagkatapos ng buwanang dalaw.
3. ***An-Nifas*** (Pagkapanganak): Obligadong maligo ang babae pagkatapos ng dugo sanhi ng panganganak tulad din ng regla.
4. ***Al-Mawt*** (Pagkamatay): Kapag namatay ang isang Muslim ay obligado sa kanyang pamilya na paliguan siya.
5. ***Al-Islam***: Kapag ang isang walang-pananampalataya ay pumasok sa Islam ay obligado siyang maligo. Ngunit ang iba sa mga *'Ulama* ay nagsasabi na ito ay rekomendado lamang at hindi obligado.

Mga rekomendadong *Ghusl* (*Sunnah*)

Sunnah ang *ghusl* sa mga sumusunod na pangyayari:

1. Bago Mag-Salah ng Jumu'ah: Ang ibang mga *'Ulama* ay nagsasabi na obligado ang Paliligo sa araw ng Biyernes dahil sinabi ng Propeta Muhammad ﷺ: "*Ang Paliligo sa araw ng Biyernes ay obligado sa bawat tao na nasa tamang edad*".
2. Bago mag-Salah ng *'Eid* (ang dalawang pagdiriwang sa Islam).
3. Pagkatapos bumalik ang malay mula sa pagkahimatay o katinuan mula sa pagkabalih.
4. Bago pumasok sa sagradong kalagayan ng *Ihram* para sa *Haji* o *'Umrah*.
5. Bago pumasok sa *Makkah Al-Mukarramah* ng isang tao na nanggaling sa mahabang paglalakbay, kung siya ay magsasagawa ng *'Umrah* o *Haji*.
6. Pagkatapos magpaligo ng patay.



Ang Pamamaraan ng Ghusl

Kinakailangan lamang na magkaroon ng *Niyah* (intensiyon) at bigkasin ang "*Bismillaah*", pagkatapos ay padaluyin ang tubig mula sa kanyang ulo at sa lahat na bahagi ng kanyang katawan. Kinakailangan ding mag-mumog at suminghot ng tubig sa ilong.

Ang sunnah sa paliligo ng isang *Junub* ay ang mga sumusunod:

1. *Niyah*: Magkaroon ng intensyon sa pagligo upang matanggal ang *Hadath*, at ang *niyyah* ay nasa puso lamang.
2. Bigkasin ang "*Bismillaah*".
3. Hugasan ang pribadong bahagi ng katawan.
4. Magsagawa ng *Wudhu'* na katulad ng *Wudhu'* para sa *Salah*.
5. Buhusan ng tubig ang ulo ng tatlong beses.
6. Pagkatapos ay ibuhos na sa ulo at buong katawan ang tubig ng isang ulit lang.



Mga usapin para lamang sa Tahaarah ng mga babae

Walang pagkakaiba ang babaing Muslimah sa lalaki tungkol sa lahat ng mga alituntunin ng Tahaarah mula sa *Ghusl*, *wudhu'*, at sa *Junub*, maliban sa mayroong natatanging alituntunin na para lamang sa mga kababaihan dahil sa likas nilang katangian bilang babae tulad ng buwanang regla, pagdurugo pagkatapos manganak at tuloy-tuloy na pagdurugo. Mahalagang malaman ng mga kababaihan ang mga alituntunin na ito upang maisagawa nila ng tama ang kanilang pamamaraan ng '*Ibadah* (pagsamba), at mahalaga ring malaman ng mga kalalakihan ang mga ito upang magabayan nila ang kanilang pamilya at maituro ang mga alituntunin ng kanilang relihiyon. Siya ang may pananagutan sa kanyang sariling pamilya kung kaya kinakailangang magkaroon ng detalyadong pagpapaliwanag sa mga alituntunin ng Tahaarah para sa mga babae.

Ang mga alituntunin ng Tahaarah para sa mga babae ay ang mga sumusunod:

Una: *Al-Haydh* - Ito ay dugo na lumalabas mula sa babae tuwing buwan (regla). Ang tagal nito ay magkakaiba sa mga kababaihan, anim hanggang walong araw sa bawat buwan, humigit kumulang.

Ang mga alituntunin tungkol sa babaing may regla:

1. Ang babaing may regla ay hindi maaring mag-Salah hanggang sa matapos ang regla. Ang kanyang Salah ay hindi tama at kabilang siya sa mga sumusuway kapag nag-Salah habang may regla. Hindi niya babayaran ang mga Salah na hindi niya naisagawa habang siya ay may regla.
2. Hindi maaaring mag-ayuno ang babaing may regla hanggang sa matapos ang kanyang regla, ngunit dapat niyang bayaran ang mga araw na hindi siya nakapag-ayuno sa buwan ng Ramadhan o anumang obligadong pag-aayuno.
3. Hindi siya maaring humawak ng *Mus-haf* (Aklat ng Qur'an), ngunit maaari siyang bumasa ng Qur'an na naisaulo niya, o mula mismo sa Qur'an ng hindi niya hinahawakan kung kinakailangan, tulad ng pag-aaral o pagtuturo at pagrerepaso sa mga naisaulo niya kung nangangamba na makakalimutan.
4. Hindi maaring makipagtalik sa kanyang asawa hanggang sa maging malinis (*Taahir*), ngunit pinahihintulutan ang kaniyang asawa na makipaglambingan sa kanya tulad ng paghalik, pagyakap at paghawak ng hindi aabot sa pakikipagtalik.
5. Hindi maaari sa babaing may regla na pumasok at mananatili sa loob ng *Masjid*, at hindi rin maaaring mag-*Tawaf* (pag-ikot) sa *Ka'bah*.

Pangalawa: *An-Nifas* - Ito ang dugo na lumalabas mula sa babae pagkatapos ng panganganak. Maaari din itong mangyari bago manganak sa maikling panahon kagaya ng tatlong araw. Ang lahat ng nabanggit sa unahan tungkol sa mga alituntunin ng babaing may regla ay katulad din ng babaing may *Nifas*, tulad ng hindi pagsa-Salah, pagbabayad ng ayuno, hindi paghawak ng *Mus-haf*, hindi pagpasok ng *Masjid*, at hindi pakikipagtalik.

Ang pagdurugo ng matagal dahil sa panganganak (*Nifas*)

Ang mga *'Ulama* ay naglagay ng hangganan na 40 araw para sa mga kababaihan na dinudugo pagkatapos niyang manganak, at kapag huminto ang dugo bago dumating sa hangganan na ito ay dapat siyang maligo at maaari na niyang gawin ang lahat ng ipinagbabawal sa kanya sa panahon na siya ay may *Nifas*. At kapag humigit pa ito ng apatnapung araw, ang tawag dito ay *Istihadhah* (tuloy-tuloy na pagdurugo). Susunod sa ibaba ang paliwanag tungkol dito.

Nakunan (*Al-Ijhaadh*)

Ito ay ang paglabas ng sanggol (embryo) na hindi pa nakumpleto ang panahon ng pagbubuntis. Ang dugo na lumalabas pagkatapos ng pagkalaglag ay tulad din sa alituntunin ng *Nifas* kung ito ay nangyari pagkatapos ng 81 araw ng pagbubuntis, maliban kung ang pagkalaglag ay di pa umabot ng 81 na araw na pagbubuntis at wala pang pagkakakilanlan ng pagiging tao bagkus ito ay isang namuong dugo pa lamang, kaya hindi pa maituturing na *Nifas*.

Pangatlo: *Al-Istihadhah* - Ang tuloy-tuloy na pagdurugo na lumalabas mula sa babae na tumitigil ng isa o dalawang araw, hihinto at pagkatapos ay babalik muli, ay hindi nangagailangan ng *ghusl*. Hindi siya saklaw ng alituntunin ng regla at pagdurugo pagkatapos manganak (*nifas*). Ang kinakailangan dito ay mag-*wudhu'* sa bawat oras ng **Salah**. Linisin ang bahagi kung saan lumalabas ang dugo at layan ng bulak upang huminto ang paglabas nito. Kapag mayroon pa ring lumalabas na dugo habang nagsa-Salah ay maaari pa rin nyang ituloy at tapusin ito. Ang *istihadhah* ay may tatlong uri:

1. **Ang normal na *istihadhah*** - Siya ang babae na may regular na regla bago nagkaroon ng tuloy-tuloy na pagdurugo. Dapat niyang balikan ang bilang ng kanyang karaniwang panahon ng regla, at kapag natapos na ang mga araw na ito ay maligo siya. Tulad ng isinalaysay sa hadith ni Aisha رضي الله عنها nang sinabi niya: Sinabi ng Propeta ﷺ kay Fatimah binti abee Hubaysh رضي الله عنها "...Kaya't kapag nagsimula ang iyong totoong regla itigil ang iyong mga Salah, at kapag natapos ito hugasan ang dugo (maligo) at isagawa ang iyong mga Salah." ⁽¹⁾
2. **Ang babaeng hindi regular ang regla** - Ito ay ang mga kababaihan na walang regular na regla, ngunit maaari niyang makilala ang dugo ng regla at ang dugo ng *istihadhah*. Kaya't gagawin niya ang ayon sa alam niya.
3. **Ang nalilito na babaeng may regla** - Ito ang babae na hindi alam kung anong uri ng dugo ang lumalabas at wala siyang regular na regla at hindi niya makilala ang dugo ng regla at dugo mula sa *istihadhah*. Dapat siyang humingi ng payo mula sa mga *'Ulama* at mula sa mga medikal na doktor.

Ang paliligo pagkatapos ng Regla at Panganganak

Kapag natapos na ang regla o panganganak ng isang babae, dapat niyang tiyakin na huminto na ang dugo at kung malinaw na sa kanya ang mga palatandaan ng kalinisan, kailangan na niyang maligo kaagad upang maisagawa ang Salah at makapagbayad ng anumang hindi niya nagawang pag-aayuno.

(1) Bukhari at Muslim



Nakasulat na Pagsasanay

1. Kumpletuhin ang mga sumusunod:

- a) Ang Ghusl ay ang:
- b) Ang *Hadath akbar* (malaking hadath) ay kinakailangan ng
at ang *hadath asghar* (maliit na hadath) ay kinakailangan ng
- c) Ang halimbawa ng *hadath akbar* (malaking hadath) ay
at, at
- d) Ang mga dahilan ng Junub ay, at, at
- e) Dahil sa *hadath akbar* bawal magsagawa ang isang Muslim ng
at, at, hanggang siya ay maging
- f) Ang *haydh* (regla) ay:
- g) Ang *istihadhah* ay:

2. Banggitin ang mga bagay na kinakailangan ng obligadong Ghusl:

- a)
- b)
- c)
- d)
- e)

3. Kailan rekomendado ang Ghusl?

.....

4. Banggitin ang kumpletong hakbang pagsasagawa ng Ghusl:

- a)
- b)
- c)
- d)
- e)

Mga Bagong Salita at Termino

No.	Arabik	Pagsasatitik	Kahulugan
1	مصحف	Mus- <u>h</u> af	Qur'an
2	ولادة	Wilaadah	Kapanganakan
3	مني	Manee	Semilya
4	نفاس	Nifaas	Dugo sanhi ng panganganak
5	حيض	<u>H</u> ay <u>d</u> h	Regla
6	استحاضة	Isti <u>h</u> aad <u>h</u> ah	Patuloy na paglabas ng dugo
7	احتلام	I <u>h</u> tilaam	Basang panaginip
8	إغماء	Ighmaa'	Hinihimatay
9	ميت	Mayit	Patay
10	اجهاض	Ijhaad <u>h</u>	Pagkalaglag

*"Manalangin (Salah) kayo katulad ng kung paano ninyo
ako nakitang manalangin." ⁽¹⁾*

Yunit ng Salah (Pagdarasal)



Talaan ng mga Nilalaman

Pahina	Mga Paksa
62	Unang Aralin: Ang Boluntaryong Salah
63	Ang Boluntaryong Salah
64	Ang mga oras na ipinagbabawal ang pagsa-Salah
65	Nakasulat na Pagsasanay
66	Mga Bagong Salita at Termino
68	Pangalawang Aralin: Ang Salat-ul-Jama'ah (Sama-samang Pagsasalah)
69	Ang Alituntunin ng Sama-samang pagsa-Salah
70	Ang Adhan (Pagtawag sa Salah) at Iqamah (Pagtawag sa pag-uumpisa ng Salah)
71	Ang Kabutihang-asal sa Pagpunta sa Salah
72	Nakasulat na Pagsasanay
72	Ginagawang Pagsasanay
73	Mga Bagong Salita at Termino
74	Ikatlong Aralin: Ang mga alituntunin sa pagbabayad ng Salah at ang Sahwu (pagkalimot)
75	Mga alituntunin para sa nahuli sa Salat-ul-Jama'ah (Sama-samang Pagsasalah)
76	Mga alituntunin ng Sujood Sahwu (Pagpapatirapa ng Pagkalimot)
78	Ang pamamaraan ng Sujood Sahwu (Pagpapatirapa ng Pagkalimot)
79	Ang Sujood Tilawah (Pagpapatirapa dahil sa pagbigkas ng Qur'an)
80	Ang Du'a ng Qunoot (Panalangin)
81	Nakasulat na Pagsasanay
82	Ginagawang Pagsasanay
82	Mga Bagong Salita at Termino
84	Pang-apat na Aralin: Ang Salah ng Jumu'ah at ng Dalawang Eid
85	Ang Salat-ul-Jumu'ah (Salah sa Araw ng Biyernes)
87	Ang Salah ng Eid (Salah ng Pagdiriwang)
88	Ang Salah ng Janazah (Panalangin para sa patay)
89	Ang Salah ng Naglalakbay (Musafir)
90	Ang Salah ng Maysakit (Mareedh)
91	Nakasulat na Pagsasanay
92	Ginagawang Pagsasanay
93	Mga Bagong Salita at Termino

Unang Aralin

Ang Boluntaryong Salah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kaphintulutan ng Allah ﷻ na:

- Banggitin ang bilang ng mga Sunnah Rawatib (boluntaryong Salah bago o pagkatapos ng mga obligado).
- Tandaan ang ilan sa mga malakas na tinatagubilin na boluntaryong Salah.
- Malaman ang mga oras na ipinagbabawal magsagawa ng boluntaryong Salah.



Kabuuan ng Aralin:

- Mga Nilalaman ng Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Mga Aralin sa Salah
- Mga aralin sa Athkarus-Salah
- Mga aralin sa Taharah

Ang Boluntaryong Salah

Ito ang mga Salah na ginawa ng Propeta ﷺ, o nirekomenda niyang gawin na hindi kabilang sa mga obligadong Salah, at ito ay maraming uri:

1. **Sunan Rawaatib:** Ito ang mga boluntaryong salah (Sunnah) na nakakabit sa mga obligadong Salah at ginagawa bago o pagkatapos nito. Ito ay 12 *Rak'ah* tulad ng makikita sa sumusunod na talahanayan:

Nu.	Salah	Bilang ng Rak'ah Sunnah sa unahan	Bilang ng Rak'ah na Obligado	Bilang ng Rak'ah Sunnah sa hulihan	Kabuuang Rak'ah
1	Fajr	2	2	-	4
2	Dhuhr	2+2	4	2	10
3	'Asr	-	4	-	4
4	Maghrib	-	3	2	5
5	'Isha	-	4	2	6

Ang Sunnah ng Fajr ay malakas na tinatagubilin (*mu'akkadah*) at hindi kinaligtaan ng Propeta ﷺ kahit pa siya ay naglalakbay.

2. **Ang Salat-ul-Witr:** Ito ay isang *Rak'ah* lamang bilang panghuling Salah ng isang Muslim sa buong araw at gabi, tulad ng sinabi ng Propeta ﷺ: "*Ang Salat-ul-Witr ay isang Rak'ah sa huling bahagi ng gabi.*"⁽¹⁾

Ang kanyang oras ay pagkatapos ng 'Isha hanggang sa Fajr. Ito ay Sunnah *Mu'akkadah* (malakas na tinatagubilin) tulad ng Sunnah ng Fajr na hindi kinaligtaan ng Propeta ﷺ kahit naglalakbay siya. Mas mainam kapag mag-Salah muna ng dalawang *Rak'ah* bago ang *Witr*. Ang pinakamabuting oras nito ay sa huling bahagi ng gabi kapag nakatitiyak na magigising, tulad ng Hadith ni Jabir ؓ: Sinabi ng Propeta ﷺ "*Sinuman ang nangangamba na hindi magigising sa huling bahagi ng gabi ay magsagawa ng Salat-ul-Witr sa unang bahagi ng gabi, at kung sino naman ang nakatitiyak na magigising sa huling bahagi ng gabi ay magsagawa ng Salaatul-Witr sa huling bahagi ng gabi, sapagkat ang Salah sa huling bahagi ng gabi ay sinasaksihan, na kung kaya mas mabuti.*"⁽²⁾

3. **Salatul-Layl (Salah sa gabi):** Ito ang pinakamabuting Salah pagkatapos ng mga obligadong Salah, tulad ng sinabi ng Propeta ﷺ sa Hadith ni Abu Hurayrah ؓ: "*Ang pinakamabuting Salah pagkatapos ng mga obligadong Salah ay ang Salah sa gabi.*"⁽³⁾ Walang takdang bilang para dito kung kaya maaaring isagawa ng isang Muslim kung ano ang kaniyang nais na tig-dalawang *Rak'ah*, at tatapusan niya ng *Salatul-Witr*.
4. **Salatul-Taraweeh:** Isinasagawa ito sa bawat gabi sa buwan ng Ramadhan pagkatapos ng Salah ng 'Isha, at ito ay isinasagawa ng mga Muslim sa loob ng Masjid ng sama-sama (*Jama'ah*).
5. **Tahiyatul-Masjid (Pagbati sa Masjid):** Ito ay dalawang *Rak'ah* na ginagawa pagka-pasok sa loob ng Masjid bago maupo upang hintayin ang pagsasagawa ng Salah.

(1) Saheeh Muslim

(2) Saheeh Muslim

(3) Saheeh Muslim

Ang mga oras na ipinagbabawal ang pagsa-Salah

Ang nagbigay ng batas ng Islam (Allah ﷻ) ay nagtalaga ng mga oras na bawal magsagawa ng boluntaryong Salah, tulad ng mga sumusunod:

1. Pagkatapos magdasal ng Salah ng *Fajr* hanggang sa pagsikat ng Araw. Maaari lang magbayad ng Sunnah ng *Fajr* kung hindi ito nagawa bago ng *Fajr*.
2. Magsisimula sa pagsikat ng araw hanggang tumaas ng kasing haba ng sibat. Ito ay katumbas ng 15 minuto pagkatapos sumikat ang araw.
3. Magsisimula sa tanghaling-tapat hanggang sa ang araw ay lumampas ng bahagya sa bandang kanluran. Malalaman ang oras na ito kapag nawala na ang anino ng isang bagay, at malalaman din na lumihis na ng bahagya ang araw sa kanluran dahil sa paglitaw ng anino sa bandang silangan.
4. Pagkatapos magdasal ng Salah ng *'Asr* hanggang sa paglubog ng araw.
5. Sa oras habang lumulubog ng araw.

Ang mga pagkakataong maaaring magsagawa ng Salah sa mga oras na pinagbabawal ang pagsa-Salah:

1. Pagbabayad ng mga obligadong Salah.
2. Ang dalawang *Rak'ah* na sunnah pagkatapos ng *Tawaf*.
3. Pagbabayad ng *Sunnah* ng *Dhuhr* pagkatapos ng *'Asr*, kapag pinagsama (*Jama'ah*) ang Salah ng *Dhuhr* at *'Asr*.
4. Ang mga Salah na ginagawa ng mayroong kadahilanan, tulad ng *Salatul-Janazah* (patay), *Al-kusoof* (Eklipse ng Araw), *Al-khusoof* (Eklipse ng Buwan) at *Tahiyatul-Masjid* (Pagbati sa Masjid).



Nakasulat na Pagsasanay

Sagutin ang mga sumusunod:

1. Magbigay ng tatlong oras na ipinagbabawal ang pagsasagawa ng boluntaryong Salah ng walang kadahilanan:

- a.
- b.
- c.

2. Isulat ang mga uri ng boluntaryong Salah:

- a.
- b.
- c.
- d.

3. Kumpletuhin ang sumusunod na talahanayan:

Nu.	Salah	Bilang ng Rak'ah Sunnah sa unahan	Bilang ng Rak'ah na Obligado	Bilang ng Rak'ah Sunnah sa hulihan	Kabuuang Rak'ah
1	Fajr				
2	Dhuhr	2			10
3	'Asr		4		
4	Maghrib		3		
5	'Isha				
6	Witr				

4. Anu-ano ang mga pagkakataong maaaring magsagawa ng Salah sa mga oras na ipinagbabawal magsagawa ng Salah?

- a.
- b.
- c.
- d.

5. Magbigay ng dalawang halimbawa ng malakas na tinatagubilin na boluntaryong Salah (Sunnah Mu'akkadah):

- a.
- b.

Mga Bagong Salita at Termino

Nu.	Arabiko	Pagsasatitik	Kahulugan
1	تطوع	Taṭawwu'	Boluntaryo
2	نافلة	Naafilah	Kalabisan
3	سنن رواتب	Sunan Rawaatib	Mga sunnah para sa mga obligadong Salah
4	وتر	Witr	Nag-iisa
5	سنة مؤكدة	Sunnah Mu'akkadah	Nakumpirmang Sunnah
6	خسوف	Khusoof	Eklipse ng buwan
7	الضحى	Adh-Dhuha	Umaga
8	الاشراق	Al-Ishraaq	Pagsikat ng araw
9	تراويح	Taraawe <u>h</u>	Tarawih Salah
10	كسوف	Kusoof	Eklipse ng araw



Pangalawang Aralin

Ang Salat-ul-Jama'ah (Sama-samang Pagsasalah)

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kakahintulutan ng Allah ﷻ na:

- Malaman ang mga alituntunin ng Salat-ul-Jama'ah.
- Mararamdaman mo ang kahalagahan ng Salat-ul-Jama'ah.
- Maisagawa ang Adhan (Pagtawag sa Salah) sa tamang pamamaraan.
- Maisagawa ang Iqamat (Pagtawag sa pag-uumpisa ng Salah) sa tamang pamamaraan.
- Tandaan ang mga kaugalian ng paglalakad patungong Salah.



Kabuuan ng Aralin:

- Mga Nilalaman ng Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino

Kinakailangang napag-aralan na:

- Mga aralin tungkol sa Salah.
- Mga aralin tungkol sa Taharah.

Ang mga alituntunin ng sama-samang pagsa-Salah

Obligado sa isang lalaking Muslim na isagawa ang obligadong Salah sa loob ng Masjid na sama-sama (*Jama'ah*). Sinabi ng Allah ﷻ:

﴿ فِي بَيْوتِ الَّذِينَ أُذِنَ لَهُمْ أَنْ يُرْفَعُوا وَيُذَكَّرَ فِيهَا اسْمُهُ يُسَبِّحُ لَهُ فِيهَا بِالْغُدُوِّ وَالْآصَالِ , رَجَالٌ لَا تُلْهِهِمْ تِجَارَةٌ وَلَا بَيْعٌ عَنْ ذِكْرِ اللَّهِ وَإِقَامِ الصَّلَاةِ وَإِيتَاءِ الزَّكَاةِ يَخَافُونَ يَوْمًا تَتَقَلَّبُ فِيهِ الْقُلُوبُ وَالْأَبْصَارُ ﴾ (1)

“..Sa mga tahanan ng Allah (Masjid) na ipinag-utos Niya na itayo ang mga ito, igalang at ikarangal, at inaalaala at pinupuri ang Kanyang Pangalan sa pamamagitan ng pagbigkas o pagbasa ng Kanyang Aklat at Pagluwalhati sa Allah sa umaga at hapon. Mga kalalakihan na hindi naabala ng negosyo at pagbebenta mula sa pag-alaala nila sa Allah, at pagsasagawa ng Salah, pagbibigay ng Zakah (obligadong kawanggawa), natatakot sila sa Araw ng Muling Pagkabuhay na kung saan doon ay babaling ang mga puso sa pagitan ng pag-asa na maligtas at pagkatakot na mapahamak, gayundin ang kanilang mga paningin”.

﴿ إِنَّمَا يُعْمُرُ مَسَاجِدَ اللَّهِ مَنْ آمَنَ بِاللَّهِ وَالْيَوْمِ الْآخِرِ وَأَقَامَ الصَّلَاةَ وَآتَى الزَّكَاةَ وَلَمْ يَحْشَ إِلَّا لِلَّهِ فَعَسَىٰ أُولَٰئِكَ أَنْ يَكُونُوا مِنَ الْمُهْتَدِينَ ﴾ (2)

Sinabi rin ng Allah ﷻ: **“At walang sinuman ang nagpapanatili at nagtataguyod ng mga Tahanan ng Allah maliban sa mga yaong naniniwala sa Allah at sa Kabilang-Buhay, at isinasagawa nila ang Salah at nagbibigay sila ng Zakah, at wala silang kinakatakutan na sinuman kundi ang Allah, at sila ang tunay na pinatnubayan tungo sa katotohanan”.**

Isinalaysay ni Abu Hurayrah ؓ: **Dumating ang isang lalaking bulag sa Propeta at sinabi niya: “Oh Rasulullah, katotohanan walang aakay sa akin patungong Masjid pahihintulutan mo ba ako na dito na lang ako mag-Salah sa aking tahanan?” Sa simula ay pinagbigyan siya, ngunit nang paalis na siya ay tinanong siya ng Propeta: “Naririnig mo ba ang pagtawag ng Adhan para sa Salah?” Sinabi niya, “Oo.” Sinabi ng Propeta “kung ganoon ay tumugon ka.” (3)**

Kung ito ay hindi obligado, hindi hihingi ng pahintulot ang lalaking bulag na sa kanyang tahanan na lamang siya mag-Salah, at napatunayan na ito ay obligado dahil ipinag-utos sa kanya ng Propeta ﷺ ang pagtugon niya sa pagtawag ng Adhan na naririnig niya. Isinalaysay ni Abdullah bin Abbas ؓ. Sinabi ng Propeta ﷺ: **“Ang sinumang nakarinig ng Adhan (Pagtawag para sa Salah) at hindi tumugon ay wala siyang Salah maliban lang kung mayroong sapat na dahilan.” (4)**

Ang Salah ng *Jama'ah* ay mayroong malaking kabutihan. Isinalaysay ni Ibnu 'Umar ؓ, na sinabi ng Propeta ﷺ: **“Ang Salah *Jama'ah* ay higit na mabuti kaysa sa Salah ng nag-iisa ng 27 antas.” (5)**

Kung kaya dapat hangarin magsagawa ng obligadong Salah sa *Masjid* at *Jama'ah* (sama-sama). Ang mga boluntaryong Salah naman ay higit na mabuti kapag isasagawa sa tahanan. At hindi obligadong mag-*Jama'ah* ang mga kababaihan. Ang kanilang Salah ay higit na mabuti sa kanilang tahanan. Gayunpaman, hindi bawal sa kanila na mag-Salah sa *Masjid* kung nais nila kung mayroong lugar para sa mga babae.

(1) Surah An-Noor 24:36-37

(2) Surah At-Tawbah 9:18

(3) Saheeh Muslim

(4) Saheeh, Ibnu Maajah at Abu Dawood

(5) Bukhari at Muslim

Ang Adhan (Pagtawag sa Salah) at Iqamah (Pagtawag sa pag-uumpisa ng Salah)

Ang *Adhan* ay ang malakas na pagtawag upang mabatid ng mga Muslim na ang oras ng Salah ay nag-uumpisa na. Ang *Iqamah* naman ay pag-anunsyo na ang *Imam* ay dumating na at mag-uumpisa na ang Salah. Ang pamamaraan ng pagtawag ng *Adhan* at *Iqamah* ay ang mga sumusunod:

Nu.	Ang mga bibigkasin sa Adhan	Ilang ulit	Ang mga bibigkasin sa Iqamah	Ilang ulit
1	Allahu Akbar	4	Allahu Akbar	2
2	Ash-hadu an la ilaha illallah	2	Ash-hadu an la ilaha illallah	1
3	Ash-hadu anna Muhammadan Rasulullah	2	Ash-hadu anna Muhammadan Rasulullah	1
4	Hayya alas-Salah	2	Hayya alas-Salah	1
5	Hayya alal-falah	2	Hayya alal- falah	1
6	--		Qad Qamatis-Salah	2
7	Allahu Akbar	2	Allahu Akbar	2
8	La ilaha illallah	1	La ilaha illallah	1

Para sa Salah ng *Fajr* naman ay bibigkasin ng *mu'adh-dhin* (tagatawag ng *Adhan*) ang "*As-Salaatu khayrun minan-nawm*" ("Ang Salah ay mas mainam kaysa pagtulog") ng dalawang beses pagkatapos niyang bigkasin ang "*Hayya alal-falah*".

Ano ang gagawin kapag narinig ang *Adhan*?

Ulitin mo ang binibigkas ng *mu'adh-dhin* kapag narinig mo ang *Adhan*, maliban sa "*Hayya 'alas-Salah*" at "*Hayya 'alal-falah*" dahil ang bibigkasin mo naman para dito ay "*La hawla wa la quw-wata illa billaah*".

Pagkatapos ng *Adhan* ay inirerekomenda na mag-*Salaawat* (panalangin) sa Propeta ﷺ at pagkatapos ay humiling ng *Al-waseelah* (kalapitan sa Allah) para sa Propeta ﷺ. Nagmula kay Abdullah bin Amr bin Al-As ؓ: narinig niya ang Propeta ﷺ na nagsasabi: "*Kapag narinig ninyo ang pagtawag ng Adhan ay bigkasin ninyo ang katulad ng binibigkas niya, pagkatapos ay manalangin kayo para sa akin. Katiyakan, ang sinumang manalangin para sa akin ng isang beses ay bibigyan ng Allah ng katumbas ng sampung panalangin, pagkatapos ay humiling kayo ng "Al-waseelah" (kalapitan sa Allah) sa Allah para sa akin. Katotohanan, ito ay isang antas sa paraiso na di-maipagkakaloob maliban sa isang lingkod ng Allah, inaasam ko na sana maging ako yaon, kung kaya sinumang humiling sa Allah para sa akin ng Al-waseelah ay ako ay pahihintulutang magiging taga-pamagitan para sa kanya.*" ⁽¹⁾

Nagmula kay Jabir bin Abdullah ؓ: Katotohanan, sinabi ng Propeta ﷺ: "*Sinuman ang bumigkas pagkatapos niyang marinig ang pagtawag ng Adhan ng: 'O Allah Panginoon ng Dakilang Pagtawag na ito at ang itatayong Salah, ipagkaloob mo kay Propeta Muhammad ang Al-waseelah (kalapitan sa Allah) at mga kabutihan, at ipagkaloob mo sa kanya ang kapuri-puring katayuan na lyong ipinangako, ako ay pahihintulutan na maging taga-pamagitan para sa kanya sa araw ng muling pagkabuhay*" ⁽²⁾

(1) Saheeh Muslim
(2) Saheeh Bukhari

Kapag pumasok na ang oras ng Salah at ikaw ay nasa lugar o bayan na hindi naririnig ang pagtawag ng *Adhan* ay makabubuting ikaw ang tumawag ng *Adhan* para sa Salah dahil magkakaroon ka ng malaking gantimpala. Ngunit kapag naririnig mo ang *Adhan* ay dapat kang pumunta upang mag-Salah ng *Jama'ah*. Kapag ikaw ay magsa-Salah ng mag-isa sa lugar na mayroon nang tumawag ng *Adhan* ay mas mainam kang mag-*Iqamah* para sa sarili mo o para sa sinumang magsa-Salah kasama mo.

Mga video upang maituro ang pagbigkas ng Adhan at Iqamah



Ang pagtawag ng Adhan



Ang pagtawag ng Adhan sa Fajr



Ang pagtawag ng Iqamah

Ang Kabutihang-asal sa Pagpunta sa Salah

Ang Salah ay dakilang gawaing pagsamba kung kaya dapat bigyan ng pagpapahalaga ng bawat Muslim ang paghahanda para dito ng sama-sama sa loob ng *Masjid*. Ang Salah sa *Masjid* ay mayroong mabubuting-asal na itinatagubiling gawin tulad ng:

1. Maagang pagpunta sa *Masjid* sa oras na narinig na ang *Adhan*.
2. Magpunta sa Salah ng mahinahon at hindi nagmamadali sa paglalakad kahit nakapag-umpisa na ang Salah.
3. Unahin ang kanang paa sa pagpasok sa *Masjid* at bigkasin ang *Du'a* na nagmula sa Propeta ﷺ: Isinalaysay ni Abdullah bin Amr bin Al-Aas ؓ kapag pumapasok sa loob ng *Masjid* ang Propeta ﷺ ay nagsasabi ng ganito: *"A'oodhu billaahil-Adheem wa bi wajjihil-Kareem wa sultanihil-Qadeem minash- shaytanir-rajeem"*.⁽¹⁾
4. Mag-Salah ng dalawang *Rak'ah* (*Tahiyatul-Masjid*) o *Sunnah* (*Ratibah*) kapag ang Salah ay mayroong *Sunnah* sa unahan nito, pagkatapos ay maupo at mag-*Thikr*, magbasa ng Qur'an at mag-*Du'a* hangga't hindi pa nagsisimula ang Salah.
5. Sikaping mag-Salah sa unang linya sapagkat ito ang pinaka-mabuting linya para sa mga lalaki.
6. Sikaping ituwid ang linya, huwag sumulong o umatras sa linya, at huwag lagyan ng puwang sa pagitan mo at sa iyong katabi.
7. Maupo muna ng sandali at huwag magmadaling tumayo pagkatapos ng Salah. Bigkasin ang mga pag-alaala sa Allah ﷻ (*Thikr*) pagkatapos ng Salah.
8. Huwag dumaan sa harapan ng nagsa-Salah.
9. Huwag lakasan ang boses sa pagbigkas ng Qur'an, *Du'a* at *Thikr* na makaka-abala sa mga nasa paligid mo.
10. Patahimikin o patayin muna ang telepono.

(1) Abu Dawood



Nakasulat na Pagsasanay

1. Isulat ang limang mabuting-asal sapaglalakad papuntang Salah:

- a.
- b.
- c.
- d.
- e.

2. Kumpletuhin ang sumusunod:

- a. Ang *Adhan* ay:
- Ang *Iqamah* ay:
- b. Ang alituntunin ng Salah Jama'ah (grupo) ay
- Ito ay higit na mabuti kaysa Salah ng nag-iisa ng

3. Ano ang binibigkas kapag narinig ang *adhan*?

.....

.....

.....



Ginagawang Pagsasanay

Hilingin sa mag-aaral na mag-*Adhan* para sa Salah.



Hilingin sa mag-aaral na mag-*Iqamah* para sa Salah.



Mga Bagong Salita at Termino

Nu.	Arabiko	Pagsasatitik	Kahulugan
1	مكتوبة	Maktoobah	Obligado
2	جماعة	Jamaa'ah	Kapulungan/grupo
3	منفرد	Munfarid	Nag-iisa
4	إمام	Imaam	Imam/ namumuno
5	مأموم	Ma'moom	Tagasunod ng Imam
6	رخصة	Rukhsah	Pahintulot
7	نداء	Nidaa'	Pagtawag
8	أذان	A thaan	Ang tawag sa Salah
9	إقامة	Iqaamah	Pagtayo ng Salah
10	عذر	' A thr	Patawad; Pasensya

Pangatlong Aralin

Ang mga alituntunin sa pagbabayad ng Salah at ang Sahwu (pagkalimot)

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kaphintulutan ng Allah ﷻ na:

- Makumpleto ang anumang kulang sa Salah Jama'ah (sama-sama) sa tamang pamamaraan.
- Maipaliwanag ang mga alituntunin ng Sujood Sahwu (Pagpapatirapa ng pagkalimot).
- Maituwid ang maling hindi mo sinasadya habang nagsa-Salah sa tamang pamamaraan.
- Maisagawa ang Sujood Sahwu sa tamang pamamaraan.



Kabuuan ng Aralin:

- Nakasulat na Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino

Kinakailangang napag-aralan na:

- Mga aralin tungkol sa Salah.
- Mga aralin tungkol sa Taharah.

Ang mga alituntunin para sa nahuli sa Salat-Jama'ah (Sama-samang Pagsasalah)

Itinatagubilin sa isang Muslim na maagang magtungo sa *Salat-Jama'ah* tulad ng nabanggit sa unahan, ngunit kapag nahuli ay dapat siyang sumali kaagad sa Imam sa kalagayan na kanyang naabutan at kumpletuhin na lamang niya ang hindi niya naabutan kung mayroon siyang hindi naabutan sa Salah. Ang mga sumusunod ay paliwanag tungkol sa pagbayad ng hindi naabutan sa *Salat-Jama'ah*:

1. Kapag nakaabot ka sa kalagayan na ang *Imam* ay nakayuko, naabutan mo ang *Rak'ah* na *iyon*, kung kaya iyon ang unang *Rak'ah* ng Salah mo.
2. Kapag nakahabol ka na sa linya ay bigkasin ang *Takbeeratul-Ihram* habang ikaw ay nakatayo. Bigkasin ulit ang *Takbeer* at sundan mo kung ano ang posisyon ng *Imam*, kung siya ay nakatirapa ay magpatirapa ka rin, kung nakaupo ay umupo ka rin.
3. Sundan ang *Imam* hanggang sa pangalawang *Tasleem* (pagbigkas ng "*As-salaamu 'alaykum wa rahmatullaah*").
4. Pagkatapos ng *Tasleem* ng *Imam* ay tumayo ka at bigkasin ang *Takbeer* at kumpletuhin ang hindi mo naabutan sa Salah.
5. Ang *Rak'ah* na naabutan mo kasama ng *Imam* ang iyong unang *Rak'ah*, pagkatapos ay kumpletuhin mo ang mga *Rak'ah* na hindi mo naabutan batay sa pagkasunod-sunod ng Salah, tulad halimbawa ng:

Unang halimbawa: Ang *Jama'ah* sa pagdating mo ay nagpapatirapa sa pangalawang *Rak'ah* ng *Dhuhr*, kung kaya dapat mong gawin ang mga sumusunod na hakbang:

- Bigkasin ang *Takbeeratul-Ihram* habang nakatayo.
- Bigkasin ang *Takbeer* pagkatapos ay magpatirapa kasama ang grupo at pagkatapos ay sumunod na sa Salah ng *Imam*.
- Kapag nag-*Tasleem* na ang *Imam* ng pangalawa sa kaliwa, mag-*Takbeer* at tumayo. Ito na ang pangatlong *Rak'ah* para sa iyo dahil ang nadatnan mo kasama ang *Imam* ay ang una at pangalawang *Rak'ah* para sa iyo, samantalang ang *Imam* ay nasa pangatlo at pang-apat na *Rak'ah* na para sa kanila.
- Kumpletuhin mo ang pangatlo at pang-apat na *Rak'ah* pagkatapos ay mag-*Tasleem* ka na rin.

Pangalawang halimbawa: Ang *Jama'ah* sa pagdating mo ay nasa posisyon na nakaupo para sa unang *Tashahhud* ng Salah ng *Maghrib*, kung kaya dapat mong gawin ang mga sumusunod:

- Bigkasin ang *Takbeeratul-Ihram* na ikaw ay nakatayo, pagkatapos mag-*Takbeer* at maupo kasama ang grupo.
- Kumpletuhin mo kasama ang *Imam* ang pangatlong *Rak'ah* niya at ibilang mo ito na unang *Rak'ah* para sa iyo.
- Kapag nakapag-*Tasleem* na ang *Imam* ng pangalawa sa kaliwa ay bigkasin ang *Takbeer* at tatayo ka upang isagawa ang pangalawang *Rak'ah* para sa iyo.
- Maupo upang mag-*Tashahhud* sa unang pagkakataon pagkatapos ng *Rak'ah* na ito, sapagkat ang unang *Tashahhud* ay ginagawa pagkatapos ng pangalawang *Rakaah*.
- Pagkatapos ng unang *Tashahhud* ay mag-*Takbeer* at tumayo para sa pangatlo at huling *Rak'ah*, tapusin ang iyong salah at mag-*Tasleem*.

Mga alituntunin ng Sujood Sahwu (Pagpapatirapa ng Pagkalimot)

Likas sa tao ang magkamali at makalimot. Minsan ang nagsa-Salah ay nagkakamali gaya ng pagdagdag o pagbawas ng hindi sinasadya sa kanyang Salah o di kaya'y nag-aalanganin sa kanyang Salah, ngunit dahil sa habag ng Allah ﷻ sa Kanyang mga lingkod, itinalaga Niya ang batas na *Sujood Sahwu* sa bawat kamaliang mangyayari sa nagsa-Salah na hindi sinasadya. Ang mga pangyayaring dapat mag-*Sujood Sahwu* ay tatlo, ito ay ang mga sumusunod:

1. **Kapag nakadagdag sa Salah**, sa ganitong pagkakataon ay mag-*Sujood Sahwu* pagkatapos ng *Tasleem*.
2. **Kapag nakabawas sa Salah**, na sa ganitong pagkakataon ay mag-*Sujood Sahwu* bago mag-*Tasleem*.
3. **Alanganin kung nakadagdag o nakabawas**. Sa ganitong pagkakataon ay mag-*Sujood Sahwu* pagkatapos ng *Tasleem* kapag inaakala niya na mas matimbang ang isa sa kanyang nagawa. Ngunit kapag wala siyang nakikilingan sa dalawa ay kunin niya ang pinakasigurado at ito ang pinaka-kaunti, mag-*Sujood Sahwu* bago mag-*Tasleem*.

Ang *Sujood Sahwu* ay ipinag-utos gawin sa mga obligado at boluntaryong Salah kung kinakailangan, at hindi lahat ng kamalian na hindi sinasadya ay nangangailangan ng *Sujood Sahwu*. Ang mga sumusunod ay paliwanag sa mga kalagayang kinakailangan ng *Sujood Sahwu*:

Una: Ang pagdagdag sa Salah

Kapag nakadagdag ng gawain sa Salah gaya ng pagyuko o pagpapatirapa o pagtayo o nakadagdag ng isang *Rak'ah*, gaya sa Salah ng *Dhuhr* na nagawang lima imbes na apat na *Rak'ah* ng hindi sinasadya at naalaala lamang pagkatapos niyang magawa, kinakailangang magpatirapa siya ng dalawang beses pagkatapos ng *Tasleem*.

Ngunit kapag nakadagdag ng isang *Rak'ah* at agad niyang naalaala habang nakatayo, dapat siyang maupo sa oras na naalaala niya para sa huling *Tashahhud* at hindi na kailangang kumpletohin ang dagdag na *Rak'ah*, at pagkatapos ng *Tasleem* ay magpatirapa ng dalawang beses.

Pangalawa: Ang pagbawas sa Salah

Ito ay ang pagbawas ng anumang gawain sa Salah. Magkaiba ang pamamaraan ng pagtatama kapag nabawasan ng hindi sinasadya, ayon sa mga sumusunod na paliwanag:

- Kapag nakalimutan ang *Takbeeratul-Ihram* ay kinakailangan ulitin ang Salah mula sa umpisa, dahil ang Salah ay hindi pa naumpisahan.
- Kapag nakabawas ng haligi (*ruk'n*) maliban sa *Takbeeratul-Ihram* tulad ng pagyuko at pagpapatirapa, (balikan ang pag-aaral ng mga haligi ng Salah), pagkatapos ay dapat niyang tratuhin ang kakulangan sa tatlong paraan, ayon sa sitwasyon kung saan ang kakulangan ay nabanggit:
 1. Kapag naalaala niya na hindi siya yumuko o nagpatirapa habang siya ay nanatili pa rin sa *Rak'ah* na yaon ay dapat niyang balikan ang naiwang kulang upang ituwid, pagkatapos ay kumpletohin na niya ang kanyang Salah at magpatirapa ng dalawang beses bago mag-*Tasleem*.

2. Kapag naalaala niya na mayroong siyang naiwang kulang pagkatapos maumpisahang bigkasin ang *Al-Fatihah* sa susunod na *Rak'ah*, huwag na niyang balikan ang unang *Rak'ah* na pinangyarihan ng naiwang kulang dahil makakansela na ito at ang magiging kapalit ay ang kasalukuyang *Rak'ah*, at pagkatapos ay kumpletohin ang *Salah* at magpatirapa ng dalawang beses bago mag-*Tasleem*.
3. Kapag naalaala na nakaiwan ng isang haligi (*ruk'n*) pagkatapos ng *Tasleem*, o nakaiwan ng isang kumpletong *Rak'ah*, gaya ng kapag nag-*Salah* ng '*Asr* ng tatlong *Rak'ah* lamang, nararapat sa kanya na tumayo at isasagawa lamang niya ang naiwanang *Rak'ah* pagkatapos ay mag-*Tasleem*. Pagkatapos ay magsagawa ng magpatirapa ng dalawang beses at mag-*Tasleem* ulit. Ito ang bayad niya at pagkumpleto doon sa nabawas na gawain. Kaya ang unang pag-*Tasleem* ay nagiging karagdagan kung kaya ang *Sujood Sahwu* ay pagkatapos ng *Tasleem*. Ngunit kung naaalala niya pagkatapos ng mahabang panahon, dapat niyang ulitin ang buong *Salah*.

Pangatlo: Ang pagdadalawang-isip sa *Salah*

Ang pagdududa ay ang pag-aalangan sa pagitan ng dalawang bagay, alin sa kanila ang nangyari, kapag ang nagsa-*Salah* ay alanganin sa bilang ng *Rak'ah* kung dalawa o tatlo, ang pangyayari ay di-lalampas sa dalawang kalagayan:

1. **Kayang pumili:** Timbangin niya sa isipan niya ang dalawang bagay na yaon, at sundin niya kung ano ang mas sigurado siya. Kumpletohin niya ang kanyang *Salah* at mag-*Tasleem*, pagkatapos ay mag-*Sujood Sahwu* at mag-*Tasleem*. Halimbawa ang *Salatul-Dhuhr*, kapag nag-aalinlangan kung nasa pangalawa o pangatlong *Rak'ah*, bumatay siya sa kung ano ang mas sigurado sa kanya. Kung mas sigurado na nasa pangatlong *Rak'ah* na, kumpletohin ang pang-apat na *Rak'ah* at mag-*Tasleem*, at pagkatapos ay mag-*Sujood Sahwu* at mag-*Tasleem* ulit.
2. **Hindi kayang pumili:** Sa ganitong sitwasyon, dapat niyang piliin ang pinakamaliit na bilang. pagkatapos ay kumpletohin ang *Salah* at mag-*Sujood Sahwu* bago mag-*Tasleem*. Halimbawa, may pag-aalinlangan habang nagsa-*Salah* ng '*Asr*, kung nasa pangalawa o pangatlong *Rak'ah* na. Dapat piliin ang pangalawang *Rak'ah*, kumpletohin ang pangatlo at pang-apat na *Rak'ah*, at mag *Sujood Sahwu* bago mag-*Tasleem*.



Ang Pamamaraan ng Sujood Sahwu

Ang *Sujood Sahwu* ay dalawang Sujood na isinasagawa ng nagsa-Salah pagkatapos kumpletohin ang huling *Tashahhud* at bago mag-*Tasleem* o pagkatapos ng *Tasleem* batay sa naipaliwanag natin sa unahan. Ang mga sumusunod na mga larawan ay ang pagpapaliwanag:

Ang pamamaraan ng Sujood Sahwu bago mag-Tasleem



Ang pamamaraan ng Sujood Sahwu pagkatapos ng Tasleem



Ang Sujood Tilawah (Pagpapatirapa dahil sa pagbigkas ng Qur'an)

Minsan ay mapapansin mo na ang *Imam* ay humihinto sa pagbigkas ng Qur'an kapag siya ay nakatayo sa Salah at magpapatirapa ng isang *Sujood* pagkatapos ay tumatayo ulit at itinutuloy ang pagbibigkas. Ang tawag sa *Sujood* na ito ay *Sujood Tilawah*. Mayroong mga talata sa Qur'an na kapag binigkas ng isang Muslim sa kanyang pagsa-Salah o sa labas ng Salah ay inirekomenda (*Sunnah*) sa kanya na magpatirapa. Ang mga Talatang ito ay maaaring nag-uutos ng pagpapatirapa tulad ng sinabi ng Allah ﷻ sa *Surah Al-'Alaq*:

﴿كَلَّا لَا تَطَعُهُ وَأَسْجُدْ وَاقْتَرِبْ﴾ ⁽¹⁾

"Katiyakan, hindi ka niya maipapahamak, O Muhammad, na kung kaya, huwag mo siyang sundin sa anuman na kanyang ipinag-anyaya sa iyo, na tumigil sa pagsasagawa ng Salah, bagkus ay magpatirapa sa iyong Rabb na Tagapaglikha, at lumapit ka sa Kanya sa pamamagitan ng pagmamahal sa Kanya bilang pagsunod sa Kanyang mga ipinag-uutos."

O di kaya'y mayroong mga nabanggit na pagpapatirapa, tulad ng sinabi ng Allah ﷻ sa *Surah Ar-Raad*:

﴿وَلِلَّهِ يَسْجُدُ مَنْ فِي السَّمَاوَاتِ وَالْأَرْضِ طَوْعًا وَكَرْهًا وَظِلَالُهُم بِالْعُدُوِّ وَالْآصَالِ﴾ ⁽²⁾

"At sa Allah na Bukod-Tangi nagpapatirapa bilang pagpapakumbaba ang lahat ng mga nasa kalangitan at kalupaan, nagpapasailalim sa Kanyang kagustuhan ang mga mananampalataya nang kusang-loob, at gayundin ang mga walang pananampalataya kahit ayaw pa nila dahil sa sila ay nagmamataas na ayaw nilang sumamba sa Kanya, gayong ang kanilang katayuan at ang kanilang likas na katangian ay tinatanggi ang kanilang ginawang paglabag, at nagpapasailalim sa Kanyang Kadakilaan ang mga anino ng lahat ng mga nilikha, at ito ay gumagalaw dahil sa Kanyang kagustuhan mula sa simula ng araw hanggang sa duluhan nito."

At sinabi rin ng Allah ﷻ sa *Surah As-Sajdah*:

﴿إِنَّمَا يُؤْمِنُ بِآيَاتِنَا الَّذِينَ إِذَا ذُكِرُوا بِهَا حَمَزُوا سَجْدًا وَسَبَّحُوا بِحَمْدِ رَبِّهِمْ وَهُمْ لَا يَسْتَكْبِرُونَ﴾ ⁽³⁾

"Ang naniniwala lamang sa mga talata ng Dakilang Qur'an ay ang mga yaong kapag pinaalalahanan hinggil dito, ay nagpapatirapa sila at pumupuri sa kanilang Rabb, at sila ay hindi nagmamataas."

Nakakasanayang nakikita sa gilid ng *Mus-haf* (Aklat ng Qur'an) sa tapat ng talata na may *Sajdah* ang pagkakaroon ng linya sa ibaba ng talata na may-*Sajdah* upang mabatid ng sinumang nagbabasa ng Qur'an ang lugar kung saan mayroong *Sujood Tilawah*, at minsan mayroon din nakasulat na salitang "*Sajdah*". Kung kaya kapag nabigkas ng *Imam* ang talata na may *Sajdah* sa oras ng kanyang pagsa-Salah ay mag-*Takbeer* at mag-*Sujood* pagkatapos ay mag-*Takbeer* ulit at tumayo mula sa pagpapatirapa. Dapat din na lahat ng nagsa-Salah sa likuran niya na sumunod sa pagpapatirapa.

(1) Surah Al-'Alaq 96:19

(2) Surah Ar-Ra'd 13:15

(3) Surah As-Sajdah 32:15

Ang Du'a ng Qunoot (Panalangin)

Minsan ay mapapansin mo na ang *Imam* sa ibang mga Salah lalo na sa *Salatul-Witr* sa Buwan ng *Ramadhan*, pagkatapos niyang tumayo mula sa pagyuko ay mananatili siyang nakatayo. Bumibigkas siya ng mga panalangin (*Du'a*) at ang mga nasa likuran niya ay sumasagot ng "*Ameen*". Ang panalangin na ito ay tinatawag na *Du'a Al-Qunoot*. Minsan ay binibigkas ng *Imam* ang *Qunoot* sa lahat ng Salah kapag mayroong mga nangyayaring kalamidad.





Nakasulat na Pagsasanay

1. Piliin ang tamang sagot sa mga sumusunod:

1. Kapag naabutan mo ang *Imam* sa kalagayan ng *ruku'* sa pangalawang *Rak'ah* ng *Fajr* ang dapat mong gawin ay:
 - a. Isagawa ang pangalawang *Rak'ah* pagkatapos mag-*Tasleem* ang *Imam*, pagkatapos ay mag-*Tasleem*.
 - b. Mag-*Tasleem* kasama ng *Imam*.
 - c. Ulitin ang *Salah*.
2. Kapag naabutan mo ang *Imam* sa kalagayan ng *Sujood* sa pangalawang *Rak'ah* ng *Dhuhr* ang dapat mong gawin ay:
 - a. Magsagawa ng dalawang *Rak'ah* pagkatapos mag-*Tasleem* ang *Imam*, at pagkatapos ay mag-*Tasleem*.
 - b. Magsagawa ng tatlong *Rak'ah* pagkatapos mag-*Tasleem* ang *Imam*, at pagkatapos ay mag-*Tasleem*.
 - c. Magsagawa ng isang *Rak'ah* pagkatapos mag-*Tasleem* ang *Imam*, at pagkatapos ay mag-*Tasleem*.
3. Kapag naabutan mo ang *Imam* sa kalagayan ng unang *Tashahhud* ng *Salah Maghrib*, ang dapat mong gawin ay:
 - a. Magsagawa ng dalawang *Rak'ah* pagkatapos mag-*Tasleem* ang *Imam* at walang pag-upo sa pagitan nito, at pagkatapos ay mag-*Tasleem*.
 - b. Magsagawa ng isang *Rak'ah*, pagkatapos ay uupo para sa unang *Tashahhud*, pagkatapos ay magsagawa ulit ng isang *Rak'ah*, at pagkatapos ay mag-*Tasleem*.
 - c. Magsagawa ng dalawang *Rak'ah*, pagkatapos ay uupo para sa *Tashahhud*, at magsagawa ulit ng pangatlong *Rak'ah*, at pagkatapos ay mag-*Tasleem*.
4. Kapag hindi maalala sa *Isha* kung ilan na ang nagawang *Rak'ah*, tatlo ba o apat, ang dapat mong gawin ay:
 - a. Mag-*Sujood Sahwu* bago mag-*Tasleem*.
 - b. Mag-*Sujood Sahwu* pagkatapos mag-*Tasleem*.
 - c. Magsagawa ng isang *Rak'ah*, at pagkatapos ay mag-*Sujood Sahwu* bago mag-*Tasleem*.

2. Kumpletuhin ang mga sumusunod:

- a. Ang *Sujood Sahwu* ay:
- b. Kapag nakalimutan ang *Takbeeratul-Ihram* ang *Salah* ay:
.....
at ang dapat sa iyo ay:
- c. Ang *Sujood Tilawah* ay ang:
- d. Ang *Du'a* ng *Qunoot* ay ang:




Ginagawang Pagsasanay

Hilingin sa mag-aaral na magsagawa ng Sujood Sahwu para sa may pagkukulang, para sa may nadagdag, at para sa may pag-aalinlangan sa Salah.

Mga Bagong Salita at Termino

Nu.	Arabiko	Pagsasatitik	Kahulugan
1	مسيوق	Masbooq	Nahuli sa Salah
2	سجود السهو	Sujood As-Sahwu	Sujood ng pagkalimot
3	قضاء	Qadh ^h aa'	Pagbabayad
4	نقص	Naqs	kakulangan
5	شك	Shak	Pagdududa
6	صف	Saf	Hilera; Linya
7	تذكر	Tath ^h akkar	Tandaan
8	تردد	Taraddad	Nag-aalangan
9	سجود التلاوة	Sujood At-Tilaawah	Pagpapatirapa ng pagbabasa ng Qur'an
10	دعاء القنوت	Du'a Al-Qunoor	Panalangin para sa Qunoot



Pang-Apat na Aralin

Ang Salah ng Jumu'ah (Salah ng Biyernes) at ng Dalawang 'Eid (Pagdiriwang)

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kaphintulutan ng Allah ﷻ na:

- Isagawa ang Salah ng Jumu'ah (Salah ng Biyernes) sa tamang paraan.
- Matandaan ang mga mabubuting-asal ng Salah ng Jumu'ah.
- Isagawa ang tamang pamamaraan ng Salah ng Eid (Salah ng Pagdiriwang).
- Isagawa ang tamang pamamaraan ng Salah sa patay.
- Matandaan ang mga alituntunin ng Salah ng isang manlalakbay.
- Isagawa ang Salah ng maysakit sa tamang paraan.



Kabuuan ng Aralin:

- Nakasulat na Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino

Kinakailangang napag-aralan na:

- Mga aralin tungkol sa Salah.
- Mga aralin tungkol sa Taharah.

Ang Salat-Jumu'ah (Salah sa Araw ng Biyernes)

Ang Araw ng *Jumu'ah* (Biyernes) ang pinaka-mabuting araw sa loob ng isang linggo. Naisalaysay ni Abu Hurayrah رضي الله عنه ang tungkol sa kabutihan ng *Jumu'ah* dahil narinig niya ang Propeta صلى الله عليه وسلم na nagsabi: *"Tayo ang huli ngunit tayo ang mangunguna sa Araw ng Muling Pagkabuhay (Yawmul-Qiyamah), samantalang ang mga Angkan ng Kasulatan ang naunang pinagkalooban ng Aklat. Ito ang araw na inobligang sa kanila ngunit hindi sila nagkasundo dito, bagkus tayo ang ginabayan ng Allah. Kung kaya sa atin sumusunod ang mga tao, kinabukasan ang para sa mga Hudyo at sa makalawa naman ang para sa mga Kristiyano."*⁽¹⁾

Sa Araw ng Biyernes isinasagawa ang *Salatul-Jumu'ah* bilang kapalit ng *Salatul-Dhuhr* para sa mga nagdarasal na sama-sama (*Jama'ah*), at dapat dumalo ang lahat ng lalaking Muslim sa *Salatul-Jumu'ah* dahil sa kahalagahan nito. Sinabi ng Allah تعالى sa Banal na Qur'an:

﴿ يَا أَيُّهَا الَّذِينَ آمَنُوا إِذَا نُودِيَ لِلصَّلَاةِ مِنْ يَوْمِ الْجُمُعَةِ فَاسْعَوْا إِلَىٰ ذِكْرِ اللَّهِ وَذَرُوا الْبَيْعَ ۚ ذَلِكُمْ خَيْرٌ لَكُمْ إِنْ كُنْتُمْ تَعْلَمُونَ ﴾⁽²⁾

"O kayong mga naniniwala sa Allah at sumusunod sa Kanyang Sugo! Kapag nanawagan ang tagapagtawag ng Salah sa araw ng Jumu'ah samakatuwid ay magsitungo kayo sa Khutbah bilang pakikinig sa pagpapayo at sa pagsagawa ng papuri o pag-alaala sa Allah, at pansamantalang iwanan ninyo muna ang pakikipagkalakalan, at gayundin ang pamimili at ang lahat ng anumang maaaabala sa inyo. At itong ipinag-utos sa inyo ay mas higit na nakabubuti para sa inyo; dahil naririto ang kapatawaran ng mga kasalanan at gantimpala ng Allah sa inyo, kung batid ninyo."

Mayroong mga nabanggit na babala para sa sinumang hindi sisipot dito. Naisalaysay mula kay Abdullah bin 'Umar at Abu Hurayrah رضي الله عنه na narinig nilang dalawa ang Propeta صلى الله عليه وسلم na nagsabi habang siya ay nasa kanyang mimbar: *"Walang pag-aalinlangan, kailangang huwag tumigil ang mga tao sa pagdalo sa *Salatul-Jumu'ah*, o di kaya'y lalagyan ng Allah ng selyo ang kanilang mga puso at mapapabilang sila sa mga taong nagpapabaya."*⁽³⁾

Kabilang naman sa mga kabutihan ng *Salatul-Jumu'ah* ay tulad ng naisalaysay ni Abu Hurayrah رضي الله عنه na sinabi ng Propeta صلى الله عليه وسلم: *"Sinumang maligo at pagkatapos ay magtungo sa *Salatul-Jumu'ah* at mag-Salah ng kung ano ang naitakda sa kanya, pagkatapos ay taimtim na makikinig ng Khutbah hanggang sa katapusan nito, pagkatapos ay magsa-Salah kasama ng Imam, ay patatawarin sa kanya ang kanyang kasalanan sa pagitan ng *Jumu'ah* na ito at susunod na *Jumu'ah*, at mayroong pang labis na tatlong Araw."*⁽⁴⁾

Kaya dapat paghandaan ng isang Muslim na maagang maligo at magpabango, at magbihis ng pinakamagandang damit niya sa Araw ng *Jumu'ah*. Naisalaysay ni Abu Saed Al-Khudri رضي الله عنه na sinabi ng Propeta صلى الله عليه وسلم: *"Ang paliligo sa Araw ng *Jumu'ah* ay obligado (wajib) sa bawat Muslim na nasa tamang gulang, at magpabango kung mayroon siyang pabango."*⁽⁵⁾

Itinatagubilin sa isang Muslim na maagang pumunta upang mag-Salah ng *Jumu'ah* at gugulin ang panahon sa pag-alaala sa Allah تعالى at pagsasagawa ng mga boluntaryong salah at pagbasa ng Qur'an. Kapag dumating na ang Imam at nag-umpisa ng mag-Khutbah (sermon) ay dapat makinig ng mabuti at huwag ng magsasalita dahil ang pagsasalita ay nakakawalang-bisa ng *Salatul-Jumu'ah*.

(1) Bukhari at Muslim

(2) Surah Al-Jumu'ah 62:9

(3) Saheeh Muslim

(4) Saheeh Muslim

(5) Bukhari at Muslim

Pamamaraan ng Salaatul-Jumu'ah

Mayroong dalawang *Adhan* ang *Salaatul-Jumu'ah*. Ang unang *Adhan* ay ginagawa bago pumasok ang oras ng *Salah* upang paalalahanan ang mga tao na maghanda na para sa *Salah*. Kapag dumating na ang *Imam* ay tatawag ulit ng pangalawang *Adhan*, pagkatapos ay magbibigay ng dalawang *Khutbah* (sermon) ang *Imam*. Papaalalahanan niya ang mga Muslim ng pagkakaroon ng takot sa Allah ﷻ at tuturuan sila sa kanilang relihiyon. Ang *Imam* ay mauupo sandali sa pagitan ng dalawang *Khutbah*. Pagkatapos ng pangalawang *Khutbah* ay bibigkasin na ang *Iqamah* upang umpisahan ang *Salah*, at pangungunahan ng *Imam* ang *Salah* ng may dalawang *Rak'ah* kasama ang mga *Ma'moom* (tagasunod) ng malakas ang pagbigkas.

Sa panahon ng *Khutbah* ay nararapat sa bawat Muslim ang manatiling tahimik at hindi nagsasalita at hindi abala sa ibang mga bagay.

Ano ang dapat gawin kapag nahuling dumating sa *Salatul-Jumu'ah*:

Nauna na ang paliwanag ng kahalagahan ng pagiging maaga ng pagpunta sa *Salatul-Jumu'ah*, ngunit kapag nangyaring nahuli sa pagdating ay mayroong tatlong sitwasyon:

1. Kapag dumating ka habang nagsesermon na ang *Imam* ay huwag kang uupo hangga't hindi ka nakakapag-*Salah* ng dalawang *Rak'ah* na maikli, pagkatapos ay maupo at makinig sa *khutbah*.
2. Kapag dumating ka nang nag-umpisa na ang *Salah* at nakahabol ka sa *ruku'* ng una o pangalawang *Rak'ah* ay kasali ka sa *Jumu'ah*, kung kaya ang dapat mong gawin ay kumpletuhin ang *Rak'ah* na nawala sa iyo, kung mayroon man, pagkatapos mag-*Tasleem* ng *Imam*.
3. Kapag dumating ka at nakatayo na mula sa *ruku'* ng pangalawang *rak'ah* ang *Imam* ay hindi ka na nakahabol sa *Salatul-Jumu'ah*. Kung kaya ang dapat mong gawin ay kumpletuhin ang natitirang *Salah* kasama ang *Imam* hanggang siya ay mag-*Tasleem*,



Ang Salah ng 'Eid (Salah ng Pagdiriwang)

Ito ang Salah na natatangi sa Araw ng 'Eid. Ito ay *Sunnah Mu'akkadah* (malakas na itinatagubilin) na isinasagawa pagkalipas sumikat ang araw sa Araw ng 'Eid Al-Fitr (pagkatapos ng Ramadhan) at Araw ng 'Eid Al-Adha (sa panahon ng Hajj). Mag-uumpisa ang *Salatul-'Eid* pagkatapos sumikat ang araw ng kasing taas ng sibat at ito ay mga 15 minuto pagkatapos ang pagsikat ng araw.

Ang pamamaraan ng *Salatul-'Eid* ay mag-Salah ng dalawang *Rak'ah* kasama ang *Imam*. Mag-*Takbeer* ng 7 beses sa unang *Rak'ah*, pagkatapos ay bigkasin ang *Al-Fatihah* at iba pang talata sa Qur'an, at pagkatapos ay kumpletuhin ang unang *Rak'ah*. Pagtayo ulit sa pangalawang *Rak'ah* ay mag-*Takbeer* ng 5 beses, at pagkatapos ay bigkasin ang *Al-Fatihah* at iba pang talata sa Qur'an, kumpletuhin ang pangalawang *Rak'ah* at mag-*Tasleem*. Pagkatapos ng Salah ay magbibigay ang *Imam* ng dalawang *khutbah* bilang paalaala sa mga tao at pagtuturo sa kanila ng kanilang relihiyon.



Ang Salah ng *Janazah* (Panalangin para sa patay)

Ito ang Salah para sa isang namatay na Muslim at ito ay isinasagawa sa ganitong pamamaraan: Iilagay ang bangkay sa harapan ng *Imam* pagkatapos nito mapaliguan at mabalot ng telang puti. Mag-*Takbeer* ng apat na beses pagkatapos ay mag-*Tasleem* ng isang beses lang sa bandang kanan habang nakatayo. Ang mga sumusunod ay pagpapaliwanag:

1. Bigkasin ang unang *Takbeer* ("Allahu Akbar"), pagkatapos ay bigkasin ang Al-Fatihah lamang.
2. Bigkasin ang pangalawang *Takbeer*, pagkatapos ay mag-salawat para sa Propeta ﷺ. Ito ang tinatawag na *Salatul-Ibrahimiyyah* ("Allahumma salli 'alaa Muhammad..."). Katulad ito ng binibigkas sa huling *Tashahhud* sa bawat Salah bago mag-*Tasleem*.
3. Bigkasin ang pangatlong *Takbeer*, at ipanalangin ang patay.
4. Bigkasin ang pang-apat na *Takbeer*, pagkatapos ay tumahimik ng bahagya, at pagkatapos ay mag *Tasleem* sa bandang kanan lamang.



Ang Salah ng Naglalakbay (*Musaafir*)

Dapat magpursigi ang bawat Muslim sa pagsasagawa ng Salah sa lahat ng pagkakataon. Dahil sa habag ng Allah ﷻ at upang mapadali ang Islam sa taong naglalakbay, pinapahintulatang paiklihin (*Qasr*) ang kanyang Salah na may apat na *Rak'ah* na gawin na lamang dalawang *Rak'ah*, at pagsamahin (*Jama'ah*) ang *Dhuhr* at *'Asr*, at ganoon din ang *Maghrib* at *'Isha* habang naglalakbay. Ang itinuturing na naglalakbay (*Musaafir*) na maaaring magpaikli ng Salah ay kapag ang layo ng paglalakbay ay hihigit sa 80 kilometro. Ang mga sumusunod ay ang pagpapaliwanag:

1. Kapag ikaw ay nagsimula nang maglakbay at nakaalis ka na sa iyong bayan at inabutan ka ng Salah ay maaari mong pagsamahin ang Salah ng *Dhuhr* at *'Asr* sa kahit saan man matapat ang oras ng isa sa dalawang Salah na ito. Mag-*Iqamah* at mag-Salah ka ng dalawang *Rak'ah* lamang na *Dhuhr*, pagkatapos ay mag-*Iqamah* muli at mag-Salah ng dalawang *Rak'ah* na *'Asr*.
2. Maaari mo rin pagsamahin ang Salah ng *Maghrib* at *'Isha* sa alinmang oras ng isa sa dalawang Salah na ito, ngunit ang *Maghrib* ay tatlong *Rak'ah* pa rin tulad din ng dati at ang *'Isha* ay dalawang *Rak'ah* na lamang kapalit ng apat na *Rak'ah*.
3. Kapag nakarating ka na sa lugar na pupuntahan mo at mananatili ka roon ng hanggang apat na araw ay pinahihintulutan kang magpaiksi ng Salah ngunit itinatagubilin na mag-Salah ka sa tamang oras ng bawat Salah at huwag ng pagsamahin ang mga Salah. At kapag ang intensiyon mo ay manatili ng higit sa apat na araw ay nararapat sa iyo ang pagsasagawa ng bawat Salah sa tamang oras at hindi na pagsamahin (*Jama'ah*) at hindi na rin paiiksihin (*Qasr*).



Ang Salah ng Maysakit (Mareedh)

Hindi kailanman maaring ipagpaliban ng isang Muslim ang Salah kahit sa panahon na siya ay maysakit hangga't nasa tamang kaisipan pa rin siya. Dapat sikapin ng isang Muslim na maysakit na mag-Salah sa takdang oras nito sa abot ng kanyang makakaya. Kapag hindi niya kayang tumayo ay maari siyang mag-Salah ng nakaupo. Kapag hindi niya kaya ng nakaupo ay magsa-Salah siya ng nakahiga. Kapag hindi niya kayang yumuko (*Ruku'*) o magpatirapa (*Sujood*) ay ibaba na lamang niya ng bahagya ang kanyang ulo sa pag-*Ruku'* at higit na mababa naman para sa *Sujood*. At kapag hindi na niya kayang igalaw ang kanyang katawan at ulo ay mag-Salah na lamang siya sa kanyang puso at mag *Ruku'*, *Sujood* at *Juloos* sa pamamagitan ng intensyon.





Nakasulat na Pagsasanay

1. Kumpletuhin ang mga sumusunod:

a. Ano ang mga natatangi (espesyal) para sa Araw ng *Jumu'ah*?

-
-
-

b. Ang mga mabubuting-asal sa Araw ng *Jumu'ah*:

-
-
-

c. Ang Salah para sa patay (*Janazah*) ay binubuo ng apat na *Takbeer*, at ginagawa sa bawat *Takbeer* ang mga sumusunod:

- Bigkasin ang unang *Takbeer*, at pagkatapos ay:
- Bigkasin ang pangalawang *Takbeer*, at pagkatapos ay:
- Bigkasin ang pangatlong *Takbeer*, at pagkatapos ay:
- Bigkasin ang pang-apat na *Takbeer*, at pagkatapos ay:

2. Bilugan ang tamang sagot sa mga sumusunod:

a. Kapag ang *Imam* ay nagbibigay na ng *Khutbah* sa araw ng *Jumu'ah* sa oras ng pagpasok mo sa Masjid, ang dapat mong gawin ay:

1. Maupo at makinig ng *Khutbah*.
2. Mag-Salah ng dalawang maikling *Rak'ah*, at pagkatapos ay maupo at makinig ng *Khutbah*.
3. Manatiling nakatayo hanggang sa mag-*Iqamah* para sa Salah.

b. Kapag nakatayo na ang *Imam* sa *ruku'* ng pangalawang *Rak'ah* ng *Salatul-Jumu'ah* sa pagpasok mo ng Masjid, ang dapat mong gawin ay:

1. Kumpletohin ang kasalukuyang *Rak'ah* kasama ang *Imam* at pagkatapos mag-*Tasleem* ang *Imam* ay magsagawa ng pangalawang *Rak'ah*.
2. Sundin ang *Imam*, kapag nag-*Tasleem* na ito ay tatayo upang magsagawa ng apat na *Rak'ah* ng *Salatul-Dhuhr*.
3. Kumpletohin ang *Rak'ah* na nawala sa iyo kasama ang *Imam* at pagkatapos mag-*Tasleem* ang *Imam* ay magsagawa ng tatlong *Rak'ah* at mag-*Tasleem* dahil ang Salah mo ay nagiging *Dhuhr*.



Nakasulat na Pagsasanay

- Binubuo ang *Salatul-'Eid* ng dalawang *Rak'ah*, nagta-*Takbeer* ang *Imam* ng:
 - Siyam na *Takbeer* sa unang *Rak'ah* at anim na *Takbeer* sa pangalawang *Rak'ah*.
 - Pitong *Takbeer* sa unang *Rak'ah* at lima naman sa pangalawang *Rak'ah*.
 - Pitong *Takbeer* sa unang *Rak'ah* at anim naman sa pangalawang *Rak'ah*.
- Kapag ikaw ay may sakit at hindi mo kayang mag-*Salah* ng tulad ng walang sakit, ang dapat mong gawin ay:
 - Hihintayin mo hanggang gumaling ka pagkatapos ay babayaran mo na lang ang lahat ng *Salah* na nawala sa iyo noong ikaw ay may sakit.
 - Hihintayin mo hanggang ikaw ay gumaling bago ka magsimula ng pagsasagawa ng *Salah* at wala kang babayaran na *Salah*.
 - Mag-*Salah* tuwing oras ng *Salah* sa tamang oras nito sa abot ng iyong makaakaya at huwag mong ipagpaliban ang *Salah* sa tamang oras nito.
- Kapag ikaw ay naglalakbay (musaafir) ay pinahintulutang kang:
 - Pagsamasamahin ang lahat ng *Salah* sa iisang oras lang.
 - Pagsamahin ang *Dhuhr* at *'Asr*, at pagsamahin ang *Maghrib* at *'Isha*.
 - Pagsamahin at paikisihin ang *Dhuhr* at *'Asr*, at pagsamahin ang *Maghrib* at *'Isha* ng maikli ang *'Isha* samantalang ang *Maghrib* ay mananatiling kumpleto.



Ginagawang Pagsasanay

- Hilingin sa mag-aaral na magsagawa ng *Salah* para sa patay (*Janazah*).
- Hilingin sa mag-aaral na magsagawa ng *Salatul-'Eid*.
- Hilingin sa mag-aaral na gayahin ang *Salah* ng maysakit sa magkakaibang kalagayan tulad ng hindi makatayo, hindi makaupo, at hindi maka-*ruku'* o hindi maka-*Sujood* at iba pa.

Mga Bagong Salita at Termino

Nu.	Arabiko	Pagsasatitik	Kahulugan
1	الجمعة	Al-Jumu'ah	Ang araw ng Biyernes
2	يوم	Yawm	Araw
3	عيد الفطر	'Eid Al-Fitr	Pagdiriwang para sa pagkatapos ng Ramadan
4	مرض	Maradh	Sakit
5	سفر	Safar	Paglalakbay
6	جنازة	Janaazah	Libing
7	جمع	Jama'a	Pinagsama
8	قصر	Qasar	Pinaiksi
9	خطبة	Khutbah	Sermon
10	عيد الأضحى	'Eid Al-Adhha	Pagdiriwang para sa Hajj

"Katiyakan, ipinagkaloob Namin sa iyo, O Muhammad, ang pambungad ng Qur'an, na pitong talata, na inuulit-ulit ang pagbibigkas tuwing Salah, at ipinagkaloob Namin sa iyo ang Dakilang Qur'an." ⁽¹⁾

Yunit ng Athkaar-us-Salah (Ang mga binibigkas sa Salah)



Talaan ng mga Nilalaman

Pahina	Mga Paksa
96	Unang Aralin: Al-Fatihah
97	Surah Al-Fatihah
98	Ang kahalagahan at kabutihan ng Surat Al-Fatihah
98	Paano magsisimulang basahin ang Banal na Qur'an
100	Nakasulat na Pagsasanay
100	Ginagawang Pagsasanay
101	Mga Bagong Salita at Termino
102	Pangalawang Aralin: Surat Al-Ikhlās at ang Mu'awwidatayn
103	Surat Al-Ikhlās (Kabanata ng Katapatan)
104	Surat Al-Falaq (Kabanata ng Bukang Liwayway)
105	Surat An-Nas (Kabanata ng Sangkatauhan)
106	Ang kabutihan ng Surat Al-Ikhlās at Al-Mu'awwidatayn
107	Nakasulat na Pagsasanay
107	Ginagawang Pagsasanay
108	Mga Bagong Salita at Termino

Unang Aralin

Ang Al-Fatihah (Ang Pambungad na Kabanata)

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kaphintulutan ng Allah ﷻ na:

- Kabutihan ng Surah Al-Fatihah
- Pagbigkas sa tamang pamamaraan ng Surah Al-Fatihah.
- Isaulo ang Surah Al-Fatihah

Kabuuan ng Aralin:

- Nakasulat na Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino

Kinakailangang napag-aralan na:

- Ang aralin mula sa unang baytang ng Athkarus-Salah,
- Ang una at pangalawang Aralin mula sa yunit ng Salah.



Surat Al-Fatihah

Ang *Surat Al-Fatihah* (Pambungad na Kabanata) ang unang Surah sa *Mus-haf* (Aklat ng Qur'an). Ito ang nakakuha ng ika-unang bilang sa pagkakasunod-sunod ng mga *Surah* ng Banal na Qur'an. At ito ang unang dapat maisaulo ng isang Muslim mula sa Banal na Qur'an.

- (1) Sa ngalan ng Allah, ang Pinakamapagpala, ang Pinakamaawain.
- (2) Ang lahat ng papuri at pasasalamat ay sa Allah lamang, Panginoon ng lahat ng nilalang.
- (3) Ang Pinakamapagpala, ang Pinakamaawain.
- (4) Ang Hari sa Araw ng Paghuhukom.
- (5) Ikaw lamang ang aming sinasamba at ikaw lamang ang hinihingan namin ng tulong.
- (6) Patnubayan Mo kami sa Matuwid na Landas.
- (7) Sa landas ng mga ginawaran Ninyo ng Inyong mga biyaya at hindi sa landas na umaani ng Inyong pagkapoot, at hindi sa landas ng mga napaligaw sa patnubay.



Ang Pagbigkas ng Surat Al-Fatihah

Ang kahalagahan at kabutihan ng Surah Al-Fatihah

Ang Surat Al-Fatihah, na tinatawag ding Pambungad ng Aklat (*Fatihatul-Kitab*), ang pinakadakilang Surah sa Banal na Qur'an.

Isinalaysay ni Abu Said bin Al-Muwla ؓ: *Ako ay nagsasagawa ng Salah sa loob ng Masjid. Tinawag ako ng Propeta at hindi ko siya sinagot. Sinabi ko sa kanya: O Sugo ng Allah ako ay nagsasagawa ng Salah. Ang sinabi niya: Di ba sinabi ng Allah "Tugunan ninyo ang panawagan ng Allah at ang Kanyang Sugo kapag tinawag kayo sa makakabuti para sa inyo"? Pagkatapos sinabi niya sa akin: Tuturuan kita ng pinakadakilang Surah sa Qur'an bago ka lumabas sa Masjid na ito, at kinuha niya ang aking kamay. Nang nais na niyang lumabas sinabi ko sa kanya: Di ba sinabi mo sa akin na tuturuan mo ako ng pinakadakilang Surah sa Banal na Qur'an? Sinabi niya: "Alhamdu Lillaahi Rab-bil 'Aalameen" ito ang pitong Talata at Dakilang Qur'an na ibinigay sa akin".⁽¹⁾*

Ibinibilang ito na pinakamahalagang Surah sa Banal na Qur'an dahil ang pagbigkas nito sa Salah ay kasama sa mga haligi ng Salah, at hindi magiging tama ang Salah ng sinuman na hindi bumibigkas nito. Sinabi ng Propeta ؐ: "Walang Salah ang sinuman na hindi nagbigkas ng pambungad ng aklat (*Surah Al-Fatihah*)".⁽²⁾

Paano magsisimulang basahin ang Banal na Qur'an?

Kapag magsisimula kang magbasa ng Qur'an sa pagsasagawa ng Salah at iba pa sa Salah, ay magsimula muna sa *Isti'athah* (paghingi ng proteksiyon mula sa Allah ﷻ laban kay satanas na isinumpa). Sinabi ng Allah ﷻ: "Kapag binabasa mo ang Qur'an ay humingi ka ng proteksiyon mula sa Allah laban kay satanas na isinumpa".⁽³⁾ Ito ang bigkasin mo:

أَعُوذُ بِاللَّهِ مِنَ الشَّيْطَانِ الرَّجِيمِ

A'oothu bil-lahi minash-shaytanir-rajeem

Ako ay humihingi ng proteksiyon mula sa Allah laban kay satanas na isinumpa.

Pagkatapos ay bigkasin ang sumusunod (*basmalah*):

بِسْمِ اللَّهِ الرَّحْمَنِ الرَّحِيمِ

Bismil-lahir-rahmanir-raheem

Sa galan ng Allah, ang Pinakamapagpala, ang Pinakamaawain.

(1) Saheeh Al-Bukhari

(2) Saheeh Al-Bukhari

(3) Surah An-Nahl 16:98

Ang Basmalah ay binibigkas tuwing magbabasa ng kahit anong umpisa ng Surah. Ngunit kapag magbabasa ng Qur'an na hindi sa umpisa ng Surah ay sapat na ang Isti'athah. Kapag binuksan mo ang Mushaf ay makikita mo na ang lahat ng Surah ay nagsisimula sa Basmalah maliban sa isa. Ito ay ang Surat At-Tawbah, ang ika-9 na kabanata ng Qur'an.

Pagbigkas at pagsasaulo ng Surat Al-Fatihah

Dapat magpursigi ang bawat Muslim sa pagbigkas ng Surat Al-Fatihah sa tamang pamaraan, at maisaulo ito ng mabuti upang mabigkas ito sa kanyang Salah. Kung kaya, dapat mong pag-aralan ang pagbigkas mula sa isang dalubhasang guro ng *Tajweed* at pakinggan mula sa nai-rekord na pagbabasa ng Qur'an. Ito ay makakatulong sa iyo sa pagsasaulo sa pamamagitan ng paulit-ulit na pagsubaybay ng pagbasa ng mga dalubhasa hanggang sa maisaulo mo ng mabuti. Iparinig mo ang pagbabasa mo sa iyong guro o sa sinuman na nagtuturo ng Qur'an o ng *Tajweed* upang kanyang maituwid ang iyong pagbabasa.





Nakasulat na Pagsasanay

1. Kumpletuhin ang mga sumusunod:

- Tinatawag na Surat Al-Fatihah dahil:
- Pinakadakilang Surah sa Qur'an ang:
Ang katibayan nito ang Hadith:
- Bago magbasa ng Qur'an ay magsimula ng *Isti'athah*. Ito ang pagbigkas ng:
- Ang lahat ng Surah sa Qur'an ay nagsisimula ng Basmalah maliban sa Surah:
Ang Basmalah ay ang pagbigkas ng:
- Dapat maisaulo ng bawat Muslim ang Surat Al-Fatihah dahil ito ay:
mula sa mga ng Salah.

2. Ano ang hatol sa sinuman na hindi magbasa ng Surat Al-Fatihah sa kanyang Salah at ibigay ang katibayan mula sa hadith ng Propeta ﷺ

3. Kapag ikaw ay nagsasagawa ng Salah sa likod ng Imam, at ito ay nagbabasa ng malakas, at nakumpleto na niya ang Surat al-Fatihah sa pagbigkas ng "wa ladh-dhal-leen", ang dapat mong sabihin ay:



Ginagawang Pagsasanay

- Pakinggan sa nai-rekord na CD o Tape ang Surat Al-Fatihah at sundan ng paulit-ulit, dalawang talata o di kaya tatlo araw-araw hanggang sa maisaulo ang Surah.
- Magsagawa ng dalawang Rak'ah Salah na malakas ang pagbasa ng Surat Al-Fatihah at mga *Thikr* ng Salah na nakikita ng iyong guro.



Ang Pagbigkas ng Surah Al-Fatihah



Ang pagtawag ng Iqamah



Mga Bagong Salita at Termino

Nu.	Arabe	Pagsasatitik	Kahulugan
1	سورة	Surah	Kabanata
2	آية	Ayah	Talata
3	جزء	Juz'	Bahagi
4	آمين	Ameen	O Allah tanggapin Mo
5	استعاذة	Isti'aathah	Pagbigkas ng " Aoothu billahi minas-shaytanir-rajeem "
6	ضالين	D haaleen	Mga naliligaw
7	الفاحة	Al-Fatihah	Pambungad
8	تلاوة	Tilawah	Pagbabasa
9	الشیطان	Shaytan	Demonyo
10	الرجيم	Ar-Rajeem	Isinumpa

Pangalawang Aralin

Surat Al-Ikhlās at ang Muawwidatayn

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kaphintulutan ng Allah ﷻ na:

- Pagbabasa ng Surat Al-Ikhlās sa tamang pamamaraan.
- Pagsasaulo ng Surat Al-Ikhlās.
- Pagbabasa ng Surat Al-Falaq sa tamang pamamaraan.
- Pagsasaulo ng Surat Al-Falaq.
- Pagbabasa ng ng Surat An-Naas sa tamang pamamaraan.
- Pagsasaulo ng Surat An-Naas.
- Maniwala sa kabutihan ng Surat Al-Ikhlās, Al-Falaq, at An-Naas.



Kabuuan ng Aralin:

- Nakasulat na Aralin
- Nakasulat na Pagsasanay
- Ginagawang Pagsasanay
- Mga Bagong Salita at Termino

Kinakailangang napag-aralan na:

- Ang unang aralin mula sa yunit ng Athkarus-Salah
- Ang una at pangalawang aralin mula sa yunit ng Salah.

Surat Al-Ikhlās (Kabanata ng Katapatan)

بِسْمِ اللَّهِ الرَّحْمَنِ الرَّحِيمِ
قُلْ هُوَ اللَّهُ أَحَدٌ
اللَّهُ الصَّمَدُ لَمْ يَلِدْ وَلَمْ يُولَدْ
وَلَمْ يَكُنْ لَهُ كُفُوًا أَحَدٌ

Sa ngalan ng Allah, ang Pinakamapagpala, ang Pinakamaawain.

(1) Sabihin mo (O Muhammad): Siya ang Allah, ang Nag-iisa.

(2) Allah, ang Walang-Hanggan, ang Sakdal at Ganap [ang may sariling kasapatan, ang lahat ng mga nilalang ay umaasa sa Kanyang pagtataguyod].

(3) Hindi Siya nagka-anak at hindi rin Siya ipinanganak.

(4) At walang anuman ang maihahambing sa Kanya.



Ang Pagbigkas ng Surat Al-Ikhlās

Ang Surat Al-Ikhlās ay binubuo ng apat na talata, ngunit ito ay katumbas ng tatlong-bahagi (1/3) ng Qur'an, tulad ng sinabi ng Propeta ﷺ: "Ako ay sumusumpa sa Kanya na may hawak ng aking buhay, na katunayan ito ay katumbas ng tatlong bahagi ng Qur'an".⁽¹⁾

Tinawag ito na Surat Al-Ikhlās (katapatan) dahil nakasaad dito ang kaisahan ng Allah ﷻ (Tawheed) at ang taus-pusong pagsamba lamang sa Kanya, at pagtanggì ng kahit anung uri ng pagtatambal, pagkukumpara at pagkakaroon Niya ng anak. Ang karagdagang paliwanag tungkol sa mga kabutihan ng Surah na ito ay nasa katapusan ng aralin na ito.

(1) Saheeh Al-Bukhari

Surat Al-Falaq (Kabanata ng Bukang Liwayway)

بِسْمِ اللَّهِ الرَّحْمَنِ الرَّحِيمِ
قُلْ أَعُوذُ بِرَبِّ الْفَلَقِ
مِنْ شَرِّ مَا خَلَقَ ۝ وَمِنْ شَرِّ غَاسِقٍ إِذَا وَقَبَ ۝
وَمِنْ شَرِّ النَّفَّاثَاتِ فِي الْعُقَدِ ۝
وَمِنْ شَرِّ حَاسِدٍ إِذَا حَسَدَ ۝

Sa ngalan ng Allah, ang Pinakamapagpala, ang Pinakamaawain.

- (1) Sabihin mo (O Muhammad!) "Ako ay nagpapakupkop sa Panginoon ng Bukang Liwayway."
- (2) Mula sa kasamaan ng Kanyang nilikha.
- (3) At mula sa kasamaan ng gabi (kadiliman) kapag ito ay lumalaganap.
- (4) At mula sa kasamaan ng mga nagsasagawa ng pangkukulam kapag sila ay umiihip sa mga buhol.
- (5) At mula sa kasamaan ng mga maiinggitin kapag sila ay naiinggit."



Ang Pagbigkas ng Surat Al-Falaq

Ang Surat Al-Falaq ang pangalawa sa katapusan ng Mushaf. Ito ang isa sa *Mu'awwidatayn* (dalawang surah na humihingi ng proteksiyon sa Allah ﷻ). Naitala ang mga kabutihang idinudulot nito kapag bininigkas pagkatapos ng bawat obligadong Salah. Makikita mo ang mga kabutihan na ito sa pagtatapos ng aralin na ito In sha' Allah.

Surat An-Nas (Kabanata ng Sangkatauhan)

بِسْمِ اللَّهِ الرَّحْمَنِ الرَّحِيمِ
قُلْ أَعُوذُ بِرَبِّ النَّاسِ
مَلِكِ النَّاسِ ۝ إِلَهِ النَّاسِ ۝
مِن شَرِّ الْوَسْوَاسِ الْخَنَّاسِ ۝
الَّذِي يُوسَسُ فِي صُدُورِ النَّاسِ ۝ مِنَ الْغَيْثِ وَالنَّاسِ ۝

Sa ngalan ng Allah, ang Pinakamapagpala, ang Pinakamaawain.

- (1) Sabihin (mo O Muhammad!) "Ako ay nagpapakupkop sa Panginoon ng Sangkatauhan"
- (2) Ang Hari ng sangkatauhan
- (3) Ang Diyos ng sangkatauhan
- (4) Mula sa kasamaan ng isang bumubulong na lumilisan
- (5) Na bumubulong sa dibdib [o puso] ng mga tao
- (6) Mula sa mga Jinn at Sangkatauhan."



Ang Pagbigkas ng Surah An-Naas

Ang Surat An-Nas ang pinakahuling Surah sa Mushaf. Ito ay isa sa dalawang Mu'awwidatayn na dapat na maisaulo ng isang Muslim, at inuulit-ulit bigkasin pagkatapos ng mga obligadong Salah at bago matulog sa gabi kasama ng Surat Al-Ikhlās at Al-Falaq.

Ang kabutihan ng Surat Al-Ikhlās at dalawang Mu'awwidatayn

Hinihikayat ang bawat Muslim na basahin ng paulit-ulit ang mga Surah na ito (*Al-Ikhlās, Al-Falaq at An-Nas*) pagkatapos ng limang obligadong Salah. Basahin ang bawat Surah ng tatlong beses pagkatapos ng Salah ng *Fajr* at *Maghrib*, at isang beses lamang pagkatapos ng iba pang mga Salah.

Naisalaysay ni Abdullah Bin Khabib ؓ, na ang Propeta ﷺ ay nagsabi sa kanya: “Sabihin mo ang: “Qul huwal-lahu *ahad*” at ang dalawang Mu'awwidatayn ng tatlong beses sa umaga at hapon, at magiging sapat na ito sa iyo ang lahat ng bagay.”⁽¹⁾

Sinabi ni Uqbah Bin Aamir ؓ: “Ipinag-utos sa akin ng Sugo ng Allah na basahin ang dalawang Mu'awwidatayn pagkatapos ng bawat Salah.”⁽²⁾

Inirerekomenda rin na basahin ang *Surat Al-Ikhlās* at ang dalawang *Mu'awwidatayn* bago matulog. Hihipan mo ang iyong dalawang kamay at ipahid ang mga ito sa iyong katawan ng tatlong beses, tulad ng ginawa ng Propeta ﷺ.

Isinalaysay ni Aishah ؓ na bago matulog ang Propeta sa kanyang silid tuwing gabi ay pinagdidikit niya ang kanyang mga kamay at hinihipan niya ang mga ito at kanyang babasahin dito ang: “Qul huwal-lahu *Aahad*, Qul A'oothu birab-bil-Falaq, at Qul A'oothu birab-bin-Nas”; pagkatapos ay kanyang ipinapahid ang mga ito sa kanyang katawan sa abot ng kanyang makakaya, simula sa kanyang ulo, mukha at sa harapan ng kanyang katawan. Ginagawa niya ito ng tatlong beses.”⁽³⁾

Naipahayag din sa kabutihan ng *Surat Al-Ikhlās* ang naisalaysay ng Ina ng mga Mu'min na si Aishah ؓ, na ang Propeta ay nagpadala ng isang lalaki na mamuno sa isang grupo ng mga mandirigma, na ang naging kaugalian nitong basahin sa tuwing magsasagawa sila ng Salah ay ang: “Qul huwal-lahu *ahad*”. Nang nakabalik na sila ay binanggit nila ito sa Propeta. Sinabi ng Propeta: “Tanungin ninyo kung bakit ganito ang kanyang ginagawa; kung kaya tinanong nila. Ang kanyang sinabi: “dahil ito ang katangian ng Allah, kaya gusto kong basahin”. Sinabi ng Propeta: “Sabihin ninyo sa kanya na katiyakan mahal siya ng Allah.”⁽⁴⁾

Mula kay Abu Saeed Al-Khudree ؓ na nagsabi: Sinabi ng Propeta ﷺ: “Hindi ba kaya ng isa sa inyo na magbasa ng tatlong-bahagi ng Qur'an sa loob ng isang gabi?” Ang sinabi nila: “Sino sa amin ang may kakayanan dito O Sugo ng Allah?” Sinabi niya: “Ang ‘Qul huwal-lahu *ahad*, Allahus-Samad’ ay tatlong-bahagi ng Qur'an.”⁽⁵⁾

(1) Tirmidhi

(2) Pahayag nila Ahmad, Abu Dawood, Nisa-ee, pinatotohanan ni Haakim, at sinabi nito: Nasa kondisyon ni Muslim

(3) Saheeh Al-Bukhari

(4) Saheeh Al-Bukhari

(5) Saheeh Al-Bukhari

Nakasulat na Pagsasanay

1. Kumpletuhin ang mga sumusunod:

- Kasama sa mga kabutihan ng Surat Al-Ikhlās ay ang pagiging katumbas ng:
..... dahil nilalaman nito ang :
- Ang tawag sa Surat Al-Falaq at Surat An-Nas ay:
- Naisalaysay ni Aishah رضي الله عنها na palaging binibigkas ng Propeta صلى الله عليه وسلم ang Surat Al-Ikhlās at dalawang *Mu'awwidatayn* tuwing sa gabi.
- Inirekomenda ang pagbasa ng Surat Al-Ikhlās at dalawang *Mu'awwidatayn* ng pagkatapos ng bawat Salah, at pagkatapos naman ng Salah Al-Fajr at Maghrib ay beses.
- Tinawag ang Surah "*Qul huwal-lahu ahad*" na Surah: dahil:
.....



Ginagawang Pagsasanay

- Pakinggan sa nai-rekord na CD o Tape ang Surat Al-Ikhlās at sundan ito ng paulit-ulit.
- Pakinggan sa nai-rekord na CD o Tape ang Surat Al-Falaq at sundan ito ng paulit-ulit.
- Pakinggan sa nai-rekord na CD o Tape ang Surah An-Nas at sundan ito ng paulit-ulit.



Ang Pagbigkas ng Surah An-Nas



Ang Pagbigkas ng Surah Al-Falaq



Ang Pagbigkas ng Surah Al-Ikhlās



Mga Bagong Salita at Termino

Nu.	Arabiko	Pagsasatitik	Kahulugan
1	اخلاص	I khl ^h as	Katapatan
2	الفلق	Al-Falaq	Bukang-liwayway
3	العقد	Al-'Uqad	Mga buhol
4	حاسد	H asid	Mainggitin
5	حسد	H asad	Inggit
6	الناس	An-Nas	Mga tao
7	الوسواس	Al-Waswas	Mga bumubulong
8	صدور	S udoor	Mga dibdib
9	الجن	Al-Jinn	Jinn / mga nilalang na hindi nakikita
10	معوذتين	Mu'aww ^h atayn	Dalawang kabanata na humihingi ng proteksyon mula sa Allah



"Kumuha ka (O Muhammad) ng kawanggawa mula sa kanilang kayamanan upang sila ay mapadalisay nito at ito ay lalo pang mag-ibayo, at ikaw ay manalangin sa Allah para sa kanila. Katotohanan, ang iyong panalangin ay kapanatagan para sa kanila. At ang Allah ay lubos na nakakarinig, ang Ganap na Maalam)." ⁽¹⁾

Yunit ng Zakah

(Kawanggawa)



Talaan ng mga Nilalaman

Pahina	Mga Paksa
112	Unang Aralin: Ang Mga Ari-arian na Dapat Kuhanan ng Zakah
113	Ang Mga Ari-arian na Dapat Kuhanan ng Zakah
115	Nakasulat na Pagsasanay
116	Mga Bagong Salita at Termino
118	Pangalawang Aralin: Ang Mga Tatanggap ng Zakah
119	Ang Mga Tatanggap ng Zakah
120	Ilang usapin tungkol sa Zakah
121	Nakasulat na Pagsasanay
122	Mga Bagong Salita at Termino

Unang Aralin

Ang mga ari-arian na kinakailangang
kuhanan ng Zakah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kaphahintulutan ng Allah ﷻ na:

- Malaman ang mga ari-arian na dapat kuhanan ng Zakah.
- Matandaan ang nisab ng ginto at pilak.
- Matuos ang halaga ng zakah kapag naabot ang nisab.

Kabuuan ng Aralin:

- Nakasulat na Aralin
- Nakasulat na Pagsasanay
- Mga Bagong Salita at Termino



Kinakailangang napag-aralan na:

- Ang unang aralin ng Zakah sa unang baytang.

Ang mga ari-arian na dapat kuhanan ng Zakah

Ang mga sumusunod na ari-arian ay dapat kuhanan ng Zakah:

1. Ang Zakah ng Ginto at Pilak (Zakaatun-Naqdayn):

Ang *nisab* (pinakamaliit na halaga na kinakailangang maabot upang maging obligado ang zakah) para sa Zakah ng ginto ay kinakailangang umabot ito sa 85 gramo at 595 na gramo para naman sa pilak. Sinuman ang nagmamay-ari ng ganito sa loob ng isang taon (kalendaryong hijri) ay dapat niya itong kunan ng 2.5% bilang kabayaran ng Zakah. Magkasing tulad din sa ginto at pilak ang lahat ng uri ng salapi. Sinuman ang nagmamay-ari ng salapi sa buong taon at naabot ang *nisab* ay kinakailangang magbayad ng 2.5% ng halaga nito.

Sa ibang paliwanag naman: kapag gusto mong malaman ang halaga ng Zakah para sa ginto, pilak at salapi ay hati-hatiin mo ang kayamanan ng 40 kung ano ang lumabas na resulta yaon ang halaga ng Zakah, halimbawa: $1/40$ ng 10,000 = 250. Kinakailang niyang kunan ito ng dalawang-daan at limampu bilang Zakah.

2. Ang Zakah ng mga Kalakal at mga Paninda:

Kabilang dito ang anumang bagay na gagamitin sa pakikipagkalakal upang kumita. Ang lahat ng kayamanang pagmamay-ari ng isang tao na balak niyang ipagkalakal ay dapat kunan ng Zakah.

Naisalaysay ni Abu Dawood nagmula kay Samurah رضي الله عنه: sinasabi niya: *"Inutusan kami ng Propeta na kunan ng Zakah ang lahat ng aming ipinagbibili"*.⁽¹⁾ Kapag umabot ng *nisab* at makumpleto ang isang taon ay dapat kunan ng Zakah.

Halimbawa: kapag bibili ng mga bagay, mga sasakyan o lupain at binabalak niyang ipangkalakal upang kumita at lumipas ang isang taon ay dapat na kunan niya ng 2.5% mula sa halaga nito bilang Zakah. Subalit kung siya ay bumili ng bagay para sa personal na gamit, gaya ng lupa, bahay o sasakyan para sa personal na gamit, hindi na kinakailangan pa ang magbigay ng Zakah. Kabilang din sa pakikipagkalakal ang kabahaging nakamtan o kinita ng isang Muslim mula sa mga Kumpanya.

3. Ang Zakah ng mga hayop: Kamelyo, Baka, Kambing at Tupa

Mayroong dalawang kondisyon upang kunan ng Zakah ang mga ito:

Una: kapag ito ay pinapalago at pinapa-anak (ang ibig sabihin ay pinakikinabangan sa paggatas at iba pa, at hindi pangkalakal).

Pangalawa: Ang mga hayop ay hindi kinakailangan na alagaan at naka-kawala lamang at kumakain sa lupang pastulan sa kalakhang bahagi ng taon. Dahil kapag ang mga ito ay inaalagaan at binibigyan ng makakain sa kalakhang bahagi ng taon ay hindi dapat kunan ng Zakah, maliban lamang kung gagawing pangkalakal na ang kanyang halaga ay ihahalo sa kanyang pera upang kunan ng Zakah.

(1) Abu Dawood

Ang mga sumusunod ay *Nisab* ng mga hayop na ito:

Kamelyo: Ang *nisab* (pinakamaliit na bilang) ay 5 kamelyo: sinuman ang nagmamay-ari ng limang kamelyo o mas higit pa, at ang mga ito ay kumakain sa pastulan ng halos isang taon, ay dapat kunan ng Zakah.

Baka: Ang *nisab* nito ay 30 baka. Sinuman ang nagmamay-ari ng 30 o mas higit pa dito na mga baka ay dapat kunan ng Zakah.

Kambing at Tupa: Ang *nisab* ay 40 na kambing o tupa. Sinuman ang nagmamay-ari ng 40 o mas higit pa na kambing o tupa ay dapat kunan ng Zakah.

4. Ang mga pananim:

Kabilang dito ang mga butil, bungang-kahoy at mga produktong agrikultura. Dapat kunan ng Zakah ang lahat ng sinusukat sa gantang at iniimbak mula sa mga butil at bungang-kahoy tulad ng mais, bigas, pasas at datiles sa panahon ng anihan nito kapag umabot ng nisab na 5 wasak. Sinabi ng propeta ﷺ *“Walang zakah para sa mas mababa ng 5 wasak”* ⁽¹⁾ (bawat isang wasak ay 60 sa’a). Ang isang sa’a naman ay katumbas ng apat na *mudd*. Ang isang *mudd* naman ay katumbas ng dalawang-punong mga kamay ng isang lalaking katamtaman ang sukat hindi matangkad at hindi mababa. Ang isang wasak ay humigit kumulang na katumbas ng 612kg. Ito ang pinakamababang pagtatantya na nasa ligtas na panig.

Magkakaiba ang pamamaraan ng pagkuha ng Zakah sa mga pananim. Ito ay batay sa kung papaano nadidiligan ng tubig ang mga pananim. Kapag ito ay nabubuhay sa tubig-ulan o ilog na hindi na kinakailangan ang pagdidilig ng tagapagtanim ay dapat kunan ng Zakah katumbas ng sampung porsiyento (10%). Tulad ng sinabi ng Propeta ﷺ: *“Ang lahat ng [pananim na] nabubuhay sa tubig ilog at ulan ay sampung porsiyento.”* ⁽²⁾

Kapag ito naman ay nabubuhay sa pagdidilig ng tagapagtanim gaya ng balon at irigasyon, ito ay dapat kunan ng Zakah katumbas ng kalahati ng sampung porsiyento (5%). Tulad ng sinabi ng Propeta ﷺ: *“Ang [pananim na] nabubuhay sa pamamagitan ng pagdilig ay kalahati ng sampung porsiyento.”* ⁽³⁾

Ang mga bungang-kahoy na hindi sinusukat at hindi iniimbak tulad ng mga prutas at mga gulay ay walang Zakah.

Kasama din sa mga kayamanan na nagmumula sa lupa ang mga mineral at nakabaong-yaman. Ito ay tumutukoy lamang sa mga mineral o kayamanan tulad ng ginto o pilak na naibaon ng matagal na panahon mula sa panahon ng kamangmangan (bago dumating ang Islam). Kung ito ay mahuhukay ng isang Muslim, kinakailangan niyang magbigay ng 20% o 1/5 ng kabuuan ng kanyang nahukay bilang zakah.

(1) Bukahri at Muslim

(2) Saheeh Muslim

(3) Saheeh Al-Bukhari



Nakasulat na Pagsasanay

1. Banggitin ang mga ari-arian na dapat kuhanan ng Zakah:

- a)
- b)
- c)
- d)

2. Paano tutuusin ang halaga ng Zakah para sa kayamanan?

.....
.....
.....

3. Kumpletuhin ang sumusunod:

- a. Ang *nisab* ng ginto ay: at ang *nisab* ng pilak ay:
- b. Ang mga hayop na dapat kuhanan ng zakah ay:
 - 1.
 - 2.
 - 3.
- c. Ang *nisab* ng kamelyo ay:
- d. Ang *nisab* ng baka ay:
- e. Ang *nisab* ng kambing at tupa ay:

Mga Bagong Salita at Termino

Nu.	Arabiko	Pagsasatitik	Kahulugan
1	الذهب	Thahab	Ginto
2	الفضة	Fidh-dha	Pilak
3	تجارة	Tijaara	Kalakal
4	بيع	Bee'	Pagbebenta
5	الأسهم	As-hum	Stocks
6	شاة	Shaah	Tupa
7	البقر	Al-Baqar	Baka
8	الغنم	Al-Ghanam	Kambing
9	حبوب	Hu boob	Mga butil
10	ثمار	Thamar	Bunga



Pangalawang Aralin

Ang Mga Tatanggap ng Zakah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kaphintulutan ng Allah ﷻ na:

- Matandaan ang mga kategorya ng maaring tatanggap ng Zakah.
- Maintindihan ang mga kategorya ng maaring tatanggap ng Zakah.
- Malaman ang mga ari-arian na hindi kinukunan ng Zakah.

Kabuuan ng Aralin:

- Nakasulat na Aralin
- Nakasulat na Pagsasanay
- Mga Bagong Salita at Termino



Kinakailangang napag-aralan na:

- Ang mga aralin ng Zakah sa unang baytang.

Ang mga tatanggap ng Zakah

Ang tinutukoy dito ay kung sinu-sino ang mga tao na may karapatang tumanggap ng Zakah. Ang zakah ay hindi dapat ibigay sa sinuman maliban dito. Sila ay binanggit ng Allah ﷻ sa Surat Tawbah:

﴿ إِنَّمَا الصَّدَقَاتُ لِلْفُقَرَاءِ وَالْمَسْكِينِ وَالْعَامِلِينَ عَلَيْهَا وَالْمُؤَلَّفَةِ قُلُوبُهُمْ وَفِي الرِّقَابِ وَالْغَارِمِينَ وَفِي سَبِيلِ اللَّهِ وَابْنِ السَّبِيلِ بَدْرِيضَةً مِنَ اللَّهِ وَاللَّهُ عَلِيمٌ حَكِيمٌ ﴿١﴾

“Katotohanan, ang kawanggawa ay nakalaan lamang para sa mga dukha at maralita at sa mga kawaning naglilikom ng kawanggawa at sa mga taong ang puso ay malapit sa Islam at sa pagpapalaya ng mga alipin at sa mga may pagkakautang, at sa landas ng Allah (mga nakikipaglaban sa landas ng Allah), at sa mga naglalakbay na nagigipit. Isang tungkulin na inaatang ng Allah. At ang Allah ang higit na nakakabatid at higit na marunong.”

Hindi maaaring ibigay ang Zakah kaninuman maliban sa mga nabanggit sa ayah na ito. Sila ang mga:

1. **Ang Faqeer (pulubi o dukhang-dukha):** Mahirap na tao na nagtataglay lamang ng mas mababa sa kalahati ng kanyang pinakamaliit (minimum) na pangangailangan at ng kanyang pamilya.
2. **Ang Miskeen (Mahirap):** Siya ay mahirap, subalit mas maganda ang kanyang kalagayan kung ikukumpara sa isang pulubi. Siya ay nagtataglay ng hindi sapat sa kanyang pangangailangan at ng kanyang pamilya.
3. **Ang mga tagalikom ng Zakah:** Sila ang mga nangungulekta ng Zakah. Kapag wala silang natatanggap na kaukulang sahod mula sa pamahalaan ay karapatan ng punong-tagapamahala na bigyan sila mula sa salapi ng Zakah.
4. **Upang hikayatin at palambutin ang mga puso:** Ang mga tao na hinihikayat patungo sa Islam na may pag-asang yumakap sa Islam at ang mga Muslim na may mahinang pananampalataya upang palakasin ang kanilang pananampalataya. Ganundin ang mga prominenteng tao na tinutulungan upang mayakap nila ang Islam sa pamamagitan ng pagbibigay sa kanila ng bahagi ng Zakah, o kaya ay upang hindi sila makagawa ng mga bagay na makakapagpahamak sa Islam at sa mga Muslim.
5. **Ar-Riqaab:** Upang magpalaya ng mga alipin, at pagpapalaya ng mga bihag na Muslim.
6. **Al-Garimeen:** Yaong may pagkaka-utang na hindi kayang bayaran. Mayroon itong dalawang kategorya: a) Ang nagka-utang dahil sa pagtulong sa mga tao upang sila ay magkasundo, at b) Ang may utang dahil sa pangangailangan. Sila ay bibigyan mula sa Zakah upang mabayaran ang kanilang utang.
7. **Sabeelillaah:** Upang gamitin sa Landas ng Allah ﷻ. Ito ang pakikipaglaban sa landas ng Allah ﷻ upang protektahan ang mga Muslim. Kabilang din ang pagpapalaganap ng Islamikong kaalaman at pagda-Da'wah tungo sa Allah ﷻ.
8. **Ibnus-Sabeel:** Ang Manlalakbay. Ang taong ito ay naglalakbay at naubusan ng pang-gastos. Maaari siyang bigyan mula sa Zakah upang siya ay makarating sa kanyang pinanggalingang bayan, kahit pa siya ay isang mayaman sa kanyang bayan.

Ilang usapin tungkol sa Zakah

1. Hindi kinukunan ng Zakah ang buwanang sweldo, maliban kung ito'y nakaimpok sa loob ng isang taon sa halagang umabot ng *nisab*.
2. Ang lahat ng mga kayamanan na ginagamit para lamang sa sarili tulad ng bahay, lupang kinatatayuan ng tahanan at mga sasakyan ay walang Zakah. Ngunit kung ang mga ito ay balak ipang-negosyo upang kumita at hindi upang makabili ng ibang tahanan, ito ay dapat kunan ng Zakah kapag nakalipas ang isang taon.
3. Ang mga bahagi ng Kumpanya (*eng. shares of stocks*): kung ang isang Muslim ay nagmamay-ari ng mga ito na may layunin na manatili sa kumpanya at maging isang kasosyo (sa kumpanya) upang makinabang mula sa mga kita nito, kung gayon ang zakaah ay kailangang bayaran. Ito ay tinutuos ayon sa kung magkano ang kapital ng kumpanya pagkatapos ng isang taon at kapag naabot ang *nisab*, tulad ng nabanggit na dati (sa aklat na ito).

Ang kumpanya ng agrikultura ay naiiba sa kumpanya ng kalakalan. Ngunit kung ang kumpanya mismo ang nagbabayad ng zakaah, kung gayon ang bawat kasosyo ay hindi na kailangan pang magbayad din nito.

Gayunpaman, kung ang mga bahagi (*eng. shares of stocks*) ay pagmamay-ari na may layuning ikalakal (bumili at magbenta), kung gayon ang zakaah ng mga paninda ang dapat bayaran; ang uri ng kumpanya at ang mga aktibidad nito ay hindi isinasaalang-alang dito. Bagkus, ang Zakah ay naaayon sa halaga sa Pamilihang Merkado (*eng. stock exchange*) at hindi sa tunay na halaga sa oras ng pagbili.

4. Mayroong pagkakaiba ng opinyon ang mga '*Ulama* (paham) tungkol sa gintong ginagamit para sa sarili ngunit ang malapit sa tama ay ang *Jumhoor* (karamihan, *eng. majority*). Sinasabi nila na wala itong Zakah dahil kasama sa kayamanan na ginagamit lamang para sa sarili, kung kaya kapag ito ay naisuot ng kahit minsan lamang sa loob ng isang taon ay walang Zakah. Ngunit ang mga gintong hindi ginagamit o tinatago lamang, o mga gintong pang-negosyo ay kinukuhanan ng Zakah.





Nakasulat na Pagsasanay

1. Isulat kung sino-sino ang dapat pagkalooban ng Zakah:

- a)
- b)
- c)
- d)
- e)
- f)
- g)
- h)

2. Ano ang alituntunin ng zakah sa mga sumusunod:

- a) Dapat bang kuhanan ng Zakah ang buwanang sahod?
- b) Dapat bang kuhanan ng Zakah ang bahay kung ang intensyon ay ipagbili?
.....
- c) Dapat bang kuhanan ng Zakah ang lupa para sa pagpapatayo ng sariling bahay?
.....

2. Ano ang alituntunin ng zakah sa mga sumusunod:

- a) Al-Garimeen (May pagkakautang):
- b) Sabeelillah (Sa landas ng Allah):
- c) Ibnus-Sabeel: Ang Manlalakbay:
- d) Upang hikayatin at palambutin ang mga puso:

Mga Bagong Salita at Termino

Nu.	Arabiko	Pagsasatitik	Kahulugan
1	مستحق	Mustahiq	May karapatan
2	حاجة	Haajah	Nangangailangan
3	دين	Dayn	Utang
4	سبيل	Sabeel	Daan
5	مناجرة	Mutaajirah	Kalakalan
6	شركة	Sharikah	Kumpanya
7	سوق	Sooq	Merkado /palengke
8	قيمة	Qaymah	Halaga
9	ربح	Ribih	kita
10	أرض	Ardh	Lupa



الزكاة

الزكاة

الزكاة

“O kayong mga mananampalataya! Ang pag-aayuno ay ipinag-utos sa inyo, na kagaya ng pag-uutos sa mga nangauna sa inyo, upang kayo ay maging Al-Muttaqun.” (magkaroon ng takot sa Allah).⁽¹⁾

Yunit ng Siyam

(Pag-aayuno)



(1) Surah Al-Baqarah 2 : 183

Talaan ng mga Nilalaman

Pahina	Mga Paksa
126	Unang aralin: Ang pinagpalang buwan ng Ramadan
127	Ang Kabutihan ng Buwan ng Ramadhan
128	Ang Kabutihan ng pagsasagawa ng mabuting gawain sa buwan ng Ramadhan
130	Sino ang pinahihintulatang putulin ang pag-aayuno sa buwan ng Ramadhan?
131	Nakasulat na Pagsasanay
132	Mga Bagong Salita at Termino
134	Pangalawang aralin: Ang Mga Sunnah ng Pag-aayuno at ang mga Boluntaryong Pag-aayuno
135	Ang Mga Sunnah at mabubuting-asal ng pag-aayuno
136	Ang mga Boluntaryong Pag-aayuno
137	Papaano mababayaran ang mga araw na hindi nakapag-ayuno?
138	Mga karaniwang tanong tungkol sa Ramadan at pag-aayuno
140	Nakasulat na Pagsasanay
141	Mga Bagong Salita at Termino

Unang Aralin

Ang Pinagpalang Buwan ng Ramadhan

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kaphintulutan ng Allah ﷻ na:

- Malaman mo ang kabutihan ng buwan ng Ramadhan.
- Matandaan mo ang kabutihan ng mga gawain sa buwan ng Ramadhan.
- Matandaan mo kung sino ang pinahintulutang hindi mag-ayuno sa buwan ng Ramadhan.



Kabuuan ng Aralin:

- Nakasulat na Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Ang mga aralin mula sa yunit ng Siyam (pag-aayuno) sa unang baytang.

Ang Kabutihang Buwan ng Ramadhan

Ang Buwan ng Ramadhan ay ang pinakamabuti sa lahat ng mga buwan sa loob ng isang taon. Ito ang buwan ng Qur'an, sapagkat ang Qur'an ay nagsimulang ipahayag sa Propeta ﷺ sa buwan ng Ramadhan. Sinabi ng Allah ﷻ:

﴿ شَهْرُ رَمَضَانَ الَّذِي أُنزِلَ فِيهِ الْقُرْآنُ هُدًى لِّلنَّاسِ وَبَيِّنَاتٍ مِّنَ الْهُدَىٰ وَالْفُرْقَانِ ﴾⁽¹⁾

"Ang Ramadhan ay ang (buwan) kung kailan ipinahayag ang Qur'an, bilang gabay sa sangkatauhan, at upang maging maliwanag na (palatandaan para sa) gabay at paghatol (sa pagitan ng tama at mali)".

Ito ang buwan kung kailan binubuksan ang pintuan ng paraiso at ang pintuan ng Impiyerno ay sinasara, katulad ng sinabi ng Propeta ﷺ. Isinalaysay ni Abu Hurairah ؓ: Sinabi ng sugo ng Allah ﷻ: *"Kapag dumating na ang buwan ng Ramadhan, ang pintuan ng paraiso ay binubuksan, ang pintuan ng impiyerno ay sinasara at ang mga demonyo ay kinakadena."*⁽²⁾



(1) Surah Al-Baqarah 2:185

(2) Bukhari at Muslim

Ang kabutihan ng pagsasagawa ng mabubuting gawain sa Buwan ng Ramadhan

Kabilang sa mga kabutihan ng Buwan ng Ramadhan ay pagkakaroon ng karagdagang gantimpala sa mga mabubuting gawain at pagkakaroon ng malakas na ugnayan nito sa mga mabubuting gawain, katulad ng mga sumusunod:

1. **Ang Salah sa Gabi:** Tuwing gabi ng Buwan ng Ramadhan ang mga Muslim ay nagsasagawa ng Salah ng Taraweeh bilang pagsunod sa Sunnah ng Propeta ﷺ at paghahangad ng gantimpalang dulot ng Salah na ito, tulad ng sinabi ng Propeta ﷺ:

Isinalaysay ni Abu Hurairah رضي الله عنه: *"Sinuman ang magsagawa ng Salah sa gabi sa buwan ng Ramadhan dahil sa pananampalataya at paghahangad ng gantimpala mula sa Allah, ang kanyang mga nakaraang kasalanan ay patatawarin sa kanya."*⁽¹⁾

2. **Pagbasa at pagbigkas ng Banal na Qur'an:** ang Buwan ng Ramadhan ay ang buwan ng Qur'an, kung kaya dapat sa bawat Muslim na repasuhin at basahin ang Qur'an sa buwan na ito. Sa buwan din na ito rinerepaso ng Propeta ﷺ kasama si Jibreel عليه السلام ang Qur'an. Ngunit hindi ito nangangahulugan na hindi na babasahin ang Qur'an sa iba pang mga araw sa loob ng isang taon.

3. **Ang kawang-gawa at pamimigay ng pagkain:** Hinihikayat ng Propeta ﷺ ang kawanggawa at pamimigay ng pagkain at pagpapakain ng Futoor (almusal) sa mga nag-aayuno sa Buwan ng Ramadhan.

Isinalaysay ni Ibn 'Abbas رضي الله عنه: *"Ang Propeta ng Allah ang pinakamapagbigay na tao pagdating sa kawanggawa, mas lalo't higit sa buwan ng Ramadhan. Makikipagkita sa kanya si anghel Jibreel عليه السلام bawat taon tuwing panahon ng Ramadhan hanggang sa katapusan ng buwang ito, kung saan bibigkasin ng Propeta ang Qur'an at sa kanilang pagtatagpo ang Propeta Muhammad ang pinakamapagbigay na tao sa pagbibigay ng kawanggawa katulad ng ihip ng hangin."*⁽²⁾

Isinalaysay rin ni Zayd ibn Khaalid al-Juhani رضي الله عنه: *"Ang sinumang magpakain (iftar) sa taong nag-aayuno ay makakatanggap ng gantimpala na katulad ng gantimpala ng taong nag-aayuno samantalang hindi nababawasan ang gantimpala para sa taong nag-aayuno ng kahit kaunti."*⁽³⁾

Kung kaya karamihan sa mga Muslim sa ngayon ay namimigay ng pagkain sa oras ng Iftar para sa mga mahihirap at nangangailangan at lumalaganap ang mga pagkain para sa Iftar sa mga Masjid, kaya hindi nararamdaman ng mga dayuhan na sila ay dayuhan at hindi sila nahihirapan sa paghahanap ng makakaing Iftar, at ito ang nagiging sanhi ng tunay na pagmamahalan ng mga mamamayan.

4. **Ang (I'tikaf) pananatili sa Masjid at paghahanap sa Laylatul-Qadr (Ang Gabi ng Tadhana):** Katunayan, ginawa ng Allah ﷻ sa Buwan ng Ramadhan ang isang natatanging gabi na may napakalaking gantimpala para sa mabuting gawain. Ang gabing ito ay mas mabuti pa sa isanlibong buwan:

﴿ لَيْلَةُ الْقَدْرِ خَيْرٌ مِنْ أَلْفِ شَهْرٍ، تَنْزِلُ الْمَلَائِكَةُ وَالرُّوحُ فِيهَا بِإِذْنِ رَبِّهِمْ مِنْ كُلِّ أَمْرٍ، سَلَامٌ هِيَ حَتَّى مَطْلَعِ الْفَجْرِ ﴾⁽⁴⁾

(1) Bukhari at Muslim

(2) Saheeh Bukhari

(3) At-Tirmithi

(4) Surah Al-Qadr 97:3-5

"Ang gabi ng Al-Qadr (Tadhana) ay mas mabuti pa sa isanlibong buwan (ang pagsamba sa Allah sa gabing ito ay mas mabuti pa kaysa sa pagsamba sa Allah sa loob ng 1,000 buwan, o 83 taon at 4 na buwan). Sa panahong ito bumababa ang mga anghel at ang Ruh (Espiritu, si anghel Jibreel) sa kapahintulutan ng Allah, dala ang lahat ng mga pagkakatakda at nakatakda..."

Pinayuhan tayo ng Propeta Muhammad ﷺ na hanapin ang pinagpalang gabi na ito sa huling sampung gabi ng Ramadhan. Isinalaysay ni A'ishah, رضى الله عنها: Sinabi ng Propeta ﷺ : *"Hanapin ang Laylatul-Qadr sa huling sampung gabi ng Ramadhan."*⁽¹⁾

Isinalaysay ni A'ishah رضى الله عنها: *"Kapag nagsimula na ang huling sampung gabi ng Ramadha, hihigpitan ng Propeta ang kanyang sinturon at mananatiling gising sa gabi (sa pagdarasal), at ginigising ang kanyang pamilya."*⁽²⁾

Ang Propeta ﷺ ay nananatiling gising sa loob ng sampung gabi para sa l'tikaf sa loob ng kanyang Masjid upang mag-Salah at mag-alaala sa Allah ﷻ. Ang l'tikaf ay pananatili ng isang Muslim sa loob ng Masjid upang sumamba. Hindi maaaring lumabas maliban kung kinakailangan tulad ng paghahanap ng pagkain o pagtungo sa palikuran o pagtungo sa manggagamot dahil sa biglaang pagsama ng pakiramdam. Ang layunin ng l'tikaf ay ang paghahanap ng Laylatul-Qadr at pananatili sa pagsamba sa Allah ﷻ bago matapos ang buwan ng Ramadhan.

5. **Ang 'Umrah sa buwan ng Ramadhan:** Ang 'Umrah sa buwan ng Ramadhan ay mas malaki ang gantimpala kung ikukumpara sa ibang mga 'Umrah sa loob ng isang taon. Ito ay katumbas ng gantimpala ng pagsasagawa ng Hajj, at sa ibang salaysay ito ay katumbas ng Hajj na kasama ang Propeta ﷺ.

Isinalaysay ni Ibn Abbas رضى الله عنه: *"Sinabi ng Propeta ng Allah ﷺ kay Ummi Sinan al-Ansariyah pagkatapos makabalik ang Propeta mula sa pagsagawa ng Hajj: 'Ano ang pumigil at humadlang sa iyo upang mag-Hajj?' Sinabi niya (babaer): 'Ang ama ni Fulan', ang tinutukoy ay ang kanyang asawa, 'mayroon lamang kaming dalawang kamelyo, ginamit niya ang isa para sa kanyang pag-Hajj, ang natitirang isa naman ay ginagamit sa pag-igib ng tubig.' Kaya sinabi ng Propeta sa kanya: 'Katotohanan ang 'Umrah sa buwan ng Ramadhan ay katumbas (sa gantimpala) ng Hajj, o di kaya'y Hajj na kasama ako.'" ⁽³⁾*



(1) Bukhari at Muslim

(2) Bukhari at Muslim

(3) Bukhari at Muslim

Sino ang pinahihintutulang putulin ang pag-aayuno sa buwan ng Ramadhan?

Ang Relihiyon ng Islam ay mapagbigay at napakadali. Kabilang sa mga habag ng Allah ﷻ ay pinahintutulang huminto sa pag-aayuno sa Buwan ng Ramadhan ang sinumang mayroong sapat na dahilan tulad ng mga sumusunod:

1. **Ang Manlalakbay:** Sila ay pinahintutulang huminto sa pag-aayuno sa Buwan ng Ramadhan habang sila ay naglalakbay, subalit kinakailangang magbayad ng pag-aayuno para sa mga araw na hindi naisagawa ito kapag nakabalik na sa kanilang bayan. Ngunit kapag hindi rin naman nakakaramdam ng paghihirap at nais niyang mag-ayuno ay maaari rin naman.

Isinalaysay ni Hamza bin Amr Al-Aslamie ؓ na sinabi niya: *‘Oh Rasoolullah ako ay mayroong lakas mag-ayuno kahit ako ay naglalakbay. Magkakaroon ba ako ng kasalanan kapag ako ay nag-ayuno?’ Sinabi ng Propeta: “Ito ay pahintulot mula sa Allah, kapag tinanggap mo ay napakabuti. Ang sinumang nais mag-ayuno ay walang kasalanan.”⁽¹⁾*

2. **Ang Maysakit:** Pinahintutulan ang maysakit na nahihirapan na mag-ayuno na itigil ang pag-aayuno sa araw ng Ramadhan, subalit kinakailangan mag-aayuno bilang kabayaran sa mga susunod na araw kapag siya ay gumaling na, tulad ng sinabi ng Allah ﷻ para sa naglalakbay at may-sakit:

﴿ فَمَنْ كَانَ مِنْكُمْ مَرِيضًا أَوْ عَلَى سَفَرٍ فَعِدَّةٌ مِنْ أَيَّامٍ أُخَرَ ﴾⁽²⁾

“Subalit kung ang isa sa inyo ay may sakit o naglalakbay, ang katulad na bilang ng araw (ay dapat bayaran) sa ibang araw at panahon.”

3. **Ang buntis at nagpapasusong ina:** Kung sila ay natatakot para sa kanilang mga sarili at mga anak, maaari nilang ihinto ang pag-aayuno at dapat nilang bayaran ito ng pag-aayuno sa ibang araw pagkatapos ng Buwan ng Ramadhan.
4. **Ang mga matatanda na wala nang kakayanang mag-ayuno at ang isang may permanenteng sakit at wala ng pag-asa pang gumaling:** ay hindi na kailangan pang mag-ayuno, subalit magpapakain sila ng isang mahirap (sa Buwan ng Ramadhan) para sa mga araw na hindi naisagawa ang pag-aayuno.

Bawal (*Haram*) ang pag-aayuno sa babaing may regla o dinudugo sanhi ng panganganak hanggang sa maging malinis na sila. Kung sila ay mag-aayuno ay magkakaroon sila ng kasalanan, at hindi ito tatanggapin sa kanila. Na kung kaya kailangan nilang tumigil sa pag-aayuno at kinakailangan din nilang bayaran ito pagkatapos ng buwan ng Ramadhan. Hindi rin naman ibig sabihin na ipapakita nila na sila ay kumakain lalung-lalo na sa mga kabataan dahil hindi pa nila nauunawaan ang dahilan.

(1) Isinalaysay ni Muslim at ang pinagmulan nito sa napagkasunduang hadith ni 'Aisha

(2) Surah Al-Baqarah 2:184



Nakasulat na Pagsasanay

1. Kumpletuhin ang mga sumusunod:

a) Pinapahintulutan ang pagtigil ng pagaayuno sa buwan ng ramadhan para sa:

..... at

at pinagbabawal ang pagaayuno para sa mga

at

b) Kabilang sa mga kabutihan ng Buwang ng Ramadhan na naitala sa hadith ay ang:

..... ,

..... , at

.....

2. Isulat ang 5 mabuting gawain na nirerekomenda sa Buwan ng Ramadhan.

a.

b.

c.

d.

e.

3. Ibigay ang kahulugan ng mga sumusunod:

a) *Al-I'tikaf*:

.....

.....

b) *Laylatul-Qadr*:

.....

.....

Mga Bagong Salita at Termino

Nu.	Arabiko	Pagsasatitik	Kahulugan
1	فرقان	Furqaan	Qur'an / Ang nagpapahiwalay sa pagitan ng tama at mali
2	بينات	Bayyinaat	Nagpapaliwanag
3	قيام الليل	Qiyamul-layl	Pagtayo ng Salah sa gabi
4	أيام	Ayyaam	Mga araw
5	طعام	Ta'aam	Pagkain
6	غريب	Ghareeb	Isang estranghero
7	مائدة	Maa'idah	Hapag kainan
8	تكاافل	Takaaful	Pagdadamayan
9	اعتكاف	I'tikaaf	Pananatili sa Masjid para sa pagsamba
10	ليلة القدر	Laylatul-Qadr	Gabi ng kapangyarihang nakatakda



Pangalawang Aralin

Ang mga Sunnah ng Pag-aayuno at ang mga Boluntaryong Pag-aayuno

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kaphintulutan ng Allah ﷻ na:

- Mabilang mo ang mga Sunnah ng pag-aayuno at mga mabubuting asal tungkol dito.
- Malaman mo ang kabutihan ng boluntaryong pag-aayuno.
- Malaman mo ang kahalagahan ng pagbabayad ng obligadong pag-aayuno.
- Maipapaliwanag mo ang pamamaraan ng pagbayad sa hindi naisagawang pag-aayuno ng sinumang may-sapat na dahilan.
- Matandaan mo ang mga araw na kalugud-lugod na mag-aayuno ng boluntaryo.



Kabuuan ng Aralin:

- Nakasulat na Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Pag-aaral ng aralin mula sa yunit ng Siyam sa unang baytang.

Ang mga Sunnah at mabubuting-asal ng pag-aayuno

Mayroon mga Sunnah at mga etiketa na inilagay ng Propeta ﷺ sa pag-aayuno na kapag hindi naisagawa ay hindi rin naman nakakasira ng pag-aayuno subalit ito ay nirerekomenda na gawin ng isang Muslim bilang pagsunod sa Propeta ﷺ, tulad ng mga sumusunod:

1. **Ang pagkain ng Sahoor (sa madaling-araw) bago sumikat ang buking-liwayway.** Mas mainam kung ito ay gagawin sa huling oras ng gabi, sa abot ng makakaya.

Ibinalita ni Anas ؓ na sinabi ng Propeta ﷺ; *"Kumain kayo ng sahoor dahil ito ay may kaakibat na biyaya."*⁽¹⁾

Isinalaysay ni Amr bin Al-As ؓ, sinabi ng Propeta ng Allah ﷻ; *"Ang pagkakaiba ng ating pag-aayuno sa pag-aayuno ng mga Tao ng Kasulatan (Hudyo at mga Kristiyano) ay ang pagkain ng sahoor."*⁽²⁾

2. **Pagmamadali sa Futoor (almusal) sa pagkatapos ng pag-aayuno sa paglubog ng araw, at huwag iantala ito.**

Isinalaysay ni Sahl bin Sa'd ؓ, sinabi ng Propeta ng Allah ﷻ: *"Ang mga tao ay mananatiling nasa mabuti hanggat minamadali nila ang pagtapos sa kanilang pag-aayuno."*⁽³⁾

Isinalaysay ni Abu Hurairah ؓ: Sinabi ng Propeta ﷺ na sinabi ng Allah ﷻ: *"Ang pinaka kaibig-ibig na lingkod mula sa aking mga lingkod ay siya na nagmamadali sa pagtapos ng kanyang pag-aayuno."*⁽⁴⁾

3. **Tapusin ang pag-aayuno sa pamamagitan ng sariwa o pinatuyong datiles.**

Isinalaysay ni Salma'n bin A'mer ؓ, na sinabi ng Propeta ng Allah ﷻ: *"Sinuman sa inyo ang tatapusin ang kanyang pag-aayuno, tapusin ito sa pamamagitan ng datiles, kung wala siyang datiles, tapusin ang pag-aayuno sa pamamagitan ng tubig, dahil ito ay puro at dalisay."*⁽⁵⁾

Ang isa pang hadith ni Anas ؓ: *"Karaniwang tinatapos ng Propeta ang kanyang pag-aayuno bago siya magsalah ng Maghrib sa pamamagitan ng sariwang datiles, at kung wala naman nito, ng tuyong datiles, at kung wala pa rin kahit ito, siya ay iinom ng ilang lagok ng tubig."*⁽⁶⁾

4. **Ang pagdu-Du'a sa pagtatapos ng pag-aayuno.**

Kapag tinatapos ng Propeta ﷺ ang kanyang pag-aayuno siya ay mananalangin at sinasabi niya: *"Natanggal na ang pagkauhaw, at nabasa na ang mga ugat, at sa kapahintulutan ng Allah ay nagkaroon na ng gantimpala."*⁽⁷⁾ Sa ibang Hadith naman ng mga Sahabah, sinabi nila na kapag tinatapos ng Propeta ﷺ ang kanyang pag-aayuno siya ay nagsasabi ng: *"Oh Allah sa Iyo ang aking pag-aayuno at sa pamamagitan ng Iyong biyaya tinatapos ko ang aking pag-aayuno kung kaya patawarin Mo ako, tunay na Ikaw ang Mapagpatawad at walang hanggang Mahabagin."*

5. **Ang paramihin ang pagbibigkas at pagbabasa ng Qur'an sa panahon ng Ramadhan** sapagkat ito ay buwan ng Qur'an kaya dapat sa bawat Muslim ang palaging basahin ito.

(1) Bukhari at Muslim, (2) Saheeh Muslim, (3) Bukhari at Muslim

(4) Isinalaysay ni al-Tirmidhi, ito ay inuri bilang hasan ni Imam bin Baz kasama ang kanyang katibayan

(5) Isinalaysay ni Abu Dawood at At-Tirmidhi, (6) Isinalaysay ni Abu Dawood, (7) Isinalaysay ni Abu Dawood

Ang mga Boluntaryong Pag-aayuno

Ang mga kabutihan ng pag-aayuno ay napakadakila at ang gantimpala nito ay ang Allah ﷻ lamang ang nakakaalam. Ang natatanging pag-aayuno na obligado ay sa buwan lamang ng **Ramadhan**. Subalit mayroong ilang pagkakataon na rekomendado ang pagsagawa ng boluntaryong pag-aayuno dahil sa laki ng kabutihan ng Ibadah na ito. Ang ilan sa mga araw na inirerekomenda ang pag-aayuno ay:

1. **Anim na araw (ng Shawwal)** pagkatapos ng **Ramadhan** para sa sinuman na nag-ayuno sa Buwan ng **Ramadhan**. Isinalaysay ni Abu Ayub AlAnsari ؓ na sinabi ng Propeta ng Allah ﷺ: *"Sinuman ang nag-ayuno nang Ramadhan, at ng anim na araw ng Shawwal, (ang katumbas na gantimpala) ay parang nakapag-ayuno na siya ng buong taon."*⁽¹⁾
2. **Ang pag-aayuno tuwing makalawa**, para sa may kakayanan. Ito ang pamamaraan ng pag-aayuno ni Propeta Dawood ؑ. Isinalaysay ni Abdullah bin 'Amr ؓ, sinabi ng Propeta ﷺ: *"Ang pinakamabuting pag-aayuno ay ang pag-aayuno ni Propeta Dawood: Mag-aayuno siya ng isang araw at sa susunod na araw ay hindi mag-aayuno."*⁽²⁾
3. **Ang pag-aayuno ng Lunes at Huwebes ng bawat linggo**.
4. **Ang pag-aayuno ng talong araw ng bawat buwan**. Ito ang tinatawag na *Ayyamul-beedh* (mga puting araw), ika- 13,14,15 ng kalendaryong hijri ng bawat buwan. Isinalaysay ni Abu Dhar ؓ: *"Kami ay inutusan ng Propeta ng Allah ﷺ na mag-ayuno ng tatlong araw sa bawat buwan, sa ika-13, ika-14, at ika-15 ng buwan."*⁽³⁾
5. **Ang Araw ng Arafat** (para sa mga hindi nagsasagawa ng **Hajj**). Isinalaysay ni Abu Qatâda Al-Ansâri ؓ, ang Propeta ng Allah ﷺ ay tinanong ukol sa pag-aayuno sa araw ng Arafah, na kung saan sinabi niya: *"Binubura nito ang kasalanan nang naunang taon at nang susunod na taon". At siya ay tinanong din ukol sa pag-aayuno sa araw ng 'Ashurâ', kung saan kanyang sinabi: "Ito ay kabayaran sa kasalanan nang naunang taon." Tapos siya ay tinanong ukol sa pag-aayuno ng araw ng Lunes, kanyang sinabi: "Iyon ang araw na ako ay isinilang, sa araw na iyon ako ay itinalaga bilang isang Propeta at sa araw ding iyon ang Qur'an ay ipinahayag sa akin."*⁽⁴⁾
6. **Ang Araw ng 'Ashura'** (ika-10 araw sa buwan ng Muharram, ang unang buwan ng Islamikong kalendaryo) at isang araw bago o pagkatapos nito. Isinalaysay ni Ibnu Abbas ؓ, sinabi ng Propeta ﷺ: *"Kapag ako ay nabubuhay pa sa susunod na taon, walang pag-aalinlangan na mag-aayuno ako sa ika-siyam na araw."*⁽⁵⁾

Sa ibang Hadith: *nang mag-ayuno ang Propeta ﷺ at ipinag-utos niya sa kanyang mga Sahaabah na mag-ayuno sa araw ng 'Ashura', sinabi ng mga Sahaabah, 'O Rasoolullaah, ito ang araw na dinadakila ng mga hudyo at mga kristiyano'. Sinabi ng Propeta ﷺ: "Sa susunod na taon - in sha' Allah - ay mag-ayuno tayo sa ika-siyam na araw". Ngunit yumao na ang Propeta ﷺ sa sumunod na taon.*⁽⁶⁾

Isinalaysay rin ni Ibnu Abbas ؓ na sinabi ng Propeta ﷺ: *"Mag-ayuno kayo sa araw ng 'Ashura'. Huwag ninyong tularan ang mga hudyo, na kung kaya mag-ayuno kayo isang araw bago nito o isang araw pagkalipas ng araw ng 'Ashura'."*⁽⁷⁾

(1) Saheeh Muslim, (2) Bukhari at Muslim,

(3) At-Tirmithi, (4) Saheeh Muslim

(5) Saheeh Muslim, Ahmad at Bayhaqi

(6) Saheeh Muslim, (7) Bayhaqi

Papaano mababayaran ang mga araw na hindi nakapag-ayuno?

Tunay na kahit isang araw lamang na hindi nakapag-ayuno sa buwan ng Ramadhan ng walang sapat na dahilan ay napakalaking kasalanan na hindi kayang bayaran ng kahit isang-taong pag-aayuno, kung kaya mahalaga para sa isang Muslim na sikapin na mag-ayuno at hindi ito iwanan maliban kung mayroong sapat na dahilan tulad ng karamdaman o naglalakbay. Kapag ang isang Muslim ay nakagawa ng kasalananang ito ay dapat na mag-*Tawbah* (humingi ng kapatawaran) agad at bayaran ang araw na yaon at manalangin (*Du'a*) ng marami at gumawa ng mabubuting gawain upang siya ay pagkalooban ng Allah ﷻ ng kapatawaran.

Tungkol naman sa sinuman na nakaiwan ng pag-aayuno dahil may sapat na dahilan ay walang pagkakasala, ngunit dapat bayaran ito sa lalong madaling panahon pagkalipas ng Ramadhan sa oras na gumaling na ang maysakit, kapag nakarating na ang naglalakbay sa kanyang lugar, at iba pa gaya ng mga sumusunod:

1. Sinuman ang huminto sa pag-aayuno dahil sa paglalakbay, sakit na may lunas, regla o panganganak para sa mga kababaihan ay kinakailangang mag-ayuno para sa mga araw lamang na hindi nakapag-ayuno at makabubuting isagawa ito kaagad pagkalipas ng Ramadhan. Sinabi ng Allah ﷻ:

﴿ فَمَنْ كَانَ مِنْكُمْ مَّرِيضًا أَوْ عَلَىٰ سَفَرٍ فَعِدَّةٌ مِنْ أَيَّامٍ أُخَرَ ﴾⁽¹⁾

"Kaya sinuman sa inyo ang may karamdaman o naglalakbay (sa buwang ito) magkagayon ang (katumbas na) bilang ng pag-aayuno ay dapat ding tuparin sa ibang araw bilang kabayaran".

2. Sinuman ang huminto sa pag-aayuno dahil sa sakit na walang lunas, at matatandang wala nang kakayahang mag-ayuno ay kinakailangang magpakain ng isang mahirap na tao sa bawat araw ng buwan ng Ramadhan o di kaya magtipon ng tatlumpong mga mahihirap na tao sa katapusan ng buwan ng Ramadhan upang sila ay pakainin.
3. Sinuman ang nasira ang pag-aayuno dahil sa pakikipagtalik sa asawa sa mga araw ng Ramadhan, siya ay nakagawa ng malaking kasalanan at dapat mag-*Tawbah* (humingi ng kapatawaran) sa Allah ﷻ at isagawa ang mga sumusunod (ayon sa pagkakasunod-sunod nito):
 - a) Pagpapalaya ng isang alipin kung mayroon; Kung wala,
 - b) Pag-aayuno nang dalawang buwan na magkasunod nang walang pagitan o patlang kung makakayanan; Kung hindi ito makakayanan,
 - c) Magpakain ng 60 mahihirap na tao.

Sinuman ang namatay bago mabayaran ang mga araw na hindi nakapag-ayuno noong Ramadhan, ay inirerekomenda itong isagawa ng kanyang mga tagapagmana. Isinalaysay ni 'Aisha رضي الله عنها, sinabi ng Propeta ﷺ: *"Sinuman ang namatay at may babayaran pa siyang pag-aayuno, dapat na mag-ayuno ang kanyang mga tagapagmana na may layuning ito ay para sa kanya (taong namatay)."*⁽²⁾

Hindi ipinapahintulot sa isang Muslim na magsagawa ng boluntaryong pag-aayuno tulad ng anim na araw ng Shawwal at iba pa hanggang sa mabayaran nito ang naiwan pang pag-aayuno sa buwan ng Ramadhan. Dapat kaagad bayaran ito upang maligtas sa pananagutan. Kapag naantala ang pagbabayad bago ang pagsapit ng panibagong Ramadhan ay wala ring magiging kasalanan. (Ang Allah ﷻ ang mas higit na nakakaalam).

(1) Surah Al-Baqarah 2:184

(2) Bukhari at Muslim

Mga karaniwang tanong tungkol sa Ramadhan at pag-aayuno

T1. Kapag ako ay nasa isang bayan na kung saan ang kanilang pinagbabatayan sa pag-uumpisa ng Ramadhan ay kalendaryo, maaari ba akong sumabay sa kanila, o doon ako sasabay sa ibang bayan na bumabatay sa pagtingin ng bagong buwan?

S1. Hindi nagka-isa ang pananaw ng mga *'Ulama* (paham) tungkol dito. Ang batayan kung kailan mag-uumpisa ang Ramadhan ay ang Hadith na: *"Mag-aayuno kapag nasilayan ang bagong buwan, at ihinto ang pag-aayuno kapag nasilayan ang bagong buwan ng Shawwal."*⁽¹⁾

Ito ang nagpapatunay na ang Islam ay napakadali at hindi nagpapahirap. Ngunit kapag ang napiling sundin ng punong-bayan o tagapamahala ng Islam sa isang bayan ay ang kalendaryo bilang batayan ay dapat sumunod ang mga Muslim na nasasakupan ng bayan na ito, dahil ang pag-aayuno ay sa araw ng pag-aayuno ng mga tao. Ganoon din ang paghinto ng pag-aayuno ay sa araw din ng paghinto ng mga tao, tulad ng nabanggit sa isang Hadith.

T2. Kapag ako ay nag-umpisang mag-aayuno sa bayan na kung saan ay nagsisimulang mag-aayuno pagkalipas ng ika-29 ng Sha'ban, pagkatapos ako ay nalipat sa ibang bayan na kung saan ay huli ng isang araw ang pag-umpisa ng kanilang pag-aayuno, at nananatili ako dito hanggang sa katapusan ng buwan ng Ramadhan: Sa kaninong bayan ako susunod sa paghinto ng pag-aayuno? Sa bayan na aking pinagsimulan o sa bayan na aking huling kinaroroonan? At ano ang aking gagawin kapag nakumpleto na ang 30 araw ng buwan ng Ramadhan sa bayan na kinaroroonan ko maari pa ba ako mag-aayuno hanggang 31 na araw?

S2. Ang batayan sa pag-aayuno ay ayon sa taong-bayan na kinaroroonan ng nag-aayuno, hindi sa kung saan siya nag-umpisa, ngunit kinakailangan hindi magkulang ang bilang ng araw ng Ramadhan ng 29 araw, bagkus makikisabay siya sa mga taong-bayan pagkatapos ay kumpletuhin niya ang buwan ng 29 araw.

Halimbawa: Ang isang tao ay nag-umpisa ng Ramadhan sa Saudi Arabia pagkatapos naglakbay sa Japan at inabutan siya ng buwan ng Shawwal dito ngunit ang mga araw ng kanyang nagawang pag-aayuno ay 28 araw lamang. Sa ganitong pangyayari ang dapat niyang gawin ay sumabay siya sa taong-bayan sa pagsasagawa ng *Eidul-Fitr* pagkatapos ay kumpletuhin ang kanyang Ramadhan ng isa pang araw sapagkat ang isang buwan sa batas ng Islam ay hindi bababa sa 29 araw.

Kapag ang kanyang pag-aayuno ay lalampas ng 30 araw sa bayan na kanyang kinaroroonan ay dapat pa rin siyang sumabay sa kanila at mag-aayuno siya ng 31 araw, tulad ng sinasabi ng Hadith: *"Ang pag-aayuno ay sa araw ng kanilang pag-aayuno, at ang paghinto ay sa araw ng kanilang paghinto ng pag-aayuno."*⁽²⁾

(1) Isinalaysay nina Al-Bukhari at Muslim

(2) Isinalaysay nina At-Tirmidhi at Ad-Dar Qutni

- T3. Kapag ako ay nag-intensyon na putulin ang aking pag-aayuno sapagkat ako ay maglalakbay o gumawa ng reservation sa susunod na araw, pagkatapos hindi natuloy ang aking paglalakbay: Ano ang alituntunin ng aking pag-ayuno sa araw na yaon? At kailan may pahintulot magputol ng pag-aayuno ang isang naglalakbay?
- S3. Hindi pinapahintulutan magputol ng pag-aayuno ang sinumang maglalakbay hanggang sa siya ay makaalis sa kanyang bayan. Hindi maaaring magputol ng pag-aayuno ang sinuman na hindi pa naglalakbay, kung kaya ang pag-intensyon ng pagputol ng pag-aayuno ay isang gawaing mali. Dapat bayaran ang araw na yaon sapagkat ang sinuman na nag-intensyon ng pagputol ng pag-aayuno ay nasira ang kanyang pag-aayuno kahit hindi kumain o uminom.
- T4. Alin ang mas mabuti sa sinuman na naglalakbay, mag-ayuno o tumigil ng pag-aayuno kahit hindi nahihirapan, gaya ng paglalakbay sakay ng eroplano?
- S4. Kapag hindi rin naman nahihirapan ang isang naglalakbay ay mas mabuting mag-ayuno bilang pagsunod sa Propeta ﷺ at paghangad ng pagpapala sa buwan ng **Ramadhan**, at dahil ang pag-aayuno sa loob ng **Ramadhan** ay higit na mabuti kaysa sa pagbabayad.





Nakasulat na Pagsasanay

1. Kumpletuhin ang mga sumusunod:

- a) Sinuman ang nagputol ng pag-ayuno ng isang araw ng Ramadh^{an} ng walang sapat na dahilan ay nararapat sa kanya ang
- at
- b) Sinuman ang nakipagtalik sa asawa sa araw ng Ramadh^{an} ay dapat:, kapag walang makita ay:, kapag hindi kaya ay:

2. Isulat ang ilan sa mga Sunnah (itinatagubilin) para sa isang nag-aayuno:

- a)
- b)
- c)

3. Isulat ang tatlong mga panahon na kanais-nais mag-ayuno ng boluntaryo:

- a)
- b)
- c)

4. Ano ang dapat gawin sa sinuman na hindi kayang mag-ayuno dahil matandang matanda na o may sakit na walang lunas?

.....

.....


.....

Mga Bagong Salita at Termino

Nu.	Arabiko	Pagsasatitik	Kahulugan
1	سحور	Sa <u>h</u> oor	Pagkain sa madaling-araw
2	بركة	Barakah	Pinagpala
3	رطب	Ra <u>t</u> ab	Halos kalahati pa ang hinog na bunga ng palmera
4	تمر	Tamar	Bunga ng palmera
5	شوال	Shawwaal	Buwan ng Shawwal
6	الأيام البيض	Ayyaamul- <u>Beedh</u>	Mga araw na napakaliwanag
7	عاشوراء	'Aashooraa'	Ika sampo ng buwan ng Muharram
8	إثم	Ithm	Kasalanan
9	مؤمن	Muzmin	Talamak
10	مرضع	Mur <u>d</u> hi'	Nagpapasuso

“At ipahayag sa sangkatauhan ang Hajj...” ⁽¹⁾

Yunit ng Hajj at ‘Umrah



Talaan ng mga Nilalaman

Pahina	Mga Paksa
144	Unang Aralin: Ang mga Haligi ng Hajj at 'Umrah
145	Ang mga haligi ng Hajj at 'Umrah
145	Ang mga haligi (<i>Arkan</i>) ng 'Umrah
145	Ang mga obligado (<i>Wajibat</i>) sa 'Umrah
146	Ang mga haligi (<i>Arkan</i>) ng Hajj
146	Ang mga obligado (<i>Wajibat</i>) ng Hajj
147	Ang mga Sunnah ng Hajj at 'Umrah
151	Nakasulat na Pagsasanay
152	Mga Bagong Salita at Termino
154	Pangalawang Aralin: Ang mga Alituntunin ng Fidyah (multa) ng Hajj at 'Umrah
155	Ang mga alituntunin ng pagbabayad ng Fidyah (multa) para sa Hajj at 'Umrah
157	Mga usapin tungkol sa Hajj at 'Umrah para sa mga babae
158	Nakasulat na Pagsasanay
159	Mga Bagong Salita at Termino

Unang Aralin

Ang mga Haligi ng Hajj at 'Umrah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kakahintulutan ng Allah ﷻ na:

- Malaman mo ang pagkakaiba ng haligi at obligado ng Hajj at 'Umrah.
- Mabilang mo ang mga haligi ng 'Umrah.
- Matandaan mo ang mga obligado para sa 'Umrah.
- Mabilang mo ang mga haligi ng Hajj.
- Matandaan mo ang mga obligado para sa Hajj.
- Mabilang mo ang ilan sa mga Sunnah para sa Hajj at 'Umrah.



Kabuuan ng Aralin:

- Nakasulat na Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Pag-aaral ng unang Aralin ng Hajj at 'Umrah yunit.
- Pag-aaral ng Taharah yunit.
- Pag-aaral ng Salah yunit.

Ang mga haligi ng Hajj at 'Umrah

Ang mga gawain sa *Hajj* at '*Umrah* ay hinati sa mga *rukn* (haligi), *wajib* (obligado) at *Sunnah*. Ang pagkakaiba ng mga ito ay ang sumusunod:

Ang *Rukn* (haligi): Ang *Hajj* o '*Umrah* ay hindi magiging tama kapag hindi naisagawa ang anuman sa mga *Arkan* (mga haligi), at hindi ito maaaring palitan o bayaran ng pagkatay ng hayop.

Ang *Wajib* (obligado): Ang mga *wajibat* (mga obligado) ay dapat isagawa, ngunit kapag hindi naisagawa ay maaaring bayaran ng pagkatay ng hayop sa Makkah.

Ang *Sunnah* (itinatagubilin): Ginagawang ganap ng mga *sunan* ang *Hajj* at '*Umrah* sapagkat kabilang ito sa pagsunod sa Propeta ﷺ. Itinatagubilin sa bawat Muslim ang pagsasagawa nito at magkakaroon ng gantimpala ang sinumang magsasagawa nito. Ngunit kapag hindi ito naisagawa ay hindi naman nakakasira ng *Hajj* at '*Umrah*.


Ang mga haligi (*Arkan*) ng 'Umrah

Mayroong tatlong mga haligi ang '*Umrah*, at hindi magiging tama ang '*Umrah* kung mayroong maiwan na kahit isa lamang sa mga ito. Dapat ito gawin sa tamang pagkasunod-sunod:

1. ***Ihram*:** Ito ay ang intensyon ng pagpasok sa sagradong kalagayan ng '*Umrah*.
2. ***Tawaf*:** Pag-ikot sa palibot ng *Ka'bah* ng pitong ulit.
3. ***Sa'ee*:** Paglakad sa pagitan ng *Safa* at *Marwah* ng pitong ulit.

Ang Mga obligado (*wajibat*) sa 'Umrah

1. **Pagpasok sa sagradong kalagayan ng *ihram* sa *Meeqat*:** Sinuman ang may intensyon na magsagawa ng '*Umrah* ay dapat pumasok sa sagradong kalagayan ng *ihram* sa *Meeqat*. Sinumang nakalampas dito nang hindi nakapasok sa kalagayan ng *ihram* ay dapat bumalik, at kapag hindi ay dapat magkatay sa Makkah bilang kabayaran.
2. **Pag-ahit o pag-gupit ng buhok:** Hindi maaaring lumabas mula sa kalagayan ng *ihram* ng '*Umrah* hanggang hindi pa nagpakalbo o nagpagupit ng lahat ng buhok sa ulo.



Ang mga haligi (Arkan) ng Hajj

Mayroong apat na haligi ang Hajj ayon sa mga mas nakakaraming Ulama (paham). Ito ang pagkakasunod-sunod:

1. **Ihram**: pagpasok sa sagradong kalagayan ng Ihram na may intensyon na umpisahan ang Hajj.
2. **Wuqoof (Pagtayo) sa Arafah**: Ito ay magsisimula sa oras ng Salah ng Dhuhr sa ika-9 na araw hanggang sa pagsikat ng buhang liwayway sa ika-10 na araw, Araw ng Nahr. Sinuman ang tumayo sa loob ng Arafah sa oras na ito kahit saglit lamang ay nagampanan ang haliging ito.
3. **Tawaf Al-Ifadah**: Ito ay pagkatapos ng Wuqoof sa Arafah at hindi maaaring mauna dito.
4. **Sa'ee para sa Hajj**: Maaaring magsagawa ng Sa'ee pagkatapos ng Tawaf Al-Qudoom o kaya ay pagkatapos ng Tawaf Al-Ifadah para sa nagsasagawa ng Hajj Ifrad (Pagsasagawa ng Hajj lamang) at Hajj Qiran (Pagsasagawa ng Hajj at 'Umrah na magkasama). Tungkol naman sa Hajj Tamattu (Pagsasagawa ng 'Umrah at pagkatapos ay ng Hajj) ang Sa'ee ay dalawa, pagkatapos ng Tawaf ng 'Umrah at pagkatapos ng Tawaf Al-Ifadah.

Ang mga obligado (Waajibat) ng Hajj

1. **Ang Ihram sa Meeqat**: Sinuman ang makalampas ng Meeqat ng walang Ihram ay dapat bumalik dito, kapag hindi ay dapat magkatay ng hatop bilang kabayaran.
2. **Wuqoof (Pagtayo) sa Arafah**: Magsimula sa umpisa ng Salah ng Dhuhr hanggang sa paglubog ng araw.
3. **Mabeet Muzdalifah (pananatili ng magdamag sa Muzdalifah)**: Ito ay ika-10 ng gabi ng Dhul-Hijjah hanggang sa pagkatapos ng Salah ng Fajr sa Araw ng Nahr. Pinahihintulutan ang mga mahihina at mga kababaihan na manatili kahit hanggang hating-gabi lamang.
4. **Mabeet Mina**: Pananatili ng magdamag sa Mina sa mga gabi ng Araw ng Tashreeq.
5. **Pagbato ng Jamaratul-Aqabah** lamang sa Araw ng Nahr (ika-10 araw), at pagbato ng tatlong Jamarah sa mga Araw ng Tashreeq (ika-11, ika-12, ika-13 araw).
6. **Pag-ahit o pag-gupit** ng lahat ng buhok sa ulo pagdating sa Mina mula sa Muzdalifah.
7. **Tawaf Al-Wida' (Ang Tawaf ng Pamaamaalam)**. Tulad ng sinabi ng Propeta ﷺ: "Hindi maaaring umalis ang sinumang nagsasagawa ng Hajj hanggang sa maisagawa sa pinakahuli ang Tawaf Al-Wida' sa Bahay ng Allah".⁽¹⁾ Maliban sa isang babaing nirerepla sapagkat may tanggap na dahilan upang hindi isagawa ang Tawaf Al-Wida'.

Sinuman ang makaiwan ng kahit isa sa mga obligadong ito ay dapat magbayad ng dam (sakripisyo). Ito ay ang pagkatay ng tupa sa Makkah at ipapamahagi sa mga mahihirap na tao sa Makkah.

(1) Saheeh Muslim

Ang mga Sunnah ng Hajj at 'Umrah

Ang lahat ng hindi nabanggit sa mga haligi at mga obligado ng Hajj at 'Umrah ay kabilang sa Sunnah. Sinuman ang magsasagawa nito ay magkakamit ng gantimpala, at hindi nakakasira ng Hajj at 'Umrah kapag hindi naisagawa. Ang mga mahahalagang Sunnah ay ang sumusunod:

Una: Mga Sunnah para sa Ihram

1. Pagligo, pagpapabango sa katawan at pagsuot ng dalawang puting tela para sa mga lalaki.
2. Pagpasok sa *ihram* pagkatapos ng pagsasagawa ng obligado o boluntaryong Salah.
3. Pagbigkas ng pangalan ng isasagawang uri ng Hajj, tulad ng pagbigkas ng: "*Labbayka 'Umran*" (para sa 'Umrah), o "*Labbayka Hajjan*" (para sa Hajj), o "*Labbayka 'Umran Mutamatti'an biha ilal-Hajj*." Sunnah rin ang pagpaparami ng pagbigkas ng *Talbiyyah* (pagbigkas ng "*Labbayka Allahumma labbayk...*").
4. Paglalagay ng kondisyon sa oras ng pagpasok sa kalagayan ng ihram kapag nangangamba na baka hindi makumpleto ang kanyang Hajj or 'Umrah dahil sa sakit at iba pang kadahilanan. Ganito ang kanyang sasabihin:

"Fa-in habasanee haabisun, fa mahal-lee haythu habastanee"

"Kung ako ay mapipigilan ng anumang bagay, ako ay lalabas ng *ihram* kung saan ako napigilan".

Ang kahalagahan ng kondisyon na ito ay kapag hindi matuloy ang kanyang Hajj dahil nagkaroon ng sapat na dahilan ay maaaring lumabas ng *ihram* na walang dapat babayarang multa.

Pangalawa: Mga Sunnah para sa Tawaf

1. Maligo kapag papasok ng Makkah.
2. Mag-umpisang mag-Tawaf sa pamamagitan ng paghalik sa *Hajarul-Aswad* (itim na bato), o di kaya'y ituro lamang ang kamay dito kapalit ng paghalik.
3. Huwag takpan ang kanang balikat sa oras ng pagta-Tawaf ng *Qudoom* (Tawaf ng pagdating) o ng *Ifadah* lamang.
4. *Ar-Raml*: Paglalakad ng mabilis at magkakalapit ang mga yapak sa unang tatlong pagikot habang nagta-tawaf ng *Qudoom* (Tawaf ng pagdating) o ng *Ifadah* lamang.
5. Paghaplos sa panulukan ng *Rukn Yamane*.
6. Pagsasagawa ng dalawang *Rak'ah* Salah sa likod ng *Maqam Ibrahim* pagkatapos ng Tawaf, kapag ito ay hindi magiging mahirap. Kapag mahirap ay maaaring mag-Salah sa kahit saan na lugar sa loob ng *Masjid Al-Haram*. Bibigkasin sa unang *Rak'ah* pagkatapos ng *Al-Fatihah* ang *Surah Al-Kafiroon*, at sa pangalawang *Rak'ah* ay *Surah Al-Ikhlis*.
7. Bigkasin ang *sumusunod* sa pagitan ng sulok ng *Rukon Yamane* at *Hajarul-aswad* sa bawat pag-ikot:

"Rabbana atina fid-dunya hasanah, wa fil-akhirati hasanah, wa qina athaban-nar"

"Aming Panginoon! Bigyan mo kami ng kabutihan sa mundong ito at kabutihan sa Kabilang-buhay, at iligtas mo kami mula sa parusa ng apoy."

Pangatlo: Mga Sunnah para sa Sa'ee

1. Pagsasagawa ng Wudhu'.
2. Magtungo sa Safa sa umpisa ng sa'ee, kapag nakalapit na dito ay bigkasin ang:

﴿ إِنَّ الصَّفَا وَالْمَرْوَةَ مِنْ شَعَائِرِ اللَّهِ فَمَنْ حَجَّ الْبَيْتَ أَوْ اعْتَمَرَ فَلَا جُنَاحَ عَلَيْهِ أَنْ يَطَّوَّفَ بِهِمَا ۚ وَمَنْ تَطَوَّعَ خَيْرًا فَإِنَّ اللَّهَ شَاكِرٌ عَلِيمٌ ﴿۱﴾

"Tunay na ang Şafā at ang Marwah ay kabilang sa mga sagisag ni Allāh. Kaya ang sinumang nagsagawa ng hajj sa Bahay o nagsagawa ng 'umrah ay walang maisisipi sa kanya na magpabalik-balik sa pagitan ng dalawang iyon. Ang sinumang nagkusang-loob ng isang kabutihan, tunay na si Allāh ay Tagapagpasalamat, Maalam."

3. Pagdating sa itaas ng Safa ay humarap sa Ka'bah at itaas ang mga kamay at bigkasin ang "Allahu Akbar", pagkatapos ay bigkasin ang:

"La ilaha illal-lah, wahdahu la shreeka lah, lahul-mulku wa lahul-hamd, wa huwa 'ala kulli shay-in qadeer. La ilaha illal-lahu wahdah, anjaza wa'dah, wa nasara 'abdah, wa hazamal-ahzaba wahdah."

Pagkatapos ay manalangin. Ulitin ito ng tatlong beses at dalawang ulit naman ang panalangin tuwing matapos ito. Pagkatapos ay bumaba mula Safa at maglakad patungong Marwah.

4. Habang naglalakad sa pagitan ng Safa at Marwah, tatakbo ang mga lalaki sa pagitan ng dalawang berdeng ilaw.
5. Ang pag-ahit ng buhok para sa mga hindi magsasagawa ng Hajj Tamattu.

Pang-apat: Mga Sunnah sa Araw ng Tarwiyyah (ika-8 ng Dhul-Hijjah)

1. Ang pagpasok sa sagradong kalagayan ng ihram sa araw na ito bago dumating ang oras ng Salah ng Dhuhr, para sa mga magsasagawa ng Hajj.
2. Isasagawa ang mga Salah ng Dhuhr, 'Asr at 'Isha' na pinaiksi (Qasr) sa Mina. Sa Mina rin matutulong sa ika-9 na gabi at pagkatapos ay mag-Salah ng Fajr.

Pang-lima: Mga Sunnah sa Araw ng Arafah (ika-9 ng Dhul-Hijjah):

1. Pag-alis mula *Mina* papuntang '*Arafah* pagkatapos sumikat ang araw.
2. Damihan ang pagbigkas ng *Talbiyyah* at *Takbeer* habang naglalakbay mula *Mina* patungong '*Arafah* at sa iba pang mga lugar.
3. Mananatili sa *Namirah* hanggang sa pagsapit ng *Salah* ng *Dhuhr*, pagkatapos ay tutungo ng '*Arafah*.
4. Mag-*Salah* ng *Dhuhr* at '*Asr* na pinaikli (*Qasr*) at pinagsama (*Jama'ah*) sa araw ng ika-9 sa '*Arafah*.
5. Gugulin ang oras sa pagdu-*Du'a* at paggawa ng mabubuting gawain sa Araw ng '*Arafah* hanggang sa lumubog ang araw.

Pang-anim: Mga Sunnah sa gabi ng Muzdalifah

1. Mag-*Salah* ng *Maghrib* at '*Isha*' na pinaiksi (*Qasr*) at pinagsama (*Jama'ah*) pagdating ng *Muzdalifah*.
2. Pagtulog sa *Muzdalifah* hanggang *Fajr* upang makapagpahinga para sa mga gawain sa susunod na Araw ng *Nahr*.
3. Mag-*Salah* ng *Fajr*, pagkatapos ay manalangin (*Du'a*) sa *Mash'aril-Haram* hanggang sa pagsikat ng liwanag ng umaga (*isfar*).
4. Pag-alis mula *Muzdalifah* patungong *Mina* bago sumikat ang araw.

Pang-pito: Mga Sunnah para sa araw ng Adh-ha (ika-10 ng Dhul-Hijjah)

1. Umalis sa *Muzdalifah* at magtungo ng *Mina* bago sumikat ang araw, at magsimulang magbato ng *Jamaratul-Aqabah* pagkatapos sumikat ang araw. Huwag iantala hanggang sa *Salah* ng *Dhuhr*.
2. Mananatili sa pagbigkas ng *Talbiyyah* hanggang sa pagbabato ng *Jamaratul-Aqabah*. Pagkatapos bumato ay titigil na sa pagbigkas ng *Talbiyyah* at sisimulan ang pagbigkas ng *Takbeer*.
3. Habang bumabato ng *Jamaratul-Aqabah*, ay nasa bandang kaliwa ang Makkah at bandang kanan ang *Mina* at nakaharap sa *Jamarat*.
4. Ang pagbigkas ng *Takbeer* (*Allahu Akbar*) sa bawat pagbato ng *Jamarah*.
5. Ang sariling pagkatay ng kanyang *Had'ee*, at kakain din siya mula dito.
6. Magpakalbo (para sa mga lalaki) at magsimula sa bandang kanan ng kanyang ulo.
7. Maligo, at magpabango (para sa mga lalaki) pagkatapos magtanggap ng *ihram*. Ito ay pagkatapos magbato, magpakalbo at pagkatay ng *Had'ee* kung may dalang *Had'ee*.
8. Mag-*Tawaf Al-Ifadah* pagkatapos ng unang *Tahallul* (pagtanggap ng *ihram*).
9. Pagsunud-sunod ng mga gawain sa araw na ito ng ganito:
 - a. Pagbato
 - b. Pagkatay
 - c. Pagpapakalbo o pagputol ng buhok
 - d. *Tawaf Al-Ifadah*

Pang-walo: Mga Sunnah para sa mga Araw ng *Tashreeq*

1. Pagpaparami ng *Takbeer* (*Allahu Akbar*) at pag-alaala sa Allah.
2. Pinaiksi (*Qasr*) at hindi pinagsama (*Jama'ah*) ang pagsasagawa ng lahat ng Salah na may apat na *Rak'ah* dito sa *Mina*.
3. Ang pagbato sa lahat ng *Jamarah* pagkalampas ng katanghaliang-tapat (*Zawal*), at mag-*Takbeer* sa bawat pagbato.
4. Pagkatapos bumato sa maliit na *Jamarah*, tumungo ng bahagya sa bandang kanan at magiging nasa bandang kaliwa ang *Jamarah*, humarap sa *Qiblah* at mag-*Du'a* ng matagal.
5. Pagkatapos bumato sa kalagitnaang *Jamarah*, ay tumungo ng bahagya sa bandang kaliwa at magiging nasa bandang kanan ang *Jamarah*, humarap sa *Qiblah* at mag-*Du'a* ng matagal.
6. Pagkatapos magbato sa *Jamaratul-Aqabah* (pinakamalaki) ay aalis na lamang at wala ng *Du'a*.
7. Sinuman ang hindi nagmamadali ay mananatili hanggang sa ika-13 araw, at aalis mula sa *Mina* bago lumubog ang araw pagkatapos bumato sa lahat ng tatlong *Jamarah* at tutungo sa Makkah.





Nakasulat na Pagsasanay

1. Ano ang pagkaiba ng Rukn at Wajib?

a) Ang Rukn ay:

b) Ang Wajib ay:

2. Lagyan ng ✓ kung saan sa mga sumusunod ang Rukn, Wajib at Sunnah para sa Hajj:

Bilang	Mga gawain	Alituntunin		
		Rukn	Wajib	Sunnah
1	Mabeet (pagtulog) sa Muzdalifah			
2	Wuqoof (Pagtayo) sa 'Arafat			
3	Du'a sa Mash-ari- <u>H</u> aram pagkatapos ng Salah ng Fajr sa araw ng ika-10.			
4	Ang pagligo bago mag- <u>i</u> hram			
5	Tawaf Qudoom (Pagdating na tawaf) para sa 'Umrah			
6	Tawaf Al-Wida' (Tawaf ng pamamaalam) para sa <u>H</u> ajj			
7	Tawaf Qudoom (Pagdating na tawaf) para sa <u>H</u> ajj			
8	Tawaf Al-Wida' (Tawaf ng pamamaalam) para sa 'Umrah			
9	Ang Takbeer sa pagbato ng Jamarat			
10	Tawaf Al-Ifadah			
11	Sa'ee para sa 'Umrah			
12	Sa'ee para sa <u>H</u> ajj			
13	Pagbato ng Jamarat			
14	Pag- <u>i</u> hram sa Meeqat			
15	Mabeet (pananatili sa magdamag) sa Mina sa mga araw ng Tashreeq			
16	Du'a pagkatapos magbato ng Jamarat			
17	Takbeer tuwing makatapat ng Hajarul-Aswad sa pag-Tawaf.			
18	Pagbigkas ng (Rabbana' a'tina fid-Dunya hasanah..... sa pagitan ng Rukn Yamani at Hajarul-Aswad.			
19	Pagpapakalbo o pagputol ng buhok para sa nag-'Umrah.			
20	Tarteeb (sunod-sunod) ang mga gawain sa araw na ika-10 para sa nagsasagawa ng <u>H</u> ajj.			

Mga Bagong Salita at Termino

Nu.	Arabiko	Pagsasatitik	Kahulugan
1	واجب	Waajib	Obligado
2	ميقات	Meeqaat	Lugar at oras ng pagpasok sa kalagayan ng Ihraam para sa Hajj at 'Umrah
3	وقوف	Wuqoof	Pagtayo sa Arafat
4	الافاضة	Al-Ifaad <u>ha</u>	Tawaf para sa Hajj
5	القدوم	Al-Qudoom	Tawaf para sa pagdating
6	الوداع	Al-Widaa'	Tawaf para pagpapaalam
7	أيام التشريق	Ayyamul-Tashreeq	Mga Araw ng Tashreeq (Ika-11,12,13)
8	جمرات	Jamaraat	Pagbato gamit ang maliliit na bato
9	شوط	Shawṭ	Pag-ikot
10	تلبية	Talbiyya	Pagbigkas ng “Ibbayk Allahumma labbayk...”



Pangalawang Aralin

Ang mga Alituntunin ng Fidyah (multa) ng Hajj at 'Umrah

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kakahintulutan ng Allah ﷻ na:

- Malaman kung ano ang dapat gawin kapag hindi naisagawa ang anuman sa mga obligasyon ng Hajj at 'Umrah.
- Malaman kung ano ang nararapat kapag hindi naisagawa ang anuman sa mga haligi ng Hajj at 'Umrah.
- Matandaan ang mga uri ng Fidyah (multa) para sa sinuman na nakagawa ng ipinagbabawal sa ihram.
- Maipaliwanag kung ano ang kabayaran kapag hindi naisagawa ang anuman sa mga obligasyon ng Hajj at 'Umrah.



Kabuuan ng Aralin:

- Nakasulat na Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Pag-aaral ng unang Aralin ng Hajj at 'Umrah yunit.
- Pag-aaral ng yunit sa Taharah.
- Pag-aaral ng yunit sa Salah.

Ang mga alituntunin ng pagbabayad ng *Fidyah* (multa) para sa *Hajj* at '*Umrah*

Ang sinasabing *Fidyah* (multa) ay dapat bayaran ng sinuman na nagsasagawa ng *Hajj* at '*Umrah* kapag nakagawa ito ng anumang ipinagbabawal sa *ihram*, o bayaran ang anumang hindi nagawang obligasyon ng *Hajj* at '*Umrah*, tulad ng mga sumusunod:

Una: *Fidyah* para sa mga ipinagbabawal sa *Ihram*

Kapag nakagawa ang sinumang nagsasagawa ng *Hajj* o '*Umrah* ng isa sa mga ipinagbabawal sa *ihram* tulad ng mga sumusunod: Pagtanggap ng buhok, pagtakip ng ulo, pagputol ng kuko, paggamit ng pabango, paglapit sa asawa na may kasamang pagnanasa, pagsuot ng may tahing damit para sa lalaki, pakikipagtalik sa asawa pagkatapos ng unang *Tahallul* sa *Hajj*, pakikipagtalik sa asawa pagkatapos ng *Tawaf* at *Sa'ee* bago mag-ahit o maggupit ng buhok para sa '*Umrah*, o pagsuot ng *guwantes* at *Niqab* ng mga babae. Ang lahat ng nabanggit na ito ay dapat magbayad ng *Fidyah*. Ang mga sumusunod ay ang pagpipilian:

1. Magkatay ng kambing sa Makkah,
2. Magpakain ng 6 na *Miskeen* (mahirap na tao) sa Makkah,
3. Mag-ayuno ng tatlong araw kahit saan na lugar.

Pangalawa: Nakaiwan ng anumang obligado (*wajib*) ng *Hajj*

Sinumang nakaiwan ng anumang obligasyon para sa *Hajj* tulad ng pagbato ng *Jamarat*, *Mabeet* (pananatili sa magdamag) sa *Muzdalifa* at *Mina*, hindi nag-*Tawaf* ng *Wida'*, hindi pumasok sa *ihram* sa *Meeqat*, at iba pang mga obligasyon para sa *Hajj* ay dapat magbayad ng *ihram*, tulad ng sumusunod ayon sa pagkakasunod-sunod:

1. Magkatay ng tupa. Kapag walang makuhang tupa ay,
2. Mag-ayuno ng 10 araw, 3 araw sa panahon ng *Hajj* at 7 araw kapag nakabalik sa kanyang pamilya.
3. Kapag walang pagkakataong mag-ayuno ng 3 araw sa *Hajj* ay mag-ayuno ng 10 araw kapag nakabalik sa kanyang pamilya.

Pangatlo: *Al-Muhsar*

Ang *Al-Muhsar* ay ang pumasok sa sagradong kalagayan ng *ihram* ngunit hindi maipagpatuloy ang kanyang pagsasagawa ng *Hajj* dahil nagkaroon ng hadlang na hindi maiwasan gaya ng malubhang karamdaman. Kapag siya ay naglagay ng kondisyon sa simula ng kanyang *ihram* ay maaaring lumabas ng kalagayan ng *ihram* na walang multa. Ngunit kapag walang kondisyon ay dapat magkatay ng isang tupa bilang *Fidyah* sa lugar kung saan siya nakahinto pagkatapos ay maaari nang lumabas sa kalagayan ng *ihram*.

Pang-apat: *Kaffarah* (kabayaran) para sa nakipagtalik sa asawa at anuman na nakakaakit ng pakikipagtalik, bago ang unang *Tahallul* (pagtanggap ng *ihram*).

Para sa *Haji*, dapat magbayad ng *Fidyah* sa ganitong pagkasunod-sunod:

1. Magkatay ng *Badanah* (isang kamelyo o baka). Kapag walang makuhang *badanah* ay;
2. Mag-ayuno ng sampung araw: tatlong araw sa *Haji* at pitong araw kapag nakabalik sa kanyang pamilya, at dapat magsagawa ng:
 - a. Dapat mag-*Tawbah* (humingi ng kapatawaran sa Allah ﷻ).
 - b. Dapat ituloy ang pagsasagawa ng *Haji*.
 - c. Dapat magsagawa ulit ng *Haji* sa susunod na taon bilang kabayaran.

Para sa '*Umrah*: Tungkol naman sa pakikipagtalik sa asawa sa '*Umrah* kapag nangyari ito bago magsagawa ng *Tawaf* at *Sa'ee* ay:

1. Nasira ang kanyang '*Umrah*.
2. Dapat pa ring ituloy ang pagsasagawa ng '*Umrah*, at magsasagawa ulit ng '*Umrah* sa susunod na mga araw.
3. At kinakailangang magbayad pa din ng *Fidyah*, na pipili ng isa sa mga sumusunod:
 - a. Magkatay ng tupa, o
 - b. Mag-ayuno ng tatlong araw, o
 - c. Magpakain ng anim na *Miskeen* (mahirap na tao).

Pang-lima: Ang *Kaffarah* ng pakikipagtalik at paglapit sa asawa na may kasamang pagnanasa pagkatapos ng unang *Tahallul* (pagtanggap ng *ihram*).

Para sa *Haji*: Nararapat sa sinumang nakipagtalik sa asawa pagkatapos ng unang *Tahallul* para sa *Haji* (nakapag-ahit at nakapagbato na sa *Jamarah*) ngunit bago nakapag *Tawaf Al-Ifadah* ay dapat gawin ang sumusunod:

1. Magkatay ng tupa at
2. Ipagpatuloy ang kanyang *Haji*.
3. Dapat lumabas ng *Haram* (gaya ng *Tan'eem*) at pumasok ulit sa kalagayan ng *ihram* upang makapag-*tawaf* habang nasa kalagayan ng *ihram*.
4. Ang kanyang *Haji* ay maibibilang na tama sa kapahintulutan ng Allah ﷻ.

Para sa '*Umrah*: Kapag ang pakikipagtalik sa asawa ay nangyari pagkatapos magsagawa ng *Sa'ee* para sa '*Umrah* at bago magpakalbo o magpaputol ng buhok ang alituntunin ay ang mga sumusunod:

1. Tama ang '*Umrah*.
2. Kinakailangang magbayad ng *Fidyah*, na pipili ng isa sa mga sumusunod:
 - a. Magkatay ng tupa, o
 - b. Mag-ayuno ng tatlong araw, o
 - c. Magpakain ng anim na *Miskeen* (mahirap na tao).

Mga usapin tungkol sa Hajj at 'Umrah para sa mga babae

Ang mga babae ay katulad ng mga lalaki. Ipinag-uutos din sa kanila kung ano ang ipinag-uutos sa mga lalaki na mga pagsamba tulad ng Salah, Siyam, Zakat, Hajj at 'Umrah. Ngunit dahil sa pagkakaroon ng pagkakaiba ng likas na katangian sa pagitan ng lalaki at babae ay naglagay ang Nag-iisang Tagapaglikha ng mga alituntunin para sa mga kababaihan na naaayon sa likas na katangian ng pagkakalikha sa kanila. Ang kabilang dito ay ang mga sumusunod:

1. Kondisyon ng pagkaroon ng Mahram (kamag-anak na lalaki) na kanyang makasama sa pagsasagawa ng Hajj at 'Umrah tulad ng Hadith ni Abi Hurayrah رضي الله عنه na sinabi ng Propeta صلى الله عليه وسلم: "*Hindi ipinahintulot sa sinumang babaing naniniwala sa Allah at sa kabilang buhay ang paglalakbay na ang layo ay aabot ng isang araw at isang gabi maliban kung may kasamang Mahram*".⁽¹⁾ Ang tinatawag na Mahram ng isang babae ay ang kanyang asawa o sinumang lalaki na bawal maging asawa para sa kanya magpakailanman tulad ng kanyang tatay, kapatid, tiyuhin sa ama at sa ina, anak, mga pamangkin at anak na lalaki ng kanyang asawa sa ibang asawang babae.

Ang babae ay hindi inutusang magsagawa ng Hajj at 'Umrah kapag walang Mahram at hindi kinakailangang magsagawa ng Hajj at 'Umrah para sa kanyang pangalan ang ibang tao kahit siya ay may kakayanang pinansyal.

2. Kapag ang babae ay may abilidad na pisikal at pinansyal na makapag-Hajj ngunit walang Mahram, at wala ng pag-asa na magkaroon ng Mahram sa hinaharap, maaari siyang kumuha ng ibang tao at babayaran upang magsagawa ng Hajj para sa kanya.
3. Pinahihintulutan ang babaing mayroong Haydh (regla) o may Nifas (pagdurugo sanhi ng panganganak) na pumasok sa sagradong kalagayan ng ihram para sa Hajj at 'Umrah. Sunnah para sa kanya na maligo bago mag-ihram.
4. Maaaring magsuot ang babae ng kahit anong uri ng damit na kanyang naisin kung ito ay nakakatakip sa kanyang katawan. Hindi maaaring magsuot ng Niqab at guwantes, at dapat nakabukas ang kanyang mukha kapag walang kahalubilong mga kalalakhian na hindi niya Mahram, tulad ng Hadith ni A'ishah رضي الله عنها: "*Kami ay naka-Ihram kasama ang Propeta صلى الله عليه وسلم kapag dumaraan sa amin ang grupo ng mga kalalakhian nakasakay ay ibinababa namin ang takip sa aming mukha, kapag nakalampas na sila ay binubuksan namin ang aming mukha*".⁽²⁾
5. Ang babaing mayroong Haydh o Nifas kapag natapos ng magsagawa ng Tawaf Al-Ifadah ay hindi na kailangang magsagawa ng Tawaf Al-Wida' kapag lalabas ng Makkah bago matapos ang kanyang Haydh o Nifas.
6. Hindi kabilang sa Sunnah para sa babae ang Raml sa Tawaf (paglakad ng mabilis at magkakalapit ang pagyapak) at pagtakbo sa pagitan ng berdeng ilaw sa Sa'ee sa Safa at Marwah. Ito ay para lamang sa mga kalalakhian.
7. Hindi maaaring magpakalbo ang babae, bagkus sapat na sa kanila ang pagputol ng kasing haba ng dulo ng daliri sa kanilang buhok.
8. Hindi kabilang sa Sunnah para sa babae ang malakas na boses para sa Talbiyyah, Takbeer at mga Thikr, bagkus siya lamang ang dapat makakarinig at hindi ng mga kalalakhian.
9. Pinahihintulutan ang mga babae na lumabas ng Muzdalifah patungong Mina pagkalipas ng hating-gabi.

(1) Isinalaysay ni Bukhari at Muslim

(2) Isinalaysay ni Abu Dawood at Ahmad



Nakasulat na Pagsasanay

1. Buuin ang mga sumusunod:

- Ang *Fidyah* ay:
- Ang *Muhsar* ay:
- Ang dapat bayaran para *Muhsar* ay:
- Ang pagpasok sa *ihram* sa Meeqat para sa sinuman ang nais magsagawa ng *Hajj* o *'Umrah* ay: ang *kaffarah* ng sinumang nakalampas dito ng walang *ihram* ay:

2: Ipaliwag ang *Kaffarah* (kabayaran) ng mga sumusunod:

- Nagputol ng buhok habang nasa kalagayan ng *ihram*:
- Nakipagtalik sa asawa bago ang unang pagtanggap ng *ihram*:
.....
.....
- Nakalampas ng *Meeqat* ng walang *ihram*:
- Pagbato ng *Jamarat* pagkalipas lumubog ang araw:
- Hindi namalagi sa Muzdalifah sa gabi ng Ika-10:
- Hindi nagpalipas ng gabi sa Mina sa mga araw ng *Tashreeq*:
- Ang isang *Muhsar* na hindi naipagpatuloy ang kanyang *Hajj* ay kinakailangang:
.....
.....

3. Kasama sa mga alituntunin na para lamang sa mga kababaihan ay:

-
.....
-
.....
-
.....
-
.....
-
.....

Mga Bagong Salita at Termino

Nu.	Arabe	Pagsasatitik	Kahulugan
1	محظورات	Mah <u>h</u> dhoorat	Mga ipinagbabawal
2	نقاب	Niqab	Takip sa mukha
3	قفاز	Quffaz	Guwantes
4	خمار	Khimar	Damit na nakabalot sa ulo ng babae (tabing)
5	فدية	Fidyah	Ransom
6	تخير	Takhyir	Pagpipilian
7	ترتيب	Tarteeb	Kaayusan; Pagkakasunod-sunod
8	محصر	Mu <u>h</u> -sar	Napigilan
9	كفارة	Kaffarah	Pagbabayad-sala
10	توبة	Tawbah	Pagbabalik-loob

"Sabihin mo, O Muhammad: Katotohanan ang aking Salah, ang aking Sakripisyo, ang aking buhay at ang aking kamatayan ay para sa Allah, ang Panginoon ng lahat ng mga nilikha. Wala Siyang katambal. At iyan ay ipinag-utos sa akin, at ako ang una sa hanay ng mga Muslim." ⁽¹⁾

Yunit ng Buhay ng Muslim



(1) Surah Al-An'am 8:162-163

Talaan ng mga Nilalaman

Pahina	Mga Paksa
162	Unang aralin: Ang buhay ng isang Muslim
163	Ang buhay ng isang Muslim
163	Ang pagkain ng isang Muslim
166	Ang damit ng isang Muslim
167	Ang pang-ekonomiyang buhay ng isang Muslim
168	Ang buhay ng isang babaeng Muslim
170	Nakasulat na Pagsasanay
171	Mga Bagong Salita at Termino

Unang Aralin

Ang buhay ng isang Muslim

Itatagal:



Isang Oras



Mga Layunin:

Sa pagtatapos ng araling ito, magkakaroon ka ng kakayahan sa kakahintulutan ng Allah ﷻ na:

- Malaman ang mga alituntunin ng pagkain at inumin sa Islam.
- Malaman ang mga alituntunin ng mga pananamit sa Islam.
- Maunawaan ang pangkalahatang alituntunin tungkol sa transaksyong pinansyal sa Islam.
- Malaman ang ilang mga natatanging alituntunin para sa mga kababaihan muslim.



Kabuuan ng Aralin:

- Nakasulat na Aralin
- Nakasulat na Pagsasanay
- Mga Bagong Salita at Termino

Kinakailangang napag-aralan na:

- Pag-aaral ng lahat ng yunit ng kurikulum na ito.

Ang Buhay ng Muslim

Ang Islam ay kumpletong batas ng buhay. Ito ang nagsasaayos ng buhay ng isang Muslim sa lahat ng pang-relihiyon at makamundong aspeto ng buhay. Ito ang buhay na batay sa kaalaman at gawain sa pamamagitan ng gabay ng Qur'an at Sunnah ng Propeta ﷺ sa lahat ng bahagi ng buhay.

Malalaman natin ang mga katuruan at mga batas ng Islam na nagbibigay ng maayos na buhay para sa isang Muslim sa kanyang buhay-panglipunan, kabutihang asal at pangkabuhayan.

Ang Pagkain ng isang Muslim

Ang pangunahing prinsipyo tungkol sa pagkain at inumin ng isang Muslim ay ang lahat ng mga mabubuti ay maaaring kainin at inumin kapag ito ay hindi ipinagbawal sa batas ng Islam (*Shari'ah*) o kung ito ay hindi makakasama sa kanya. Katotohanan, ipinahintulot ng Allah ﷻ sa atin ang mga mabubuting pagkain at ipinagbawal ang mga masasama. Sinabi ng Allah ﷻ:

﴿ يَا أَيُّهَا الَّذِينَ ءَامَنُوا كُلُوا مِن طَيِّبَاتِ مَا رَزَقْنَاكُمْ وَأَشْكُرُوا لِلَّهِ إِن كُنتُمْ إِيَّاهُ تَعْبُدُونَ ﴾⁽¹⁾

“O kayong mga naniniwala, kumain kayo mula sa mga ipinahintulot na masasarap na pagkaing ipinagkaloob ng Allah sa inyo, at magpasalamat kayo sa Allah sa Kanyang mga dakilang biyaya, kung talagang sinasamba ninyo Siya na bukod-Tangi”.

Ipinaliwanag sa Banal na Qur'an kung ano ang ipinagbabawal kainin. Sinabi ng Allah ﷻ:

﴿ وَقَدْ فَصَّلَ لَكُمْ مَا حَرَّمَ عَلَيْكُمْ إِلَّا مَا اضْطُررْتُمْ إِلَيْهِ ﴾⁽²⁾

“Samantalang ipinahayag ng Allah ang lahat ng mga ipinagbabawal sa inyo, maliban kung kayo ay napilitan lamang dahil sa kagutuman ay ipinahintulot sa inyo sa ganitong pagkakataon”.

Dahil dito ay maaaring kumain at uminom ang isang Muslim ng kung anong naibigan niya sa lahat ng uri ng mga pagkain at inumin ngunit huwag mag-aksaya. Sinabi ng Allah ﷻ:

﴿ وَكُلُوا وَاشْرَبُوا وَلَا تُسْرِفُوا إِنَّهُ لَا يُحِبُّ الْمُسْرِفِينَ ﴾⁽³⁾

“At kumain kayo at uminom mula sa mga malilinis na ipinagkaloob ng Allah sa inyo, at huwag kayong magsayang sa pamamagitan ng pagiging mapag-aksaya. Katiyakan, ang Allah ay hindi Niya naiibigan ang mga mapag-aksaya”.

Hindi rin pinapahintulot ang paggamit ng mga kagamitan na gawa sa ginto at pilak sa pagkain at pag-inom.

(1) Surah Al-Baqarah 2:172

(2) Surah Al-An'am 6:119

(3) Surah Al-A'raf 7:31

Ang mga ipinagbabawal na pagkain sa Islam

Ipinagbabawal sa bawat Muslim ang mga sumusunod:

1. **Pagkain ng karne ng baboy o anumang nahaluan nito.** Lahat ng pagkain na nahaluan ng anumang bagay mula sa baboy ay kabilang sa *Haram* (bawal) tulad ng mga minatamis at biskwit na ginagamitan ng gelatin mula sa baboy.
2. **Pagkain ng namatay na hayop na hindi nakatay.** Hindi pinahihintulutan ang isang Muslim na kumain ng karne ng mga hayop sa kalupaan na namatay nang hindi nakatay, ito man ay namatay sa pamamagitan ng pagkakasakal o pagkakabangga o pagpalo o anumang ibang paraan, at hindi kinatay alinsunod sa kilalang pamamaraan ng Islam. Ang mga namatay sa dagat tulad ng mga isda at iba pang mga hayop sa dagat ay maaaring kainin. Isinalaysay ni Abu Hurairah رضي الله عنه nang itanong sa Propeta ﷺ tungkol sa pagsasagawa ng *wudhu'* gamit ang tubig dagat, sinabi niya: *"Ito ay tubig na malinis at dalisay at ipinahihintulot kainin ang mga namatay dito."*⁽¹⁾
3. **Ipinagbabawal kainin ang karne ng mga mandaragit na hayop at ibon.** Ang mga ito ay kumakain ng karne tulad ng Leon, Oso, Pusa, Aso at lahat ng mayroong pangil na ginagamit sa panghuhuli. Gayundin ang mga ibon na may talon (mahahabang kuko) na ginagamit sa panghuhuli tulad ng palkon, agila, uwak at lahat ng nabubuhay sa pamamagitan ng pagkain ng karne. Isinalaysay ni Ibnu Abbas رضي الله عنه: *"Ipinagbawal ng Propeta ang lahat ng may pangil mula sa mga hayop at lahat ng may pandagit mula sa mga ibon."*⁽²⁾
4. **Ipinagbabawal ang pagkain ng dugo** o paglalagay nito sa pagkain maliban sa atay at pali (eng. spleen). Sinabi ng Propeta ﷺ: *"Ipinahintulot sa atin kainin ang dalawang uri ng namatay na hindi nakatay, ang isda at balang. Ganoon din ang dalawang uri ng dugo, ito ay atay at pali."*⁽³⁾
5. **Ipinagbabawal kainin ang lahat ng nakasisira sa tao o magdudulot sa kanya ng kapahamakan,** tulad ng lason. Sinabi ng Allah ﷻ:

﴿ وَلَا تَقْتُلُوا أَنْفُسَكُمْ ﴾⁽⁴⁾

"At huwag ninyong patayin ang inyong mga sarili."

Ang lahat ng pagkain na napatunayang nakakasama ay *Muharram* (ipinagbabawal).

6. **Ipinagbabawal ang pagkain ng anumang hayop na madumi** (gaya ng mga ahas, alakdan, daga at mga insekto).

(1) binalaysay ng lima, (2) Al-Jama'ah
(3) Ahmad, (4) Surah An-Nisa' 4:29

Ang mga ipinagbabawal na inumin sa Islam

Ipinagbabawal sa isang Muslim ang pag-inom ng lahat ng nakalalasing at mga droga na nakapipinsala sa pag-iisip. Kabilang dito ang mga sumusunod:

1. Ipinagbabawal sa isang Muslim ang pag-inom ng alak o anumang inumin na nahaluan ng alak kahit ano pa man ang tawag dito.
2. Ipinagbabawal ang pag-inom ng lahat ng *khamr* (nakalalasing). Ito ay nakasisira ng pag-iisip, kahit pa hindi nakalalasing ang pag-inom ng kaunti nito.
3. Ipinagbabawal sa isang Muslim ang paggamit ng droga (narkotiko) at mga ipinagbabawal na gamot sa kahit anong paraan tulad ng tabletas, likido at iniksyon. Hindi rin ipinahihintulot ang mga ito na bilhin o ibenta o itaguyod kahit sa mga hindi Muslim.

Mga kagamitan na gawa sa ginto at pilak

Ang paggamit ng mga kagamitang pangkain at pang-inumin na gawa sa ginto at pilak ay ipinagbabawal para sa lahat ng Muslim, lalaki man o babae.



Ang damit ng isang Muslim

Kabilang sa kabutihang-loob ng Allah ﷻ para sa mga tao ay ang Kanyang pag-utos sa kanila ng pagsusuot ng kung ano ang kanilang naiibigang damit upang matakpan ang kanilang *Awrah* (maselang bahagi ng katawan) at magpapaganda sa kanila nang walang pag-aaksaya. Sinabi ng Allah ﷻ:

﴿ يَا بَنِي آدَمَ قَدْ أَنْزَلْنَا عَلَيْكُمْ لِبَاسًا يُؤَارِي سَوْآتِكُمْ وَرِيشًا وَلِبَاسُ التَّقْوَىٰ ذَٰلِكَ خَيْرٌ ﴾⁽¹⁾

“O mga angkan ni Adam, katiyakan, Lumikha Kami para sa inyo ng kasuotan na inyong itatakip sa inyong mga Awrah, at magsisilbi rin ito bilang palamuti sa inyong buhay. At ang kasuotan ng pagkatakot sa Allah ang siyang tunay na nakahihigit.”

Walang tiyak na limitasyon sa Islam tungkol sa uniporme o di-pangkaraniwan na damit, kung kaya ang isang Muslim ay malayang magsuot ng damit na kilala sa kanyang komunidad. Ang Islam ay naglagay ng ilang patakaran para sa isang Muslim sa kanyang pananamit, kabilang dito ang mga sumusunod:

1. Dapat natatakpan ang *Awrah*. Ang *Awrah* ay bahagi ng katawan kung saan nahihiya ang tao na may tamang pag-iisip kapag nakalitaw sa paningin ng iba.
2. Maging natatangi lamang para sa kasarian. Hindi isusuot ng lalaki ang damit para sa babae at hindi isusuot ng babae ang damit para lang sa lalaki, ayon sa kung ano ang kinikilala at tinatanggap sa kanyang komunidad.
3. Hindi katulad sa damit na pang-relihiyon ng hindi Muslim, tulad ng kasuotang damit ng mga pastor at mga monghe.
4. Hindi lalampas hanggang bukung-bukong ang damit, pantalon at *izaar* (balot pang-ibaba), para hindi mahatak sa lupa at marumihan.
5. Hindi magsusuot ng damit na mayroong larawan ng anumang may espiritu tulad ng tao at mga hayop.
6. Hindi maaaring magsuot ang mga kalalakihan ng ginto at sutla.
7. Ang pananamit ng babaing Muslimah kapag nasa harapan ng mga taong hindi *Mahram* sa kanya ay dapat matakpan ang kanyang buong katawan at hindi dapat naaninag (*eng. transparent*) ang katawan, o masikip na nakikita ang hubog ng katawan at lumilitaw kung ano ang itinatago.



(1) Surah Al-A'raf 7:26

Ang pang-ekonomiyang buhay ng Muslim

Ipinag-uutos ng Islam sa atin ang matuwid (ligal) na hanapbuhay upang matustusan ang ating pangangailangan at pangangailangan ng ating pamilya. Dapat magsumikap ang Muslim na hanapin ang kanyang biyaya at huwag aasa sa iba, at magkaroon ng ligal na hanapbuhay at gagastusin din sa ligal na paraan. Ang mga sumusunod ay mga pangkalahatang patakaran tungkol sa kinikita ng isang Muslim:

1. Dapat maging masigasig ang isang Muslim sa ligal na hanapbuhay. Huwag mag-ipon ng salapi na mula sa pagnanakaw o panunuhol o pang-aagaw at pandaraya upang makakuha ng kayamanan na labag sa batas dahil sinabi ng Allah ﷻ:

﴿ وَلَا تَأْكُلُوا أَمْوَالَكُمْ بَيْنَكُمْ بِالْبَاطِلِ ﴾⁽¹⁾

“At huwag kainin at angkinin ng ilan sa inyo ang kayamanan ng iba sa pamamagitan ng maling pamamaraan.”

2. Dapat umiwas ang isang Muslim sa pakikipagkalakal (pagbili, pagbenta o mamagitan sa bentahan at bilihan) ng mga ipinagbabawal sa Islam tulad ng alak, droga, ninakaw na bagay, baboy at anuman na nanggaling dito. Sinabi ng Propeta ﷺ: *“Katatohanan, kapag ipinagbawal ng Allah ang isang bagay ay ipinagbawal na rin ang halaga nito.”*⁽²⁾
3. Pag-iwas sa mga ipinagbabawal na transaksyon tulad ng *Riba* (interes), sa pamamagitan ng pagpapa-utang o pangungutang o di kaya pagtulung sa anumang gawain na may kinalaman sa *Riba*.

(1) Surah Al-Baqarah 2:188

(2) Isinalaysay nila Abu Dawood at Ibn Hibaan

Buhay ng Babaing Muslimah

Pinarangalan ng Islam ang mga kababaihan ng dakilang parangal. Ang karapatan ng ina sa kanyang mga anak ay higit kaysa karapatan ng ama, tulad ng sinabi ng Propeta ﷺ nang tanungin siya ng isang lalaki kung sino ang higit na may karapatan ng mabuting niyang pakikitungo, *sinabi niya: "Ang iyong ina". Nagsabi ang lalaki, "sino ang susunod"? Sinabi niya: "Ang iyong ina". Nagsabi ang lalaki, "sino ang susunod"? Sinabi niya: "Ang iyong ina". Nagsabi ang lalaki, "sino ang susunod"? Sinabi niya: "Ang iyong ama".*⁽¹⁾

Ipinag-utos din ang mabuting pakikitungo sa asawang babae. Sinabi ng Allah ﷻ:

﴿ وَعَاشِرُوهُنَّ بِالْمَعْرُوفِ ﴾⁽²⁾

"At ang karapat-dapat na pakikisama ninyo sa inyong mga asawa ay dahil sa pagmamahalan at pagbibigay sa kanila ng kanilang karapatan".

At sinabi ng Propeta ﷺ: *"Ang pinakamahasag sa inyo ay kung sino ang pinakamahasag sa kanyang pamilya."*⁽³⁾ Sinabi rin niya: *"Pakitunguhan ninyo ang mga kababaihan ng mabuti."*⁽⁴⁾ Garantisado ng Islam ang karapatan ng mga babae sa pagmamahala. Sila ay malaya sa pag-gastos ng kanilang sariling salapi, at walang may karapatan na kunin ito sa kanya maliban kung kanyang pahihintulutan at naisin.

Mayroong mga batas ang Islam na para lamang sa mga babae dahil sa likas nilang katangian. Kabilang sa mga ito ay ang mga sumusunod:

1. Umiwas sa pagsagawa ng Salah, pag-aayuno, pag-*Tawaf* at paghawak ng *Mus-haf* (Qur'an) na walang namamagitan sa panahon ng *Haydh* (regla) at *Nifas* (dugo sanhi ng panganganak).
2. Dapat matakpan ang lahat ng kanyang katawan maliban sa mukha at mga kamay kapag magsasagawa ng Salah. Hindi obligado para sa kanya ang pagsasagawa ng Salah ng *Jama'ah* (grupo), ngunit maaari siyang mag-Salah ng *Jama'ah* sa *Masjid* kasama ng iba pang mga kababaihan kung hindi ito mahirap para sa kanya.
3. Magsusuot ang babae ng kanyang ordinaryong damit ng *Ihram* para sa *Hajj* at *'Umrah*. Dapat na hindi matakpan ang mukha ng *Niqab* at mga kamay ng guwantes. Walang natatanging damit o kulay ng *Ihram* para sa babae. Ang mahalaga ay umiwas sa mga damit na mayroong mga palamuti, at hindi dapat natatakpan ang kanyang mukha kapag walang ibang lalaki na hindi *Mahram* para sa kanya.
4. Hindi pinapahintulutang maglakbay ang isang babaing Muslimah na walang kasamang lalaking *Mahram* para sa kanya kahit ito ay paglalakbay ng pagsamba tulad ng pagsasagawa ng *Hajj* at *'Umrah*.
5. Dapat magtakip (*Hijab*) ang babae sa sinumang lalaki na hindi *Mahram* para sa kanya ng tamang *Hijab*, at hindi lumalabas na nagpapabango at naglalagay ng mga palamuti na magbibigay pansin sa mga kalalakihan.

(1) Bukhari at Muslim

(2) Surah An-Nisa' 4:19

(3) At-Tirmithi at Ibn Majah

(4) Bukhari at Muslim

6. May karapatan ang babae ng pagtanggap o pagtangga sa sinumang magmungkahi ng kasal para sa kanya. Hindi maaaring ipilit sa kanya ang pag-aasawa sa lalaking hindi niya gusto, ngunit kapag isasagawa na ang kontrata ng kasal ay dapat mayroong *Walee* (Tagapangalaga, gaya ng ama) para sa kanya. Hindi maaring magpakasal ang isang babae na walang *Walee*.
7. Maaaring magsuot ng sutla at ginto ang mga kababaihan nang walang labis na paggastos, ngunit hindi ipinahihintulot ito sa mga kalalakhian.
8. Ang *iddah* (mga itinakdang araw ng paghihintay) ng babae ay magkakaiba ayon sa mga sumusunod na sitwasyon:
 - a. Ang *iddah* ng babaing namatay ang asawa ay apat na buwan at sampung araw, kung siya ay hindi nagdadalang-tao. Sinabi ng Allah ﷻ:

﴿وَالَّذِينَ يُتَوَفَّوْنَ مِنْكُمْ وَيَذَرُونَ أَزْوَاجًا يَتَرَبَّصْنَ بِأَنْفُسِهِنَّ أَرْبَعَةَ أَشْهُرٍ وَعَشْرًا﴾⁽¹⁾

"At yaong mga (lalaking) mamamatay na kabilang sa inyo at mag-iiwan ng mga asawa, sila (mga asawanag babae) ay dapat maghintay ng apat na buwan at sampung (araw)."

- b. Ang *iddah* ng babaing nagdadalang-tao ay matatapos sa oras ng kanyang panganganak. Sinabi ng Allah ﷻ:

﴿وَأُولَئِكَ الْأَحْمَالُ أَجَلُهُنَّ أَنْ يَضَعْنَ حَمْلَهُنَّ﴾⁽²⁾

"...at sa mga nagdadalang-tao, ang kanilang iddah ay hanggang sila ay manganak."

- c. Ang *iddah* ng isang babaing hiwalay sa asawa ay pagkatapos ng kanyang pangatlong regla. Pagkatapos ng pangatlong regla ay maari na siyang mag-asawa ulit. Sinabi ng Allah ﷻ:

﴿وَالْمُطَلَّاتُ يَتَرَبَّصْنَ بِأَنْفُسِهِنَّ ثَلَاثَةَ قُرُوءٍ﴾⁽³⁾

"Ang mga hiniwalayang babae ay mananatili sa paghihintay ng tatlong panahon (ng pagreregla)..."

- d. Ang babaing hindi na dinadatnan ng regla, ang kanyang *iddah* ay tatlong buwan. Sinabi ng Allah ﷻ:

﴿وَأُولَئِكَ يَتَبَوَّسْنَ مِنَ الْمَحِيضِ مِنْ نِسَائِكُمْ إِنْ أَرَبْتُمْ فَعِدَّتُهُنَّ ثَلَاثَةَ أَشْهُرٍ﴾⁽⁴⁾

"At sila na hindi na umaasa pa ng kanilang buwanang pagreregla mula sa inyong mga kababaihan—kung kayo ay nag-aalinlangan, magkagayon, ang kanilang iddah ay tatlong buwan..."

(1) Surah Al-Baqarah 2:234

(2) Surah At-Talaq 65:4

(3) Surah Al-Baqarah 2:228

(4) Surah At-Talaq 65:4



Nakasulat na Pagsasanay

1. Buuin ang mga sumusunod:

- a) Ang lahat ng mga pagkain ay ipinapahintulot para sa mga Muslim maliban sa:
..... at:
- b) Ipinagbawal sa Islam ang pagkain ng lahat ng may: mula sa mga hayop, at lahat ng may: mula sa mga ibon.
- c) Ang pagsusuot ng ginto at sutla para sa mga kalalakihan ay: at ang pagsusuot nito para sa mga kababaihan ay:
- d) Hindi ipinahihintulot sa babae habang nasa 'iddah ang:
- e) Ang 'iddah ng isang babaing namatay ang asawa ay:
- f) Ang 'iddah ng isang babaing nagdadalang-tao ay magtatapos kapag:
.....
- g) Ang 'iddah ng isang babae na hiwalay sa asawa ay:
- h) Ang 'iddah ng isang babae na hindi na dinadatnan ng regla ay:

2. Isulat ang ilan sa mga batas na para lamang sa mga kababaihan:

- a)
- b)
- c)
- d)

3. Ano ang batas ng Islam para sa alak at droga? At ano ang batas ng pagbebenta nito sa hindi mga Muslim?

.....

.....

.....

4. Ano-ano ang mga kondisyon sa pananamit ng isang Muslim:

.....

.....

.....

5. Ipaliwanag ang alituntunin ng paggamit ng ginto at pilak ng mga babae at lalaki sa mga sumusunod:

- a. Kagamitang pangkusina para sa pagkain at inumin:
- b. Pagdadamit at pagpapaganda:

Mga Bagong Salita at Termino

Nu.	Arabiko	Pagsasatitik	Kahulugan
1	شراب	Sharaab	Inumin
2	عبادات	Ibaadah	Pagsamba
3	معاملات	Mu'aamalaat	Mga transaksyon
4	اسراف	Usraaf	Pagsasayang
5	الربا	Riba	Patubuan
6	المتوفى	Mutawaffa	Namatay
7	حامل	Haamil	Buntis
8	عدة	Idda	Panahon ng paghihintay ng babae pagkatapos ng hiwalayan o pagkamatay ng asawa.
9	مطلقة	Mutlaqah	Diborsyada
10	مخدرات	Mukhaddiraat	Droga

Talaan ng mga Nilalaman para sa Ikalawang Baytang

MGA PAKSA	PAHINA	MGA PAKSA	PAHINA
Mula sa Qur'an	3	Ang Pamamaraan ng Ghusi	55
Mula sa Hadeth	4	Mga Usapin para lamang sa Taharah ng mga Babae	56
Pambungad	5	Nakasulat na Pagsasanay	58
Yunit ng 'Aqeedah	6	Mga Bagong Salita at Termino	59
Talaan ng mga Nilalaman	7	Yunit ng Salah (Pagdarasal)	60
Unang aralin: Ang mga Haligi ng Imaan (Paniniwala sa Allah - Paniniwala sa mga Anghel - Paniniwala sa mga Aklat)	8	Talaan ng mga Nilalaman	61
Ang Mga Haligi ng Imaan	9	Unang Aralin: Ang Boluntaryong Salah	62
Una: Paniniwala sa Allah (Ang Katas-taasan)	10	Ang Boluntaryong Salah	63
Pangalawa: Paniniwala sa mga Anghel	12	Ang mga oras na ipinagbabawal ang pagsalah	64
Pangatlo: Paniniwala sa mga Aklat	14	Nakasulat na Pagsasanay	65
Nakasulat na Pagsasanay	16	Mga Bagong Salita at Termino	66
Mga Bagong Salita at Termino	18	Pangalawang Aralin: Ang Salatul-Jama'ah (Sama-samang Pagsasalah)	68
Pangalawang aralin: Ang mga haligi ng Imaan (Paniniwala sa mga Sugo ng Allah)	20	Ang Alituntunin ng Sama-samang pagsalah	69
Mga Haligi ng Imaan (ipinagpatuloy sa nakaraang aralin)	21	Ang Adhan (Pagtawag sa Salah) at Iqamah (Pagtawag sa pag-uumpisa ng Salah)	70
Pang-apat: Paniniwala sa Mga Sugo Allah	22	Ang Kabutihang-asal sa Pagpunta sa Salah	71
Ang Buhay ni Propeta Muhammad ﷺ	24	Nakasulat na Pagsasanay	72
Ang mga Natatanging Katangian ni Propeta Muhammad ﷺ	26	Ginagawang Pagsasanay	72
Nakasulat na Pagsasanay	27	Mga Bagong Salita at Termino	73
Mga Bagong Salita at Termino	28	Ikatlong Aralin: Ang mga alituntunin sa pagbabayad ng Salah at ang Sahwu (pagkalimot)	74
Ikatlong Aralin: Ang Mga Haligi ng Imaan (Paniniwala sa Huling Araw - Paniniwala sa Al-Qadr)	30	Mga alituntunin para sa nahuli sa Salatul-Jama'ah (sama-sama)	75
Panglima: Paniniwala sa Huling Araw	31	Mga alituntunin ng Sujood Sahwu (Pagpapatrapa ng Pagkalimot)	76
Pang-anim: Ang Paniniwala sa Al-Qadr, Mabul man o Mesama	34	Ang pamamaraan ng Sujood Sahwu (Pagpapatrapa ng Pagkalimot)	78
Nakasulat na Pagsasanay	36	Ang Sujood Tilawah (Pagpapatrapa dahil sa pagbigkas ng Qur'an)	79
Mga Bagong Salita at Termino	37	Ang Du'a ng Qunoot (Panalangin)	80
Pang-Apat na aralin: Shirk (Ang pagtatambal)	38	Nakasulat na Pagsasanay	81
Ang Kahulugan ng Shirk	39	Ginagawang Pagsasanay	82
Mga Anyo ng Shirk	39	Mga Bagong Salita at Termino	82
Mga Uri ng Shirk	40	Pang-apat na Aralin: Ang Salah ng Jumu'ah at ng Dalawang Eid	84
Nakasulat na Pagsasanay	42	Ang Salatul-Jumu'ah (Salah sa Araw ng Biyernes)	85
Mga Bagong Salita at Termino	43	Ang Salah ng Eid (Salah ng Pagdiriwang)	87
Yunit ng Taharah	44	Ang Salah ng Janazah (Panalangin para sa petay)	88
Talaan ng mga Nilalaman	45	Ang Salah ng Naglalakbay (Musafir)	89
Ang unang aralin: Pagpupunas ng Khuf o medyas at ang Tayammum	46	Ang Salah ng Miysakit (Mareedh)	90
Pagpupunas ng medyas (Khuf)	47	Nakasulat na Pagsasanay	91
Ang Tayammum	48	Ginagawang Pagsasanay	92
Mga usapin tungkol sa Tayammum	49	Mga Bagong Salita at Termino	93
Nakasulat na Pagsasanay	50	Yunit ng Athkaarus-Salah (Ang mga binibigkas sa Salah)	94
Ginagawang Pagsasanay	51	Talaan ng mga Nilalaman	95
Mga Bagong Salita at Termino	51	Unang Aralin: Ang Al-Fatihah (Ang Pambungad na Kabanata)	96
Pangalawang Aralin: Ang Ghusi (Ritual na Palligo)	52	Surah Al-Fatihah	97
Ang Ghusi (Ritual na Palligo)	53	Ang kahalagahan at kabuthan ng Surat Al-Fatihah	98
Ang mga Obligadong Ghusi	54	Paano magasimulang basahin ang Banal na Quran	98
		Nakasulat na Pagsasanay	100

Talaan ng mga Nilalaman para sa Ikalawang Baytang

MGA PAKSA	PAHINA	MGA PAKSA	PAHINA
Ginagawang Pagsasanay	100	Ang mga Boluntaryong Pag-ayuno	136
Mga Bagong Salita at Termino	101	Papaano mababayaran ang mga araw na hindi nakapag-ayuno?	137
Pangalawang Aralin: Surat Al-Ikhlās at ang Muawwidatayn	102	Mga karaniwang tanong tungkol sa Ramadan at pag-ayuno	138
Surah Al-Ikhlās (Kabanata ng Katapatan)	103	Nakasulat na Pagsasanay	140
Surah Al-Falaq (Kabanata ng Bukang Liwayway)	104	Mga Bagong Salita at Termino	141
Surah An-Nas (Kabanata ng Sangkatauhan)	105	Yunit ng Hajj at 'Umrah	142
Ang kabuluhan ng Surat Al-Ikhlās at Al-Mu'adhlin	106	Talaan ng mga Nilalaman	143
Nakasulat na Pagsasanay	107	Ang unang aralin: Ang mga haligi ng Hajj at 'Umrah	144
Ginagawang Pagsasanay	107	Ang mga haligi ng Hajj at 'Umrah	145
Mga Bagong Salita at Termino	108	Ang mga haligi (rukn) ng 'Umrah	145
Yunit ng Zakah (Kawanggawa)	110	Ang mga obligado (wajib) sa 'Umrah	145
Talaan ng mga Nilalaman	111	Ang mga haligi (rukn) ng Hajj	146
Unang Aralin: Ang Mga Ari-arian na Dapat Kuhanan ng Zakah	112	Ang mga obligado (wajib) ng Hajj	146
Ang Mga Ari-arian na Dapat Kuhanan ng Zakah	113	Ang mga Sunnah ng Hajj at 'Umrah	147
Nakasulat na Pagsasanay	115	Nakasulat na Pagsasanay	151
Mga Bagong Salita at Termino	116	Mga Bagong Salita at Termino	152
Pangalawang Aralin: Ang Mga Tatanggap ng Zakah	118	Pangalawang Aralin: Ang mga Alituntunin ng Fidyah (multa) ng Hajj at 'Umrah	154
Ang Mga Tatanggap ng Zakah	119	Ang mga alituntunin ng pagbabayad ng Fidyah (multa) para sa Hajj at 'Umrah	155
Ilang Usapin Tungkol sa Zakah	120	Mga usapin tungkol sa Hajj at 'Umrah para sa mga babae	157
Nakasulat na Pagsasanay	121	Nakasulat na Pagsasanay	158
Mga Bagong Salita at Termino	122	Mga Bagong Salita at Termino	159
Yunit ng Siyam (Pag-ayuno)	124	Yunit ng Buhay ng Muslim	160
Talaan ng mga Nilalaman	125	Talaan ng mga Nilalaman	161
Unang aralin: Ang pinagpalang buwan ng Ramadan	126	Unang aralin: Ang buhay ng isang Muslim	162
Ang Kabuluhan ng Buwan ng Ramadhan	127	Ang buhay ng isang Muslim	163
Ang Kabuluhan ng pagsasagawa ng mabuting gawain sa buwan ng Ramadhan	128	Ang pagkain ng isang Muslim	163
Sino ang pinahihintulatang putulin ang pag-ayuno sa buwan ng Ramadhan?	130	Ang damit ng isang Muslim	166
Nakasulat na Pagsasanay	131	Ang pang-ekonomiyang buhay ng isang Muslim	167
Mga Bagong Salita at Termino	132	Ang buhay ng isang babaeng Muslim	168
Pangalawang aralin: Ang Mga Sunnah ng Pag-ayuno at ang mga Boluntaryong Pag-ayuno	134	Nakasulat na Pagsasanay	170
Ang Mga Sunnah at mabubuting-asal ng pag-ayuno	135	Mga Bagong Salita at Termino	171

Aqeedah



Ang Tahaarah



Ang Salah



Athkaarus-Salah



Ang Zakah



Ang Siyam



Hajj at 'Umrah



Buhay ng Muslim

